



BIBL. NAZ.
VITT. EMANUELE III

148

D

54

NAPOLI

1798.

Report of Gen. Moultrie — 1798.

HISTORIA ACCVRATA

DE

PHILIPPI
ANBLANCHTHONIS

VITÆ INGRESSV, PROGRESSV

ET EGRESSV,

ET

TOTVM VITÆ CVRRICVLVM

REVERENDISSIMI ET ILLVSTRISSIMI

PRINCIPIS

GEORGII

PRINCIPIS ANHALTINI ET ASCANIÆ &c.

PRÆPOSITI MAGDEBURGENSIS ET

MISENENSIS, SENIORIS CAPITVLI

MERSBVRGENSIS,

VT ET

HELII EOBIANI

HESSI,

COMPREHENDENS TRIFOLIVM

ILLIVS ÆTATIS

DOCTORVM ET ERVDITORVM

VIRORVM COMPOSITA

AVCTORE

JOACHIMO CAMERARIO,

PABEPERGENSE.

LIPSIÆ,

ANNO MDCCXXIII.



21÷

JOACHIMI CAMERARII
PROOEMIUM

Ad Illustrissimum Principem ac Dominum,

DOMINVM PHILIPPVM,
LANDGRAFIVM HASSIAE,
PRINCIPEM CATTORVM&c.

S*Aepe & multum egerunt mecum amici, viuente adhuc & bene valente Philippo Melanchthone, ut, quæ de illius genere, vita, studiis, actionibus comperta haberem, literis mandare inciperem. Multa autem mihi nota esse arbitrabantur; quem & celeriter in eius familiaritatem peruenisse, quum ille primum sese in has regiones contulisset, & coniunctissime cum ipso vixisse scirent. Disputabant pertinere, me narrante potissimum cognosci illa, ad celebritatem necessitudinis nostræ; & hunc fructum capere utrumque constantissimi in vera amicitia usus, honestissimum simul atque iucundissimum videri. Sæpe literas mihi ab eo non aliter quam fratris nomine inscriptas legerant. Sæpe viderant quam amanter ipse me coram complecteretur, &*

PROOEMIUM.

de me absente sermones honorificæ inprimis mentionis auduerant. Quibus omnibus moti, & me nostræ amicitiae hanc operam dare, & aliorum cupiditati conciliare istam notitiam æquum esse existimabant. Ego vero, qui & gauderem opinione de nostra coniunctione aliorum singulari, & mihi huius copiam gratularer, non nolui quidem hanc descriptionem aggredi & istud opusculum absoluer; sed nescio quo pacto semper interuenit aliquid quo hic conatus impediretur, donec æterni Dei voluntate e medio sublatus est & migravit ex hac vita Philippus Melanchthon, cum ingente luctu & maximo dolore bonorum omnium, & occasionem mihi eripuit non modo gratificandi amicis, sed eiusmodi etiam expositionis edendæ, quæ ab ipso lecta & plenior & emendatior de eius admonitionibus diuulgari posset. Quum vero post casum mortis illius vehementer urgeremur, ut tandem huius scriptiois laborem susciperemus, iniecit moram partim animi in recente mœrore

PROOEMIUM.

rore perturbatio, partim, ut verum fatear,
 aliæ complures optimorum & doctissimorum
 virorum hoc argumento prolatae lucubra-
 tiones; inter quas, quum neque opus esse iam
 putarem studio in hac parte nostro, & illis
 legendis sæpe acquiescerem, bebetiores red-
 ditæ fuerunt cogitationes animi mei, inci-
 tatioque pristina resedit. Itaque anno toto
 vertenteres ea fuit dilata. Sed quum &
 amici subjicerent officii considerationem, &
 me recordatio consuetudinis suauissimæ no-
 stræ indies quasi interpellaret; sensi rur-
 sum paulatim instigari me & impelli ad
 hanc operam, si possem, nauandam, & tem-
 pore neglecto, quo ad fruendum nobis com-
 muniter ista elaborarentur, nunc quasi exe-
 quiarum hæc & funeris iusta non persolue-
 re amico, ne impietatis crimen subirem, ve-
 titus sum. Itaq; & officio meo & amicorum
 voluntati studui tandem satisfieri, ut ex-
 ungatur nomen, ne quid debeam. secundum
 Plautum. Neq; aliorum iam edita præcla-
 ra scripta me a proposito detertere par esse
 duxi,

PROOEMIUM.

duxi, ac potius veluti calcar hoc adhibitum mihi fuit. Quod enim illi fecissent ut testarentur affectionem erga mortuum suam, id me non facere indignum iudicabam. Quamuis autem eadem a me referrentur quæ illi commemorauissent, non tamen metui ne quis hoc reprehenderet; ac potius quum aliud quasi filum animaduertetur, diuersæ orationis varietatem delectatione non carituram esse speravi. Denique quæ alii tradidissent, ea meo quasi testimonio confirmari, & quæ reticuisissent, diligentia nostra explicari, neutiquam alienum visum est.

Venit autem mihi in mentem, hoc proæmio tuam, illustrissime Princeps PHILIPPUS, clementiam compellare, & tuæ pietati virtutique, & in rerum grauissimarum atque difficillimarum tractatione, forti, excelso, magno animo, veluti dedicare hæc composita a me de Philippo Melanctone: qui & nomen haberes cum illo commune, & viuum clementissimo fauore esses complexus, & multorum, quæ in isto scripto vel
enar-

PROOEMIUM.

enarrantur vel indicantur, testis & explicator esse posses. Scio etiam illustrissimæ Clementiæ tuæ iudicio atque sententia sæpe commendatum celebratumque singularem in modum Philippi studium in cognoscenda, & asserenda fortitudinem, & labores propaganda cœlestis veritatis & optimarum disciplinarum doctrina, & tuenda utraque sollicitæ probitatis integritatem, diligentiam, assiduitatem, fidem, & mortuo familiaris desiderii dolorisque acerbi tributum esse honorem. Statuente illustrissima consideratione tua, non ad suæ tantum patriæ utilitatem & decus fuisse natum Philippum Melanchthonē, sed ad Germaniæ eximium ornamentum productum uniuersæ. Memoratur aliorum aliis locis gloriosa procreatio; Germania autem nostra, inque ea illustrissimæ domus Palatinæ, vicinæ terris tuis & coniunctæ etiam affinitatis vinculo, Bretta vrbs alumno Philippo Melanchthone ad omnium hominum memoriam commendata celebrabitur, & quasi

PROOEMIUM.

& quasi in nitidissimo auro maximarum laudum aliarum, huius veluti gemmæ pulcherrima species enitebit: fama ortus & incunabulorum ipsius. Sane in hoc etiam genere & isto loco, quo Philippus Melancthon fuit, illa, quemadmodum Poëta fecit de Empedocle & Sicilia:

*Et si magna modis multis miranda videtur
Gentibus humanis regio, visendaque fertur
Rebus opima bonis multa munita virum vi:
Nil tamen hoc habuisse viro præclarius in se
Nec sanctum magis & mirum carumque videtur.*

Atque mihi est persuasum, illustrissimam Clementiam tuam iudicii sinceri & sententiæ incorruptæ gravitate, conservare benignitatis constantissimum favorem. erga communem ciuem, neque pati ut bona de eo existimatio labefactetur, & tueri famam absentis huius, quem præsentem abs tua illustrissima mansuetudine & maximifieri, & clementissima affectione diligere, est multis atque clarissimis signis declaratum.

Accidit autem huic id quod perpaucis, ut non quiesceret invidia & odium post mortem ipsius;

PROOEMIUM.

ipsius; ac potius ut magis tum quam prius illo viuente pasceretur, carpens atq; arro- dens optimi & innocentissimi deq; omnibus publice privatimque bene meriti sanctissi- mum nomen, & in hoc lacerando auram po- pularem colligens & applausum vulgi quæ-rens: nimirum qui tantum & talem virum insectari non dubitassent, ut ipsi aliquid fu-isse perhibeantur. In medio autem est huius sæculi mirifica vanitas in affectando scien- tiæ propria quandam & peculiarem fa- mam; quam ita demum quidam consecutu- ros se sperant, si aliorum simplicem & pla- nam doctrinam detorquendo & inuoluendo peruerterint. Deprehenditur hoc fieri in o- mnibus iis, quæ ingenii facultate & studii industria exponi solent, usque adeo ut nihil jam fere sine contentione & jurgiis atque certaminibus disputetur aut enarretur. Accedit summa inhumanitas, vel ut verius dicam immanitas, conuiciorum & maledi- clorum, & pertinacium in altercando rixa- rum; quæ nisi vsurpentur, neque autorita- tem

PROOEMIUM.

tem habere quicquam, neque conseruari libertatem plerique existimant. Quid dicam de impudentia ac sæuitia insolentiæ? Quæ leuissimis sæpe de rebus capitales inimicitias exercet & prælia ciet cruenta; quum pietatis & humanitatis lenitas atque verecundia, de veritate quoque, & in causis grauisimis, seueritatem illa quidem, ut decet, adhibeat, sed remouet iracundiæ atque odii importunitatem. Quæ intuens non possum non admodum timere, ne magna calamitas honestis & liberalibus studiis impendeat, euasura ad religiosæ etiam pietatis detrimenta. Nisi fortasse, id quod multo tristius est, ista quasi murmura antecedunt tempestatem extremæ barbariæ, qua inter verborum sententiarumque dissidia, excitationis etiam bellorum præliis, vna cum rebus spes quoque bona penitus extinguatur atque intereat. Sed de hoc fiat, quod æterno Deo visum fuerit, cuius misericordiam imploremus, ut propitius nobis reprimat iræ iustissimæ impetum, & clementer parcat veniamque

amque det tam stultitiæ peccatis quam improbitatis delictis.

Ad Philippum autem Melanchthonem quod attinet, haud scio an vel inprimis gloriosa sit huic maleuolorum contumeliosa obtractatio; quæ hoc profecto efficit, ut & personæ Philippum Melanchthonem reprebendentium, & res quæ notantur, & tractationis futilitas atque peruersitas, scurrilisque audacia atque impudentia, eum, quem oppressum cupiunt, altius extollant, & cuius nomen infamare conantur, illius hoc reddant admirabilius atque illustrius. Non aliter quam de noctis tenebris & caligine, diei lucem atque splendorem eminere & magis conspici cernimus. Potuerunt Socratem calumnia accusationis lædere, & popularis leuitatis iudicio condemnare, Anytus, Melitus & Lycon; sed sapientiæ virtutisque existimationem tantum abest ut diminuerint, ut aucta hæc accusatorum dedecus & ignominiam redundarit sempiternam. Nihil tale aggressum est ignauum odium & cum formidine coniuncta inuidia, ne-

que

PROOEMIUM.

que omnino struere machinarique valuit in
Philippum Melanchthonem viuentem. Nunc
exultat importuna temeritas, & excurrit
vanissima jactatio. huius & illius, qui, vt
Græcorum vulgus Hectoris interfecti cor-
pus fortiter confixerunt, quemadmodum
cecinit Homerus, telis suis; sic mortui Phi-
lippi Melanchthonis nomen ignominiis &
probris appetunt. Equibus vnus cæteris fe-
rocior glorioso voto optat adhuc supersti-
tem esse Philippum Melanchthonem, vt in
eo scilicet vim ingenii & doctrinæ copiam
experiri liceat. At hic si vultum isti nuga-
tori suum ostendat reuersus, profecto ipsi &
gregalibus atque sociis ad pedes statim ani-
mus delabatur, & in fuga

per aperta citatis

Atria, quamuis lata domus arcta ostia fiant,
quemadmodum ait apud eundem Poetam
adhuc ignotus procis Ulysses. Alter turbulen-
tiæ istius & seditiosæ catervæ & ipse signi-
fer, delicatus scurra, tanquã Thersites, stu-
dio sibi habet laceßere maledictis summos &
maximos viros: qui nescio quos funestos ca-
piti quidem ille suo cantus effutire fertur,
sic

PROOEMIUM.

sic effundens furiosas verborum spurcorum nugas, ut aliquos dicatur reperire qui ipsum audiant, & voce eius etiam permulceantur, quamvis hoc deterius non

*ille sonet, quo mordetur gallina marito, tum quidem quum immaturi & absoni modi ab intorto gutture eliduntur. Adiunxit se his pietatis & humanitatis omnis manifestus hostis, transfuga quidam, qui talia iam scripta edidit, qualia si non dico probare sed omnino ferre possunt promulgari, illi ipsi, quibus impudens os istud turpissime assentatur, sane miror. Hi inter se discordantes, in oppugnando tamen nomine & conuel-
lenda opinione doctrinae Philippi Melanchthonis iam conspirant, & hanc quasi in medio positam palmam habent, ut confidentissime & insolentissime in-
webantur in viri, pietate, virtute, sapientia, humanitate, integritate, fide prestantissimi famam, & eius, qui de*

)(

PROOEMIUM.

ipsis non modo optime est meritus, sed sine cuius benignitate atque beneficentia ipsis obscuris & ignotis delitescendum, & famelicis atque nudis esuriendum & algendum fuisset. Verum etsi indignitas facinorum istorum tanta est, ut a potentia quoque pia atque religiosa, & de salute patrie sollicita, animaduertenda sit; futilitas tamen ineptiarum tam friuola est, ut, quod quidem ad Philippum Melanchthonem attinet, istiusmodi βωμολοχίαι contemnendæ simpliciter neque omnino curandæ esse videantur. Nisi putamus eruditissimi viri Theophrasti causa moueri aliquem debuisse, quod contra illum meretricula quadam Leontium, ut accepimus, nescio quid libri scripsisset & emisisset. Nam virus istud maledicentie nefaria non nocet profecto Philippo Melanchthoni, quum sibi auctores huius ipsis, non illi, fœdisimas notas inurant ignomi-

PROOEMIUM.

*nia & infamia, quas nulla unquam dies eluere poterit, quæque hærebunt in ipsorum memoria, si qua forte ad posteritatem propagabitur, perpetuo. Quos vel debita & salutari in pœnitendo perturbationi, vel ultatricibus sce-
rum pœnis relinquentes, ita perga-
mus, & id agamus quod institui-
mus.*

*Et tuæ quidem, illustrissime Prin-
ceps, clementissima pietati & sapientiæ,
ut spero inprimis, sed & aliis compluri-
bus, gratam acceptamque futuram
narrationem & quasi historiam expo-
namus; commemorantes ea, quæ de
Philippi Melanchthonis patria, paren-
tibus, genere, educatione, vita, mori-
bus, morte, partim ipsi nos præsentem
cognouimus, partim explorauimus, &
certo: veroque indicio comperimus.
Quibus si quædam aspergerentur quum
negotiorum tum personarum mentiones
huc pertinentes, vel non abhor en-*

PROOEMIUM.

*tes certe ab instituto opusculo, neque
hoc reprebendum, ac potius sententia
bonorum & non inhumanorum
omnium probatum iri, su-
mus arbitrati.*



ELEN-



ELENCHVS

principuorum argumentorum, quæ in
singulis capitibus enarrantur.

PHILIPPI MELANCHTHONIS
patria & parentes.

II. Magistri eius pueritia in schola Bret-
na & Phorcensi, ingenii eiusdem præstantia,
adules, literarum cupido, morum suauitas, do-
cilitas, moderata iracundia, pronuntiatio gra-
ua: Reuchlinus studia eius moderatur, nomen-
que Schwarzerd in Melanchthonis mutat ap-
pellationem.

III. Magistri eius in academia Heidelber-
ensi & Tubingensi. Prima laurea Heidelber-
ge, Magisterii dignitas Tubingæ ei collata. Eber-
ardi Ducis Wurtembergici, conditoris Academiæ
Tubingensis, amicus subditis. Philippi Melanch-
thonis ingens discendi ardor, cum primis erga
theologia studium amor, & assidua Bibliorum
lectio.

IV. Io. Naucleri Chronicon Philippus Me-
lanchthon Tubingæ recenset & auget. Io. Reuch-
linus, a Dominicanis & Coloniensibus monachis
(X) (X) 3 gra-

ELENCHVS CAPP.

grauiter vexatus, ab Vlrico Hutteno Equite & aliis amicis vindicatur, a Philippo Melanchthone etiam adiuuatur.

V. *Temporum istorum & hominum ratio peruersa, barbariem in studiis præ cultu eorum, & superstitionum impietatem præ veræ doctrinæ exorientis luce, retinere cupientium.*

VI. *Philosophi scissi in duas factiones, Reales & Nominales: posteriori adharens Philippus Melanchthon, amicitiam inter ambas partes conciliare studet.*

VII. *Philippus Melanchthon a Friderico III. Electore Sax. Wittenbergam anno 1518 per Io. Reuchlinum arceretur: in itinere Norimbergam & Lipsiam transit: Lipsiæ conuiuio academico excipitur.*

VIII. *Wittenbergam Philippus Melanchthon omni studiorum genere exornat; Croco & Mosellano in disciplinis & linguis tradendis felicior & elegantior.*

IX. *Philippi Melanchthonis cum Martino Luthero contracta amicitia, indeque enata arcta familiaritas & assidua consuetudo. Peruersa ratio doctrinæ & rei ecclesiasticæ isto tempore, ac necessaria eius reformatio.*

X. *Nulla reformationis culpa, nec isti imputande calamitates eam secuta, quas ipsi contraxerunt qui emendari agre ferebant. Colloquium*

quium Caroloſtadii & Lutheri cum Io. Eccio,
Lipſie anno 1519 habitum,

XI. Amicitia inter Philippum Melanchthonem & Ioachimmm Camerarium firmata occaſio.

XII. Matrimonium Philippi Melanchthonis cum Catharina Crappia, anno 1520 initum, cultumque per annos XXXVII, & ſuſcepti ex eo quatuor liberi, Philippus, Georgius, Anna & Magdalena. Coniugis Catharina probitas & beneficentia. Mariti comitas & humanitas.

XIII. Domeltica Philippi Melanchthonis vita ratio, & inſignis ac tantum non prodiga benignitas & erga ſtudioſos humanitas. Domeltici miniſtri Iohannis Sueui fides & dextertitas. Impudentia cuiusdam, in auferendis a Philippo Melanchthone veteribus nummis, benignitate eius abutentis.

XIV. Comitia Wormatienſia anno 1521 a Carolo V Ceſare habita, ad qua vt cauſſam diceret vocatus Lutherus. Exorta eo tempore Anabaptiſtarum ſecta: eorum dogmata: additiis Nicolaus Storch, Marcus Stubnerus, & Martinus Cellarius, poſtea Borrhaus dictus.

XV. Anabaptiſta a Mart. Luthero Wormatia 1522 reuerſo compeſcuntur.

XVI. Philippi Melanchthonis in docendo Wittenberge aſſiduitas & ſtudium.

ELENCHVS CAPP.

XVII. *Eius habitus corporis & animi: statura, forma, insomnia, incuria corporis, animus vehemens, comitas, candor, natura bonitas, mansuetudo, festiuitas, felicitas memoria, officiositas, liberalitas, pro amicis felicitudo, laborum tolerantia, verecundia, valetudo, morbi, victus, vestitus, vox, incessus, gestus.*

XVIII. *Eius studia, pietas, lingua Hebraica cognitio, mathematicarum disciplinarum cultus, astronomie amor. Bernhaldi Ziegleri & Casparis Borneri laus.*

XIX. *Philippus Melanchthon quam orationis & eloquentia rationem tenuerit, & quod genus dicendi sectatus sit: in sententiis, ἀπεκδοχῶς, exemplis, αἰτίαις, prorsus singularis; in originibus nominum inuestigandis felix; in expositionibus dilucidus & cautus.*

XX. *Eius diuinandi & presagiendi somniaque interpretandi facultas: physices & astrologie studium: chiromantices scientia quatenus ipsi probata.*

XXI. *Philippi Melanchthonis ingenium placidum, a rixis & contentionibus alienum; inde ipsum insectantium iniuria silentio vindicata.*

XXII. *Scripta eius ab aliis euulgata, non satis elaborata, sed quomodocunque excepta, quo loco sint habenda.*

XXIII.

ELENCHVS CAPP.

XXIII. *Constans eius cum Ioachimo Camerario amicitia & firma coniunctio.*

XXIV. *Mors, quæ ipsi contigit beata prorsus, ob temporum malignitatem opportuna atque exoptata censenda.*

XXV. *Philippi Melanchthonis iter in patriam, comitibus Wilh. Nefeno, Franc. Burcardo, Io. Silberbornero, & Ioach. Camerario. Petri Mosellani & Vlr. Hutteni mors, ac huius ingenii morumque character.*

XXVI. *Philippi Melanchthonis libera ad Card. Campegium responsio, & cum Philippo Hasfia Landgrafio colloquium in itinere.*

XXVII. *Wilh. Nefeni mors in vndis, eiusque presagia.*

XXVIII. *Henr. Zutphanienfis crudele ignis supplicium.*

XXIX. *Andrea Carolostadii turba. Seditiones rusticae.*

XXX. *Lutheri coniugium. Frid. rici III Electoris Sax. mors.*

XXXI. *Philippus Melanchthon Norimbergam accersitur ad deliberationem de ludo literarum ibi constituendo: primi in ea urbe doctrine magistri Ioach. Camerarius & Ioh. Schenerus: Sig. Gelenius Basilea eo se conferre recusat.*

XXXII. *A Comite Mansfeldensi Alberto legatio*

)((s

gatio

gationis Hispanica comes lectus Ioach. Camerarius: qua tamen legatione intermissa, is Norimbergam redit, eodemqun anno patrem amittit, de coniugio cum Anna Truchsessia de Gruensberg contrahendo consilia init, & fratris Hieronymi, ab Episcopo Bambergense capti, calamitate affligitur.

XXXIII. *Iohannes Elector Sax. belli, ob famam fœderis inter Pontificios sanciti ab Ottonne Paccio sparsam, exoriturum incendium restinguit. Visitatio Ecclesiarum Saxonicarum, & de ea Philippi Mel. editus libellus obtreçtationi expositus. Hic a Pontificiis, vt ad partes ipsorum discederet, per Io. Fabrum sollicitatus.*

XXXIV. *Conuentus Spirensis, ad dirimendas controuersias ecclesiasticas institutus: in eo adhibita a Philippo Melanchthone circumspectio probata.*

XXXV. *Periculum Simoni Gryneo intentatum, consilio Philippi Melanchthonis euitatur.*

XXXVI. *Protestantium nomen. Philippi Melanchthonis prudentia in dissidio religionis adhibita, ab obtreçtatoribus maledicis inique sugillata.*

XXXVII. *Conuentus Marpurgensis ab Hassia Landgrafio indictus. Caroli V sollicitudo*
de

ELENCHVS CAPP.

de inuestiganda veritate in controuersis religionis capitibus, eiusque impedimenta.

XXXVIII. *Comitia Augustana, inque iis edita Confessio fidei: in ea conscribenda Philippi Melanchthonis studium & prudentia.*

XXXIX. *Philippi Melanchthonis circumpectio, lenitas ac timiditas a multis iniuste reprehensa, & omnia ad conciliandam ei invidiam conquisita.*

XL. *Io. Cochlai & Frid. Staphyli erga Philippum Melanchthonem malignitas. Etsi is omnis erroris ac labis neutiquam censendus est fuisse expers.*

XLI. *Confessionis Augustanae apologia a Philippo Melanchthone scripta; qua quum frequenter ederetur, subinde dilucidior ab ipso fuit reddita.*

XLII. *Conciliatio Pontificiorum & Protestantium frustra tentata.*

XLIII. *Consilia de fœdere Protestantium in eundo. Decreti Augustani executio formidata. Inducie factæ.*

XLIV. *Iohannis Electoris Sax. mors. De oecumenica Synodo cogenda deliberationes ambiguae.*

XLV. *Cometa visi. Pestis Norica, & Norimbergensis schola clades. Henrici VIII Angliæ Regis*

ELENCHVS CAPP.

Regis diuortium, & a Pontifice Romano defectio. Ulrici Ducis Wurtembergici restitutio. Academia Tubingensis ordinatio.

XLVI. *A Britannia & Gallia Regibus Philippus Melanchthon expetitur. Viriusque Regis immanis crudelitas erga doctrinae verioris assertores. Academia Wittenbergensis Ienam translata ob pestem.*

XLVII. *In Gallia multi viui combusti, agere ferentibus id isto in regno prudentioribus. Wilhelmus Bellaius fauet Germanis ibi agentibus. Philippi Melanchthonis literae ad Io. Bellaium Langaeum Episcopum Parisinum. Barnabas Voraeus Philippum Melanchthonem sollicitat, ut secum in Galliam proficiscatur. Huius de itinere istoc ambigua consilia. Regis Galliae ad eum literae.*

XLVIII. *Consilium itineris Gallici Philippus Melanchthon abjicit, & datis ad Franciscum literis se excusat. Varia de omissa Gallica prosecutione iudicia. Flamma ante ades Philippi Melanchthonis de caelo cadere visa. In Britanniam iterum is accersitur, hypochondriacis doloribus vexatus.*

XLIX. *Philippi Melanchthonis iter in patriam & Tubingam, comite Iac. Milichio. De itinere isto diuersae sententiae.*

L. *Philippi Melanchthonis lapsus de scalis.*
Mors

ELENCHVS CAPP.

Mors Des. Erasmi Roteradami. Academia Tubingensis expositulatio cum Pontificiis super Cancellariatus academici munere, & Philippi Melanchthonis ea de re sententia.

LI. *Conuentus Smalcaldensis: in eo grauis Lutheri morbus.*

LII. *Calumniis maleuolorum & obtreſtationibus vexatus Philippus Melanchthon. Iacobi Sadoleti Card. epistola adeundem.*

LIII. *Cometa conſpectus. In Britanniam & Saxonia quidam proſecti, & Philippus Melanchthon eodem vt veniret inuitatus. Pontificii ipſi de emendando ſtatu ſuo ſoliciti ſunt. Principum quorundam conuentus Brunſuicenſis. Antinomorum dogmata a Luthero conſutata.*

LIV. *Epigrammatibus quibusdam a Simone Lemnio editis creata Philippo Melanchthoni moleſtia. Ioachimus Camerarius Wittenbergam proficiſcitur. Matthai Friderici, ſeu Irenai, miſerabile fatum.*

LV. *Philippi Melanchthonis iter cum Electore Sax. Ioh. Friderico ad comitia Francofurtensia. Liber ab eo ſcriptus. Mortuo Georgio Sax. Duci ſuccedens frater Henricus eccleſiaſticam rem aliter conſtituit. Seb. Munſteri mors, peſte domui ipſius illata a fratribus Geuderis. Ioachimus Camerarius in Academiam Lipſienſem*

ELENCHVS CAPP.

sem ad docendas literas vocatus. Philippi Melanchthonis vehemens morbus in itinere Haguenensi, ex animi dolore contractus, consolationibus Lutheri & cura Sturciada depulsus.

LVI. *Incendium Tubingense. Colloquium Wormatiense.*

LVII. *Comitia Ratisbonensia: ad qua Philippus Melanchthon proficiscens, curru deiectus, manum grauitè afflixit. Liber ibi prolatus, e quo is postea conflatus fuit, qui Interim dictus. Mors Sim. Grynai, Eobani Hesli, Wolfg. Capitonis & Iac. Bederoti. In Galliam iterum Philippus Melanchthon inuitatus. In Britannia crudeliter & inique gesta.*

LVIII. *Iulius Pflugius Episcopus Naumburgensis designatus, renitente Electore Sax. Io. Friderico, & in eius locum Nic. Amsdorffium substituente: qui postea tamen iterum decedere iussus fuit, surrogato Pflugio. Consilia moderata præstant violentis.*

LIX. *Hermanni, Comitis de Wida, Archiepiscopi & Electoris Coloniensis, studium & cupido reformationis ecclesiasticæ. Philippi Melanchthonis ad ipsum profectio.*

LX. *Mors Ludouici Electoris Palatini, Hier. Baumgartneri a latronibus capti calamitas, & liberatio.*

LXI. *Georgii Sabini demigratio in Borussiam*

ELENCHVS CAPP.

siam cum coniuge Anna, parenti Philippo Melanchthoni perquam ingrata. Sabini erga coniugem & socerum animus alienior. Mors coniugis in Borussia.

LXII. *Lutheri animus erga Philippum Melanchthonem concitatus, ob nimiam huius moderationem & lenitatem. Valerii Cordi & Corn. Sittardi mors.*

LXIII. *Atrocia de Euangelicis in Gallia supplicia sumta. Conuentus Wormatiensis & Ratisbonensis. Mors Georgii Helti & Hieronymi Camerarii. De vtroque horum lectu non indigna.*

LXIV. *Episcopatus Mersburgensis administratio Augusto Duci Sax. commissa, adiutore dato Georgio Principe Anhaltino. Michael Hellingus, dictus Episcopus Sidonius, suffraganeus Moguntinensis, susceptus & ad Episcopatum gerendum postulatus. Testimonium ordinationis Principis Georgii, a Philippo Melanchthone nomine omnium in vicinis Ecclesiis praesidentium scriptum.*

LXV. *Philippi Melanchthonis iter Ratisbonense intermissum, misfis eo aliis. De Synodo Tridenti congreganda rumores. Reginaldi Poli de cogenda ea consilium. Friderici Electoris Palatini de vera religione constituenda sollicitudo.*

LXVI.

ELENCHVS CAPP.

LXVI. *Transitio adea enarranda, qua post Lutheri obitum contigerunt, enatis difficilibus controuersis & afflictis temporibus.*

LXVII. *Martini Lutheri beata mors. Eius autoritas quousque trahenda.*

LXVIII. *Conuentus Ratisbonensis dissolutus, indignante Imperatore. Huius de bello Germania inferendo consilia. Philippi Melancthonis super perturbato rerum statu dolor. Io. Diazii nefanda cades, ab Alphonso fratre patrata. Hermanni Archiepiscopi & Electoris Coloniensis excommunicatio. Ducum Saxoniorum concordia minus firma.*

LXIX. *Philippi Melancthonis de Ecclesia autoritate liber, varia iudicia expertus. Auctoris in Narratione hac de vita Philippi Melancthonis, publici iuris facienda, ambiguitas.*

LXX. *Michaelis Comitis Wertheimensis, & Christophori Baronis a Limperg bona indoles, aduentus & studia in Lipsiensi academia. Ioannes Crato eiusque studia.*

LXXI. *Bellum Germanicum editis libellis, quibus suam qualibet pars causam defendebat, magis excitatum. Philippi Melancthonis consilia de modis, quibus istud posset restringi.*

LXXII. *Lipsia oppugnata a copiis Electoris Sax. Iohannis Friderici. Is ad Mulbergam captus in Caesaris potestatem peruenit, exercitu
eius*

ELENCHVS CAPP.

eius profligato. Prodigia tum visa. Dan. Stibari cum Philippo Melanchthone amicitia.

LXXIII. *Philippus Hassia Landgrafius Halensi carceri a Carolo V includitur. Philippus Melanchthon Serueta commoratur, & in his turbis, tanquam naus procellis ventorum & fluctibus maris, iactatur.*

LXXIV. *Imperator Norimbergam petit, erga omnes clemens & equus. Vitus Theodoricus arthriticis doloribus fractus moritur.*

LXXV. *In Ienensem academiam multi confluunt Wittenberga probi & mali. Io. Stigelii obitus. Philippus Norimberga ad suos Wittenbergam redit. Hermannus Archiepiscopus & Elector Coloniensis ditionibus suis exuitur. Plures veram doctrinam profitentes patria pulsi.*

LXXVI. *Mauritius Dux Sax. Electoratum adeptus conuentum Ordinum prouincialium Lipsie agit. Philippus Melanchthon se Wittenberga non patitur abstrahi. Augusta Vindelicorum Imperatori Carolo V nonnulla a Mauritio Electore in priuatis colloquiis promissa fuisse, religioni ueriori quæ aduersantur, falso curiosiores distulerunt. Tridentina Synodus Bononiæ translata, indignante Casare.*

LXXVII. *Casparis Borneri mors, Philippo Melanchthoui luctuosa.*

LXXVIII. *Liber Interim euulgatus. Hunc*

)()()

quod

ELENCHVS CAPP.

quodcum aliis nollet recipere & probare Philippus Melanchthon, in odium Caesaris & vite discrimen incurrit.

LXXIX. *Anna, Sabini coniugis, Melanchthonis filia, obitus, quem fortiter fert parent. Imperatoris Caroli V animi obstinatio in causa religionis. Inde Philippo Melanchthoni periculum & anxietas animi. Eum Mauritius Elector Sax. tuetur. Franc. Spiera desperans.*

LXXX. *Constantie urbis ab inuasionem Hispanica periculum. Thoma Blareri abstinentia a republica.*

LXXXI. *Philippus a patre Carolo V traditus Belgii prouincias accipit. Saecula erga Lutheranos in Gallia & Belgio. Magdeburgum in summo discrimine constituta. Camerarii prudens in religionis disfidis moderatio.*

LXXXII. *Matthia Garbitii laus ab humanitate & beneficentia. Matthia Flacii Illyrici turbulentum ingenium: primum Tubinga, dein Wittenberga, tandem Magdeburgi agit, socium nactus Nic. Gallum.*

LXXXIII. *Philippi Melanchthonis in calamitatibus publicis constantia, & aduersus calumnias & maledicta vesana Flacianorum obfirmatio. Horum erga Misnicos Theologos odium & contumelia, sicque Interimistarum & Adiaphoristarum nomina. Perniciosa*

ELENCHVS CAPP.

ciosa eorum in Ecclesia turbæ, nihil boni aut salutaris in doctrina afferentium.

LXXXIV. *Mauritii Electoris Sax. sollicitudo circa librum Augustanum vel recipiendum vel repudiandum.*

LXXXV. *Philippi Melanchthonis nomen, doctrina & existimatio multorum obtrectationibus petita.*

LXXXVI. *Andreas Osiander, Norimbergensis prius concionator, postea in Borussiam delatus, concitat turbas, & Philippum Melanchthonem contumeliis appetit. De factis, non de consiliis, narrationes contexenda; quum hac incerta sint, neque suspicionibus iudicandum de aliis.*

LXXXVII. *Casparis Crucigeri mors: eius laus.*

LXXXVIII. *Synodus oecumenica iterum Tridenti indicta. Martini Buceris mors.*

LXXXIX. *Martini Buceris patria, doctrina, functiones, ingenium moderatum, & in Angliam profectio.*

XC. *Philippi Melanchthonis Repetitio Augustanæ Confessionis, in Synodo Tridentina exhibenda, iussu Mauritii Electoris Sax. scripta: cui similem librum conscripserat Io. Brentius, Ducè Wurtenbergensi Christophoro perquam carus.*

ELENCHVS CAPP.

XCI. *Augustana Ecclesia & Schola doctores quidam iussu Antonii Perenotti Granuellani vrbe eieci. Decreti Casariani violentia, cognitionem de controuersis ecclesiasticis interturbans, improbat, & de pertinacia religionem violenter obtrudendi differitur.*

XCII. *Philippus Melanchthon a Mauritio Electore Saxonia, literis datis, ad Tridentinam Synodum mittitur: sed ad arma traductis negotiis, Norimbergam modo peruenit, indeque reuertitur.*

XCIII. *Pax inter Carolum V Imp. & Mauritium Electorem Sax. sancita. Huius copie in Pannoniam aduersus Turcas ducta. Christophori Carolouicii laus. Alberti Marchionis Brandenburgensis ad Gallicas partes a Casarianis defectio.*

XCIV. *Bern. Ziegleri mors, eiusque character ingenii & morum.*

XCV. *Pestis in Saxonia & Misnia. Bellum Franconicum ab Alberto Marchione Brandenburgensi concitatum.*

XCVI. *Mauritii Electoris Saxonia mors: eiusdem intrepidus & imperterritus animus. Aegranus conuentus.*

XCVII. *Erasmi Reinholdi, Eduardi VI Anglie Regis, Georgii Principis Anhaltini, & Iacobi Sturmii mors. Georgii anhaltini elogium.*

Ma-

ELENCHVS CAPP.

Maria Anglia Regina, fratri Eduardo succedens, ad Pontificias partes regnum perducit.

XCVIII. *In Borussia perturbatus rei ecclesiastica status. Georgii Sabini inde migratio. Conuentus Principum Naumburgensis, de pace stabilienda, & dirimendis litibus ecclesiasticis. Prodigia.*

XCIX. *Philippi Melanchthonis culta cum Iaxitio, Sig. Geloo, Lelio Socino, Franc. Dryandro, inprimis autem Huberto Langueto, amicitia: ac huius postremi laus.*

C. *Mors Electoris Iohannis Friderici. Eius laus vera, nec supra humanam tamen sortem euecta.*

CI. *Ad conuentum Augustanum Philippi Melanchthonis iter, quod parare iussus fuerat, omissum. Io. Moroni Card. laus: eius patris Hieronymi captiuitas. Danielis Stibari obitus.*

CII. *In Anglia & Gallia aduersus profectos sinceram religionem atrociter sauitum. Hugonis Latimeri & Thomae Crammeri in Anglia martyrium.*

CIII. *Philippi Melanchthonis iter Norimbergense, ad diiudicandas ab Andr. Osiandro motas controuersias.*

CIV. *Flacianorum improbitas, & quiduis confingendi ac quosuis probris infectandi proteruitia.*

CV.

ELENCHVS CAPP.

CV. Bonorum super istis turbis & dissensionibus dolor. E Bohemia multi ob professionem sincera doctrina exules. Iusti Iona mors.

CVI. Colloquium Wormatiense, in quo Philippus Melanchthon postremo cum Pontificiis est congressus. Eius progressionem Flaciani turbant, & magno cum Pontificiorum gaudio omnia miscent. De Mich. Sidonio Episcopo Mersburgense & Frid. Staphylo, ad Pontificias partes regresso, nonnulla.

CVII. Philippi Melanchthonis iter ad Otho-
nem Henricum Electorem Palatinum. Iac. Mic-
cylli mors. Philippi Melanchthonis coniugis Ca-
tharina, dum ipse domo abest, obitus.

CVIII. Colloquii Wormatiensis exitus. Phi-
lippus Melanchthon respondet criminationibus
Staphyli & Auii.

CIX. Iusti Menii & Io. Bugenhagii mors.

CX. Flacianorum iterata turba. Caroli V
Imp. obitus.

CXI. Cappadocis cuiusdam Cesariensis &
Demetrii, Diaconi Constantinopolitani, ad Phi-
lippum Melanchthonem aduentus.

CXII. Nic Gerbelii mors: eius fama ab au-
ctore Rhetorici libelli vehementer lesa.

CXIII. Philippi Melanchthonis beata &
placida mors, exequia, monumentum, mor-
bus.

CXIV.

ELENCHVS CAPP.

CXIV. *Post mortem Philippi Melanchthonis controuersia, ecclesiastica atrocius excitata & agitata; ea cum primis de sacra Cæna. Philippi Melanchthonis de hoc argumentolibet, ab aliis post mortem ipsius, non ab ipso, editus.*

CXV. *Aduersariorum Philippi Melanchthonis impudens peruersitas.*

CXVI. *Eorundem aperta improbitas, ipsum veteratorem appellantium.*

CXVII. *Eorundem malitiosa temeritas, ab aliis edita sub ipsius nomine scripta probris insectantium.*

CXVIII. *Eorundem inepta & praua reprehensio, si qua emendauit, correxit, aut explicauit in scriptis suis Philippus Melanchthon, criminantium.*

CXIX. *Eorundem impudens vanitas, fortuito dicta ab eo carpentium, & qua excusare debebant, quaque antea laudabant, & quibus assentiebant, reprehendentium & cauillantium.*

CXX. *Dehortatio a studio, famam nominis Melanchthoniani conuitiis in calumniatores reiectis tuendi, aut scurrilia aduersariorum scripta refellendi. Vnica ratio compescendi immanem istam scriptorum ferociam, prohibere ne liceat cuius suo arbitrio libellos disseminare.*

ELENCHVS CAPP.

*nare, Philippi Melanchthonis innocentia tu-
ta aduersus quosuis maleuolentium impetus.*

CXXI. *Philippi Melanchthonis laus & pra-
clare gestorum summa, breuiter exposita.*

CXXII. *Obtreſtatores ipsius, & doctrina
eius cauillatores coercendi.*

CXXIII. *Narrationis huius conclusio, qua
istius quam tenuerit rationem explicat.*



VITA



VITA PHILIPPI MELAN- CHTHONIS.

I.

PHILIPPVS MELAN-
CHTHON natus est in op-
pido nomine Bretta, qua par-
te territorium Palatinatus Rhe-
ni attingit fines agri Wirten-
bergenlis, solem orientem versus, sitque il-
lac iter a proficiscentibus ex Italia Galliaque
in loca Germaniæ, quæ quoniam ad ocea-
num sita sunt quasi decliuia, appellari solent
inferiora. Non est oppidum illud vel
ambitu amplum, vel extructionibus ma-
gnificum, vel exquisitis operibus mu-
nitum, sed situ peramœnum, & pro ca-
ptu Germanorum satis bene atque splendide
ædificatum, & tam firmum, vt bello Bauari-
co grauem Ducis Wirtenbergenlis oppugna-
tionem sustinuerit, & virtute præsidii defen-
sum sit, neque in potestatem hostium venerit.

A

Quin

Quinetiam eo tumultu quo plebs rustica atque vrba aduersus dominos suos arma cepit, quum seditiosi scirent, vndique multa in oppidum illud deportata conuectaque esse, potiendi ipso cupiditate nihil non conati aggressique sunt. Sed etiam tunc, tametsi ingens multitudo oppugnantium neque propinqua auxilii spes vlla esset, cum summa incolarum laude & oppidum Principi & bona dominis fuere conseruata. Ciuum opes sunt mediocres, & quæ parantur quum agricultura tum rebus negotiisque inter se aut cum vicinis contrahendis, non commerciis externis & ingentibus lucris quæstibusque singularibus faciendis. Incolæ incredibili humanitate præditi, & moribus ingeniisque sunt politis ac bonis. Migrauerat eo pater Philippi Georgius, ducta vxore, laudati & honorati illic viri Iohannis Reuteri, qui & præfecturæ oppidi munere aliquot annis functus est, filia Barbara. Fuit autem Georgii pater Nicolaus, qui Eytelbergæ sub arce domicilium habuit, & cuius ad vicinum facellum ibidem monumentum sepulcri nunc etiam visitur. Ipse Georgius & probitate, integritate, taciturnitateque & fide, etiam prudentia atque solertia, & quod admirabili artificio opera armorum elaborare sciret, quibus & defenderentur contra vim aduersariorum

in

in conflictu, & instruerentur ad hos percellendum sternendumque qui manum siue in acie cum hostibus, seu in ludis equestribus cum suis (quæ exercitationes tum in aulis Principum studiosissime frequentabantur) conferre vellent: harum igitur artium ille peritus, & iis virtutibus quas commemorauimus ornatus, in notitiam peruenit maximorum & potentissimorum Principum, iisque carius fuit; in quibus nominasse satis sit & Regem optimum & bellatorem inuictissimum Diuum Maximilianum Imperatoris Friderici filium. Quem Georgius aliquando cum glorioso prouocatore Italo, cui nomen Claudio Bataro, certamine singulari congressurum ita instruxit, & sic arma ipsius machinando parauit, vt fortissimo viro Maximiliano victoria certa facile etiam & celeriter contingeret. Claudius enim non diu repugnans, quum, quanto omnibus rebus esset inferior sentiens, ad pedes Maximiliani se abiecisset, ita in potestatem eius se tradidit. Sed paullo post orto pernicioso bello inter Palatinos & Bauaros cognatos Principes, quum Georgius patriæ suæ Principi Philippo operam officiumque quod debebat fideliter præstaret, imprimis machinarum tormentorumque ratione administranda, missus cum quibusdam Monhemium, in morbum incidit insanabilem;

lem; etsi Princeps in curando eo summum studium diligentiamque adhibuit; credebaturque puteo, unde aqua ad quotidianos usus haurienda fuerat, veneno infecto, malum hoc illis accidisse. Sane qui cum eo aduenerant intra vertentem annum omnes mortui fuere, Georgii vita remediis & exquisita curatione ad annum quartum producta. Decessitque tandem & ille, quum ante dies vndecim socerum amisisset, & ipse totum quadriennium vixisset perimbecillis. Cateram autem vitam sine querela omnium, & cum laude plurimorum, in primis religionis amans, & profana omnia dicta ac facta fugiens, & neque serio neque ioco verbis rebusque designans quicquam, quod vel minimam impietatis speciem haberet, aut propter leuitatem esset vituperandum, vel etiam a grauitate veritateque recederet. Ante omnia falsitatem mendaciaque & fraudes auersatus fuit, multa etiam pietatis studio & amore obseruans, quæ indicanda non putauimus, quod aliquorum opinione superstitiosa videri possent. Tunc Philippus habuit annos vndecim, quem susceptum ex filia, cum fratre vno Georgio minore annis non prorsus quatuor, & sororibus tribus, auus voluerat tam ipsum quam fratrem apud se educari. Mater vidua mansit annis totis duodecim, postea quum Philippum

pum duxisse vxorem audiisset, non sine quadam offensiuncula nupsit iterum, viro honestissimo ciui Brettano. Foemina fuit illa valde prudens atque pia, quam & nos vidimus in patriam proficiscentis Philippi comites an. Christi M.D.XXIV. & eam, quam diximus, esse perspeximus.

II. Quum in ludum publicum mitterentur pueri illi fratres vna cum auunculo & ipso puero, coepit tum lues foeda passim homines in Germania primum inuadere, & miserum in modum non solum excruciendo sed mutilando & membra depascendo affligere, quam Hispanicam nonnulli, plerique Gallicam nominabant. Quo malo. quum Magistrum ludi auus puerorum laborare rescuisset, contagionem metuens, nepotes cum filio domi apud se retinendos duxit, vbi matura ætate iuuenis opera primis literarum elementis curauit erudiendos. Nomen illius fuit Iohannes Hungarus, quem grauem annis vidimus Phorcæ, & audiuius præclare concionantem de Filio Dei Domino nostro Iesu Christo, & puram Euangelii doctrinam explicantem Principibus & populo frequenti, virum optimum atque integerrimum. Eminuit autem statim in Philippo præstantia ingenii, quod & celeriter perciperet atque comprehenderet quæ tradebantur, & fideliter meminisset, & liquido exponere

illa sciret. Utque fit in generosis animis, in puerili tum etiam ætate admodum quiescere non poterat, sed quærebat vbique aliquem cum quo de auditis disputaret. Ea erant nimirum præcepta artis Grammaticæ & initia sermonis Latini. Itaque & circuire & vestigare aduenas scholasticos, qui tum peregrinari consueuerant, & maxime gaudere si qui aduiores offerrentur, quos sæpe animaduersum fuit cum multorum admiratione & pudore eorum a puero Philippo mirifice exagitari. Itaque omnes de indole tali bonam spem conceperunt, & paullo post mortuo tam auo quam patre, paucorum vt diximus dierum intervallo, matris propinquo- rumque consilium ac voluntas in studiis piis & honestis educandi filium institutum aui persecuta est. Quanquam autem docilitas in Philippo tanta, quanta in nullo altero ostenderetur, & simul acris animi & mentis sagacis præclarissima signa perspicue cernerentur, & vis ingenii ingens tunc adeo appareret, nihilo tamen minus summa elucere suauitas, qua omnium facile fauorem sibi ille conciliabat, & declarabatur futurum, vt vehementior natura ipsius non ad austeram neque tristem seueritatem deferretur, sed ad grauitatem lenitate comitateque conditam euaderet: id quod euentus comprobauit. Nam
feruen-

feruentior incitatioque in eo animus immitis aut sæuus non fuit, quumque esset ad iracundiam pronior, nihil tamen fecit vnquam commotus quod insignem haberet deformitatem, aut omnino magnopere culpandum esset. Pronunciatio nonnihil balbutiens non modo tanquam praua colloquentibus molesta & iniucunda non fuit, sed puerilem loquacitatem visa etiam est decere. Quod vitium tamen procedente ætate attentione & cura sic emendauit, vt vix tenuissima illius vestigia, verba præsertim eo accurate faciente, apparerent atque deprehenderentur. Illis temporibus literarum ludus Phorcensis celebrari præ cæteris, cuius Magister esset Georgius Similerus patria Bimpinensis, qui habebatur & erat, pro illius ætatis captu, doctus & eruditus in primis. Iam enim plurimis in locis melius quam dudum pueritia institui, & doctrina in scholis vsurpari politior, quod & bonorum autorum scripta in manus sumerentur, & elementa quoque linguæ Græcæ alicubi proponerentur ad discendum, cum seniorum admiratione maxima & ardentissima cupiditate iuniorum, cuius vtriusque tum non tam iudicium quam nouitas causa fuit. Similerus, qui postea ex primario Grammatico eximius Iurisconsultus factus est, initio hanc doctrinam non vulgandam aliquanti-

sper arbitrabatur. Itaque Græcarum literarum scholam explicabat aliquot discipulis suis priuatim, quibus dabat hanc operam peculiarem, vt quos summopere diligeret. In omnibus autem Philippus Melanchthon ita proficere & eas facere progressiones, & ita se erga omnes communicatione eorum, quæ ipse percepisset & teneret, gerere, vt nemo non cum & laudaret & amaret. Habebat socios studii fratrem Georgium & Iohannem auunculum, quorum Georgius in hoc cursu non permansit, & in patria præcipuos honores ciuitatis suæ consecutus est & gessit. Quæ, quum hæc scribere instituissemus, ipsius maxime consilio opeque nitebatur, fungentis annis multis præfecturæ munere: Iohannes Spirensi collegio ad S. Crucem præfuit, quem ibi & nos aliquando vidimus, virum dignitate & humanitate excellentem. Viuebant hi apud sororem Iohannis Reuchlini, quod quadam cognationis necessitudine familiæ illæ coniungerentur. Eueniebatque sæpe vt Reuchlinus patriam & suos videret, qui in gubernatione terræ Wirtenbergensis tum vna cum aliis paucis auctoritatem summam atque grauissimam obtinebat. Solebat igitur in puerorum studia ille inquirere, & de iis, quæ sciret tradi eis in ludo, percontari. Longe autem Philippo omnibus responsionibus

nibus præcellente, Reuchlinus indolem pueri exosculatus, & spe singulari de illo concepta, libellos quosdam ei donauit; inter quos plenior præceptorum Grammaticæ Græcæ tractatus & liber fuit, comprehendens interpretationem Latinam præcipuorum Græcorum vocabulorum, quæ opera Lexica vocantur. Hac copia instrumenti auctus Philippus, ipse sese indies magis magisque incitare, & vtriusque sermonis Græci Latinique vberiore comparare facultatem: neque scribere tantum aliquid soluta oratione, sed tentare etiam versuum compositionem. Et oblatis aliquando factis a se quibusdam Reuchlino, per iocum donatus ab hoc fuit pileolo puniceo, quo insigni, vt fert consuetudo, Reuchlinus fuerat decoratus, quum titulus ei Doctoris decerneretur. Philippus vero lætus dono, & veluti generosus equus ornatu gaudens, prioribus semper aliquid adjicere, & cognitionem partam cumulare. Tunc & æqualibus suis scriptum quoddam ludicrum Reuchlini, instar Comœdiæ illis diebus editum, ediscendum distribuit, & suas cuique partes assignauit, vt coram Reuchlino ad se reuerso fabula ea ageretur. Quod etiam factum est cum summa ipsius voluptate atque lætitia. Quando & Philippi nomen, quod haberet ille familiæ, significans solum nigrum

Germanico sono, in Græcum *Melanchthonis* mutauit; sicut ipse a fumo deminutum suum, ita ab Hermolao Barbaro aliquando in Italia conuersum, *Capnionis* esse voluerat. Hunc conatum mutandi nomina familiarum, meminisse audire doctos & præstantes dignitate viros, qui reprehenderent, quod isto pacto familiarum notitia quasi obteri videretur. Sed sunt omnino quædam ita aspera & veluti horrida, vt lingua Græca Latinaue exprimi neque possint neque debeant, quæ si literis quibusdam vel adiectis vel detractis quasi dolare, vt læuiora fiant, aliquis velit, quemadmodum de barbaris omnibus fere fecerunt veteres, nihilo ille minus appellationem obscuram & suis ignotam hoc modo redditurus sit, quod a mutatione illa interpretationis nihil iam differet. Sed de his nunc disputare alienum fuerit.

III. Phorcæ (quam Latinis verbis contractis Portam Herciniæ esse eruditi volunt) Philippus pene annis duobus mansit. Et inde ad pleniorum ingenii cultum & quasi mercatum doctrinæ vberiorum cura matris ac propinquorum missus est Eytelbergam in patriam auitam, vbi & sedes Principum & celebris Academia esset. In qua doctissimorum virorum in omni genere disciplinarum copia florente, Philippus iam ætate ephebus statim eam de se opinionem com-

commouit, vt aliis quoque docendis idoneus haberetur. Ibique tum ille & exercendi stilum scribendique rationem suo exemplo suscitare, & studio industriaque admirabili quum sibi fauorem caritatemque omnium ordinum atque hominum conciliare, tum animos æqualium ad bonas literas artesque maiore assiduitate & diligentia colendas impellere. Vixit Philippus Eytelbergæ apud clarissimum illo loco & tempore virum D. Pallantem, cuius sapientiam virtutemque & excellentem humanitatem atque beneficentiam, cum perquam honorifica mentione eius, quotiescunque hæc incidisset, verbosè solebat prædicare, & ita vt facile appareret, memoria ipsum consuetudinis istius admodum delectari. Huius viri prudentissimi consiliis aula multis annis feliciter vsa, & ope Academia sustentata, ornata, aucta est; *Qui* obiit mortem anno Christi M. D. XII. XVI. Calend. Sextil. sepultus Eytelbergæ in vrbs primario templo, cum elogiis epitaphiorum vtriusque linguæ versibus perscriptorum, ex quibus Latinum distichum hoc inferendum putauimus:

Consilio pollens, largus rerum, ore disertò

Doctor erat Pallas, hæc tumulatus humo.

Dedit Philippus Melanchthon ibidem illis temporibus operam instituendis, duobus filiis

liis Comitis Ludouici Leonistenii generosæ
profapiæ & indolis pueris, & familiariter v-
sus est Petro Sturmio Argentoratensi, Iacobi
fratre, nobilitate generis, virtute & sapientia
clari, religiosæque pietatis amantissimi, Bim-
phelingi, quemadmodum accepimus, disci-
pulo. Eytelbergæ etiam Philippus quasi ti-
rocinitum quoddam deposuit scholasticum &
Bacularius est factus, quo nomine honorum
in Academiis initia appellantur, natus annos
ferme quatuordecim. Quum autem animi in
discendo impetus & honesta ambitio instiga-
ret eum, qui modo excessisset ex ephebis, vt
altius honoribus scholasticis ascendendum
putaret, & ad maiorem dignitatis gradum
contendendum, petendumque Magistri titu-
lum, aduersata tum voluntati ipsius sententia
fuit præcipuorum quorundam, quod ætati
istæ tribuendum tantum esse negarent. Quo
impedimento cursui cogitato moraque illa-
ta offensus, & quod tentationes febriles cre-
bro sentiret, locum & proposito suo & vale-
tudini aduersum relinquere statuit. Ea tem-
pestate Tubingensis Academiæ in Wirten-
bergenſi regione (quam Charitinarum ve-
tere nomine fuisse coniectura est) fama fie-
ri indies maior atque melior. Quæ optimi &
illustrissimi Principis Eberhardi, cognomen-
to Probi & Barbati, paterna cura præclarissi-
me

ne fundata & collectis viris doctrina varia
 præstantissimis, condita fuerat ante annos tri-
 ginta sex. De hoc Principe, quum eam rem-
 geret & Academiam Tubingæ collocare
 ellet, accepimus id quod & memorabile &
 non abhorrens ab hac narratione duximus
 referendum. Est sane Academiae institutio
 es magna & magnificianda, sed superiorum
 amen temporum de his existimatio multo
 ptima & præclarissima fuit. Interrogatus
 gitur tum a quodam externo Princeps Eber-
 ardus, cuius opera in eo quod perfici vole-
 at uti cogeretur: Quidnam regionis & ter-
 æ haberet, quod tanto ornamento dignum
 esse iudicaret? respondisse fertur: Cætera
 omnia esse mediocria, vel etiam infra me-
 locritatem, vno autem commodo atque
 uctu suæ regionis se merito gloriari; quod,
 a quamcunque partem illius solus forte ipse
 elatus, si acquiescere liberet, tuto & cum
 omni securitate in cuiusvis ex suis, qui ob-
 iam factus esset, sinum deponere caput &
 omnum capere posset. Idem audiui aliquan-
 o eundem dixisse in Principum quodam
 onfessu, quum alius alia suæ terræ bona ex-
 olleret narrando. Erant Tubingæ tunc The-
 logi, ut illis temporibus, eximii. Erant
 risconfulti, quorum nunc etiam nomina
 ustria & opera laudabilia in ore & mani-
 bus

bus sunt eorum, qui hæc studia tractant. Humaniorum autem studiorum & Philosophiæ professores eos semper habuisse Tubingam constat, quorum eruditionem & scientiam totam Germaniam excoluisse scimus. Ex quibus tunc, quum eo Philippus venit, viuentes & operam nauantes docendo, Iohannem Stofelerum & Franciscum Stadianum, quem & coluit & dilexit Philippus inprimis, & Henricum Bebelium, quem mortuum versibus epitaphiis Græcis Philippus ornauit, & Iohannem Brassicanum nominasse in præsentia satis habuimus. Quum autem natura atque voluntas Philippum ad commercium cum Musis, id est, bonis literis & erudita doctrina, incitaret, tanta tamen fuit in eo vis ingenii & ardor discendi, vt nullarum rerum cognitionem non attingendam atque comprehendendam putaret. Itaque & Theologos & Iurisconsultos & Medicos audire, & libros omnium professionum illarum inspicere, & vndique quandam scientiæ quasi possessionem occupare, & non tam laudem venari, quam vsum sibi fructumque cognitionis acquirere. Ad Theologiæ tamen studium maxime propensa esse cupiditas illius, quod religiosæ pietatis amore flagraret, sententia hac confirmata in puero paterna maternaque educatione atque disciplina. Theologiæ tum
mate-

ateria non sacræ literæ & scripturæ diuinæ
rant, sed quædam obscuræ & spinosæ intrica-
eque quæstiones. Quarum nugatoria sub-
litate exercebantur & defatigabantur inge-
ia. Philippus autem Melanchthon factus
onarum artium Magister, & primus, decla-
tis tum simul vndecim, renunciatus, quum il-
o etiam in genere tenui & aspero nulli non
modo qui pari ætate esset, sed ex prouectio-
bus quoque atque adeo senescentibus, ce-
eret, veritatem tamen quærere & amplecti
primis, & politiori doctrinæ operam dare.
nimaduvertebatur librum habere in mani-
us, in templo & inter operationem sacro-
um. Quum grandior quibusdam ille vide-
etur iis, quibus preces descriptæ continen-
ar, quique more in templis vsurpantur, ma-
uoli quidam rumusculos sparserunt, legere
hilippum nescio quæ scripta tempori & lo-
o illi non conuenientia. At ipse nactus fu-
at sacrorum Bibliorum codicem, tractabili
rma chartis minutioribus paullo ante pri-
um a Iohanne Frobenio Basileæ impressum;
uibus legendis quam tunc adeo cœpit, eam
onstantissime dare operam in tota sua vita
erseuerauit, & talem librum ad omnes con-
entus publicos postea detulit, secumque sem-
er habuit. Quumque adscriberentur ab eo in
artis passim vtilis & præclaræ sententiæ ve-
terum

terum, quæ ei illorum scripta legenti potissimum arrisissent, & nonnullis in locis explanationes quædam; quibus contigerat libros istos videre, ab his copia ipsorum maxima cupiditate expetebatur. Itaque quum esset Philippus natura liberalissimus & ad gratificandum cunctis quibus posset rebus proclivis, sæpe ablatos istos suos & donatos aliquibus libros comparatis aliis mutavit. Sed hæc postea acciderunt.

IV. Illis temporibus vir prudentia & Iuris publici scientia celebris colligere cœperat historias, & exponere temporâ rerum memorabilium gestarum ab origine prima mundi: ei nomen fecerant *Nacleri*, quod in familiæ nomine Germanici nautæ significatio esset, qui sunt vergæ. Librum autem hunc exprimendum susceperat Thomas Anshelmus, qui Typographicam officinam habebat Tubingæ. A quo perfectum fuit, ut & illius scripti, & aliorum quæ a se ederentur, curam respectumque Philippus susceperet, quo prodirent correctiora. Is tunc & in hoc opere Nacleri partim disponendo, partim augendo, partim etiam retexendo, id præstitit, ut lectio libri istius a plurimis expecteretur & fructu voluptateque non careret. Iisdem ferme annis, quibus Philippus Melancthon Tubingæ mansit, numero sex, luctatus est Iohannes Capnio cum monachis, a quibus

us propter sententiam dictam de libris
hebraicis grauisime vexabatur. Ea erat fa-
milia Dominici, & Colonienſes quidam The-
ologorum titulo superbientes, qui in Capni-
onem ſe plane hoſtiliter inferebant. Iudici-
um fiebat Romæ, & Capnio quum cauſſam
facile defenderet, aduerſariorum tamen opi-
nis & potentia admodum premebatur: tam-
en ſi illi neque patroni viri ſummi deeſſent,
ſtudia omnium, qui amabant aut ſaltem
ſperare volebant amare eruditam doctrinam,
conſtarentur tam prolixè vel effuſe etiam, ut
ſecritate eum iſta offenſum fuiſſe conſtet.
Ipſe ipſe vir optimus, quamuis cuperet in-
nocentiam ſuam tutam eſſe, & intelligi quam
rox ſibi fieret iniuria, ſic tamen optabat
non a ſe depelli, ne læderentur ulli, utque ini-
uriæ non vel maxime meritis conuiciis ſed ve-
ſtatim ſimplice oratione refutarentur. In-
ſtata etiam erat prudentiæ & grauitati illius
eſcentis, iuuenilis leuitatis exultatio, &
hic non tam factò quam exemplo nocere
ſſe perſpiciebat. Sed nihilominus, qui
um maxime fauerent & quam optime cu-
rent Capnioni, multo peius oderant im-
tunitatem eorum, quos Capnionis euer-
nem prætere animaduerneretur, op-
ſſioni naſcentis doctrinæ eruditæ vniuer-
hanc enim quod ipſi penitus ignorarent,
B metu-

metuentes exstimationi suæ, exoriri & con-
valescere iniquissimis animis patiebantur &
ægerrime ferebant. His igitur infesti illi stu-
diosi politioris doctrinæ causam Capnionis
suam ducere, & illius aduersarios omni gene-
re scriptorum infamare, tam deridentes & elu-
dentes futilitatem quam insectantes & incre-
pantes improbitatem. Inter quos princeps,
Ulricus gente Huttenus, patria Francus, or-
dine eques, ingenio acerrimo & animo con-
fidentissimo, literis perquam eruditus, & li-
tigantes monachos cum Capnione varie ex-
agitauit, & illam factionem tam quidem ve-
hementissimis scriptis, sed aliquanto post ar-
mis quoque expeditis, adortus est. Huius
est carmen triumphale victoriæ Reuchlini,
cum pictura etiam in illius conspirationis
gregem contumeliosa, vbi vnco trahitur qui-
dam, qui quum Iudæus aliquando fuisset,
suam operam in Capnione lædendo atque
euertendo, conductam illam quidem magna,
vt credebatur, pecunia, dedisset. Sed de
Capnione extat narratio Philippi Melanch-
thonis, quam curauit quodam in conuentu
scholastico Wittenbergæ, vt solebat, recitan-
dam. Vnde si quis de Capnione plura co-
gnoscere cupit, petere ea poterit. Nam
mihi hoc scriptum etsi non alienis, verbosis
tamen & longis huiusmodi expositionibus
com-

implere non libuit. Capnioni igitur, tum
 ous & dubiis & valde difficilibus ac mole-
 s, assidue & fideliter præsto fuit Philippus
 elanchthon, describendo potissimum ea,
 ibus defensio causæ continebatur, & quæ
 iudicium mittenda erant, & quicquid o-
 nino ad Capnionis innocentiam declaran-
 m & conseruandam salutem dignitatem-
 e (quæ petebatur vtraque) pertineret, o-
 nibus modis adiuuando. Neque Philip-
 s ad Capnionem modo Stutgardiam, vbi
 e habitabat, crebro accedere, sed Capnio
 oque ipse sæpe venire Tubingam ad Phi-
 pum, & cum eo in scholastico contuber-
 o versari atque pasci, & iucundissime post ali-
 necessarios & ad se pertinentes sermones,
 communibus studiis & liberali institutio-
 confabulari. Etsi enim Capnio non fuit
 eris elegantioribus penitus excultus, & do-
 ssimum tamen virum & liberalium disci-
 narum cupidissimum fuisse eum constat,
 ebraicæ autem linguæ peritissimum. Cu-
 s prorsus senem doctrinam ipsum profiteri
 que puduit neque piguit.

V. Hæc tempora intuenti & negotia
 nsideranti, vis mihi quædam inuicta fato-
 m ob oculos versata est, id est, Quid e-
 niat, diuini iudicii sententia iam lata, de
 ous hominibusque in hac vita. Tunc e-

nim & illas præcipites ferri, & horum omnes rationes cunctaque consilia conturbari, & conuertere in contrarium, licet videre. Quo autem progressa fuerit quorundam insolentia atque importunitas, prætendentium sanctitatem atque obseruationem religionis, neminem fugit; quum tamen re iam pridem penitus amissa, species quoque euanesceret, vel etiam mutata ab illa grauitate & seueritate cum maiore indies deformitate & contaminatione appareret. Quum autem deberent ii, quorum tunc res agebatur maxime, & pericula impendentia prouidendo cauere, & causas illorum attendendo auertere; tanta fuit cæcitas, ut & has ruendo impellerent, & illa ultro commouerent atque accerferent. Non enim ipsi vitia sua, quæ neque occulta amplius essent neque omnino tegi possent, corrigere conati, sed de his dimicare etiam, & prauitatem turpitudine cumulare non sunt veriti. Habebant autem persuasum, tantas esse vires eamque potentiam suam, ut euer- ti aut percelli labefactarique nulla impressio- ne nulloque impetu possent. In quo opi- nio eos sua adeo est frustrata, ut leuissima ag- gressionem illa tanta moles statim sic concussa sit, ut postea non magnopere aliis machinis ad conuellendum opus esset, sed ipsa, quum semel ruere cœpisset, per se prolaberetur at- que

que concideret. Quid enim magis contem-
nunt & nihili haberi, exoriente bonarum lite-
rarum & artium studio, & liberalium inge-
niorum facultate? Quam parum in istis mo-
menti & ponderis plerisque visum? Nedum
metuerent aliqui ab his detrimentum aut
damnum confirmatæ barbariæ. Neglecta
autem vel potius despecta parua & puerilia
ecce, in elatione animorum & superbia im-
mensa, ruinis, quæ & factæ sunt & nunc et-
iam impendent, occasionem dederunt. Quæ
si, quum & cupide admittere, & libenter ex-
perire, & studiose amplecti oportuisset, repu-
arunt insolenter, & abiecerunt fastidiose,
contumeliis omnibus infectati fuerunt.
Nunc igitur meritas pœnas dant non stulti-
tæ sed vesaniæ suæ, &, si perrexerint vrgere
propositum, exitio suo perniciem Reipubli-
cæ videntur esse implicaturi. De quibus
non docent ea, quæ accidisse constat,
non moueretur mea certe disputatione.
Sed igitur omissis institutam expositionem
persequemur.

VI. Erant tum studia Philosophiæ, qua
metaphysica inuoluebatur, scissa in duas præ-
cipuas partes. Quarum vna veluti Platoni-
ana de ideis seu formis abstractis separatis-
simis ab iis, quorum moles corporum sensi-
bilium subjiceretur, sententiam tuebatur. Hæc

de eo, quod generalis cogitatio comprehendit, vt hominem, animantem, pulcritudinem, etiam spondam atque mensulam, quia natura & res singularis constituitur, *Reales* isti sunt nominati. Altera pars Aristotelem magis sequens, speciem istam de iis, quæ suam naturam ipsa haberent, vniuersis colligi docens, & concipi intelligendo notionem hanc ex singulis quibusdam existentem atque contractam, neque naturas esse has per se ipsas priores singulis, neque re sed nomine tantum consistere, *Nominales* appellati fuere & moderni. Habuitque vtrumque quasi agmen suos ductores & autores, quorum sectam sequi placuerat. Atque non solum contentiones & iurgia inter dissentientes, sed dimicationes etiam ac pugnae commissæ fuerunt, interdum concertationibus non tantum pertinacibus verborum, sed manuum quoque violentis. Hæc dissidia & Tubingensem Academiam inuasérant, contubernio bonarum artium & Philosophiæ studiis destinato, in duo quasi castella diuiso, ex quibus de opinione sua factiones illæ acerrime præliantes, inimicitias graues exercebant. Philippus qui certam docendi disserendi que rationem probaret, & Aristotelica in hoc genere primas tenere intelligeret, magnificas & splendidas & amplas alteras disputa-

tationes non amabat. Quamuis autem verborum contentionibus suam sententiam ita assereret, ut aduersantes facile refelleret; id tamen eximia humanitate & pariter omnibus, qui uti vellent, opera perfecit, sua autoritate inter sectas illas odia retinuerentur, & quamuis studia discrepant, voluntatum tamen maneret coniunctio. Alietiam officiis plurimis contubernium interdum rebus difficilibus fulciuit, & sustentavit consilio opeq; sua. Nam curatio in eo, consuetudine Academiae eius quoque fuit, qui & optimarum artium disciplinarumque esset magister, & publicae doctrinae munus gereret.

VII. Postquam annos sex confecit Tubingae discendo & docendo cum magna laude omnium, conuentus fuit Ordinum Imperii Romani Augustae Vindelicorum, quem egit Maximilianus Imperator postremum, anno Christi M. D. XVIII. Nam proxime secuti anni initio ex hac ille vita migravit. Ad hunc conuentum venit & Dux Saxonum Fridericus unus ex Septemuiris, penes quos est deligendi Imperatorem Romanum potestas. Accessit & Martinus Lutherus, qui ineptias & ludibria in doctrina ecclesiastica, cum exitiosa impietate coniuncta, notasset & reprehendisset, de quaestu quodam redimendi veniam factorum faciendorumque, & hanc mortuis

quoque conciliandi, quas vocarunt indulgentias. Non enim tolerabile quibusdam videbatur, ausum esse liberam aliquem vocem emittere, & quæ egissent ii, in quorum manu arbitrium esse statuebatur rerum diuinarum & humanarum omnium, improbare. Voluerat autem Dux Fridericus sedem esse Academiæ (sic enim vsitatum est nominari congregationes profitentium doctrinam & studium optimarum disciplinarum atque artium) in oppido ad fluuium Albim sito, cui nomen a colore albo Wittenberga; etsi non ignoro a Wittechindo quosdam nomen illud deducere, quod fuit fortissimi & potentissimi Principis in ea gente, & qui diutissime vim & arma Francorum, oppugnante Saxonas Carolo Magno, sustinuit. Oppidum hoc caput est regionis eius, quam propriam & peculiarem possidet gerens personam Septemviri in Saxonia creandis Imperatoribus Romanis. Atque fundata Academia confirmataque autoritate ante annos circiter sedecim, Princeps Fridericus nullam curam tunc non suscepit, qua auctior ornatiorque illa fieret. Itaque fama Philippi Melanchthonis nomen celebrante ad ipsum quoque delata, agi iussit cum Capnione de conducenda opera doctrinæ Philippi & suæ Academiæ recenti adiungenda. Et de eadem

dem re literas ad Capnionem diligenter scriptas misit, in quibus inter alia honorificam mentionem fecit de patre Melanchthonis tanquam familiariter noto. Fuit igitur Capnio autor Philippo, ut conditione, quæ offerebatur, vteretur: animaduertens hanc prioris loci mutationem, estimationem ipsius meliorem esse reddituram. Extat inter alia, Capnionis epistola de hac ipsa migratione & itinere isto ad Philippum, nuper a me edita. Ita igitur ille Tubinga discedens in Saxoniam, multis ibi quum desiderium tum memoriam præclaram sui reliquit; ex quorum numero Similerus testimonio splendido ornasse eum perhibetur, in quo & hoc esset: non intelligi neque æstimari ac perpendi, quantum Academiæ decus & commodum decederet. Transiit eques eo itinere Norinbergam, ubi cum præstantissimo dignitate & sapientia viro, atque etiam doctrina perculso inprimis, Wilibaldo Pircamero notitiam amicitiamque iunxit. Transiit & Lipsiam, ibique vidit primum Petrum Mosellanum, Richardi Croci docendis literis Græcis successorem, quorum vterque deinde alterum mirifice dilexit & coluit. Peruenit tum in amicitiam ipsius & Andreas Francus Camicianus, iuuenis illis temporibus doctrinæ eruditione celebris, qui dignitatem postea & honores præcipuos

est consecutus. Solebat narrare Philippus quid accidisset Lipsiæ in conuiuio, quo hospitem eum Collegium primarium Academiae illius honoris causa acceperat. Quum enim cibi crebro inferrentur, & quoties hi apponerentur, vnus quispiam meditata oratione ad ipsum verborum aliquid faceret, animaduersa re Philippus, postquam semel atque iterum respondisset, tandem, obsecro vos, inquit, viri clarissimi, patiamini me auditis orationibus cunctis ita denique semel respondere: nam re improuisa non accessi ad toties dicendum necessaria varietate instructus. Atque ita aiebat tum pompam eam superuacaneæ compellationis deinde adhiberi desisse:

IIX. Quum Wittenbergam venisset, celeriter consecutus est fauorem & admirationem omnium, & Academia illa mirabiliter cœpit tunc celebrari & frequentari. Vera autem ratione & tractatione illustri doctrinæ omnibus muneribus fungebatur. Et Græcas literas, quarum cognitionem paullo ante Richardus Crocus Lipsiæ profitendo plurimorum studia concitauerat, qui iam reuersus in patriam hoc opus doctrinæ reliquerat inchoatum: has igitur Philippus Melanchthon quum exquisitius docendo, tum certius tradendo, tum etiam scripta veterum autorum huius

huius linguæ vberius enarrando, & singularem expectationem de se concitavit, & vndique allexit auditores atque discipulos, quum haberet annos integros viginti & vnum & ageret vigesimum secundum. Vfus ego sum Croco præceptore Lipsiæ puer, pene triennio, eique me, si qua facultas mihi harum literarum contigit, tam initium quam progressum referre acceptum debere confiteor. In Grammatica sane doctrina, quod est eruditionis omnis in quocunque sermone fundamentum, Crocus excellebat. Ad quod autem vitæ genus & quæ studia postea se contulerit, non est mihi compertum. Quamvis autem Petrus Mosellanus Lipsiæ & ipse excitaret plurimorum studia, & eruditæ doctrinæ fama suum nomen & Lipsicam Academiam illustraret; fuit tamen Philippi opera multo in docendo speciosior, qui a prima pueritia naturæ & voluntatis instinctu bonarum literarum & artium studia secutus, nihil tum etiam aliud curaret aut spectaret, quam istius curriculi laudem, in instituti atque propositi incredibili constantia. Vnde eum non spes maioris dignitatis, non opulentia cupiditas, non denique cuiusdam mediocris saltem, quod plurimis est molestum, existimationis desiderium dimouit; sed in eo spacio, quod semel ingressus fuerat, perpetuo

petuo sine vlla declinatione perseueravit. Et si autem illustrissimi & vere optimi Principis Frederici voluntate & iussu, accersiti erant & venerant Wittenbergam in omni genere doctrinæ excellentes viri, nondum tamen neque ordine neque elegantia optimarum literarum & artium pulcritudo conspiciebatur, & cogitationum solertiæ explicationis officiebat obscuritas: cui quasi caligini ibi lumen a Philippo primum est illatum, & sapientiæ quidam horror eruditæ doctrinæ veluti serenitate depulsus. Hoc omnibus accidit volentibus & lætis. Neque quisquam metuit, vt talibus temporibus plerumque fit, ne quid de suis vel laudibus vel vtilitatibus decederet alterius gloria atque commodis. Philippus autem quum ætate & dignitate superiores studiose obseruaret & coleret, æqualibus omnia officia in familiaritatis suauissimo vsu præstaret, ceteros variis beneficiis, docendoque & multiplice alia opera, subleuandæque quibus posset, sibi adiungeret; non modo neminem maleuolum aut inuidum, sed amantes & cupidos consuetudinis suæ & admirantes se atque venerantes pro cuiusque conditione, habuit expertusque est vniuersos.

IX. Mirabili tum incremento augescebat fama Martini Lutheri, & fatali conuersione, id est, decreta iustissimo iudicio diuino, mutari incipiebat administratio rei ecclesi-

clesiasticæ, quæ vndique iam labefceret, & tanquam vetus ruinofumque ædificium demolitione faltem partium aliquarum inftauranda eſſet. Hoc quum fieri iſtamque curam ſuſcipi ab eis, quorum propria eſſet, boni & pii ardentiffimis votis optarent, & prudentes, niſi fieret, quid timendum eſſet prædicerent & monerent: tantum abſuit vt reſpectus ad tam neceſſariam rem excitaretur, & incuria illius excuteretur, vt contra, quaſi metueretur ne caſus non acceleraret, temeritas arrogantia, & audaciæ furor, & deſpiciens omnes alios ſuperbia quorundam, cæco quodam impetu vtcunque adhuc ſtandia, dum vitioſa ſarcire & tegere conantur, partim conuelliffe, partim labefactaſſe & corrupiſſe videatur; ita vt quid nunc reſci emendarique recte poſſit non appareat, & quemadmodum fabula de cribro narrat fatuum diſſiſſe, conſtitui nequeat, qua parte res illæ obſtruantur quaque relinquantur patent. Cumulatis enim & exaggeratis doctrinæ erroribus & actionum facinoribus indignis, profeſſione ſalutis & vitæ æternæ & cœleſtium rerum ſtudio, & religione ſincera confuſione ſuperſtitionis contaminata, denique & enarratione doctrinæ, & vita atque moribus, omnium pene ſententia atque confeſſione correctionem poſtulantibus, non modo

do neglecta ab iis, quorum maxime intererat conseruari, illa omnia fuerunt, sed demonstrantes etiam laborantium quasi membrorum medicinam, inhumanissime reiecti, & adiumenta omnia remediorum pertinacissime repudiata. Quum interea plurimi non in ædificando sed destruendo perquam strenue occuparentur. Intueatur enim nunc aliquis res & negotia ista, & æquo animo perspiciat, non propendente iudicio in hanc aut illam partem: inueniet profecto miseriæ & calamitatis præsentis simul & impendentis non esse autores eos, qui inclamantur contumeliose a quibusdam, sed illos ipsos, qui istos accusant, eosque se statumque suum euersum velle insimulant. Quid enim non modo quasi delitescentem in otio & quiete, religiosæ etiam pietatis sensu timidum Martinum Lutherum excitarit, sed postea quoque stimulando instigarit, & irritando prouocauerit, non est profecto ignotum neque dubium. Circumferebat & proponebat quidam audacia ingente & facundia populari præditus eas merces, quarum mentionis nunc istud venalitorum genus pudet. Indulgentias appellatas esse supra ostendimus. Pertinebat negotium primum ad maiestatem æterni Dei, & attingebatur impie veritas cœlestis, deinde Reipublicæ detrimenta erant manifesta.

Neque

Neque apparebat, qui, non tam malitiæ & fraudum, quam rapinarum & prædæ & atrocissimarum iniuriarum finis sperandus esset. Ibi tum Martinus Lutherus, qui Theologiam publice doceret Wittenbergæ, de iis rebus quærere & quædam ad disputandum proponere. Id studium eaque consideratio omnium approbatione digna, quum maiorem attentionem & tam ardui negotii animaduersionem commouere deberet, hoc modo effecit, vt aduersario prorsus contempto, non modo absurda & falsa non emendarentur, sed addita noua vanitate & commentis aliis inanioribus redderentur magis euidentiâ. Philippus autem Melanchthon qui cerneret esse in Martino Luthero naturæ bonitatem, & ingenii excellentem vim, & virtutem atque sapientiam maiorem quam in vlllo cognouerat, venerari ipsum atque diligere præ omnibus. Lutherus Philippi vicissim probitatem, doctrinam, eruditionem, fidem, candorem, animum paratum ad suscipiendos ferendosque labores, studium diligentiamque maximam quærendi cognoscendique veritatem, & industriam explicandi singularem, eam denique facultatem scientiæ & eloquentiæ, quæ ætatis illius & nostræ gentis rationem & modum longe superaret. Hac igitur omnia animaduersa in Philippo intuens Martinus
Luthe.

Lutherus non modo eum vicissim diligebat, sed dignitate & annis superior non dubitabat neque verebatur colere, habere in numero amicorum, atque etiam ex omnibus amicum præcipuum atque intimum, cum eo communicare suas, cognoscere studiose ipsius rationes atque sententias, percontari libenter, & interrogationibus elicere quo ipse fieret doctior. Itaque inter hostalis necessitudo & tantus familiaritatis usus contractus confirmatusque fuit, quo veriore arctioraque vix reperias.

X. Admodum autem & scelerate erant, qui in huius sæculi deformitatem atque peruersitatem & præsentis ærumnas defigentes oculos, de illorum hominum consiliis & actionibus male sentiunt, & eas iudicant vitia & prauitatem consecutasque calamitates contemplando. Nihil in mentem ulli erat, neque voluntatis alia incitatio, nisi religionis pietas & pura doctrina in omni genere disciplinarum ut restitueretur, vnicusque hic studii ardor, ut certa & vera & recta comprehendere tradique possent. A qua cura operaque refutari & reprehendi necesse scilicet erat dubia, falsa, praua, quæ plurima vndique occurrebant in tractatione doctrinæ vniuersæ. Fieri autem omnino nequit, quin monendo & docendo, dum errores notan-

stantur, minus etiam clementer dicatur
terdum aliquid; vt qui sordida loca expur-
ant, solum inquinatum non possunt non at-
tingere & scalpere verrendo. Accidit au-
tem tum id, quod in fabula, qua narratur,
mendam, ne in facinore deprehensus mani-
festo opprimeretur, iussum fuisse sibi pro-
ficere & fuga consulere, demonstratumque
cum, qua euadere concederetur, vbi nimi-
um in area puteum vidisset, nam ibi mace-
ram concidisse, vt fugæ exitus pateret. At
e quum ad locum venisset, & non reperis-
set puteum, sed ruinas quasdam veteris pu-
tei, recurrit & expostulat cum monitori-
us, ac negat puteum esse eo loco, sed rui-
nas putei. Quid tua? inquiunt illi, non
nim vt biberes sed vt fugeres suavisimus. Re-
eristi ne autem demonstratam maceriam?
reperi, inquit ille; at vos non debuistis pu-
tei, sed ruinarum veteris putei, facere men-
tionem; non enim iste iam puteus est, sed
quando fuit. Tu vero, inquiunt illi, tibi
prospice & maceriæ ruinas quærito, non
disputato de putei ruinis, si tibi tua salus cu-
re est. At vos, inquit ille, tamen male
monstrastis. Non nos quidem, inquiunt
vos, male monstrauius, sed tu male tibi con-
sulis rixando alieno tempore. Dumque
non desinit iste nugator altercari, adueniunt

qui comprehendere eum volebant, & corruptum inter litigandum ad supplicium trahunt. Quid mollius dici potuisset, quam contra impudentissimas conciones de indulgentiis dicebatur? Hæc admonitio non modo nihil profuit, sed nouæ tum absurditates prolatae fuerunt. Dumque vna audacia trudit alteram, eo tandem res euasit, vt gloriosus Eccius in arenam istam descenderet, qui primo aduentu, vt de milite Plautino parafitus prædicat, diffaret vno spiritu aduersantes disputationes. Congressui isti atque certamini destinatus fuit locus Lipsia, vbi quasi committerentur duo athletæ, Caroloftadius & Eccius; eodemque placuit venire Martinum quoque Lutherum; quem est secutus Philippus Melanchthon, & operam subsidariam in eo prælio nauauit, admirabilem omnibus, Eccio ingratam & nocentem. Sed de his negotiis nunc non est texenda narratio, & sentio me fuisse in hac mentione verbosiorẽ quam esse debuerim; quum huc modo contenderit expositio, vt comitatus ille commemoraretur societatis fidelissimæ, non deferente eo tempore Martinum Lutherum Philippo Melanchthone, quum cupiditate ipsius, tum vero inprimis studio veritatis.

XI. Hoc tempus occasionem dedit notitiæ

itiae nostrae, quae coniunctione necessitudinis deinde eximia aucta, amicitiae peperit memorabilis usum, quem, ut spero, posteritas non ignoratura est. Nam quum fama promulgatae disputationis Lipsicae multi excitati eo proficiscerentur, contulit se eodem ex Academia Erphordiana, ubi tunc ego degerebam, Adamus Craphthus, quem Cratonem nominabamus. Hic, quod inter nos totius vitae & studiorum omnium esset dulcissima communitas, aliis sermonibus, quos habere saepe cum Philippo Melanchthone, in cuius quandam pene familiaritatem iuuenis ille optimarum artium studiosissimus se insinuasset, ultro mei nominis & studii fecerat mentionem, & hortando effecerat, ut aliquid ille ad me scriberet. Attulitque Adamus mihi compositos exaratosque a Philippo Melanchthone in charta parva versus Græcos quatuor, quorum ultimo hoc compellabar:

ὦ μέγα γερμανῶν ψαῦμα παλαιγενέων.

Reliquorum non memini. Et dum testimonio eius, qui in tam præclara esset existimatione, mihi placens, ostento chartam istam omnibus, ita nescio quomodo ibi illa mihi euolauit, secundum Plautum, ut fuerit amissa. Siue autem commode vel etiam prolixè loquendo de me Adamus beneuolentiam

mihi tum Philippi Melanchthonis conciliauit, seu opinione & spe bona de me, & vt red-deret alacriorem in studiorum liberalium cursu, seu etiam naturæ quadam inclinatio-ne ille complexus me, talia scripsit: hoc cer-te est effectum, vt Philippus currentem me, quemadmodum dicitur, incitarit, stimulos-que admouerit pungentes diu noctuque ani-mum, neque sinentes cupiditatem præclaris-simi, quemadmodum arbitrabar, studii opti-marum disciplinarum & artium languescere. Ex eo tempore videndi ipsum opportunita-tem semper quæsiui. Quam tandem nactus fui post triennium, metu pestilentia & mo-tibus quibusdam temerariis schola Erphordi-ana dissipata, quum venisset ad me Pabeper-gam in patriam Georgius Pætus Vorchemi-us, optimus & doctissimus & grauissimus vir, (quem magistrum & hospitem mihi delege-ram Erphordia) & inde me secum, probata re meis parentibus, ad visendam Witten-bergensem Academiam, quæ tanta omni-um commendatione celebraretur, abduxis-set. Sed de me & coniunctione cum Phi-lippo Melanchthone mea satis, vel etiam, vt aliquis forte dicat, nimium.

XII. Reuersus Lipsia, non depugnato sed incepto prælio, (fuit enim ista disputa-tio veluti classicum eius belli, quod dudum com-

commotum fieri tunc magis acerbum atque pestiferum cœpit, cuius qui finis tandem futurus sit, nondum liquet) Philippus Melanchthon Wittenbergam, maiore contentione animi in Theologicam disciplinam incubuit, quum tamen nihilominus coleret liberales & ingenuas artes, & has omnibus modis augetet & ornaret. Neque diu post desponsa ei virgo fuit honestissima veteris & præcipuæ familiæ in ea vrbe, quam duxit vxorem agens annum vigesimum quartum: cumque ea vixit in matrimonio castissimo annos triginta septem, & vtriusque sexus liberos suscepit quaternos, filios duos & totidem filias. Desiit autem parere illa anno coniugii duodecimo. Fuit fœmina hæc religiosissima & viri amantissima, materfamilias assidua atque diligens inprimis, liberalis & benefica in omnes, pauperum ita studiosa, vt & dando sine discrimine, & deprecando pro illis, & conciliando quibus aliquid posset commodi, non modo suarum rerum facultatumque minus rationem habere, sed interpellatione & compellatione pro his ad alios vti soleret nonnunquam intempestiua. Summa vitæ morumque integritate, inque perpetua cura religiosæ pietatis honestatisque, & victus & cultus negligens. Neque hoc Philippus Melanchthon offendebatur, qui nullis deliciis

C 3

rum.

rum blanditiis caperetur, & voluptatum omnes illecebras fugeret. Non durus ille quidem neque asper aut inhumanus, sed nimis etiam interdum facilis atque indulgens, qui ne sodalitia quidem hilariora vitaret, atque etiam congressuum talium esset autor, quique con- niueret ad suorum familiarium nimiam aliquando latitiam. Quum quidem ab ipso nihil fieret aut diceretur perperam & praeue, sed praesentia & saepe instituto eius caueretur, ne leuitas iuuenilium cupiditatum in turpitudinem aliquam erumperet, quum ludis etiam seria miscerentur. Quod fiebat in con- uiuiis potissimum, quae more Germanico Re- ge sodalitiis creato, apparari solent. Tam enim hoc seruabatur, ut nunquam conside- rent ad epulas, nisi prius scriptis prolatis & recitatis, quae componi oportebat ab illis so- dalibus oratione soluta & versibus. Itaque ut videri possit nonnihil seuerioris disciplinae desideratum esse, id tamen praestabatur, ut verecundiae pudorisque nulli congressus eo- rum, qui bonos, vel non saltem nihili prorsus & futes, perhiberi se vellent, essent ex- pertes. Sed redeat oratio ad domesticam Philippi Melanchthonis vitam.

XIII. Quum & ipse nullis cogitationi- bus & curis vacaret, nisi salutaribus Reipu- blicae, & priuatim tam laudem quam utilita- tem

tem afferentibus, magis quidem aliis quam sibi, & talem haberet huius vitæ sociam, factum est non modo ut augendæ rei familiari nulla opera ab ipsis daretur, sed ut etiam ea copia, quæ satis abundans non tam quærebatur quam affluebat, effunderetur promiscua benignitate, neque parceretur vel pecuniæ vel penur; quin petentibus quicquid in manu esset sine recusatione tribueretur. Videres igitur in ædibus illis perpetuo accedentes & introeuntes & discedentes atque exeuntes aliquos, in quibus turba versaretur omnis ætatis, sexus, conditionis atque adeo gentis. Exportabaturque & auferebatur non indies, sed hõris singulis & pene momentis, aliquid. Nam ea domus disciplina erat, ut nihil cuiquam negaretur. Veniebant autem ad Philippum Melanchthonem plurimi, qui literas ad aliquos peterent, qui scriptum suum quodpiam ut emendaretur orarent, qui testimonii publici diploma confici vellent. Alii, qui aliqua de re sua & oblato negotio consilium ut sibi daretur rogarent. Alii, quod accidisset publice priuatimue, respectum ipsius & considerationem & opem requirens, narrantes. Alii, querelas varias deferentes. Multi etiam stipem plane exigentes, quam veluti deberi sibi ab illius immensa benignitate statuerent. Qua

in parte nonnullorum augeri confirmarique impudentiam, & erant qui tunc ægre ferrent, & Philippi Melanchthonis facilitatem improbarent. Interea alii ad coniugem aut liberos deuenire, & sibi suisque quo adiuuarentur & subleuarentur quærere. Quorum nemo non aliquo munere affectus aut tristis abire visus. Ipse Philippus accessionis ad fortunas, qua fieret ditior, consilium cepit nunquam, quin etiam oblata emolumenta aliquoties respuit, & quæ plurimi expetere atque arripere deque quibus digladiari non desinerent, ea quum essent in potestate ipsius plane abiecit. Quæ quum ita, quemadmodum exposui, administrarentur, non potuisset se & suos ille alere atque sustentare, nisi diuina quasi virgula necessaria, & plura etiam quam absumerentur, ei vndique affatim suppetiuissent. In quibus modice retinendis si paullulum attentionis voluisset adhibere, potuisset locupletiores hæreditatem suis relinquere. Erat autem in familia ipsius vnus, qui ad eum initio statim venerat, Iohannes Suevicæ gentis, commendatus a Hieronymo Pamgertnero, qui illo famulo usus fuisset, quem, expertus fidem & probitatem eius & amorem erga dominum mirabilem, Philippus valde carum habuit. Hic curabat domi ipsius omnia, emendo, conden-

do,

do, custodiendo, promendo, denique rationesque domesticas tractando vniuersas: cuius vigilantia, assiduitate, circumspectione, diligentia, non etiam nulla prudentia, & multa incommoda auertebantur in illa familia, & quantum poterat tantum adiumenti afferebatur, non modo ad sustentandam eam, vt quotidianis sumtibus impendia sufficerent, sed ad copiola aliqua in posterum muniendam. Hic consenuit apud Philippum, mortuus in ædibus ipsius anno Christi M. D. LIII. relictæ exemplo famuli & ministri eiusmodi, vt nomen eius maiore cum laude memoretur, qui seruili conditione fuisset, quam multorum potentia & diuitiis & honoribus excellentum. Quia autem mentio est facta Philippi Melanchthonis cuiusdam (dicendum enim verum est) negligentia, in suis retinendis & seruandis, non putavi reticendum, quod aliquando factum est, de quo & ipsius procliuitas in largiendo, & quorundam in auferendo proteruitas, poterit certius cognosci. Donabantur ei multa aurea & argentea numismata antiqua. Hæc fere auferabat qui primus, vbi ille accepisset, aduenerat, & nobis nonnulla quum daret, solebat dicere: nisi ego sumerem, relicturum me esse aliis. Quodam tamen tempore denarios complures congefferat, qui maxime signis & scriptura

ptura & imaginibus placuissent: eos exter-
no cuidam, quem nominare nunc esset in-
humanum, quum ostendisset, animaduertit
contemplatione eorum ipsum valde delecta-
ri. Iubet igitur sumat vnum aut alterum,
quos præ cæteris cupiat. At ille, ego verò
vniuersos, inquit, cupio. Non negabat Phi-
lippus se impudente postulatione fuisse of-
fensum, sed dedisse nihilominus illos, & sa-
tisfasse se, dicebat, cupiditatem inuerecundi
spectatoris eorum, quibus alterum etiam gau-
dere & capi par fuisset eum cogitare. Hæc
igitur non aliquot annorum, sed omnium
quibus & cælebs & coniunx & viduus vixit, vi-
ta hac in parte illius fuit. Mirifica autem
erat taciturnitas & dissimulatio beneficiorum
in largiendo. Sæpeque numero pecunia ex-
hausta, pocula sua ipse solus clanculum de-
tulit ad aliquem mercatorem, nihil curans
iustumne pretium an minus eo persolueretur:
Qua domesticæ vitæ ratione exposita, quia
huic loco conuenire hæc putauimus, perga-
mus ordine enarrare reliqua.

XIV. Disputatione illa Lipsica finita,
cœpit non ita diu post pestilentie malum op-
pido esse infestum. Itaque tum dilapsus
cœtus scholasticorum fuit, quum Martini Lu-
theri Philipppique Melanchthonis nomine
plurimi inuitati vt Wittenbergam peterent,
fecis-

ecissent, ut admodum frequens Academia illa esset. Inter quos adolescentes duo fuerunt mei Lipsiæ condiscipuli ambo, alter etiam contubernalis, Sebaldus Muntererus & Caspar Cruciger, quorum uterque virtute sua & diligentia studii præcipuos honores in illa Academia gessit, & interuallo sane multorum annorum mortuus dolorem amicis & desiderium sui omnibus maximè reliquit. Secutum est tempus, quo conuentu indicto Berbatomagi in Vangionibus Carolus Quintus Cæsar fide publica acersitum causam dicere iussit Martinum Lutherum; qui tanquam impiæ defectionis a religionis sanctitate, & seditiosus a Pontifice Romano, vel illius potius assentatoribus & assēclis, accusabatur. Is quum iter illud ingressus esset, Philippus Melanchthon ita Wittenbergæ remansit, ut omnem curam laboremque rei scholasticæ sustineret. Accidebat autem tum quod similibus temporibus semper solet, ut vitiis detectis & apparentibus, quum, qui maxime deberent medicinam facere, negligenter atque etiam plurimi irritarent mala, &, quemadmodum dicitur, essent ungues in vlceribus, multa susciperentur & fierent quum audacter tum inordinate, nonnulla etiam turbulente. Et Wittenbergæ variorum generum diuersarumque nationum iam magna

gna copia confluxerat. Et illa omnino ætate fatalis rerum conuersionis, prouenerant homines qui mouerent & concitarent & novarent aliquid indies. Quorum procliuitate credibile est, permittente Deo, abusum esse eum spiritum, qui Diabolus appellatur, quia diuinis operibus obrectare, & dissipare atque euertere quæ possit, perpetuo conatur, tam vi manifesta quam occultis machinationibus. Non enim audacia & facinora illa quorundam (de quibus dici aliquid neque alienum ab instituto, & cogitari nunc quoque utile esse existimo) humanæ malitiæ videntur fuisse. Neque res tamen noua neque inaudita prius ista tunc oblata est. Nam historiæ similia atque eadem plane narrant, quibus aliis temporibus, animis hominum in errorem & fraudem inductis, vita perturbata fuerit. Non habeo autem pro certo dicere, ubi locorum & quibus maxime autoribus secta ista furiosa, & de qua deinceps dicturus sum, exorta sit. Sed vnus vagabatur passim, cuius nomen Germanicum habet Ciconiæ significationem. Is ex plebe imperita & simplice plurimos deceptos falsitate opinionis perniciosæ complebat. Erat autem facile & in promptu infectari eos, qui in ecclesiastica re præsidebant, aut munere quopiam fungebantur; in quos nihil tam contumeliose dici posset,

posset, quod non factorum illius generis improbitate confirmaretur. Primum igitur eam congregationem, quæ a talibus gubernaretur & administraretur, Ecclesiam esse Christi negare, & dicere ex illa discedendo hanc institui oportere. Et quibus hoc peruaderetur & placeret, eos denuo baptismo initiandos esse. Vnde Anabaptistarum secta illa nomen inuenit. Sed non insistebatur hoc loco, progrediebaturque vanitas doctrinæ ad statum Reipublicæ vniuersæ mutandum. Nihil enim recte & debito modo fieri gerique vsipiam perhibebant, quod summa rerum esset penes malos, & a religiosa pietate studioque honestatis & virtutis alienos, qui suis cupiditatibus priuatim seruirent non commodis publicis, & omnia ad voluntatem referrent, in dominatione superba ac insolente. Atque decreuisse Deum extinguere istud genus, & sufficere alterum innocentia iustitiaque & sanctitate præditum. Ad cuius exordium atque incrementa, docebant, necessariam esse curam & diligentiam in procreanda sobole. Et ideo neminem ducere uxorem debere, ex qua non sciret se liberos suos & gratos æterno Deo, & ad communionem regni cœlestis electos, suscepturum esse. Id autem non aliter, quam ipso Deo patefaciente, sciri posse. Et iactabatur præcipuum donum

donum Dei in illis cœtibus, prædictionis eventuum futurorum, & arcanorum indicii, cuius eximiæ & salutaris rei in veritate nomen est, græcum Prophetia. Compertum autem est multis horum per quietem somni mirabilia visa, & species quasdam vigilantibus etiam aliquibus, sed paucis, oblatas esse. Cognitum etiam est, fuisse in cœtu isto foeminas vaticinantes. Ciconia iste se imperitum literarum esse penitus simulabat, vel erat etiam fortasse, prædicans sibi diuinitus scientiam salutarem contingere. Esse tamen studebant hi in numero suo literatos aliquos. Sed & isti ipsi se magistros doctoresue homines habuisse habereue affirmabant nullos, & copiam scientiæ sibi diuinitus conferri vniuersæ. In quibus vnus erat Marcus nomine præcipuus, qui sibi a Deo hoc esse datum tributumque eximium gloriabatur, vt ipse interpretando & explicando scripta sacrarum literarum excelleret. Hic gentis, quæ putatur incolere eam regionem quam veteres Narischorum appellarunt, ciuis, aliquando fuerat discipulus scholæ Wittenbergensis. Sed studia deseruerat, siue antea seu posteaquam in illam societatem peruenisset. Nam & hoc erat in legibus istorum: ne quis in otio liberali bonis artibus & literis operam daret: neu aliunde scientiæ

tia cognitionisque facultatem quæreretur, quam ab æterni Dei benignitate, cui adiumentis humanis nihil esset opus. Nam cur colere aut venerari aliquis vellet Deum? si non dignaretur eo beneficio, quod datum esset patribus & sanctis viris prisco sæculo. Quin etiam par commercium colloquiumque esse a Deo flagitandum, & vrgentibus tribui. Hæc secta absente in Vangionibus, & postea nescio vbi, Martino Luthero, pene anno toto longe lateque est peruagata. Ciconia interdum venire Wittenbergam, sed ibi minus libere & aperte versari. Ceteri aliis in locis serere fallaces sermones, quibus animi imperitiæ multitudinis peruertebantur. Sed grati hi erant plurimis, spem licentiæ rerum omnium & simul cuiusdam regni ostendentes. Quod sibi Ciconiam polliceri credebatur, a quo auditum esset, visum se videre aliquando dormientem aduolasse Gabrielem angelum, & postquam adstitisset propter se quem alia commemorasse, quæ proferenda nondum putaret, tum hoc dixisse: Tu collocabere in solio meo. Idque interpretatum Ciconiam, promissum sibi principatum esse regni noui & paullo post exorturi. Hæc initia sunt cladis & calamitatis quæ peruasit Germaniam, serpente malo paullatim & procedendo acquirente vires
nemi,

nemine ad cohibendum auertendumue veras rationes ineunte, aut capiente salubria consilia, donec, tanquam amnes eo pleniores, quo longius a fontibus feruntur, illi conatus & talia incepta in manifestos seditio-
num tumulus & perfidam vim confluxerunt motuum popularium, & ad extremum in occupationem vrbis Monasteriensis, & regni nefarii detestandum nomen. Quæ causæ fuerunt, vt Germania scelere & immanitate rapinarum & cædium fœdissime laceraretur, & passim vastaretur ferro & igni; de quibus & aliorum narrationes extant & hoc loco plura commemoranda non sunt. Ciconia, qui, vt dictum est, vagaretur neque vspiam fere diu consisteret, quæ conceperat animo ea strenue exequebatur. Siue huius autem mandato seu sponte sua Marcus, cuius supra mentio est facta, Wittenbergæ aliquantisper mansit, quem & nos ibi vidimus & cum eo sumus sæpe collocuti. Re-
ceperat autem eum ad se Philippus Melan-
chthon, vel innata sibi bonitate, quum hominis eum misertum esset, vel vt certius cognosceret quid istud genus doceret. Censebat enim, neque admittendum neque rejiciendum quicquam temere, quod parum alicui exploratum esset. Itaque hic hospitem quidem habebat Philippum, sed nihilominus
ad

ad alios ventitabat, & non paucos in suam
sententiam perducebat. Quorum caput fu-
it Martinus Cellarius, qui istis pertinacissi-
me diu sane adhæsit, & causam hanc egit at-
que defendit. Quumque anno XXV. in Prus-
siam venisset, in liberam custodiam Princi-
pis iussu datus, multa scripsit de doctrina
illa. Postea animaduertens labascere partes
& spem se frustrari, Basileam se contulit, vbi
ducta vxore quiete deinceps vixit. Hic Sue-
vicæ gentis cum Philippo Melanchthone Tu-
bingæ usum quendam habuerat, quumque
& ipse post discessionem illius Wittenber-
gam tandem venisset, a Philippo Melan-
chthone humanissime acceptus & tractatus
amantissime est. Nondum probabat ille
scholasticæ prioris doctrinæ mutatam ratio-
nem, deque ea cum Philippo sæpe disputan-
do pugnabat. Quum autem & ingenio es-
set minime hebetè, & studii diligentia per-
cultus, tradidit ei Philippus Melanchthoni
discipulos instituendos, habuitque ille scho-
lam priuatam, frequentem & fructuosam,
hunc igitur Marcus amicū & sociū &
adiutorem & comitem atque etiam ducem
factus, ita tum propemodum semestre sub-
stitit Wittenbergæ. Vbi fiebant omnia in-
dies difficiliora, leuitate & petulantia cupi-
ditatis rerum nouarum. Iamque non mussi-

D

taba-

tabatur, sed fremendo ferebatur palam, non quasi pedetentim ad tollenda vitia, quæ in operationes sacrorum irreplissent, progrediendum, sed irruendum & demoliendum statim quicquid perperam introductum vsurpatumque esset. Ac duorum potissimum deligebatur repentina mutatio: ritus actionis in peragenda Eucharistia, & collocatarum in templis imaginum simulacrorumque amotio. Quæ non modo conuelli exterminarique, sed publice per contumeliam, propter venerationis impietatem, exportari & concidi aut comburi volebant. Neque carebat factio ista patrocínio quorundam auctoritate prædicatorum, in quibus & Andreas Carlostadius nominabatur. Philippus Melanchthon tunc quoque fouebat apud se Marcum, quamuis perspicue cognouisset, inania esse omnia quæ afferret, & dissentanea inter se, & pleraque nugatoria, nonnulla etiam eiusmodi, vt non esse sana neque integra eum mente deprehenderetur. Ex quibus vnum hoc duxi exponendum. Quodam tempore scribente nescio quid Philippo, Marcus, qui forte aduersus illum assedisset, in silentio & cogitationibus sensim ibi consopiri, & demittere caput in mensulam, ad quam sedebant, & obdormiscere. Post non multum temporis expectatus erigere se, & intueri

eri Philippum, & interrogare subito: quanam esset existimatio eius de Iohanne Chrysostomo; quumque Philippus commode respondisset: se sentire de illo præclare, quamvis verborum ipsius interdum non probaret; tum Marcus, modo, inquit, vidi illum specie tristi in purgatorio. Ad hæc Philippus primum ridere, mox discedere deplorans perturbationem tantam in illo, qui purgatorii faceret mentionem, eam, quam ipsorum aliæ disputationes mirifice refellerent.

XV. Sed quum Philippus pondere rerum & negotiorum difficultate superaretur, neque iis quæ sibi imponi indies grauiora sentiebat par esset, & impendentium periculorum magnitudinem perspiceret: crebris suis aliorumque literis permouit Lutherum, vt Wittenbergam rediret. Et ille (qui paulo ante clam paucis diebus ibi fuisset) tunc palam est reuersus, neque indicatâ re Principi, neque quoquam permittente, animo excelso & confidente. Et nisi hoc facere maturasset, res Wittenbergenſis non modo grauius afflicta atque vexata, sed perdita & funditus diruta fuisset. Reuersio eius incidit in Nonarum Martii dies, anni Christi M.D. xxii. quibus diebus conciones eo habente omnia conquiescebant, & audientes quum singu-

larem facultatem explicandi susceptas res, tum dicendi vim, tum etiam virtutem atque fortitudinem admirabantur, & reuerabantur autoritatem. Interrogatus tunc vnus ex Marci familiaribus, ecquid doctorem esse Lutherum egregium iudicaret? Imo, inquit, angelum non hominis vocem mihi audiisse videor. Sed Marcus iis diebus aberat, quum nescio quo quarumue rerum causa discessisset. Mox tamen hic se Wittenbergam ad suum, quem ibi habebat, gregem recepit. Qui rursus ad ipsum confluere, & opiniones haustas inter se confirmare, & Marco ad retinendas & defendendas eas animos hortando addere. Inque omnibus maxime & ardentissime Martinus Cellarius, cuius paullo ante meminimus. Placuit igitur Martinum Lutherum accedi, & ei summam doctrinae exponi. Aegre Lutherum hoc concessisse rescivi. Sed tandem certo die & hora fecit potestatem Marco ad se veniendi, solo Philippo Melanchthone sibi adhibito, quum Marcus Cellarium & alterum quendam ex suis adduxisset. Audiuit Lutherus placide narrantem Marcum sua. Quum dicendi finem fecisset, nihil contra illa adeo absurda & futilia differendum ratus Lutherus, hoc modo monuit: Viderent quid agerent. Nihil eorum quae commemorassent sacris literis niti,

iti, commentaque esse cogitationum curiosarum, aut etiam fallacis & fraudulentis spiritus deliras & perniciosas subiectiones. Ibi Cellarius & voce & gestibus vesanis, quum & solum pedibus & propositam mensulam manibus feriret, exclamare & indignari, autum esse Lutherum suspicari tale aliquid de diuino homine. At Marcus paullo sedatior: vt scias, inquit, Luthere, me spiritu Dei præditum esse, ego, quid in animo tuo conceperis, sum indicaturus, idque est: te incipere inclinari ad hæc, vt meam doctrinam veram esse credas. Quum Lutherus, vt ipse postea dixit, istam dedita opera sententiam cogitando esset complexus: Increpet te Deus, Satana. Post hæc, plus verborum faciendum Lutherus non putauit, & minantes gloriantesque eos dimisit, ac nescio quid pollicentes de mirabilibus effectiõibus, quibus probaturi sua essent, quum hoc modo dixisset: Is Deus, quem ego veneror & colo, facile vestra numina, ne quid tale efficiatur, coercebit. Eo die oppido illi exceßerunt, & Chembergo, distante passibus amplius millibus quinque, literas plenas maledictis & execrationibus ad Lutherum miserunt, de quibus longiorem esse narrationem hanc meam non decet. De Ciconia autem & Marco ipso quid factum sit, & quid ipsi amplius

conati, quique exitus vitæ eorum fuerint, non habeo compertum, deque eis narrata atque prodita scio neque temporibus neque personis consentanea. Et in exponendis his fui prolixior, quod istis rebus & negotiis omnibus Philippi Melanchthonis labores, curæ, opera, consilium, fides, implicarentur.

XVI. Post hæc res satis tranquillæ toto biennio fuerunt. Martino Luthero, quem non desinerent aduersarii, cum manifesto dedecore suo & causæ quam agebant detrimento, lacessere scriptis leuissimis atque etiã ineptissimis, magno animo & summa contentione asserente sua & aduersariorum scripta confutante. Scholasticam autem doctrinam publice priuatimque assiduo exercebat Philippus Melanchthon, optimarum artium studia conformando & expoliendo, ordiens ab horum quasi pueritia, & progrediens ad vltimam veluti ætatem, (id quod annis aliquot perfecit) vt initium cum fine denique coniungeretur & coiret, & omnis ista tractatio orbe vno comprehensa absolueretur, cuius Græcum nomen esse placuit ἐγκυκλοπαιδείαν. Atque idem sacrarum etiam literarum diuersas interpretationes explicationesque conficiebat & elaborabat. Quum interea ab occupationibus aliorum
nego-

negotiorum & opera, quæ dabatur omnibus
viri volentibus, nihil ei quietis aut otii, vel
ad corporis valetudinisque curam, vel aliam
vitæ suauitatem & recreandum animum re-
linqueretur, neque ab ipso usurparetur; præ-
ter vnam voluptatem, quam ex consuetudi-
ne & familiaribus colloquiis amicorum per-
cipiebat, qua quoties licebat libenter frueba-
tur. Quod autem tum facere cœpit, vt ser-
uire voluntati atque etiam cupiditati quo-
rumvis & obsequium suum in promptu cun-
ctis esse vellet, ab eo omni postea tempore
non voluit recedere. De quo quidem &
memini diuersa iudicia diuersorum audirè,
& intelligo in vtramque partem disputari
posse. Idque indicabo, vbi prius de habitu
corporis ipsius & valetudine & natura atque
ingenio ac moribus, quam hoc loco apte in-
ferri posse existimaui, narrationem absol-
vero.

XVII. Fuit statura Philippus breuiore,
non tamen breuitate notabili, quum a com-
muni virilium corporum modo illa non pro-
cul abesset. Membrorum compositio pla-
ne elegans, frons explicata & ardua, insi-
gnis vena quadam ampliore in illa eminente;
capillus rarior, collum procerum, iugula in-
signiter concaua, oculi pulcri & acies horum
mirabiliter clara, pectus satis amplum, ven-

ter & ilia adstrictiora. Omnium autem partium corporis & integra atque vera sua figura, & congruens erat soliditas. Sensus omnes acres, in corpore nulla mole carnum grauato, & eiusmodi ut facile illud quidem propter subtilitatem afficeretur, sed laboris tamen esset patientissimum, neque facile defatigaretur. Atque narrabat ipse, quoties adolescens Tubinga Stutgardiam ad Capnionem venisset, id quod saepe facere consuevisset, & illa vina bibisset pleniora, artuum dolores se statim coepisse inuadere, & ideo studuisse citius reuerti Tubingam. Vna fuit ei molesta insomnia. Nam accidebat nonnunquam ut totam noctem vigilaret, quo incommodo quum propter debilitatem, quæ consequebatur, tum obstrepentes, ut fit, cogitationes iniucundas, grauissime affligebatur. Sed hoc malum depulit diligentia in victu, praesertim quum ætate procedente vinis vteretur plenioribus, & aliis generibus potus, quibus somnus conciliari solet. Ad quem se, dabat statim post cœnam, & surgebat mox aut non longo interuallo post mediam noctem. Omnesque scriptiones & commentationes cæteræque res, vel saltem præcipuæ, matutina opera ab eo perficiebantur. Requirebatur autem ab eo quies somni nocturna placida. Quantum igitur poterat, cauere, ne
qua

qua re perturbaretur animo iturus cubitum: & eam ob causam literarum vespere allatarum lectionem in posterum diem plerumque, differre, earum præsertim, quas Principes aut ciuitates misissent, quibus rem feriam atque magnam agi suspicaretur. Atque senescens post meridiem interdum, non ille quidem in lecto, sed supra scamnum alicubi recumbens & somnum capiens conspectus est. Quum autem eiusmodi potum, quem diximus, prodesse ei increbuisse, vndique ad ipsum benignitate Principum ciuitatumque, & amicorum aliorum studio, ille mittendus curabatur. Constat fuisse admonitum, primis statim annis aduentus sui, Philippum ab illustrissimo Principe Friderico, subiciente, vt videtur, hoc optimo & doctissimo humanissimoque viro Georgio Spalatino, quo Princeps peculiari sacerdote utebatur, vt haberet rationem ipse sui in conseruanda valetudine, neu vini vsum intermitteret. Valde autem delectabatur copiola quadam boni & egregii potus, non tam sua ille quidem, quam hospitem, quos inuitabat humanissime & libentissime accipiebat, & aliorum quoque, quibus hunc impertiebat, gratia. Nemini autem omnium in toto oppido cella ipsius clausa erat, & quicquid ea condebatur id petenti promi in hac

domo mos erat. Attentione igitur ille & diligentia assequebatur, ut talis corporis firmitas perpetuis laboribus sufficeret & inter continuos illos duraret. Quum & a medicinis magnopere abhorreret, neque ullam exquisitam curam corporis adhiberet, ac potius in hac re & parte esset negligentissimus, velis etiam, qui proposito destinato omitteret atque adeo fugeret omnia, quæ corpori curando apta sunt: unde factum est, ut tandem balnea etiam prorsus vitauerit, quæ aliquando cum amicis ingredi consueuisset. Atque in tali corpore, quale est designatione quadam a nobis effectum, animus erat, quem & illud caperet, & qui idoneum istud quasi domicilium haberet. Humor, quem flauæ bilis nomine appellant, abundantior materiam præbebat affectionibus animi vehementioribus. Grauius ergo commouebatur, eratque in eo impetus hic repentinus, qui tamen sedabatur celeriter. Reipublicæ & amicorum negotiis ex animo afficiebatur, & hæ curæ interdum sic excruciabant animum ipsius, ut morbus contraheretur. Sed naturæ vi bilis dejiciendo expellabatur, eoque alleuari ille se sentiebat. Ingenio fuit liberali, comi, admodum benefico & humanissimo, ad gratificandum semper paratus. Etiam minimis in rebus officiisque præstandis non modo

modo satisfaciebat expectationi omnium, sed hanc superabat quoque. Quinetiam sua interdum merita aliis eum tribuisse & adscripsisse cognitum est. Non ille consulto alterum quemvis vel aperte maledictis lædere, vel oblique infamare, aut nigros sales, ut dicitur, adspargere, notamue & ignominiam vlli inurere. Nullum etiam fere dictum aut factum alicuius tam duriter vnquam accepit, ut ab illius benevolentia familiaritateque & usu refugeret. Nullæ in eo malevolentia aut suspicionum latebræ. Nullæ æmulationis quasi insidia. Nihil subdolum, simulatum, tectum, fallax; contraque sincera, simplicia, aperta, vera omnia; oratio libera, sæpe etiam sine circumspectione & consideratione coram quibus illa haberetur; exceptaque esse quædam dicta ipsius, & ad quosdam inuidiose delata, notum est. Quod quum ipse sciret, nullam tamen cautionem huic parti adhibebat, ne ab amicis quidem & beneuolis admonitus. Eadem in scribendo libertas erat. Quinetiam libros scriptaque sua omnia, & literas, quæ afferebantur quotidie plurimæ a diuersis & dissimilibus conditione, loco, fortuna, relinquere omnium oculis & manibus expositas; ex quibus subtractum plurimum esse constat. Et ipse hoc animaduertens, hortantibus suis etiam, ut custodi-

studiret sua, præsertim quum aliis hoc vt facerent assidue præciperet, neque pericula tantum sed malum præsens sæpe demonstrantibus, adduci nunquam potuit vt esse aliter inciperet & sententiam consuetudinemque hac in parte suam mutaret. Voluntati aliorum promptissime inserviebat atque adeo cupiditatibus indulgebat, quum erga se esset durissimus & immitissimus. Quæ non fiebant iudicio, sed naturæ mansuetudine & bonitate. Seque intelligebat ipse hoc agendo peccare, quum sciret & testaretur quam perniciosa res esset impunitas & licentia, neque eam coerceri amplius posse sæpe deploraret. Pueros paruulos nimio pene amore complectebatur, & naturæ affectio hæc in ipso insignis & pene intemperata fuit, prudentia in aliis summa & consideratio quid deceret. Nihil rusticum aut agreste, festiva & venusta plurima. Locis delectabatur, vel tempestiuos potius, vt inter epulas & peregrinationes, minime tristis atque horridus natura, non vitabat. Vtebatur autem iis ridiculis, quæ sine contumelia ac probro mordentia læderent neminem & sales haberent non ineruditos. Ambiguus libenter & suauiter ludere cum pueris maxime & adolescentibus solebat, hoc ipso etiam exercens intelligentiam illorum ad serias fallacias con-

considerandas & explicandas, iisque enarrandis ingenia eorum acuens, & alios consideratione horum fatigari cernens & explicando interdum falli, istam hilaritatis occasionem habebat. Historias quoque & narratiunculas utiles & memorabiles crebro exposnebat. Moribus omnino placidissimis & mansuetissimis fuit. Comitas in eo & affabilitas prorsus suavis. Si quando etiam vehementius perturbabatur, ut veluti de potestate videretur exire, sedabatur ea cito quasi tempestas, & redire statim ille ad ingenium, ferreque ut antea quæcunque ei imponebantur onera, & exequi quod mandabatur, & efficere quod petebatur. Idque in se vel vitium, vel vitii quiddam simile, ipse agnoscebat. Ac postquam deferbuerat ardor ille, iocans de se meam referebat interdum narratiunculam & rythmos nostrates, quibus perhiberetur quidam percutere & confodere, & esse tamen vim illam sævitix lentam atque mitem. Itaque ut iracundiæ commotio in eo erat & subita & acris, sic nemo illo cognitus est placabilior, quique moderari sibi & temperare affectionibus sciret melius. Animus ipsius in nullos invidia, odio, malevolentia suffusus, ad omnes autem apertus atque simplex admirabilem in modum. Inter docendum interrogare aliquos fere solebat

bat de iis quæ tractabantur. Idque faciebat admodum scite & apposite, quod præcepta artium liquido teneret, & meminisset exquisitè. Fuitque in eo valde bona memoria, non rerum modo & sententiarum sed verborum quoque & orationis. Quæ igitur legendo comprehenderat, ea hærebant in animo ipsius: & si quid forte commentatus perscripserat, paruo negotio idem, verbis propemodum eisdem & eadem serie horum, sine scripto postea pronunciabat. Itaque disputando in responsionibus ad obiecta aduersariorum plurimum valebat, & erat illis metuendus. Id quod non semel, institutis de religionè doctorum virorum dissentientium partium colloquiis, cognitum est. Si res seria ageretur, studio habebat hoc in primis ne esset dubia oratio & sententia incerta. Neque peius quicquam oderat, quam in argumentando versutias & fallacias conclusionum, quæ σοφίσματα, & quam totam non facultatem, secundum Aristotelem, sed voluntatis incitationem σοφιστήν appellarunt. Et sermo igitur planus atque purus & id quod volebat intelligi (intelligi autem volebat concepta animo vera & definita ac certa) significans in studio ipsi erat; & cogitationes contortas argutiis implicantibus irascebatur, ita sæpe grauitè, vt stomacharetur, & obiurgando ipse

ipse peruersitatem callidorum & veteratorum increparet acerbius. Ea autem erat acrimonia illius, ut celeriter deprehenderet talia, neque fere eum quicquam falleret in hoc genere. Vsque adeo autem abhorrebat a dubiis & incertis sermonibus, ut ambiguas figuras orationis in rebus seriis, quamuis vſitatas, ferret iniquius. Ac memini aliquando inter epulas, quum vinum appositum ipsi valde probaretur, iubere illud ex conuiuiis vnum gustare & dicere quid videretur. Qui quum respondisset consueta ἀντιφράσεως forma: esse illud haud malum; pene cum indignatione Philippus Melanchthon: bonum, inquit, vinum sic laudari non debet; quod simplicem & propriam commendationem vsurpandam censuisset. Hoc etsi vulgarius atque leuius, moris tamen in illo huius indicium illustre non putavi pratermittendum. Vsque adeo vero indiferta, confusa, vaga, indefinita, inexplicataque auersabatur, ut quoties cum aliquibus de tempore esset constituendum, semper momentum horæ iuberet nominari. Et iis succensebat, qui intra aliquas horas, duas aut circiter, conueniendum agendumue quippiam esse dicerent. Similiter in mandatis dandis exponendisque negotiis maximopere enitebatur, ut de qua re ageretur, ea res plane & expresse demonstrare-

straretur. Itaque non solebat curare iubendum significandumue aliquid, quod ipse coram narrare, indicare, mandare posset, sed hoc munus exequebatur ipse. Cogitandi & omnia diligentissime expendendi in eo cura pene erat infinita. Itaque in sua inquirere ipse semper, & retexendo studere fieri meliora. Quod si in vno studiorum genere ei perseverare inque illo otiose versari concessum fuisset, haud scio an ea opera efficere & edere potuisset, quæ omnium aliorum elaborationes longe vincerent. Nunc hoc fiebat ut nihil vacui temporis ipsi relinqueretur prorsus, sed iis continuo occuparetur quæ supra indicaui, & nouo quodam mirifico labore insuper defatigaretur. Cœperant enim plerique ipsius & aliorum celebritate moti expetere, ut manu eorum aliquid in suis libellis perscriberetur, quod ostentare possent. Atque aliqui ad tales scripturas chartas conglutinatas & libellos peculiares circumferre: cui rei incredibile est, quantum temporis operæque tribuerit, quum qualis res esset animaduerneret, & negando tamen neminem vellet offendere. Iam quicquid tunc ab aliis Wittenbergæ librorum conficiebatur in omni genere doctrinæ, eorum nihil sine hoc quasi Thesæo, ut dicitur, vel non ipso plane magistro & autore, elaborabatur.

Quæ

Quæ vero in doctrina publica dicebantur, quæ recitanda forte erant solennibus in conventibus, quæ proponendæ aliquarum rerum significationes, ab hoc vno scribebantur. Atque visæ sunt chartæ cum humidis adhuc literis reliquæ afferri iis, qui iam pronunciaré composita ab eo priora cœpissent. Quid dicam de proœmiis? quibus si ab hoc scribebantur, quod commendari omnes & vendibilia fieri opuscula sua scirent, expetebant hæc plurimi; quum interea & externis daretur opera aliqua ipsius, conscribendis iis, quibus illi docendo, concionando, disputando vterentur. Sed hos labores & istas occupationes tantas æquabat vel etiam superabat vnus: litteras, quibus aliqui commendarentur, & testimonia perscribendi, quæ non modo patiebatur facile abs sese impetrari, sed dabat etiam perquam liberaliter & prolixè. Nam & facultates ipsius & operæ, quibuscunque dari illæ possent, in promptu cunctis, neque suum ei quicquam tam proprium erat, quam communia omnia omnibus. Atque est facilitas ista, & hæc ea res, quam supra notauimus & reprehendi posse sumus confessi: quum quidem reprehendi interdum audiuerimus. Deque ea quoniam dubium non est venire in mentem vnicuique, quid culpantes dixisse & nunc dicere credibile

bile sit, mihi silendum esse duxi. Sed vituperatione tamen liberare eum, ut opinor, potest immensa bonitas humanitasque naturæ, & nullum sibi suisque prospiciendi & consulendi studium, & seruiendi aliorum commodis more etiam confirmatum propositum, & benefaciendi gestiens voluntas: ac fortasse etiam flagitatores, partim molesti improbitate, partim assiduitate acres, quos illum quoquo modo absoluerat atque dimittere voluisse, mirandum non est: in quo animus scilicet illis explendus fuit. Itaque pauci, quod optauissent, non fuere consecuti. De nullo autem scribebat quicquam non admodum honorifice, & exquisitis verbis atque sententiis. Ac si causa magna esset, cur hoc facere nollet, nihil scribebat potius; scimusque pecunias sæpe eum aliquibus dedisse, ut illi discederent neque instarent literas petere, & ita quasi redemisse ab eis interpellationes. Quæ cuncta quamuis in vitio esse videantur: ita tamen & ipsa fuerunt indicanda. Ut enim in facie formosa næuum referre expressa illius imago debet: sic narratio de magnis & præstantibus sapientia atque virtute viris labeculam quoque aliquam, si forte adsit, repræsentans, non facere hoc perperam existimanda est. Philippum omnino Melanchthonem mira afficiebat sollicitudo de
euen-

euentu rerum negotiorumque, quorum ille particeps esset factus, & tum maxime quum acciderat, vt aliquid ipse censeret aut suaderet, vsque adeo cauendum esse bono viro statuebat, ne culpam admitteret, neue per errorem quoque aut imprudentiam causam mali daret. Inque his aliquando angoris perturbatio tanta fuit, vt illi pene succumberet. Quum ceteris rebus, & maxime priuatis atque suis, animum satis bonum haberet, vel etiam magnum atque excelsum, qui & iniurias patienter ferret atque adeo contemneret, & in periculis adeundis minime esset timidus. Verecundia in eo tanta fuit ad vltimum vitæ diem, quantam haud scio, an qui in altero cognouerit, reperiatur nemo. Sed interea nihil omnino quod inhonestum non esset neque turpe, quamuis paruum atque humile, facere eum pudere aut pigere. Itaque ea ipsum tractare, agere, exequi multi viderunt, quæ infimi etiam famuli inuiti & grauate administrare cernuntur. Valetudo quum initio esset minus bona, viuentis sub alieno cælo & inusitata ratione cibi & potus vtentis, & corpus valde attenuaretur, & peruigilationibus debilitaretur, quemadmodum diximus; temperantia tamen moderatoque simul & accurato victu illam corroborauit, vt stabili & firma vteretur, ne-

que morbos haberet vlllos infestos, præterquam calculorum a stillicidio vesicæ, quemadmodum Plinius locutus est, (hæc Græcis est λιθουρία & λιθιάσις νεφρική) quorum sæpe acerrimos sensit cruciatus. Non multis annis ante mortem etiam oculorum epiphoris atque lippitudine conflictatus est, & quum spirandi viæ semper patuissent, nescio quæ de causâ nares tandem obstructæ fuerunt: id quod grauissime molestissimeque tulit. Humoris etiam ad lumbos vapores & flatus (qui grauis interdum ægritudinis causam dant tam corpori quam animo πάγη hæc ὑποχονδριακά vocarunt) tentabant eum nonnunquam, vnde doloris nonnihil capiebat. Potus ei necessarius erat, gratus & bonus. Esca qualibet sine fastidio vescebatur. Sed cibos pretiosos & opipare conditos & delicias epularum prorsus oderat. Pisciculos minutos probabat in cibo maxime, & olera atque pulticulas omnis generis expetebat, carnes non item. Et adolescens in contubernio Tubingæ (vbi perpetua consuetudine hordei iuscula cibum communiter capientibus apponuntur) sæpe cum iusculo alterius suas carnes commutauit, vt ipse iusculum duplex alter carnes duplices haberet. A piscibus omnino non abhorrebat, vescebaturque libenter ouis: sed hæc recentia, illos feruentes, af-

ferri

ferri censebat oportere. Itaque in aulis vtrumque esse cibum ingratum solebat dicere, quod neque recentia oua, & pisces fere tepidi apponerentur, quos iocans neque frigidus neque calidos edi debere aiebat. Magnificos apparatus conuiuiorum detestabatur, neque dubitabat libere reprehendere & obiurgare eos qui instruxissent. Ac recorder eum, me præsente, aliquando quodam in conuiuium omnium rerum copia abundante, quum hospes, quemadmodum mos est nostrorum hominum, hortaretur eos qui aderant & Philippum inprimis, vt, quæ potuissent acquiri, iis contenti esse & vesci hilariter vellent, se quidem pro suis facultatibus operam dedisse, vt quam optime acciperentur, sed videre se & fateri parum effecisse, quia nihil quod magnopere bellum esset apponeretur, & quæ huiusmodi alia tunc commemorari solent vtitata dissimulatione: ibi igitur recorder, non sine indignatione eum sermonem Philippum interpellasse, & grauiter monuisse, re manifesta tali oratione non esse vtendum, atque adeo metuendum ne ea ipsa ab æterno Deo animaduерteretur, cui potius gratiæ agendæ essent, quum suppeditante largiter tam multa, tum benigne concedente non modo vsum verum etiam abusum illorum. Sed per-

gamus ad reliqua. Vestitus eum retinebat modum, quo initio fuerat usus. Tunicam semper gestabat, tam domi quam prodiens foras, ut tectum undique corpus esset. Interior vestis consuetudine horum temporum linea duplex fere induebatur, & super eam lanca altera. Quam vestem exeuntes in publicum nunc variam gestant, eius honestam speciem demissæ ad pedes cum manicis nunquam mutavit. Neque passus est persuaderi sibi, ut externis vllis sericis aut similibus vteretur. Pelles tamen non respuit aquilonares illas, quod essent ad calefaciendum corpus efficaciores. De balba voce Philippi dictum iam est aliquid, cuiusmodi & Aristotelis fuisse accepimus; quam tamen Philippi ingrauescens paullulum ætas ita emendauerat, ut nihil audiretur quod offenderet quendam. Sed & iuuenis incedens aliquando alterum humerum detorquere nonnihil solebat. Horum vtrumque qui imitari velent reperiiebantur, quemadmodum & alios gestus: ut manuum, quas inter loquendum mouebat, superciliorum quæ sustollebat. Sed imitati tamen complures sunt meliora atque potiora. His expositis, de studiis ipsius, & quæ huc pertinent, nunc etiam quædam addamus.

XIX. Quum in omnium liberalium studio;

studiorum genere flagrantissima esset cupiditas Philippi Melanchthonis, nihil tamen habuit prius aut antiquius pietate religiosa, quam sanctissime semper coluit, & cui omnes quasi nervos ingenii sui intentos esse voluit. Itaque in eis potissimum omnibus viribus elaboravit, quibus doctrina Ecclesiae Iesu Christi explicari posset. Inque eam partem quam operam dederit, & quid incumbendo effecerit, quum sit evidens neque quisquam fere nesciat, expositione non est opus; præsertim quum longius excurrere necesse esset, quam instituti scripti ratio & modus pati ferreque videatur. Et procedens tamen narratio sua illam serie attinget & assumet. Quum autem requiri ad eam doctrinam Hebraicæ inprimis linguæ cognitionem constaret, quam adolescens discere non negligenter inceperat, hoc consecutus est continuatione studii illius, ut scientiam huius adipisceretur hæud vulgarem, ac potius nullorum facultate, qui hac excellere putarentur, admodum inferiorem. Multumque & sæpe collocutus est, de eius linguæ difficili & obscura tractatione atque notitia, cum Bernhardo Ziglero, qui *Laterensis* a nobis nominabatur, & ad eam docendam Lipsiam tandem fuit accersitus, & apud se cum Crucigero; quos ambos de natura & veritate il-

lius diligentissime cogitare & rectissime iudicare perspexerat. Amabat autem & magnificiebat Ziglerum non tantum propter istam cognitionem & doctrinam, sed quod de omnibus rebus consideratio illius esset accurata & sagax, ingenium autem perquam liberale &, ut ita dicam, candidum, & constantia summa atque fides certa. Cetera studia & constituebat atque ordinabat, & ipse sine intermissione exercebat. Quumque Wittenbergæ exercitationes scribendi dicendique diu sane iam essent pene nullæ, hoc autore cœptæ sunt materiæ rerum utilium scribi & publice declamari. Quum ipse suo exemplo præiret cæteris. Nam tum pronunciauit orationem de legibus, quæ postea edita fuit. Non cessabat autem urgere & sua & aliorum opera assiduitatem doctrinæ publicæ, & crebro veniebat ipse in ea loca & ad illas horas, quibus aliqui docebant, & apud discipulos assidens audiebat profitentes. Quo fiebat ut & hi magis attenti, & existimatio ipsorum melior esset, & discipulorum retineretur frequentia. Quia vero sciebat, omnem humanæ scientiæ veritatem mathematicis disciplinis contineri, neque sine his aut doctrinam certam, aut stabilem cognitionem esse ullam, quibuscunque modis poterat ad has colendas studia iuventutis inuitabat & alliciebat.

ciebat. In quo non parum negotii ei exhibebatur, propter studiorum istius tractatus minus elegantes & quasi blandos: quum ita adhuc traderentur omnia, ut qui non quasi aptus & natus ad hæc per se esset ipse, horrore illo explicationis deterreretur, nedum audiendi professores artium illarum, aut edita scripta legendo, magnopere proficeret. Ut igitur sidera spectantibus nota fierent, & tota ista doctrina clarior esset & quasi venustior, instituit ut Plinii liber secundus enarraretur, & ad illud scriptum applicarentur ea, quæ astronomicam scientiam perficiunt. Quæ esse nemo fere nescit, primum cœli vel potius mundi quandam distinctam descriptionem, deinde omnium orbium & stellarum conuersiones & motus demonstrantem rationem. Quo nomine, & quia integerriumum & optimum hunc virum cognouerat, valde dilexit Casparem Bornerum, cumque eo celeriter necessitudine, postquam in has regiones venerat, coniunctus fuit. Nemo autem Bornero ante illa tempora exquisitius aut industria maiore situs, loca, figuras, ortus obitusque siderum signorumque cœlestium obseruauerat, neque huius contemplationis iter planius ostenderat. Fuit hic omnino vir egregius & multis magnis verisque virtutibus ornatus, qui piis & ingenuis studiis

fundandis tuendisque fortunas vitamque suam impendit.

XIX. De Philippo autem Melancthone, quod hæc mentio requirat, fortasse reliquum sit ut indicetur facultas orationis, & quo in genere eruditæ doctrinæ præstitisse cæteris videatur. Sed hoc quum manifestum perspicuumque sit, quod eius scripta & extent & sint in manibus omnium, me differere esset superuacaneum. Apparet defuisse illi non quidem ingenium, non copiam & vim sapientiæ & doctrinæ, non literarum singularem eruditionem, sed inchoata perficiendi atque eliminandi tempus atque otium. Etsi natura a quadam granditate abhorrens, iudicium voluntatemque ipsius conuertit ad curam potius versandi in quodam castigato & puro atque sano genere orationis, quam in sublimi & vehemente & cuius compositio operosa esset, elaborandi. Omnino autem subtilis & arguta concinnitas, & proprie diserteque eloquendi omnia studium, conueniebat disputationibus doctrinæ & scholasticæ veluti umbræ. Non ille inanibus verbis quasi perstreperere, non a re proposita sermonem abducere, non aliena intexere, sed veluti intra suas ripas flumen orationis coercere. Hæc est in exponendo perspicua, in narrando & ornata satis & copiosa

pioſa, in argumentando acuta neque tamen mollis aut enervata, verum etiam non declamatoria quidem illa abundantia, ſed luculenta brevitare fortis & animoſa, eoſque aculeos deſigens, qui penetrando vulnerent non pungant tantum perſtringendo. Nihil autem eſt in hac ſucatum, nihil inæquale, nihil ineptum, nullum aucupium varietatis quaſi in pictura colorum, nullus tumor, denique ſimplicia ſunt & recta omnia. Vt ſi de horum temporum & noſtrorum hominum puérili adhuc veteris præſtantiæ imitatione tam glorioſe loqui liceat, non dubitem Atticum perhibere Philippum Melancthonem. Id quod eſſet evidentius & clarius, ſi mediocre ſaltem otium ad ſuorum illi limam & expolitionem conceſſum fuiſſet; quæ pleraque omnia non edita ſed effuſa, non compoſita ſed feſtinanter in chartas coniecta, non emiſſa ſed expulſa ſunt, non prodierunt ſed euolarunt, urgente ſcilicet neceſſitate & re poſtulante. Verum ne ſic quidem languent, aut diſſoluta, ieiuna, trita, vulgaria ſunt, ſed quum aſtricta aptis converſionibus, tum membris integris continuata. Vtque fortasſe ſplendor tanquam ſolis aut auri in illis non eluceat, nitor tamen proſecto oſtendit ſe tanquam ſideris aut gemmæ: & vt non quaſi aurea corona conſpi-

spiciantur hæc redimita, pulcherrimos tamen in eis elegantiae & munditiae flosculos licet cernere. Vnum est in scriptis Philippi admirabile, quo haud scio an nostra ætate alius illi iure conferri possit nemo: Sententiae in oratione non modo crebrae & exquisitae, sed adeo opportunæ, & apte suo quæque loco collocatae. In iis autem, quæ ex veteribus assumi & quibus expositio plenior & ornatior & illustrior reddi solet, quas Græci ἀπεκδοχὰς vocant, vicit non modo Philippus studium & industriam aliorum, sed hac solertia cæteram facultatem suam ipse superavit. Quid dicam de exemplis commemoratis & enarratis, & adhuc iis de quibus ageretur accommodatis? In quo genere plurima sunt in medio opera atque monumenta studii & industriæ ipsius. Quid de exquisitis & subiectis rationibus atque causis? In quibus, quod est considerationis & omnino felicitatis cuiusdam singularis, hoc præstabat, ut afferrentur & pertinentia ad propositum atque rem de qua agebatur, & illustrantia explicando doctrinam institutam. Quum studium istud, dum colligit sæpe undique omnia, non solum corripere superuacua, sed aliena quoque attexere soleat, adeo ut aliquando plane ineptum deprehendatur. Hoc autem prudentiæ erat, ne quid admisceret abhorrens
aut

aut etiam absurdum aut certe superfluens, in quo aberraret & vagaretur expositio, nedum contrarium aut dissentaneum aliquid irreperere pateretur. In quo vel indiligentia vel fiducia & erga se fauore, reperiuntur eruditorum quoque aliquorum scripta iustæ reprehensionis crimen non effugere. In originibus nominum scrutandis, inque capiendis coniecturis obscurorum & incertorum, non modo mirifice solers & gnauus, sed etiam felix fortunatusque erat. Neque vetustis nominibus interpretandis, & ad ea quæ his significarentur attribuendis, cuiusquam opera nostro sæculo cognita est præclarior atque melior. Quo studio ad certam rerum & firmam cognitionem atque scientiam vix aliud esse possit efficacius. Vel sine illo hæc potius fluctuat semper & labascit. In iis de quibus consultaretur, aut etiam deliberatis scribendo explicandis & componendis, nemo attentam cautionem illius & dilucidam expositionem vincere immo assequi potuit. Quam autem res operaque ista difficilis & magni momenti sit, norunt illi qui in manibus eam habuerunt & sunt experti. Vidi cognouique ego eum in talibus operibus non modo sententiarum pondera examinantem, sed verba singula quasi aurificis statera perpendentem.

XX. Quum vero natura esset Philippus Melanchthon is, qui vestigando scrutandoque aliquid non facile falleretur, tum eius animum præfagiisse multa & prædicta ab eo quæ eueniunt scimus, & visa somniorum euidencia atque certa plerumque per quietem illi oblata, (quod genus hominum Aristoteles *ἐνθυνοειδέες* vocat) neque fere diuinando hac in parte esse deceptum. Tentabant idem imitando, sicut cætera, alii quoque, & audires passim percunctantes de somniis, & hæc recitantes atque conjicientes & vbique somniantes plurimos, neque personis neque rebus similibus. Sed hæc apponi poterunt ad superiorem mentionem imitationis præposteræ, quum certe exemplum illius multi cum laude & fructu sint secuti. Quod autem hic vniuersæ rerum naturæ consideratione & inquisitione caussarum, quibus illæ continentur, exerceri iuuentutis studia ad religiosæ pietatis & cuiuscunque muneris administrationem functionemque valde prodesse sciret: primum tractando Physica erudite, voluntates commouit & animos excitauit discipulorum, & multis illa iucunda vt essent perfecit; deducendo cogitationes ad Medicinæ artis eam partem, quæ stirpes tractat, & cæteras res, quarum explorata notitia in faciendo artem, non modo voluptatem sed vtili-

utilitatem affert præcipuam, vel etiam ad
spem laudabilium operum incurando neces-
sitatem habet. Deinde ad eam, quæ est Pto-
lemæo pars Astronomiæ seu Astrologiæ, præ-
videns futura & occulta aperiens, de cœli
quadam inspecta facie & animaduerso habi-
tu. (nunc Astrologiam proprie plerique vo-
cant) Ad hanc igitur siue experientiæ seu
artis rationem plurimos commendatione sua
perduxit. Non enim ignorabat fore, ut li-
berali quadam curiositate animi adolescen-
tum facile caperentur, & ita ab aliis occupa-
tionibus abstracti in spacio studiorum utili-
um & bonorum retinerentur. Quinetiam
per iocum solebat manus aduersas aliquo-
rum intueri, & de lineis ibi apparentibus in-
dicare id, quod a quibusque expeti, aut quo
delectari illos sciret. Neque ideo tamen
Chiromantices superstitiosam diuinationem
confirmabat, aut leuitati ineptiisque istis da-
bat operam, vel aliis eas commendabat:
quum constet acerrimum fuisse eum inimi-
cum omnium, quibus falsitatis nugarumue
aliquid implicaretur, vel quorum omnino
fundamenta non niterentur euidente verita-
te & certis rationibus stabilirentur. Dili-
genter autem & accurate rem distinguebat,
neque patiebatur hominum stultitiam & va-
nitatem cum vera intelligentia & recto usu
con-

confundi. Quamobrem cum naturæ consideratione & peruestigatione coniuncta, a præstigiis & falsitate superstitiosa vaticinationum longissime separabat. Et quemadmodum illorum studium collaudabat, ita hanc impiam optimæ & præclarissimæ rei corruptelam vehementer detestabatur. Atque requirebat in veteribus quibusdam & prudentiam & moderationem, qui temere ac intemperanter quum Astrologiam insectati essent, tum vniuersas mathematicas disciplinas reddidissent inuisas. De quo quamvis quum sæpe multumque verba grauiter faceret, tum scriberet luculente; & existebant tunc tamen aliqui, qui illi tanquam auctori approbatorique superstitiosi studii obtretractarent, totamque occupationem huius disciplinæ malam ac perniciosam esse assererent: & nunc etiam liberius a quibusdam hoc nomine mortuo maledicatur. Sed quum manifesta sit falsitas criminis istius, & malevolorum euidentis improbitas, nostram defensionem attexi nihil attinet. Refellit enim hos non modo res ipsa, sed ipsorum etiam odii immanis scelerata acerbitas.

XXI. Ipse sane Philippus, qui de his, quemadmodum paullo ante indicauimus, dixisset scripsissetque, quibus hoc studium & factum eius ad omnes bonos, vel non saltem insigni-

insignite malos, facile defenderetur, nunquam voluit cum vlllo contendere neque dimicare. Id quod etiam fecit in aliis omnibus: contentus veritate doctrinæ suæ, & non ignorans rixando & litigando non explicari quicquam, sed omnia magis dubia, & incerta fieri. Itaque non ille reprehendentibus & interdum accusantibus, sæpe etiam insolenter calumniando insectantibus, respondere; non de suis, quæ notarentur, apologias edere; non etiam pro sua fama propugnare; sed iniuria accepta tacere, & patientia frangere vim aduersariorum. Interea tamen sua attentè considerare & inspicere, & limando reddere meliora. Quæ opera & vtilior Reipublicæ & ipsi honestior fuit, quam si digladiando certamina auxisset, & quibusdam, materiam hanc celebritatis expetentibus, in ea nanciſcenda adiutor fuisset. Itaque & Philippî Melanchthonis scripta, in quæ plane hostiles impressiones aliqui fecerunt, & nunc in manibus & posthac futura sunt: quum pleraque hæc oppugnantium iam euantuerint, & si quid adhuc in huius sæculi leuitate quasi innatat, id breui interituum sit vna cum auctorum nominibus, demersum in caliginem & tenebras sempiternas. Neque rerum isto statu, & conditione tali temporum, & iis ingeniis studiisque hominum, & adeo confusis,

F

per.

perturbatis, difficilibus negotiis, (quod haud fere cerneret quæri veritatem, sed dimicare de suis plerosque opinionibus tanta pertinacia, ut in aduersantes non aliter quam feræ bestię vesano impetu inueherentur) faciendum sibi Philippus Melanchthon putauit, ut decertando & contendendo eas horas absumeret, quæ forte salutarium actionum & præclaræ doctrinæ occupationibus, quibus nihil prius ei neque potius erat, superfuissent: quum præsertim nihil proficeretur hoc labore ad eos, qui non disputare, argumentari, disserere nouissent, neque omnino vellent aut possent pati sese reprehendi aut admoneri; sed maledictis & contumeliis præliantes vterentur, & ita refutarent contra suas rationes adducta, quibus aduersari idem esset ac calvum nutando frontem, secundum prouerbum Græcorum, inferre aiet, & viatorem scrutari vesparum cauernas. Quapropter sinebat vociferari impune quoslibet, & ipse quiescere & tacere, & dicere, sibi quoque in ea parte decretum esse facere, quod filiola aliquando sua se facturam esse dixisset. Quum enim hæc abfuisset quondam domo diutius, & ipse eam interrogasset: quid matri respondere vellet, quæ esset grauius increpatura moram illam? tum memorasse hanc simplice puerilique sententia aiebat, velle se respon-

respondere Nihil. Atque ipse insectantum se iniurias silentio perferre, sibi quoque videri optimum censebat; siue de odio malevolentiaque eorum propria illæ existerent, seu aliorum arbitrio ac voluntati infervirent. Quæ ipse quidem ad dijudicandum relinquens Deo æterno, cuius oculis paterent omnia, non desinebat & voce sua in schola præsentibus, & scriptis absentes docere & salutari cognitione instruere. Impendebatque his quasi sumtus laborum & defatigationum & infinitarum molestiarum, neque valetudinem adeo suam neque vitam ipsam maiori curæ habebat, quam publicam utilitatem & priuata plurimorum commoda. Quemadmodum enim quidam scripsit: Lusciniæ suauissimos cantus magna homines voluptate afficere, ipsi auiculæ nihil prodesse; ita labores, vigiliæ, occupationes, opera huius viri, ad aliorum usum commoditatemque pertinebant, ipsi nihil afferebant emolumenti, neque fructus quicquam ex iis ille capiebat, præter studii industriæque honestissimam voluptatem. Quumque audiret interdum aliquos cupidos certaminum usurpare prætendendo voluntati incitatæ ad rixas sententiam iactatam in scholis etiam Iurisconsultorum: crudelem esse eum qui negligeret famam suam; ridens quærere sole-

bat: Quemnam conueniret existimari eum, qui ipse læderet? Non enim certe isto pacto defendi illam, ad eos saltem qui veritatis amantes essent, & sapientia virtuteque præditi.

XXII. Quia autem de Philippi Melancthonis scriptis mentio facta est, non fuerit fortasse alienum monere, nonnihil horum & viuente eo, quum magis non prohiberet quam iuberet aut permetteret, quumque etiam plerumque ignoraret, & post mortem ipsius, quædam prodiisse neque specie illustria neque re eximia, edita nimirum non tam ad nominis ipsius famam, quam puerilis institutionis vsum, & fortasse aliis quoque de causis. In his sunt explicationes quædam & interpretationes Scriptorum veterum, accommodatæ ad captum auditorum, & ex tempore multa non tam dictata quam effusa & quomodocunque excepta: quum præsertim variis & diuersorum negotiorum necessariis tractationibus occupato, otii temporisque tantum nunquam concederetur, quantum requireretur non ad elaborandum modo, sed cogitandum quoque, vt eiusmodi quippiam efficeretur, quod perfectionis insignem laudem haberet. Quapropter de talibus libellis non ab ipso, sed ab aliis diuulgatis, de ingenio, doctrina, eruditione, facultate Philippi

lippi Melanchthonis iudicium neutiquam fieri conuenit. Sed de iis, qui etiam dicta & sermones quotidianos atque familiares ipsius collegerunt, & ausi sunt cum suis commentationibus diuulgare, quid dicam? Isti vero neque studio neque iudicio neque omnino consideratione aliqua congerentes, quæ ne audiissent ipsi quidem, sed ex aliis fortuito cognouissent, stolidi sua temeritate sese quidem infamarunt inprimis, sed Philippi Melanchthonis nomini maculæ aliquid asperferunt, & multorum bonorum virorum futilem atque nugatoriam, vel indecoram quoque & indignam mentionem inculcantes, indignationem illa offensione concitarunt. Verum in huius sæculi impudente licentia, hoc scilicet ad alia innumerabilia mala apponendum, & dandum est insulsæ hominum vanitati, & existimationis seu luctu quoque aucupio, quum permittantur fiantque impune alia quum flagitiosiora tum sceleratiora. Sed diximus scilicet de his plura, quam necesse fuisse videatur. Quod restat igitur ad id exequendum procedat narratio.

XXIII. Exponemus autem reliqua, annorum serie quos viuendo confecit Philippus Melanchthon, & quid memorabile ei in singulis acciderit, & quibus præcipuis ma-

gnarum rerum tractationibus adhibitus, denique quod curriculum vitæ ipsius fuerit vniuersum. Quibus si quid forte admiscebitur quod exilius & leuius alicui videatur, venia dabitur mihi, qui, fieri potest, vt propter mirificum summi amoris sensum erga Philip-pum Melanchthonem, quædam æstimem carius quam mereantur. Quod si inter aliquos nostris temporibus veræ amicitiaë constans atque firma fuit coniunctio, & inter nos eam fuisse spero plurimis esse notum vel certe persuasum. Diligere ille me cœpit antequam vidisset. Conspectum tanta amoris affectione est complexus, vt excitari beneuolentia illa diuinitus videretur. Neque enim a me quicquam quod eius fauorem mereretur profectum, neque mei ille indigens, neque vtilitatis expectatio vlla fuit. Nisi fortasse ex similitudine studiorum voluntatumque exardescere potuit amor iste, qui familiaritatis & quotidianæ consuetudinis vsu crescens, ad perfectionem veræ amicitiaë progressus est, vel certe imaginem quandam atque simulacrum expressit. Accessit par propemodum ætas, quod triennio tantum integro me esset ille maior. Vt caritas beneuolentiaque nostra spacium ferme æquale ad decurrendum ingredi videretur. Et Philippus Melanchthon, quanquam nuper & Reipubli-

publicæ & suis & mihi ereptus est, non tamen memoria sanctissimæ necessitudinis simul etiam sublata est, neque hæc reliquo vitæ meæ tempore extinguetur, & viuet etiam in posteritate grata semper. Pietas enim illius, & humanitas, virtus, sapientia, liberalitas, constantia, fides, doctrina, amoris causa fuit. Quæ tantæ laudes mortuæ profecto non sunt, neque morientur vnquam. Neque solum mihi in oculis sunt, qui & certius intuendo, & fruendo vberius, penitus eas perspexi, sed ab aliis quoque compluribus & nunc cum admiratione perpenduntur, & posteris notæ celebresque sunt futuræ. Ex quibus, qui recto consilio & spe honesta & laudabili voluntate suscipere aggredique in studiis præsertim maiora voluerit, erit nemo, qui non ipsius cupide & adiumentis operum vti, & exemplum ad sequendum proponere sibi velit. Mea quidem nulla dulcior est cogitatio, ea, qua familiaritatis consuetudo & necessitudinis nostræ vsus, reminiscendo quasi repræsentatur; cumque hoc bono non inuenio alterum quod debeam comparare, in quo mihi de maximis rebus consensio, inque eodem consilium auxiliumque difficili tempore rerum priuatarum, & consolatio sæpe doloris, gratissimæque interdum & plena oblectationis quies fuit. Nemo vnquam sensit
cum

eum esse a me offensum, quum laboris & molestiæ causas ei aliquando me dedisse, ipse nunc quoque ægre feram. Ab eo nihil vnquam contrarium mihi, aut quo vel minima tristitia afficerer, dictum factumue est. Neque est in hac fortuna conditioneque nostra aliis de rebus dicendum, sed domi tamen & foris sic vna fuimus, vt consiliorum rerumque omnium inter nos esset societas. Studia certe eadem communiaque prorsus fuisse & lætor, & gloriari non verear, & in dolore non possum non iucundissime recordari. Quæ quum omnia in animo mihi sint & versentur ante oculos, non nihil lenitur desiderium amissi tanti amici, præsertim quum ille suo omnino tempore decesserit. Quumque de eo narratio instituta sit, si nihil, quod cognitionem meam non effugisset, silentio prætereundum arbitrer, vel ignosci studio meo posse, vel diligentia etiam gratiam haberi oportere existimo. Et vt aliquid mihi memorabile alteri paruum & contemnendum esse videatur, excusare me, quemadmodum opinor, poterit omnibus insitus error de iis, quæ singulari quadam & eximia cupiditate adamauerunt,

XXIV. Etsi autem luctuosa & acerba mors Philippi Melanchthonis omnibus fuit, non suis modo sed etiam extraneis, bonis
saltem

saltem aut non certe improbis; in ea tamen tempora easque res hæc incidit, ut ei non tam longiorem vitam ademisse æternus Deus, quam maturum finem largitus esse videatur. Superavit annum LXIII, quem modo perpauci attingunt. Distracta omnis vita illius fuit ingentibus laboribus & curis perpetuis, & gravissimis Reipublicæ priuatisque negotiis, & expertibus omnis remissionis solatiis. Obiit mortem placide & omnino feliciter, suavissime acquiescens obdormiscendo in eius veneratione, quem semper religiosissime coluerat, Filii Dei Domini nostri Iesu Christi, & spe immortalitatis & vitæ æternæ; hoc ipso exitu e vita beatus, quod declinans præsentem miseriam impenduntia non modo pericula sed mala migrando hinc vitauit. Non cognoscit iam in terris indies orientes nouas perniciosarum rixarum turbas, & inexplicabilium quæstionum controuersias, & maiorum dissidiorum causas, non ambitione animos plurimorum & inuidiæ odiique flammis incensos, non scelera audaciæ ruentis atque præcipitis ad interitum. Non videt præsens ea suscipi & geri, quorum exitus anxie sollicitum animum ipsius sæpissime habuissent. Non audit aut legit indicia & significationes consiliorum actionumque vel absurdarum atque peruersarum,

vel etiam exitralium ac pestilentium. Non spectator est eius furoris, cuius impetum ipse semper valde metuit, ut animorum acerbitate palam erumpente, etiam coniuncti antea studiis atque doctrina dissilirent, & se mutuo gladiis suis pene in oculis aduersariorum conciderent. Atque habitu omnino suo hoc consecutus est, ut non amplius huius aut illius nomen tanquam Pelopidarum, neque rumores nefariorum conatum & audaciæ infinitæ exaudiat. Non adhibitus est ad illa, quæ quum non posset simplicis veritatis assertionem defendere, varias multiplicesque aliorum excogitationes, quibus interpolarentur, & tortuosa quædam veluti emblemata, ferre & admittere fuisset ei instar mortis. Denique effugit alias aliorum criminationes, ut ab his nimium facilis aut lenis aut timidus, ab illis plus æquo pertinax, durus, confidens perhiberetur. Quin etiam aliqui, quod ille profecto in primis dolenter tulisset, veteratorem eum & aliis horribilis ignominia nominibus, impudentissime mentientes, non dubitarunt appellare. Nemo iam obstrepit auribus ipsius exprobrando dicta scriptaue partim insidiosè excepta, partim depravata atque palam corrupta, neque suspicionum malitia præsentem onerat. Atque hæc omnia opportunitate ipsi optatæ mortis ille effugit,

fugit, vt statuendum hoc fit, quum non aliter quam propitii Dei benignissimo consilio ortus fuerit & his temporibus nobisque donatus Philippus Melanchthon, esse eundem bonitate & fauore erga ipsum diuino sublatum, & ademtum ei vna cum vita sensum metumque calamitatum earum, quæ statim mortuo illo affligere religiosæ pietatis optimarumque disciplinarum & artium studia atque doctrinam grauius atque turbulentius cœperunt. De qua quid deinceps futurum sit, vel omnis causâ, vel ne seniles desperationes inculcasse & materiam cuiusdam quasi declamationis videar quæsiuisse, plura non dicam, commendans nostræ ætatis salutem & prosperitatem custodi generis humani Filio Dei, Deo æterno, & ei permittens cætera. Atque ita, vt me facturum iam dixi, vitæ cursum, quem in terris confecit Philippus Melanchthon, serie annorum persequar enarrando.

XXV. Anno Christi Iesu M. D. XXIV. proficisci illi in patriam placuit. In quo tamen ipso etiam non tam suæ cupiditati quam arbitrio amicorum morem gessit. Comitem habuit eo itinere Wilhelmum Neseum, cuius familiaritate iucundissime utebatur, & quem propter ingenii bonitatem, prudentiam in iudicando, doctrinam, multarum

tarum rerum cognitionem atque experientiam, & magni faciebat & valde diligebat. Sequebantur Philippum duo adolescentes, Franciscus Burcardus Vinariensis & Iohannes Silberbornerus Berbetomagensis, quorum vterque postea dignitate & honoribus longissime processit. Burcardus enim illustrissimis Principibus patriæ suæ grauissimas & præclarissimas operas dedit, & rebus difficilibus atque duris præstitit fidem & navavit studium. Silberbornerus quum Iuris-consulti personam egregie tueretur, aduersa valetudine quasi apud se est detentus, qui si corpore valuisset, honorum laudisque tantum assequi potuisset quantum collibuisset animo suo. Sed artuum cruciatus, quibus crebro affligebatur, longius eum progredi passi non sunt. His & ipse me tunc adiunxi, sumusque vecti equis omnes, eo quisque quem potuit nancisci. Et venimus Lipsiam, quo die obiit mortem Petrus Mosellanus, qui corpore fuerat perimbecilló & parvo, quum ingenio & eruditione doctrinæ excelleret. Ad eum morientem accessimus Philippus & ego, & hoc luctu tristi acerboque sumus affecti, ille amico eximio, ego carissimo præceptore deinceps cariturus. Erat Nefeno veniendum certis de causis Francofurtum ad Mœnum, Illuc igitur primum
sumus

sumus profecti, & accepti tractatique publice priuatimque officiose & benigne. Quum autem hoc itinere placuisset transire regionem eam, cui nomen fagi Buchononiam fecerunt, mansimus vnam noctem Fuldæ, vbi tum Crotus Rubianus & Adamus Crato degabant. Qui aduentu nostro affecti magno gaudio, omnia humanitatis & hospitalitatis officia prolixè nobis præstiterunt. Ibi etiam certi aliquid primum cognouimus de morte Vlrici Hutteni; quem vt viuum magnificare & admirari propter doctrinæ eruditionem & præstantiam ingenii, sic ab illius natura vehemente & excelso animo & voluntate ad nouas res propensa, quam consuetudo etiam quorundam immoderationum incitarat, non nihil timere Philippum Melanchthonem licuit animaduertere. Intercesserat Hutteno cum Croto Rubiano singularis vsus a prima adolescentia, quo autore vel certe adiutore reliquit ille contubernium Fuldanum, in quod pene puer magis disciplinæ quam religionis causa datus esset, & Coloniam Agrippinam ad optimarum artium & literarum studia percolenda profectus est. Postea venit in Italiam, vnde eum reuertentem in patria mea primum vidi anno Christi, vt meminisse videor, M. D. XVII. Celebrabat autem fama non eruditionem modo illius, sed

sed fortitudinem quoque gloriosi facinoris prædicatione: quod Gallicæ gentis quatuor Viterbii, quo forte tunc Roma ille excurrisset, (quum eodem diuertisset a Rege Gallorum legatus quidam ad Pontificem Leonem contendens) orta rixa ac certamine, profligasset dimicando, vulneratus quidem & ipse desertusque a socio itineris illius, quemadmodum eum audiui Fuldæ narrantem anno Christi M. D. XIX. secutus conferentem se Erphordia in patriam Adamum Cratonem summum nostrum. Vbi iterum tunc Huttenum vidi, & cum eo aliquot dies familiariter sum versatus, decedente ex aula Moguntina in qua circiter biennium manserat. Adiunxit deinde se Francisco Siccingensi, quum quidem & antea implicatus fuisset motui bellico, quem fecerat in agro Wirtenbergenfi Huttenica gens, interfecto populari ibi quodam suo, & rei militaris studium præ se ferret, & repræsentante se imagine armata maxime delectaretur. Tandem hic postremo grauis querelæ scripto contra D. Erasmum Roterodamum edito, quod ille parum sane molli spongia abstergere studuit, non procul ab vrbe Tigurina morbis confectus, quibus frequentibus & acribus laborauerat, mortem obiit, annos natus XXXVI. Fuit nobilitate generis antiqui inprimis, clarus, doctrinæ

næ eruditæ princeps, impatientissimus iniuriarum, libertatis immodice cupidus, non prorsus alienus a scuitia, quæ etiam vultus acerbitate & minus clemente interdum oratione indicabatur. Sed neque opum abundantia, neque corporis, in quo admodum pusillo atque debili inerat animus ingens ac ferox, viribus pollens: vt de eo mihi sæpe in mentem venerit versuum, quibus perhibetur: si respondissent vires atque potentia Demosthenis proposito & solertiæ, nunquam fuisse futurum, vt in Græcia summa rerum potiretur Macedo. Nam si consilia & conatus Hutteni non defecissent quasi nerui copiarum atque potentiæ, iam tum mutatio omnium rerum extitisset, & quasi orbis status publici fuisset conuersus. Et dolore autem tum Philippi Melanchthonis ac nostri, & deploratione quoque Croti, quasi iusta facta sunt Hutteno. Deque eo in itinere versus a nobis compositi, & refutati quidam mortuum lacerantes. In quibus quum Luscinus quispiam nominaretur, vulturem hunc potius esse epigrammate quodam Melanchthonis dicebatur. Venimus autem Fulda die tertio Francofurtum, vbi reperimus Ludouicum Carinum, cuius tum suauitate Philippum Melanchthonem admodum delectari animaduerti potuit. Postquam in patriam
venit,

venit, vnaque nos omnes, eas ædes petiimus quas incolebat vitricus ipsius. Ibique diuertimus apud matrem Philippi. Sed ego, comitibus adolescentibus duobus quos supra nominaui, incensus cupiditate videndi Erasmus Roterodamum, perrexi Basileam. Et inde reuersus cum discedente Melanchthone (cuius aduentus quemadmodum suis fuerat lætissimus & iucundissima consuetudo, ita abcessio triste desiderium reliquit, matri præsertim & fratri Georgio) eo itinere Eytelbergam veni. Vbi Hermannum Buschium vidimus, qui Philippum iuuenem senex amantissime cum quadam reuerentia complexus, nobis adolescentibus se ita quoque dedit, vt facile intelligi posset, affectionem beneuolentiæ & amoris erga nos ipsius esse singularem. Academia etiam Eytelbergen-sis studium erga Philippum Melanchthonem suum officiosissime & benignissime declaravit.

XXVI. Reuertentibus nobis non longe Francofurto obuiam factus est illustrissimus Princeps Hessorum Philippus, admodum adhuc iuuenis, proficiscens ad ludos indictos Eytelbergæ, vbi Principes Germaniæ conuenturos esse aiebant tredecim, & affuturum quoque vel potius iam adesse Cardinalem Campegius. Is quendam ex suis, qui

qui nomen sibi Nauseæ imposuerat, Germanico significationis illius in Latinum mutato (patriam enim habuit hic in montana regione Pabepergensi ad Mœnum.) Eum igitur ille ad Philippum Melanchthonem miserat, ut cum ipso, quasi sua sponte accessisset, de controuersis ortis colloqueretur, & sententiam voluntatemque ipsius exploraret; utque etiam polliceretur prolixè, si Philippus desertis partibus ad se transire veller. Eum Philippus cum simplice & breui responso dimiserat: ea quæ statueret & sciret esse vera, nullius mortalis respectu aut gratia neque spe emolumentum aut ambitione amplecti se & defendere, neque ab iis, qui illa docendo protulissent & nunc asserendo confirmarent, vnquam separaturum suas rationes. Quod autem adhuc fecisset, ut doctrinam puram & sinceram diligentia studii sui præstaret sine obrectationibus & pugnis, in eo se esse perseveraturum. Hortari omnes, qui in hoc genere communi tranquillitati & saluti consultum vellent, ut ad sananda vulnera, quæ amplius regi non possent, consilia atque operas conferrent, & quorundam furiosam audaciam coerceri studerent, qui exulcerata veluti infestis vnguibus lacerare non desisterent. Hoc nisi facerent, & ruere si mallent, videndum eis ne prolabendo ipsi primi præcipita-

G

rentur.

rentur. Itaque tum Nausea dissimulatis omnibus abierat. Sed Princeps Hessorum quum in Philippum Melanchthonem, vt dixi, incidisset, de aliquorum fortasse indicio, qui scirent eum in patria fuisse, suspicatus illac eum reuerti, & animaduertens equitatum nostrum esse minime equestrem, idque quod res erat arbitratus, ad Philippum Melanchthonem aduehitur, & nunquid ipse sit Melanchthon, interrogat. Ille se esse respondit, & honoris causa de equo descensurus iubetur a Principe in equo permanere, & conuerso itinere secum pernoctare, cupere enim se de quibusdam cum eo loqui, habere autem bonum animum neque quicquam metuere. Philippus & a Principe nihil sibi se timere, respondit, & eum esse, de quo quid fiat, non multum referre videatur. At enim, inquit arridens, si tamen te adducam & tradam Campegio, haud illi ingratum me facturum crediderim. Ita Philippus tum propter Principem pergens, ad quædam fortuita interrogata respondit & breuiter neque explicate. Non enim aliter tum poterat. Principis etiam animus nondum magnopere res illas curare, atque esse aliis cogitationibus intentus videbatur. Sed quum Philippus enixe peteret, vt sibi suum iter exequi cum bona Principis gratia concederetur,

tur, impetrauit tandem ne abduceretur longius: eaque conditione Princeps illum dimisit, vt de questionibus, quas audiisset moueri, reuersus domum aliquid diligenter conscriptum curaret quamprimum ad se perferendam. Percontatus etiam est de commeatu, & iussit iter fieri per loca suæ potestati subiecta, & mandata dedit de visita deductione in suo territorio. Ex quo postea per iocum, nescio qua sententia, Princeps ille discipulus Philippi fuit a quibusdam appellatus.

XXVII. Reuerso Wittenbergam Philippo Melanchthone, nobisque cum ipso, inuflus est acerbissimus dolor, ex tristissimo casu mortis Wilhelmi Nefeni, qui lintre piscatoria traiecturus Albim, id quod sæpe ab eo recreandi animum gratia factum fuerat, quum impegisset illam latenti sub aquis arboris trunco, de improviso vacillante inflexaque in latus lintre, excidit & in ane est suffocatus; quum quidem eo die post prandium paullulum consopitus, talem speciem per somnum oblatam vidisset, offendentis linitris & fluctuantis, & prolabentis sui ipsius in fluvium. Id ipse aduentanti tum Philippo, qui crebro accedere eum soleret, narrauit, deridens cum iocis somniorum vanitatem. Recordati & nos fuimus, quid in itinere ac-

cidisset. Est oppidum Hefforum Træsa, vbi
quum pernoctassemus, mane exeuntes peti-
vimus præterfluentem amnem aquationis
caussa. Dumque ibi Philippus Nefenusque
& ego, cæteris prouectis donec equi biberent,
moramur, conspicit Nefenus tres coruos in
proximo colle & ore & alis sonos gestusque
edentes singulares, quasque tripudia facien-
tes. Quærit igitur ex Philippo, quid por-
tendi augurio illo existimet? Quid enim,
inquit Philippus, aliud, quam vni ex tribus
nobis propinquam mortem. Hoc dicto
fensi grauitè percuti animum meum & me
vehementer perturbari, quum Nefenus ioco-
se eludens illud ita hilaris pergeret. Atque
tum quidem veritus fui interrogare Philip-
pum, quid in mentem venisset ei vt de osci-
nibus istud interpretaretur? Sed postea nar-
rauit se existimasse, qui tam imbecilli esset
corpore & valetudine mala, non posse esse
vitam suam diuturnam. Et eo sane itinere
interdum non modo grauitè, sed periculo-
se etiam, insomnia & peruigilationibus fue-
rat conflictatus. Neque hæc eo commemo-
rantur, quasi aut obseruationi supersticiosæ
volatus gestusque auium aliquid a me tribua-
tur, aut Philippus Melanchthon tales diuina-
tiones vnquam curarit; sed vt intelligatur,
mirabiliter interdum quædam accidere, quæ
neque

neque deridenda sint, & post euentum varias cogitationes commouere soleant. Scripsit de morte Nefeni epicedium optimus & doctissimus vir Iacobus Micyllus, & extant quum nostra tum aliorum epitaphia.

XXIIX. Auxit tristitiam hanc nuncius crudelissime hoc anno interfecti viri grauis atque constantis, & doctrina egregie instructi, magnanimi quoque, sed & sapientis & perquam modesti, Henrici Sutphanienſis, qui in Ditmarsia (quo acersitus venerat ad cœlestem veritatem demonstrandam populo illi, & concionandum de Euangelio Iesu Christi) inopinato comprehensus & excruciatuſ immaniter horribili supplicio necatus esset. De cuius mortis autoribus & architectis hoc reperiēbatur, vt fraude & malitia vicini sacerdotii eam oblatam esse optimo & sanctissimo, viro dubitaret nemo. Valde hunc Philippus Melanchthon dilexerat, & fuerat aliquando Wittenbergæ carus vniuersis, & celebravit eundem Philippus mentionibus honorificis, quas inseruit scriptis suis. Post Nefeni hunc casum placuit mihi paullisper secedere, & tunc ad clarissimum virum Georgium Sturciadem summum amicum me contuli, qui in patria forte erat Annabergæ. Et Wittenbergam reuersus non diu illic mansi, reuocatus in meam patriam.

Quo profectus sum circiter Idus Octobris.

XXIX. Interea Andreas Carlostadius nonnihil vel ipse dedit turbarum, vel non, cauit certe neque prouidit ne quid daretur. Et tum quidem Wittenbergam reliquit, ita ut similitatem cum Wittenbergensibus sibi esse fateretur, & non dubitaret aliqua notare & reprehendere, quæ ibi docerentur. Deque iis etiam edita scripta quædam fuere. Præ se ferebat tamen studium de illis ipsis cum Luthero & aliis differendi, & suæ quædam rationes si explicarentur, & adimerentur dubitationes, se libenter in ipsorum sententiam concessurum & denuo cum iis coniuncturum esse. Sed hæc dum mouentur, & incipiuntur actiones, & obtinetur ut tuto Carlostadio quos velit conuenire liceat, interuenit calamitas seditionis plebeix. Postquam tamen & ipsam impetratum fuit ab illustrissimo Principe Iohanne, qui fratri Frederico successerat, ut in Saxonice regionibus domicilium habere Carlostadio liceret. Qui aliquantis per antequam in Heluetiam abiret, priuatus, vixit Chembergi. Ita iam progrediens expositio nostra annum Christi M. D. XXV. peruenit, qui quasi inundatione quadam seditionum fatalis fuit toti Germaniæ; quum quidem de siderum superioris

ris anni congressu, astrologi plerique eluines aquarum prædixissent. Sed hæ fuerunt sanguinis, & horribilium facinorum, de quibus modo scribendum non est. Harum rerum scelerata consilia & actiones nefariæ quibus angoribus confecerint animum Philippi, quæ affecerint solitudine, quantopere excruciendo affligerint, verbis exprimi nequit, & de literis ipsius ad amicos missis & aliis scriptis perspicui potest.

XXX. Euenit autem vix sedatis illis tam turbulentis & periculosis motibus, vt Martinus Lutherus vxorem duceret, paullo etiam ante mortuo Friderico Principe Septemuiro creandis Imperatoribus Romanis. Ex quo facto maximum dolorem cepit Philippus, non quod illud damnaret, sed quod occasionem dari cerneret inimicis & maleuolis, quos habebat Lutherus & numero complures, & opibus potentiaque præstantes, acerbius infectandi & liberius maledicendi ipsi; quum præsertim, quicumque hoc facere voluissent, adiuuari atque instrui tempore animaduertent, in quo plurimum ad omnium rerum momenta situm esse constat. Verum quum & Lutherum ipsum iisdem cogitationibus nonnihil conturbari intellexisset, non modo suum est dolorem moderatus, sed illum quoque consolando erexit, & tristitiam

molestiasque eius hilaritate colloquiorum leuauit, & ad pristinam eum alacritatem reduxit.

XXXI. Eo anno proficiscens cum nobilitate generis, pietate, virtute, sapientia præstantissimo viro Iacobo Fuxio, ordinis equestris in Franconia, cui Prussiam videre placuerat, quod post oppressos seditiosos magna esse vbique confusio rerum, & quorundam ferox insolentia, & nihil vspiam amantem patriæ & studiosum veritatis & alienum ab inhumanitate oblectare posset: Tunc igitur Wittenbergam veni, & reuertentes cognouimus interea allatas literas fuisse scriptas ad Philippum Melanchthonem a Senatu vrbs Noricæ, quibus accersebatur ad deliberationem de ludo literarum apud se instituendo. Norimbergæ tum principes Senatus erant Caspar Nucelius, & Hieronymus Ebnerus, & Lazarus Spenglerus nomine quidem scriba senatorius, sed reuera consiliorum omnium fere autor ac gubernator. In Nucelio vige-
bat animus altus atque magnus, & ita prudens, vt neminem audiuerim, quum sermonibus interfuerim de eo plurimorum, qui in isto genere ciuilis rationis ac facultatis quenquam præstantiorem illo cognouisse diceret. Quæ secum ipse deliberando e Republica esse statuisset, ab iis nullius odio aut amore abdu-

abduci se patiebatur. Non obtineret aliquid & vinceretur aduersantum numero, at ipse dissimulare studium & propositum suum, & facere quod omnes cuiuscunque artis non vulgariter periti seruant, vt permanente eadem de sui operis absolutione sententia, non facile mutant efficiendi illud institutum modum, neque desistant ab experiendi conatu. Ita que quum iam Nucelius aliquid ab iecisse aut reliquisse existimaretur, comperi alio tempore occasionem eum nactum, ex improviso de eodem referendo perfecisse, vt approbaretur discernendo. In Ebnero ingenii maior erat mansuetudo & placidior quietiorq; mentis habitus: innocentia cura summa, & bonæ conscientia custodia. Vt horum duum quasi copulationem ciuitati illi ad felicem statum Deus largitus esse videri possit, temperamento quodam optimarum quidem naturarum, sed quarum tamen vtraque aliquid haberet alterius dissimile & suum, administrationem Reipublicæ fortunans. Spenglerus autem & vsu rerum, & quadam etiam inchoata doctrina excellebat, explorataque & perspecta multis difficultibus & arduis negotiis fide atque industria, cum inextincto ardore asserendi defendendique vera & recta tam ad Deum quam homines. Itaque nihil erat ei antiquius religionis sinceræ & puræ instauratione. Quod autem

intelligeret & perpenderet animo suo, quantum esset situm ad spem omnis prosperitatis rerum diuinarum & humanarum, & salutarium in hac vita actionum, in puerili institutione; hortator & instigator fuit Senatui, ut peritos aliquos bonarum artium & literarum reperirent, qui operam darent suam ciuitati in pueritia erudienda, quibusque congregatis eximius quidam apud se ludus aperiretur. Quumque illi duo, quorum virtutem & sapientiam veluti adumbrando paullo ante indicauimus, sentirent idem, non magno negotio effectum fuit, ut Philippo Melanchthoni publice scriberetur, & de eius sententia atque iudicio totam rem constituendi causa, aduentus ipsius peteretur. Qui quum recusandum iter istud non putaret, & potestatem faciendi impetrasset a suo Principe, ita est illud huius anni autumnus ingressus, & nos sumus vna profecti: eoque itinere Pabergæ apud meum patrem habui hospitem Philippum Melanchthonem, quum in illo comitatu esset egregius generosæ stirpis & mentis iuuenis Melchior Fronspergius. Norimbergæ autem hoc actum est, ut proximo anno rediret illuc Philippus Melanchthon, & adduceret Eobanum Hessum: quum iam conuenisset, ut Micaelus Rotingus & ego ibidem illo tempore adessemus. Fuitque anno
Chri-

Christi M. D. XXVI. nobis magistris inchoata publica doctrina bonarum literarum atque artium in ea vrbe, adiunctusque mox nobis Iohannes Schonerus Mathematicus. Laborabat Philippus vt socium haberemus operarum scholasticarum doctissimum virum Sigismundum Gelenium, gente Bohemum, qui ante annos aliquot ex Italia, vbi patrimonii totius pecuniam in necessarios studiorum sumtus impendisset, reuersus, aliquantisper vixerat apud Philippum, gratissimus huic hospes & nobis sodalis iucundissimus. Sed nescio quæ res illum Basileæ, quo tunc ad Frobenianos se contulerat, detinuerit: vbi & ad senectutem vxore ducta peruenit, & in literis bonis operam nauauit, vir honesto loco natus, & vtriusque linguæ peritissimus, & valde ingeniosus, & mirabiliter diligens.

XXXII. Hoc ipso anno & curarum nonnihil & molestiæ aliquid ex me percepit Philippus Melanchthon, cuius sollicitudines de amicis essent ingentes, præsertim iis in rebus quarum vel minima ex parte autor ipse extitisset. Fuerat decreta legatio ad Carolum V. Imperatorem Romanum, qui in Hispania illo tempore coniugio operam dabat, quum duxisset Lusitaniæ Regis Emanuelis filiam. Ad hanc legationem obeundam quatuor dele-

delegerant, inter quos præcipuus erat generosus & nobilis Comes Albertus Mansfeldensis, apud quem quum facta aliquando de me a Philippo mentio fuisset, & ille secum aliquem esse vellet, qui loquendi scribendique Latine usum quendam haberet, conditio mihi vna proficiscendi ita lata fuit. Quam quum iuuenis ætate & animo mores externorum cognoscendi cupido minime repudiandam putarem, obstitere mihi quædam ad quæ expedienda consilio opeque illius indigebam. Itaque nonnihil laboris mea causa tunc Philippus suscepit, & procedente, ut credebatur, itinere solitudine de me affectus fuit maxima. Sed quum ventum fuisset Eslingam, ubi procures Imperii congregati dare mandata & absolvere legationem debebant, conversa res fuit, & visum illo itinere ad id destinatis supersedendum, neque Cæsarem tunc missis legatis interpellandum, & quæ significari placuisset literis exponenda esse. Reversi igitur Norimbergam sub huius anni exitum, nonnihil, quemadmodum existimabatur, periculi vitauimus, & anxietate sua Philippus est liberatus. Sed sequens propter nostras ærumnas grauius illum afflixit, præsertim gaudentem indicio literarum, quibus certiores eum feceram de consiliis actionibusque coniugii mei. Hanc enim lætitiā tristis-

tristissimus casus calamitatis a fratre meo acceptæ contaminauit. De quo, rebus illis iamdudum compositis, & quia renouare ingentem dolorem & sæuissima vulnera quasi refricare non lubet, plura dicenda non sunt. De Philippo Melanchthone hoc prædicare debeo, neque laboris vllius defatigatione retardatum, neque formidine vllorum deterrium, neque metuentem flagitationum offensiones; & hos illosque appellando, & itineribus sese defatigando, & consulendo, & deprecando, facile declarasse quanti nos faceret, & quid in amicitia fieri oporteret suo exemplo demonstrasse. Sed & hæc omitantur, ne exequi & texere narrationes de me, non de illo, videar. Non diu ante finem huius anni patrem ego amisi meum, annos natum LXXXI, magis aduersorum mole quam morbo oppressum: qui luctus Philippo Melanchthoni mecum communis fuit. Estque ille me tunc consolatus amantissime scripta epistola. Quæ, si videbitur & res feret, vna cum aliis aliquando proferetur in lucem.

XXXIII. Annus Christi M. D. XXVIII. pene obruit Philippum consultationibus & curis de maximis negotiis & rebus difficillimis atque grauissimis & præsentē discrimine plenissimis. Quæ tempestas vt subito extiterat, sic

fic statim abiit. Sparsa enim fama, & delato indicio conspirationis cuiusdam, ad eos vel coercendos, vel in ordinem redigendos, qui ausi fuissent ritus pristinos religionis nostræ immutando veluti secessionem quandam facere, Principum quorundam animi iracundia & dolore exarserunt. Sed illustrissimus atque præstantissimus pietate, virtute, sapientia & optimus Princeps Iohannes, Ernesti Filius, Friderici frater, Iohannis Friderici pater, (quæ ex hac domo præclarissima nomina nostra ætate pulcherrimis laudibus & summo splendore effloruerunt) Dux Saxonum, vnus ex Septemuiris Imperii Romani, clementia atque mansuetudine operaque & studio suo, iam exorientis belli exitiale incendium restinxit, & Germaniam periculo, omnes metu liberauit, quum se eum praberet, cuius virtutem & integritatem & abstinentiam inimici quoque admirarentur & laudarent. Sed ista a nobis enarranda hoc loco non sunt. Eodem anno & laboriosæ & inuidiosæ res occupatum tenuerunt Philippum Melanchthonem. Quod enim multa inordinate & perperam in administratione rei ecclesiasticæ fierent, inspicere iussit illustrissimus Princeps Dux Saxonie Iohannes statum Ecclesiarum ditionis suæ. Huic negotio & ex nobilitate quidam primarii,

marii, & cum aliis Philippus Melanchthon præfectus fuit. Plurima ibi comperta sunt, ad quæ respectu maturo opus, multa deprehensa vitia, quorum emendatio necessaria esset. Neque breuiter dici potest, quantum boni illa inspectionis opera diligentiaque effectum fuerit, quum & peccata aliquot annorum corrigerentur, & fulcirentur ruinæ multis in locis labefactarum Ecclesiarum, & prospiceretur in posterum incolumitati illarum. Complexus tunc est Philippus doctrinæ summam perspicua breuitate, & compendio memorabili, vt certo scirent docentes in Ecclesiis regionum illarum, quid sequi deberent, neu diuersa & dissentanea traderentur. Qui libellus maxime & utilis per se, & tempore necessarius, non caruit obtrektoribus variis; quorum aliqui requirerent neruos & vim contentionum, alii dicerent prodi causam, rursumque libertatem eripi & adduci in seruitutem homines. Nam autore & monitore Philippo aliquid tunc de disciplina & vita nonnihil dissoluta constitutum, & eo libello cum fidelissimis præceptionibus & salutari doctrina perscriptum fuerat. In quo si aduersarii tantum errassent, ferri poterat; sed coniunctos in causâ, non tam iniquos certe iudices neque censores immites esse oportuit. Verum euitas plerorumque talibus tem-

temporibus perspicitur, cognosciturque quam in paucis & studium veritatis vigeat, & sententia certa sit atque firma. Philippum quidem labascere, qui eadem placide exponeret quæ ab aliis vehementius disputarentur, rati aduersarii egerunt cum eo ut ad se transfiret, & condiciones tulerunt defectionis, ut putarunt haud, respuendas, quum interea apud quosdam suorum quoque ipse oneraretur suspicionibus, & invidia odioque premeretur, & hanc mercedem acciperet studii, diligentia, laborum, fidei suæ.

XXXIV. Annus proximus Christi M. D. XXIX. quo matrem quoque amisit migrantem ex hac vita, & ipse mirifice exercuit Philippum Melanchthonem, propter actiones contuentus Spirensis, quo cum illustrissimo Principe Duce Saxonum Iohanne ille venerat. Erant res multiplicibus & variis modis exulceratæ, & vndique magis impendebant malorum incrementa, quam subleuationis aut prosperitatis spes ostendebatur. Et tantis in miseriis Reipublicæ, controuersiisque ortis iis, quæ capitalia odia Ordinum quum iam excitauissent tum adhuc alerent, non tam hoc alienatis inimicisque animis dissidentes agere videbantur, ut explicatis dubiis, & quasi decidendo occasione discordiarum remota, sita diuulsæ separatæque partes

tes benigna pacificaque compositione rursum iungerentur, quam veluti dedita opera irritare sese mutuo, & odio quietis diffidia vetera confirmare, & his alia addere, suamque vrgere perniciem, perinde ac si impendens exitium auerti nollent. Quum autem his similia aliis etiam fatalibus temporibus orbisque terrarum locis acciderint, fortasse liceat consolatione hac, quamvis infirma & misera vti: haud tibi soli, &, ferenda sint illa patienter. Vtinam præteritis omis- sis, quamvis graua & intolerabilia ea quibusdam esse videantur, non pudeat aduersis doceri, & libeat cauere providereque, ne priores difficultates, vt lenissime dicam, nouis aliis cumulehtur. Quod adiuuante Filio Dei, pacis sinceræ largitore, esset in proclui, si illius voluntati seruirent studia hominum, & non indulgeret quisque animo suo. Neque me fugit, a nonnullis Philippi Melanchthonis anxias sollicitæ mentis curas sæpe esse reprehensas & plane vituperatas, tanquam nimias & immodicas, & timiditate quadam desperata neque Deo æterno gratas & hominibus odiosas ac contrarias, quæque susceptis interdum rebus vtilibus officerent. At ille neque ignauo metu, neque desperatione culpanda, quorundam vehementiam non probabat, sed ipse erat attentior atque cir-

H

cum-

cumspectior, veramque considerationem adhibebat, & ne temeritatis iustum crimen vilo incepto subiretur, præstandum esse iudicabat. Neque negabat, se intuentem præterita & contemplantem præsentia, non parum interdum vereri quid denique futurum esset, & ea cura sollicitudineque angi animum suum fatebatur. Quod quibus vsu non veniret, eos non tam fortes quam nimis audaces, vel nullo sensu etiam humanitatis præditos, videri posse arbitrabatur. Vt autem fabula narrat quendam, qui cæcus esset, per ponticulum angustum sine trepidatione transiisse, quum alii videntes & periculum intelligentes idem facere non possent; sic profecto prudentis animi cogitatio semper in cautione timida est, quum nimia fiducia alii quamplurimi admodum sæpe insolentes ferocesque esse videantur. Ac memini me aliquando perturbatum Melanchthonem hortari, vt illas curas deponeret & rejiceret, secundum præceptum Dauidicum, in Deum æternum. At ille, si, inquit, nihil curarem, nunquam implorarem Deum: quum autem curas finiat religiosa pietas precibus, nimirum expers esse earum penitus illa nequit. Et curis igitur ad preces impellor, & precibus curas depello. Diligentia sane & circumspectio, cura, attentio Philippi Melanchthonis

thonis non probabaturæque omnibus, quum reperirentur, qui ad voluntatem sensumque aliorum iudicia sermonesque suos perfacile inclinarent, & ideo grati acceptique essent iis quibus assentiebantur vel etiam assentabantur. Philippus vero qui in cupiditate benefaciendi quamplurimis, & commodis aliorum seruiendi, ad res suscipiendas promptus paratusque esset, consulendo autem agendoque quum perquam sollicitus tum propter summam fidelitatem nimis etiam anxius de euentu, nonnunquam liber quoque tam monendo quam reprehendendo, cauere non poterat, quin aliquos offenderet, non etiam nullos a se plane alienaret.

XXXV. Non debui hoc loco omittere, quod compertum haberem, qui & ipse tum salutandi Philippum Melanchthonem gratia Spiram venissem, accidisse optimo & elegantissimo atque doctissimo viro Simoni Grynæo. Tametsi me non fugiat, & ab ipso Melanchthone esse eam narrationem insertam libro cuidam ipsius, & sciam de hac re quosdam ita locutos vt ficta, quosdam vt nugatoria. Mihi quidem minime superstitioso, & ei tamen, qui nunc etiam numinis diuini vim & efficacitatem in terris aliquando cerni non dubitem, haud videtur illa extenuanda nedum deridenda.

Quæ
sefe

fese ad hunc modum habet. Eytelbergæ Grynæus tunc, vbi ducta vxore confederat, optimarum disciplinarum & artium doctrinam profitebatur; quum autem ceteris in partibus philosophiæ non facile ei parem reperires, tum mathematicarum scientiarum erat peritissimus. Visum fuerat huic quoque Spiram vicinam venire, vt cum Philippo Melanchthone paullisper versaretur. Ibidem aderat & Faber Constantiensis, qui magnavehementia resistebat puriori ecclesiasticæ doctrinæ, & in hac vitiorum emendationi. Erat quædam Grynæo cum hoc necessitudo antiqua, qua fretus accedit hominem & cum eo primum aliis de rebus familiariter colloquitur, deinde & sermones infert de iis quæ erant in manibus. Monet hortaturque ne veritatis hostis esse pergat, neu sese non modo cum eam oppugnantibus coniungat, sed his etiam autorem ducemque præbeat. Disputat cum ipso libere, confidentius quoque aliquid dicit. Faber, qui valde offenderetur oratione tali, dissimulare tamen omnia, & iubere reuerti ad se Grynæum, vt accuratius de tanto negotio disputarent. Narrat amicis hoc Grynæus, qui dissuadent reditum ad Fabrum, & rem periculo non carere ostendunt. Erat Philippus vna cum suo grege collocatus in hospitio domunculæ sacerdotis cuius-

cuiusdam senis, nequaquam mali hominis. Ibi Grynæus & ipse fere semper esse consueuerat. Venit eodem, forte Grynæo absente, quidam eo habitu specieque eiusmodi, quæ dignitatem præ se ferret singularem, quæritque ex Philippo, vbi Grynæus sit? Modo, inquit Philippus, ille abiit. Vellem adesset, inquit hic, & scire se indicat parari ipsi infidias, in quas incidere nollet virum bonum & doctum; sic enim prædicari. Ita ille, quisquis fuit, nam cognosci id non potuit, discessit. Reuertitur paullo post Grynæus. Quem Philippus iubet redire Eytelbergam statim, neque diutius Spiræ commorari; ac miranti quæ esset festinationis tantæ causa, narrat omnia in via, quum deduceret ipse eum ad Rhenum, quo loco illustrissimus Princeps Elector Ludouicus Palatinus peculiarem traiectionem instituerat. Et non diu post affuit armata quædam manus, ad comprehendendum Grynæum missa. Neque quisquam aliter suspicari potuit, quam a Fabro ortum id, & tantum periculum Grynæo creatum fuisse. Natus hic in iugis montium vicinis Wirtenbergico agro, Viennæ ad Danubium bonarum artium studiis operam dederat. Quumque Eytelbergæ annis aliquot substitisset, contulit se postea Basileam, ibique multis egregiæ doctrinæ operibus

ribus editis, mortuus est anno Iesu Christi M. D. XLI. Commigrationis autem illius non minima causa fuerat, cupiditas utendi consuetudine Iohannis Oecolampadii, quem doctrina excellentem cœlestis & æternæ veritatis, id est, sacrarum literarum studiosissimum, simulque integritate vitæ atque morum honestate & suauitate ingenii venerandum ac amabilem cognouisset. Sed redeat ab hac digressiuncula ad institutum narrationem nostram.

XXXVI. Dum illi, qui debuerant rebus laborantibus succurrere potissimum & remedia adhibere, vel omnino facere medicinam negligunt, vel ita facere aggrediuntur, ut malum indies redderetur insanabilius & asperius; non modo non sedata fuerunt iam commota, sed indies quasi tentationes novorum morborum accesserunt. Et metu iniuriarum atque violentiæ incepterunt tunc sibi aliquando diligentius prospicere illi, qui ut desertores veteris religionis accusabantur & damnabantur. Itaque capita, ut aiunt, illi conferre, & de coniunctione ac fœderibus ad necessariam defensionem colloqui. Fervebant in Helvetia ea tempestate contentiones, & ciuitas Argentoratensis ritus quosdam, iudicio & persuasione sua impios, abrogauerat, frementibus iis, quibus mutatio

tio illa detrimento futura esset. Atque Spirenſi conuentu quum vrgerentur decreta priora valde dura, & leniora antiquarentur, coniuncti Principes quidam refragari manifesto non dubitarunt; testantes publice, talibus decretis, quæ fraudi esse possent progressionibus doctrinæ veritatis cœlestis, se non assentiri neque iis teneri velle. Horum primus fuit optimus & excellentissimus pietateque illustrissimus Princeps Iohannes Dux Saxonum. Adhæseruntque eis ciuitates potissimum duæ, Norimberga atque Reutlinga. Et fuit ista origo atque causſa nominis & cœtus eorum, qui sunt appellati *Protestantes*. Solenni autem iuris publici obseruatione res illa acta, & scripto exposita, & postea missis ad Imperatorem Romanum Carolum V. legatis, subiectissima significatione indicata est. Qui legati illum in Italia conuenerunt, peregeruntque apud ipsum mandata, aduentantem ad Imperatoris titulum coronationis augusto ritu adipiscendum & obtinendum a Pontifice Romano. Sane rediens mecum in memoriam earum rerum, quæ illis temporibus gestæ fuerunt, non possum non vehementer succensere quibusdam, qui ignari omnium quædam tunc dicta atque etiam scripta Philippi Melanchthonis nunc contra ipsum colligunt atque proferunt. Quo

tamen nihil fere aliud consequuntur, quam ut inhumani vel potius impii odii sui nefariam acerbitem patefaciant. Ut in mari procellis ventorum commoto fluctus multiplicentur, sic inceptiones inusitatorum augebant. Et de dogmatibus disputationes quorundam erant alicubi horridiores, & consilia animosa atque festinata, actionesque precipites: neque, quod Medici præcipiunt, cauebatur, ne indigesta adhuc atque cruda agitentur impellendo. Quæ animaduertens & perpendens Philippus Melanchthon non poterat non pietatis prudentis attentione metuere, quorsum illa euasura essent. Itaque si quid suscipi mouerique cognouisset turbulente aut saltem audacter, valde perturbabatur, autoribusque irasci & aduersari illis solebat. Non rem interdum improbens, sed intempestiuam aut præposteram rationem reprehendens, eorum præsertim qui alacritate quadam nimia delinquerent, & exultando laberentur, & viam nondum tritam ingrediendo nonnusquam aberrarent. Quum ipse non modo veritatis sed simplicis huius & puræ esset amator, & quicquid abhorreret a doctrinæ directæ & plana veluti via, recederetque a proprietate disertæ & perspicuæ tam expositionis quam explicationis, id magnopere fugeret. Fontem autem doctrinæ
inte-

integræ & sinceræ in Ecclesia, vnde ea hauriretur vniuersa, præter sacras literas nullum aperiendum admittendumque quum & sciret & imprimis defenderet, doctrinam nihilominus quasi deduci, vt liquido flumine & sine ambagibus manaret, per consentientem antiquitatis piæ atque religiosæ explanationem, tanquam alueum, debere statuebat. Quum igitur intempestiuæ veletiam importunæ novitatis quasi eruptiones, quæ nouorum quoque certaminum & distractionum maiorum causæ essent, neutiquam illi placerent; tum foederibus deuinctas coniunctiones, & armorum communitatem, implicari in negotium religionis & specie mirificum, & reipsa periculosum esse intelligens, curis grauissimis & maxima sollicitudine afficiebatur de talium consiliorum atque actionum euentu. Non autem temporibus, personis, occasionibus, ipsisque adeo negotiis atque rebus perspectis, distinctis, exploratis, omnia quæ dicuntur confusa atque obscura esse necesse est. Qualia sunt partim obtrectantia bonis & male-dica, partim scurrilia atque nugatoria, partim etiam calumniis & mendaciis referta scripta quorundam, quæ his temporibus e-volant tanquam monedulæ aut sturni, & magno numero & stridore ingrato, &, si quid adhuc reliquum est boni, illud carpen-

do perimunt, & omnem spem fructuosorum tractatum præcidunt. Qui nisi reprimantur aut fugentur, quid futurum tandem esse existimandum sit, non libet dicere. Itaque hoc ipsum relinquo unicuique cogitandam, & ad pertexendam narrationem redeo.

XXXVII. Hoc etiam anno illustrissimus Princeps Philippus Landgravius Hassiæ pio consilio & studio laudabili perfecit, ut Marpurgi conuenirent primarii doctores Ecclesiarum Saxonicarum & Helueticarum & suarum. In quorum numero Philippus quoque Melanchthon fuit. Et est in illo congressu de capitibus præcipuis doctrinæ ecclesiasticæ tractatum, ac de plerisque quidem plane consensum, de nullo autem tunc sane iracunde litigatum, aut in controversia alienatis odio animis discessum. Celebravit nominatim compellendo eos, qui tunc conuenerunt, elegante epigrammate Euricius Cordus postea inter alia edito. Erant autem omnino ante oculos & inter manus multæ & magnæ difficultates illo tempore, & ærumnosa Respublica, & Ecclesia afflictæ. Nam & bellorum vndique furor inflammabatur, & de Religione crescebant discordiæ, & multa loca fame pestilentiaque erant infesta. Quæ de aliorum narrationibus
pote-

poterunt ab iis, qui per ætatem non meminerunt, cognosci. Quum autem Turcicus exercitus, qui ad oppugnationem vsque vrbis Austriacæ Viennæ processerat, virtute præsidii, cui præfectus esset illustrissimus & fortissimus Princeps Philippus Ruperti F. Philippi nepos, Palatinus, de conatu & spe potiendæ vrbis depulsus, in qua capienda omnes vires opesque suas fuerat expertus: Hic igitur quum fœde vastata Pannonia discessisset, vt nihil amplius eo quidem tempore esset Germaniæ ab illo periculi: & iam antea tentatis omnibus, & fortuna vndique aduersante, Franciscus Rex Gallorum, quamuis duris conditionibus, pacem cum Imperatore Carolo fecisset, & inter hos potentissimos Christiani nominis Principes reconciliata gratia videretur: ita igitur tandem primum in Italiam ad Pontificem Romanum veniendum & inde in Germaniam progrediendum Carolus statuit, si quo modo præsens quod operæ prætium esset efficere, & laboranti Reipublicæ conturbatæque Ecclesiæ opem ferre posset. In qua parte & consilia ipsius recta & veras rationes fuisse, multa vel plurima potius sunt argumento. Sed obstitit nimirum Caroli egregio proposito & eximia voluntati, impediuitque progressionem ad salutem & dignitatem Reipublicæ, in fatalis mutationis

nis

nis articulo, quum hominum pertinacia & effrenata sæculi licentia, tum tantæ iampridem factæ labes, & res vsque adeo vel convulsæ vel certe, inclinatæ, vt tanquam ruinofum ædificium farciendo tegendoque instaurari non possent, sed siue neglectas concidere illas, seu demoliendo & extruendo denuo restitui in pristinum locum oporteret. In quo quidem quanto mora fit diuturnior, tanto vel grauior & horribilior ruina, vel demolitio & reædificatio laboriosior atque molestior est futura. Verum illa tum spe eoque animo in Germaniam venire voluisse Carolum Imp. cur dubitare aliquis velit, causam non reperio.

XXXVIII. Indictus igitur conuentus fuit, qui ageretur Augustæ Vindelicorum anno Christi M. D. XXX. Quo tandem Carolus accessit Idib. Iunii, quum illic Ordines Imperii iamdudum præsto essent, inque iis primus illustrissimus & optimus Princeps Ioannes Dux Saxonum & Septemuir, qui & ante & modo honoris causa nominatus, similiter vt deinceps nominetur, narrationis series & res feret. In huius comitatu inter Theologos fuit Philippus Melanchthon. Acta res sic est, vt plerique suspicarentur, promissa quædam Pontifici Romano vt fierent, operam dari. Itaque vehementer obiurgatis illis

illis, qui tanquam desertores veteris religionis pene seditionis insimulabantur, & varia aggressionem eorum animis tentatis, quod inter hos etiam ipsos quædam adhuc controuersa essent, iussi sunt omnes scriptis sententiam suam demonstrare. Tum informata quædam summa fuit doctrinæ vniuersæ, quam profitebantur & sequebantur Ecclesiæ Saxonicæ, & cum his concordantes. De qua, post diligentissimam considerationem, compositum est scriptum comprehendens capitibus aliquot expositam & explicatam doctrinam illam vniuersam, opera studioque & cura atque immenso labore Philippi Melancthonis. Quo scripto contentionibus disputationum agitæ quæstiones variæ, quum ordine dispositæ tum assertione simplice & aperta illustratæ definitæque sunt. Vt ab hoc tempore certa & explicata ratio doctrinæ cœlestis veritatis vno scripto exposita cœperit extare. Quia autem de hac, consentientibus Principibus & illorum consortibus, suo nomine commemorari placuerat, quid & verum esse persuasum haberent, & in quibus tuendis defendendisque perseuerandum esse statuerent, *Confessionis* titulo scriptum illud Carolo Imperatori fuit oblatum. Maluerat hoc Philippus non Principum & eis adiunctorum nomine edi, sed docentium, qui

qui Theologi vocantur. Nam & magis decere istos talia differere, & auctoritatem illam potentia quasi liberam referuari, vtilius esse iudicabat. Sed obtineri id non potuit, quod actionem illam splendidiorē fore subscriptis istis nominibus existimaretur, & aliis quoque de causis, ut hoc fieret, videretur melius. Propositæ autem fuerant complures descriptiones, quædam etiam admodum verbosæ. Nam qui in causâ hac coniungebantur, ii iusserant suos quique Theologos aliquid conscribere. Quæ legenda cognoscendaque erant Philippo. Qui non ille quidem de eorum, quæ asserebantur, veritate ambigebat, neque incerta multoque minus falsa defendi putabat: sed quanquam & sacrarum literarum auctoritate & consensu religiosæ pietatis ab initio ea niti sciret, ne agendo tamen optima causâ in tanta rerum perturbatione, & hominum tam insolentia quam ferocia atque etiam arrogancia, læderetur, neu qua in parte negligentia aut confidentia peccaretur, solícite & anxie metuebat. Quumque onus totum ipsi impositum esset & ab eo sustineretur, cura laudatissima afficiebatur, ne quid committeretur, quo & sua ad Deum conscientia vulnerari, & bona ad homines violari existimatio, & Reipublicæ perniciēs incitari videretur. Ipse ego inter
tales

tales cogitationes non modo suspirantem sed profundentem lacrymas conspexi, & pietatis atque prudentiæ quum iustissimas querelas, tum grauiissimos sapientissimosque sermones illius audiui.

XXXIX. Hæc quibusdam securioribus displicebant, & Martino Luthero indicata inflatius, quandam epistolam expresserunt, qua increpari timiditatem Philippi, vt iactabant, ille non dubitaret. Eamque ad inuidiam ipsius circumtulerunt, quum magis laudationem illa quam vituperationem Philippi contineat. Sed nescio quo pacto huius viri dicta & facta omnia perpetuo, quasi signum quoddam, propoſita fuerunt, ad quod dirigeret veluti sagittas calumniarum & obtreccionum leuitatis improbitas. In arduis autem & non carentibus præſente discrimine negotiis, circumſpectionem atque etiam timorem qui culpat, ei nimirum improbatur præceptum veteris poëtæ Græci cenſentis: deliberationes sæpe eſſe repetendas; iubentisque conſultare bis & ter perpendentes ea, quæ in mentem ipsis venerint, ſubiecta memorabilis ſententiæ veriffima ratione: quod damnorum eſſe maximorum autores ſoleant præcipites, & qui impetu quodam vehementiæ efferantur. De quo nos quidem quaſi dimicare

care disputando non volumus. Atque vitanam festinatione proteruitatis nostra quoque ætate non confirmata aliquoties esset præcepti illius contemti aut refutati admonitio, vel non saltem deinceps accepto detrimento, quam præclara hæc & salutaris sit, intelligatur. Non grauabatur Philippus quoscunque accedere, & de rebus illis tantis quid sentirent cognoscere. Non etiam verebatur cum aduersariis colloqui. Quæ, quum fierent ab eo optimo animo, neque nocerent causæ, ac potius valde prodesse, non tamen effugerunt criminationes etiam amicorum, parum recte de his existimantium, vel ardore quodam cupiditatum suarum, vel minus perspectæ rei indiligente consideratione. Quinetiam si qua ad aliquos Philippus Melanchthon scripsisset liberius minusque acerbè & accusatorie de iis negotiis, quæ tum disceptabantur, ea conquiri atque proferri ad inuidiam illius. Ac fuere circumlatæ literæ ad legatum Venetum scriptæ, quæ in Senatu Venetiis nec non Romæ recitatæ fuisset dicerentur. Sed omnia ista fortiter contempsit Philippus Melanchthon, acquiescens in recta bonaque conscientia, & nequaquam inflectens consilia actionesque suas ad aliorum sententiam ac voluntatem, sed ad veritatem solam constantissime dirigens. Vnum erat

rat. quod pene omnibus reclamantibus ille
non intermittebat suadere, non modo adsti-
bulatore sed etiam autore ipso Luthero. Ni-
mirum, Episcopi si concederent libertatem
& vsum puræ doctrinæ cœlestis veritatis, se-
cundum expositionem Confessionis editæ,
ne recusaretur atque denegaretur restitutio
ordinariæ potestatis seu administrationis suæ
quibusque diœcesis. Quod quidem quale
esset, quum cæco, vt dicitur, apparere debe-
ret, tamen varie & mirabiliter exagitatum
fuit. Audiui ipse quosdam aliquando, quos
& morte sublato, & tali in mentione non
putaui nominandos, sed eos audiui quum
me illi non prouidissent, de hoc ipso capite
potissimum accusantes Philippum inhumani-
ssime, quum vnus ex illis diceret: si esset
ingente pecunia conductus a Romanensi fa-
ctione, vt ipsorum statum tueretur, se non
videre qua meliore alia ipsisque vtiliore ra-
tione causam, quam ista, agere posset. Ne-
que Philippum suæ partis sed aduersariorum
patronum habendum esse, & quidem præci-
puum atque singularem. His sine verecun-
dia proferebantur etiam & atrociora & ma-
gis contumeliosa quædam, quorum magno-
pere postea poenituit & puduit plerosque.
Philippus autem Melanchthon & coram in-
terdum hac de lenitate remissioneque appel-

lari, & quid de eo homines loquerentur certior fieri literis. Verum nihilominus permanere in sententia, & tenere cursum bene institutum, neque mutare curationis modum, tanquam medicus peritus, dum constaret ratio illius, quamvis non efficeretur statim quod aliqui optarent & cuperent. Neque ipse laborare de nugis quibusdam, neque servire voluntati sibi aliquid quarentium, aut etiam assentari ad arbitriumque eorum sese & nutum accommodare. Sed vrgere necessaria & ea, quibus æterni Dei veneratio instauraretur, ad salutem omnium mortalium, & relinquere cuncta quibus turbarum aut belli causa dari videretur. Atque, ipsis aduersariorum capitibus eum tunc confessionem extorsisse constat: veram esse sententiam, quod est fundamentum doctrinæ Christianorum vniuersæ; quod nullo alio humano opere, nullo merito, nullo denique pacto, acquiratur & contingat reconciliatio gratiæ cum Deo alienatis & spes certa salutis ac vitæ æternæ, nisi fide tantum quæ habeatur Filio Dei Patris æterni *λόγω συναϊδίω*, & qua credentes freti sint atque nitantur.

XL. Exortus est paullo post ex turba illa, quæ vel per contumaciam nollet, vel propter obscuritatem caliginis errorum non posset aspicere lucem eminentem clarissimæ
veri-

eritatis, quidam qui se nominaret Cochlaeum, de patriæ appellatione, in qua est *Cochlae* significatio quales graduum in ædificiis sunt. Vicus autem ille est in arenis Noris. Qui quod cuperet videri eruditus, actiones, ut ipse scilicet existimauit, accusationis grauis & rei capitalis instituit atque descripsit ad Imperatorem Carolum, cuius ridicule *Philippicarum* titulum fecit. Eas & malitia improbitatis & ineptiarum leuitate refertas, non puto ab aliis negotiis tantum vacui temporis Imperatori, vel etiam in otio quoque eam voluntatem fuisse, ut legeret & nugis istis operam daret, quæ sane inter tales delirationes plurimas prorsus manuerunt, neque vsquam fere comparent. Sed in his tamen quum alia atrociter obijciuntur Philippo tanquam auctori Confessionis, tum ad Pontificis Romani legatum accessio sermones cum eo habiti humiles & abiectionis. Atque nuper adeo alter quidam, qui conficio cuius linguæ formæque nomine Stasylum se vocat, (Græcum enim illud esse non vult) & a Philippo Melanchthone in prius adiutus, ad honoresque & commodum ductus, ut alii complures, qui parem gratiam meritis ipsius retulerunt, quum in Prussia, quo a Philippo Melanchthone commentus illustrissimo Principi Alberto venerat,

tantam dignitatem tantasque opes non adipisceretur, quantas illuc contendens spe sibi desponderat, Principem simul eum reliquit, simul a caussa desciiuit, cum Philippo Melanchthone quoque simultatem quandam exercens offensionis priuatæ, quam nunc indicare non est visum. Hic igitur, vt ab autore Confessionis illius Philippo Melanchthone, tanquam fonte, multos & varios riuos manasse sectarum perniciosarum in Ecclesia perhibet, mirifico quodam & ioculatorio illo quidem scripto, sed ita impuro ac potius spurco, itaque calumniis & mendaciis conflato, vt quamuis neque dolere contra se istiusmodi, neque pro se edi gaudere quisquam debeat aut possit, rabies tamen ista animadversione seuera digna esse videatur. Quod quidem totum tale est, vt non pertineat prorsus ad Philippum Melanchthonem. Nam subscriptio Confessionis huius nunc etiam in medio est eorum, qui autores ipsius dici haberique voluerunt. Eorumque aliqui ipsi adhuc superstites, & cæterorum successores atque posteritas, illius autoritatis perscriptiorem agnoscunt & tuentur. Itaque ipsi tantum in componendo studium industriamque, & exarando operam ac manum Philippi Melanchthonis adhibuerunt & vsurparunt, rem ipsam & negotium proprium esse & suo ipso-

ipforum periculo fufcipi gerique voluerunt. Qui profecto accufantur, non Philippus Melanchthon, reprehenfione & infectatione fcriptum iftud culpantium. Et hi fortaffe aliquando temeritatem petulantia: iftius refutari coergerique ftudebunt. De iis vero, quæ vel minus caute vel parum fortiter egiffe Philippus Melanchthon a fuis & aduerfariis dictus eft, concedatur fane erraffe eum. Fuit enim certe homo. Hominem autem natum labi atque peccare, naturæ ipfius neceffitate contineri demonftratur. Neque mihi propositum eft laudationem hoc libello Philippi Melanchthonis & tanquam encomium pertexere; neque ego illum, cuius pietatem, virtutem, doctrinam, eruditionem fufpicio, facio tamen, vt de adolescente Comicus ferulus ait, Deum. Sint fane & hoc in genere quædam peccata ipfius: & vt promifcua gratificatione & meritis erga dignos atque indignos, & facilitate, lenitate, manfuetudine, humanitate fua deliquerit, fic nimia quoque fuerit & infinita confideratio, follicitudo, circumfpectio, metus illius. Minus tamen hæc omnia Reipublicæ damni dediffe, immo plus vtilitatis attuliffe deprehenditur, quam aliorum audacem confidentiam & animi vehementis fubitos impetus & orationis libertatem. Vt taceam copiam effu-

sam atque profluentem, tam temere cogitatorum, quam male & indecore cum plurimorum exitiosa offensione pronunciatorum, vel etiam effutiendo prolatorum. De his igitur satis.

XLI. Philippi Melanchthonis illo tempore studium diligentiaque & fides, seruiit & tributa est explicationi disertæ & simplici ac planæ æternæ cœlestisque veritatis. Et quoniam non sunt illa commenta noua turbulentæ vanitatis, sed relata in expositionem ordinatam atque distinctam & præsentibus temporibus ac rebus accommodatam, Prophetarum Apostolorumque, & qui illorum vestigia secuti sunt docendo in Ecclesia Christi, oracula atque consentientis perpetuo sanæ & integræ doctrinæ testimonia: manebit profecto huius scripti diuinum opus, donec in terris colligetur cœtus Christianus, quod vsque ad extremum diem mundi futurum esse religiosa pietas nouit. Prolatum fuit & recitatum coram Imp. Carolo responsum quoddam, quo refelleretur assertio Confessionis illius. Cuius exemplum vt communicaretur iis, quorum sententiam confutare conaretur, quantumuis supplice Ducis ipsius Saxonum Iohannis Principis Electoris & consentientum petitione, impetrari non potuit. Attentione tamen quorundam diligentum,

tum, præcipuis tam capitibus quam argumentis exceptis ac notatis, Confessionis postea *Apologiam* Philippus ipse scripsit, quum explicans quædam copiosius, tum aduersarios pertinaciter insolentes vehementius virgens. Quæ quum deinde ederentur frequentius, operam dedit Philippus ut alicubi expositio esset dilucidior & plenior. Nam præclare dicitur: multa diem monere, & posterioribus cogitationibus priores fieri meliores. Nihil tamen aliter factum, neque vllum mutatum dogma, neque momenta rerum conuersa sunt. De quo ne deesset materia scilicet ferendi rixas, quidam quæ ipsis non tam in mentem, qua deficerentur, quam animum, qui quiescere non posset, & buccam, ut dicitur, venter, ausi fuerunt efferre atque euomere. Quorum futilitas & quasi sordes tantæ sunt, ut præterire eas auersando & vitare declinando omnes puræ doctrinæ amantes debeant. Sed reducatur narratio paululum ad superiora, quo certius cognoscatur quid illo tempore actum, cuius nunc quoque temporis mentio sæpe fieri solet, & quo negotium religionis crebro tractatum nititur fere vniuersum; & quia Philippi Melanchthonis diligentia, studio, operæ, quam tunc rebus communibus nauauit, a nonnullis per calumnias malitiose est obrectatum.

XLII. Placuerat, quemadmodum ostensum est, cognosci præsentem Carolo Imperatore controuersiam de Religione. Librum igitur obtulerunt, qui Protestantes nominabantur, comprehendentem summam doctrinæ ecclesiasticæ apud sese, de quo supra diximus. Huic aduersarii responderunt verboso scripto. Eius quum frustra peteretur editio, & nullo modo obtineri posset exemplum, res eo vergere videbatur, ut infectis omnibus discederetur vtrinque. Quod quia & turpe & non expers periculi creditum, consilium captum est deliberationis de toto negotio per paucos. Tunc igitur ex utraque parte lecti fuere septem viri, eisque illa est consultatio commissâ. Postquam inchoata consideratio fuit eorum, quæ Protestantes assererent, satis bene res initio procedere. Nihil aduersarii quoque, tanquam a capitibus Christianæ fidei abhorrens, notare. Fidei efficacitatem iustitiæ tribui: remissionis peccatorum & vitæ æternæ nullum esse meritum humanorum operum: implorationem sanctorum hominum, qui mortem in terris obiissent, seu inuocationem, Scripturæ sacræ neque præceptum habere neque testimonium: quæ Missa vocatur, eam non perhibendam esse sacrificium pro viuis & mortuis: itemque alia quædam his similia nequa-

qua-

quaquam damnare. Progrediente autem consideratione, septem capita potissimum descripta propositaque sunt, de quibus si fieri posset partes concordarent. Hac fuere ea, quæ iis verbis, quibus proposita esse cognouimus, putavi recensenda. 1. De vtraque specie. 2. De Missa. 3. De coniugio sacerdotum. 4. De votis Monachorum. 5. De potestate & iurisdictione ecclesiastica siue Episcoporum. 6. De bonis Monasteriorum. 7. De Confessione. In his aqua, ut dicitur, hæsit. Quumque nulla spes confessionis ostenderetur, quamvis conditiones ferret, ut sua opinio erat, commodas pars vtraque; tentatis omnibus, tandem, quod inter paucos citius rectiusque conueniri posse crederetur, numerum deliberantium placuit minui, & pro septem tres in consilium illud adhiberi. In quo, cæteris suorum remotis, Philippus Melanchthon remansit. Insidiosè hoc institutum ab aduersariis suspicantur multi, quibus cupiditas pacis in Philippo, & animus placidus a contentionibusque alienus non esset ignotus. Itaque callide ii solum Philippum retineri studuisse existimabantur, quo facilius retinerentur ea, quæ nolebant amittere. Sane tum Philippus Melanchthon in tam magno periculosoque negotio solus relictus, de omnibus non modo

cogitare accuratius, sed quærere etiam disputareque liberius, nec non argumenta afferre, cur hoc aut illud aduersariis flagitantibus concedi deberet, quo magis differendo veritas & eluceret & confirmaretur. Hoc est interpretatione maleuolorum in eam partem detortum, vt de Philippo Melanchthone quum opinio conciperetur, tum spargeretur fama ea, quam paullo ante indicauimus, innocentissimo illo prorsus, id quod exitus declarauit. Sed quum nullis machinis effici posset vt res componeretur, ita tandem fuit discessum vt potuit, non vt fuit expetitur. Atque hæc fuerunt istius fere anni negotia & res, quibus interfuit & præfuit Philippus Melanchthon.

XLIII. Annus autem Christi M.D.xxxi, cuidam de Rege Ferdinando, quem designari Cæsarem Imperator Carolus voluerat, controuersia, consilia actionesque adiunxit foederum, inter eos, qui propter dissidium in doctrina ecclesiastica aduersarios multos se habere cernerent, & tam ab insidiis quam violentia oppressionem formidare cogerentur. De quibus relatum quidem fuit ad Theologos quoque. Sed præcipua occupatio in his Philippî Melanchthonis nulla: cuius omne studium omnisque cura tribueretur doctrinae laboribus. Quod tamen &
ipse

ipse de istis rebus vel cognosceret vel etiam interrogaretur ab aliquibus, fiebat ut magnis & grauibz interdum curis perturbaretur; præsertim quum edito decreto Augustano & verbis asperiore & sententiis pene minace, suspensi multorum animi essent, & expectatio, spes, cupiditas, metus miscerentur. Accidit autem ut quasi pacificatoriam quandam personam quidam suam interponerent, & in hoc solícite incumberent, ut reperiretur via vel ad certam pacem vel saltem ad firmas aliquas inducias, ut in Germania quantulocunque sane tempore esset tranquillitas. Ad quas actiones animus voluntasque Imperatoris Caroli ideo erat propensior, quod compertum ille habebat, expedita esse arma Turcica & magnos exercitus contractos, qui pergentes iam Pannoniæ appropinquarent, ipso gentis illius Imperatore, quem Magnum Turcam vocant, copias adducente. Accedebant motus in Heluetia, qui & ipsi, quorum euasuri essent, omnes de Republica solícitos magnopere vereri cogeabant. In quibus Philippi Melanchthonis anxietas, dicendum enim verum est, maxima erat & cognoscebatur. Sed & turbæ in Heluetia celeriter, post vnum aut alterum conflictum, sedatæ fuerunt. Et induciæ anno Christi M.D,XXXII. præclaræ factæ in vrbe Norimberga,

berga, & auxiliis communibus Imperator Carolus adiutus, apparatus magnitudine & fama nominis sui potentissimum hostem avertit. Quem recipientem se Imperator, non modo fortis & qui nullo terrore commoueretur, sed prouidus etiam atque sapiens, persequendum, eo præsertim anni tempore, non putauit.

XLIV. Magnam etiam tristitiam attulit Philippo, & animum ipsius vehementer afflixit illustrissimi atque optimi & præstantissimi Principis Iohannis Ducis Saxoniae mors, quam ille anno hoc obiit senex, placide & omnino feliciter, migrans ex hac calamitosa atque caduca vita in æternam ac beatam, Idibus Augusti. Sed hunc luctum nouæ etiam curæ auxerunt. Quum enim Imperator Carolus inducias, de quibus diximus, fieri passus esset, ad id vsque tempus quo Oecumenica Synodus congregaretur, quod semestre fore ostenderant, profectus in Italiam ea de re cum Clemente Pontifice Romano ita studiose & seuerè quoque egerat, ut Pontifex, quamuis putaretur nullo modo rem procedere velle, mitteret tamen legatos declarantes suam de Synodo sententiam & promptam voluntatem. Quorum vnus ad illustrissimum Principem Iohannem Fridericum, qui patri Iohanni successerat, Vinariam

am, sedem domus illius in Duringia, venit. Susceptæ deinde fuerunt deliberationes & Theologorum quoque exquisita sententia. Philippus sane Melanchthon simulari a Pontificiis omnia, & hoc agi, vt conditionibus intolerabilibus ferendis detererent a voluntate veniendi ad Synodum Ordines illos autores scripti Augustani, non habebat exploratum neque persuasum. Itaque simplice animo & vera consideratione id censuit, quo illis plus pene concedebatur quam peterent. Nam neque indici a Pontifice Romano Synodi conventum improbabat, neque eum in illa præsidem recusabat. Quod vero postulabatur: vt iam tum se stare decretis Synodi velle promitterent vniuersi; id nullo modo admittebat. Quod & accusationes & defensiones & sententias liberas oportere esse diceret. De euentu autem, antequam disceptatio & cognitio inciperetur, pacisci, præposterum esse, neque fieri hoc oportere. Neque omnino formam eam iudicii esse, obligatis iam partibus ad probandum id, quod quale futurum esset ignoraretur. Neque sponsonibus forensibus & ciuilibus compromissis exemplum sine euidente & pernicioso errore transferri ad has dijudicationes. In qua sententia semper permansit. Quum essent qui, neque vt indiceret Pontifex Synodum, neque vt in ea præ-

præfideret, concedendum esse arbitrarentur. Nam & iudicandi iure concesso, potentiam principatus illius, quæ tantopere oppugnaretur, stabiliri, & præsidendi dignitate prærogari autoritati illius. Sed neque hæc Philippum Melanchthonem fugiebant, & res si ad legitimam cognitionem & incorruptum iudicium, vel qualemcunque etiam non simulatam atque fictam discepcionem deduceretur, prospiciebat, necesse esse, ut antequam ullæ actiones inciperentur, nedum sententia lis dirimeretur, talia explicarentur atque definirentur. Sed res de Synodo tum facilis fuit, quam cogi Pontifex nollet, Imperator Carolus non posset cogere. Itaque iste quoque annus inter consultationes non nimis contentiosas abiit.

XLV. His etiam tribus annis continuis conspecti Cometæ fuerunt. De quibus multa ad amicos Philippus scripsit, suas cum eis rationes communicans & explorans sententias ipsorum. Quum autem anno Christi M. D. XXXI. Cometes ex eorum genere, qui Pogoniæ vocantur, apparuisset in plaga solis occidentis, conspectus est vel idem vel alter similis ei proximo anno mane in orientis solis parte. Et anno XXXIII. tota nocte vnus fulsit ad stellas propinquas Septentrionibus. Quo loco cerni desiit. Hic annus pesti-

pestilens fuit vrbi Norimbergæ; & eodem, quod Eobanus Hessus Erphordiam se recepisset, schola Norica, quam vt suum opus labefactari nollet, nonnihil exercuit animum Philippi Melanchthonis. Etsi magis nos sollicitum eum habebamus, quibus illuc se conferendi ipse autor & suasor fuisset. Exercuerunt & aliæ quædam curæ mistæ iustissima indignatione, quod literæ nescio quæ prolata sparsæque dicerentur, quibus turbas excitatum iri ingentes & perniciosas intelligebat. Neque ille tam autoribus earum irascebatur, quam diuulgantibus talia temere & incaute. Negotia etiam Britannica considerationes ipsius tunc cœperunt commouere. Rex enim Insulæ illius, cum quo nupta esset Caroli Imperatoris matertera, de altero coniugio consilia inibat; siue tunc consuetudinis istius satietas fieri cœpit, seu aliæ eum causæ ad diuortium hoc impulerunt. Quod inuito & refragante Pontifice Romano factum quum damnaretur, vsque adeo irritauit animum Regis, vt statim Romani Pontificis quasi iugum, sub quo ad id vsque tempus fuerat Britannia singularem in modum pressa, repelleret & penitus excuteret. Hocque ipso ad coniunctionem vel respectum saltem adigebatur eorum, qui Pontificis Romani potentiam dominationemque oppugnabant; quam-

quamuis aliquando se illis opposuisset, edito libro præferente nomen suum. Quod factum adeo gratum acceptumque Pontifici fuerat, ut Regi titulus novus decerneretur, *Defensoris fidei*. Mittebantur igitur & legati, & literæ, & Philippo negotia illa significabantur, quem minime fugiebat fore ut ipse inprimis consuleretur, & magnitudinem rei periculaque contemplanis animo, magnopere tum adeo sollicitabatur. Accedebant rumores, qui spargebantur de conatibus Landgraffii Philippi restituendi in ditionem terræ suæ Vrlicum Ducem Wirtenbergensem, ereptam ei ante annos quindecim. Sed hanc proxime sequens annus tunc inchoatam molitionem absoluit; reductusque Dux Wirtenbergenfis, & postea de recuperatione illabelloque toto transactum fuit, & ipse Philippus benigne inuitatus ut Tubingam veniret. Sed negotia eiusmodi in manibus habebantur illo tempore impendereque videbantur, ut illustrissimus Princeps, cui opera fidesque Philippi addicta erat, eum dimittendum nullo modo putaret. Accessit tamen illuc deinde, quum ego iam ibi studia bonarum artium docendo excolerem, & in Academia ordinanda, quæ sic satit perturbata erat, adiumento nobis fuit, hospes noster vno pene mense. Hoc etiam tempore Landgraffius,

fius, qui animaduerneret atque perpenderet, quantum mali detrimentique daretur doctrinæ veritatis diffidio Helueticarum & Saxonicarum Ecclesiarum, & litem illam cernens fieri indies maiorem, multaque a quibusdam admodum horride & insolenter, a quibusdam vehementer & immoderata quadam libertate quum dici tum scribi, operam studii pietate & fide pleni dedit, vt apud se conuenirent vtrinque vnus, & breuiter atque diserte comprehensam suæ partis sententiam exponerent. Idque negotium Philippo a suis datum fuit, qui ipsorum sententiæ ad Landgrafium esset nuncius. Neque quicquam tunc præterea actum est.

XLVI. Interea de coniugio, ducta iam altera vxore & priore repudiata, sollicitus Rex Britanniaë vndique colligebat suffragia, quibus illud contra sententiam damnantium, inprimis Romani Pontificis, approbaretur. Et quia sperabatur hoc facturos facile & libenter Saxonicos, dominationis Pontificiæ inimicos, remittebatur indies aliquid de sæuitia; quam ad illud vsque tempus, pariter cum Gallia, crudeliter exercebant in eos, qui, Saxonicarum Ecclesiarum exemplo, non assentirentur Pontificiæ doctrinæ. Et Philippus Melanchthon literis nunciisque fiebat certior, aduentum suum in

K

Britan-

Britanniam magnopere expeti, & futurum
vt ab ipso Rege accerferetur. Orabantque
amici, ne recusaret, neue grauaretur illud
iter suscipere. A quo sane animus ipsius
neutiquam abhorrebat. Rex autem Britan-
niæ, vt matrimonium nouum modo & iure
bono videretur contractum, nihil non expe-
riri, & refragantes omnes odisse, & hanc
maxime ob causam ad eos, quos ante fuerat
insectatus, inclinare credebatur. Cuius vo-
luntati repugnans inter alios Thomas Morus,
vir doctrina atque dignitate præstans, & qui
præsentis status mutationem fieri nollet, &
cui nouitas coniugii displiceret, supplicio
ultimo affectus est. Rex autem Galliæ, qui
in Italia bellum gerere & occupare Mediola-
num cuperet, societatem Principum Germa-
norum expetebat. Quumque conuenissent
foederis faciendi iterum gratia aliquot, co-
dem legatus Gallicus accessit. Non autem
potuit verecunde peti coniunctio, sine excu-
satione crudelitatis suppliciorum, quibus plu-
rimi in Gallia per summos cruciatus fuerant
necati. Itaque tunc & in seditiosos quosdam
sux gentis animaduertisse Regem dictum est,
& petatum vt de Religione diligenter re de-
liberata sic consentiretur, ne asserendis de-
fendendisq; non necessariis, aut etiam su-
peruacaneis dubiisue, Respublica & Ecclesia
am-

amplius turbaretur. Petitum etiam fuit, vt mitterentur ex Germania aliqui viri docti & boni, qui de dogmatibus sententiam suæ partis exponerent. Fuerat autem quorundam studio effectum, vt Rex non alienus a Philippo Melanchthone videretur; cui & accurata explicatio rerum, quas tractandas ille suscipesset, & ab aduersariis sine acerbitate dissensio, valde placeret. Itaque non modo amici institere literis suis, vt in Galliam ad Regem proficisceretur, sed hoc etiam obtinuerunt, vt ipse Rex, missis literis ad Philippum, clementissime eum inuitaret ad congressum suum. Eo anno pestilentiaæ metu Wittenbergensis schola dissipata fuerat, & Philippus Melanchthon cum plerisque magistris doctrinæ concesserat in oppidum Durinigiæ Ienam.

XLVII. In Gallia autem Regis animus perturbatus ira indignationeque nullum modum seruare neque facere finem suppliciorum. Et arrepti primum indicati conuictique tanquam conatuum seditiosorum, quod vno tempore passim libelli quidam Parisiis clanculum propositi & ad Regii quoque conclauis ianuam affixi fuissent. Huius igitur facinoris conscii statim complures comprehensi, & subiectis ignibus torrendo excruciat, ita demum viui combusti sunt. Sed indi-

cibus præmio proposito, & concessa deferendi accusandique licentia quibuslibet, plurimi etiam illius audaciæ nequaquam participes rei facti, & crimine defectionis ab Ecclesia, quod Lutheranismi nomine inferebatur, damnati & cremati fuerunt. Erant & pietate, & doctrinæ literarumque eruditione in illo Regno, dignitate etiam & honoribus præstantes quidam viri, quibus crudelitas ista immanis admodum displicebat & ingentem afferebat dolorem. Et hi Germanos, celebres eruditionis nomine in Gallia, beneuolentia fauoreque complectentes tuebantur atque protegebant, neque patiebantur eos ab ista violentiæ feritate attingi. Inter quos excellebat benignitatis & omnino virtutis sapientiæque fama domus Langæa, & in hac princeps Wilhelmus Bellaius, qui Galliam suæ sapientiæ, fortitudinis, integritatis, fidei opemoriens destituit grauissime laborantem, & in sæuissimo bello & asperrima fortuna illius, anno Christi M. D. XLIII. Germanorum autem, de quibus egregia ingenii, doctrinæ, virtutis, sapientiæ, pietatis esset existimatio, princeps habebatur Iohannes Sturmius. Per occasionem igitur illis de negotiis inter ipsos verba fieri, & consilia rationesque iniri ac quæri, quibus tam grauiter laborantibus rebus subueniri posset. Perfectumque est diligen-

ligentia & studio horum, vt apud ipsum Regem mentio fieret doctrinæ Saxonicæ, & Philippi quædam scripta coram eo legerentur: quorum dilucida expositione & disputationibus placidis Regis voluntas ad clementiam conuersa ferebatur, considerantis, & quousque esset superstitio progressa, & quibus in tenebris iacuisset obscurata veritas cœlestis, & quam tetri errores doctrinam disciplinamque Ecclesiæ occupassent; verentis etiam fortasse, ne animaduersionis iracundia infantes cum fontibus corriperet. Hoc quum Philippo Melanchthoni esset significatum, amicis suadentibus atque hortantibus, literas scriptas mittit ad Episcopum Parisiensem Iohannem Bellaium, quibus monet & orat: Animos Principum in Galliæ regno mitigari studeat, autorque sit, vt ratio ineatur, qua sanari Ecclesia possit, quam indies magis magisque lacerari appareat. Abusus quosdam esse reprehensive, & nunc multos pios atque doctos veritatem quærere & doctrinæ genus purum, non praua cupiditate aliqua sed studio religionis. Atque esse ortas controuersias de maximis rebus, quæ nulla armorum vi aut suppliciorum metu opprimi posse videantur. Non patrocinari se turbulentis & seditiosis, neque iis qui improbitate & malitia veritatem simplicis doctrinæ corrumpant,

quos fanaticos solebat vocare. Verum horum etiam furori sic maxime resisti posse, si extet certum doctrinæ genus, quo ambigentium animi confirmati nitantur. Ostendit, quantum momenti sit in Galliæ florentissimo regno, ad omnium bonorum animos tam erigendos quam dejiçendos. In eo si exemplum istud statuatur, vt non modo fanatici & seditiosi coerceantur, sed nulla prorsus admittatur emendatio ecclesiasticæ doctrinæ & errorum correctio, sique præsentia Ecclesiæ vitia summa vi defendantur, futurum esse: vt vbique gentium magna de spe boni piique decidant. Addit: esse eas preces & vota ista, vt in periculo communi succurratur Ecclesiæ simul atque Reipublicæ non vnus nationis ac gentis, sed omnium in toto orbe terrarum religiosæ pietatis. & tranquillitatis publicæ cupidorum. Multum profuisse constat has literas, & lenitam esse Regis iram, & de suppliciorum sæuitia non nihil remissum. Inculcatum autem fuerat Regi, in Germania turbarum, motuum, seditionum, cædium, vastitatis, denique malorum omnium causam fuisse mutationem doctrinæ ecclesiasticæ; & falso pleraque coram eo narrata. Quamuis igitur minime ignoraret, ac potius perspicue videret, quid in doctrina & ritibus vñtatis non modo vitiorum

rum sed omnino scelerum hæreret; tamen a nouitate similia incommoda, vel parem potius infelicitatem, metuere existimabatur & eisdem euentus, quos persuasum hætenus habuisset de innouata doctrina ecclesiastica extitisse. Sed siue hoc seu aliud fuit, quo Rex Galliarum tunc ad clementiam se inclinauit, & eo adduci passus est, ut de rebus tantis cogitandum diligentius certiusque cognoscendum arbitraretur; primum in Germaniam missus aliis etiam de causis Barnabas quidam Voræus, amicorum literas scriptas Philippo attulit, & cum eo locutus est de protectione ad Regem, pollicitusque non modo literas regias quibus accerferetur, sed quum obsides etiam, qui darentur, dum abesset, tum præsidia quibus deduceretur & reduceretur, ut undique periculi metus esset amotus. Urgebant rem amici, qui persuadere conarentur, in congressu colloquioque cum Rege Melanchthonis, non Galliarum solum sed pene orbis terrarum fortunam esse positam. Si illum præsentem vidissent, simul salutem suam cum aliorum omnium coniunctam affirmare se conspecturos. Si in illis fluctibus & sæuissimis tempestatibus audiissent aduentantem, portum & tutissimam stationem sibi ostensum iri. Quod si negligeret aut etiam contemneret postulata Regis, fore ut omnis spes, qua sustentati in

maximis periculis & præfenti discrimine fu-
iffent, debilitata infringeretur, & fimul ægre
aliquantulum fopiti ignes rurfum fufcita-
rentur, & fuppliciorum immanitas recrude-
fceret. Atque eum cogitare æquum effe
confebant, non iam a fe tantam rogari, fed
ab omnibus hominibus; non ab iis, qui
grauiffima fupplicia perpeffi fint, neque qui
eadem pertimefcant, præfentiam eius exopta-
ri, fed aduocari ipfum Dei Chriftique Iefu
voce. Remoueret igitur ex oculis Cæfareæ
& Regiæ nomina. Non refpiceret populo-
rum coniunctionem aut alienationem, fune-
ftas flammæ intueretur & fumantes rogos,
in quibus innocentiffimorum hominum cor-
pora conflagraffent, & fe plurimorum peri-
culis, quibus immineret idem exitus, moue-
ri fineret. Hæc & his fimilia quum Philip-
po & fcriberentur & nunciarentur, & mul-
tiplice ille cura & varia confideratione affi-
ciebatur atque perturbabatur. Difficile e-
nim erat conftituere, quid in tanta ac tali
re fieri oporteret. Vel ea potius, quæ offe-
rebantur, inexplicabiles habebant quæftio-
nes & difputationes infinitas. Non eum re-
fpectus ad fe aut fuos, non longinquitas lo-
ci, non periculorum metus morabatur,
quamuis hæc ab ipfius amantiffimis præfen-
tia demonftrarentur, ex quibus quidam in-
fidias

fidias vitæ eius strui suspicabantur, & eum literis grauissime scriptis, vt caueret, admonebant. Verum quum nihil esset prius illi neque antiquius gloria Filii Dei Domini nostri Iesu Christi, tot piorum bonorumque salute & incolumitate, tranquillitate Ecclesiæ tantis procellis infestæ; hac vna cura excruciabatur & in eo adhærebant cogitationes vniuersæ, quod dubitaret de consilio suscepti negotii, & quæ actiones futuræ huius essent non posset discernere, & de exitu felice plane desperaret. Neque ille, quid sibi conducere, omnino laborabat, sed ne quid in tanta re imprudenter factum, turbarum mala asperiora redderet prouidens, mirifice sollicitabatur animo suo. Veniebat ei in mentem, varias esse opiniones diuerforum in Gallia, & ea erat expertus, quæ causam darent circumspeditionis atque formidinis. Audiebat tanquam seditiones esse eos damnatos, de quibus tam crudeliter supplicia sumissent. Præterea quum intellexisset, Gallos hoc agere vt quædam discrepantium capitum in ecclesiastica doctrina controuersia tollerentur, hoc maxime timebat, ne minuta aliqua, & quæ sua sponte iam e manibus elaberentur, concedentes, retinere vellent ea, in quibus potissimum falsitas impietatis resideret. Quod videbat neque fieri debere, & si tentaretur, plus seculum

turum mali quam boni. Quumque esset de Regis voluntate existimatio ipsius præclara, tam multis tantopere illam prædicantibus; quid ipse tamen Rex, ut maxime vellet atque cuperet, posset efficere, non sine causa dubitabat. Itaque rescribens amicis hortabatur eos, darent operam ut Rex curaret maturandam Synodum, & per quoscunque liceret, ad hoc impelli studerent animum ipsius. Tum enim communiter ineundæ rationis occasionem omnes habituros, qua Ecclesiæ afflictæ ferretur auxilium. Cætera consilia sibi significabat videri inutilia, quæ periculosa essent omnia. Hæc ad amicos perscribens, ipsis ut in re præsentē deliberationem totam permittebat. Quod non tergiversandi ista causa commemorarentur, sed ut ipsi statuerent, quibus nota Gallia esset, quid expediret. Quum in omnem euentum fauorem atque gratiam potentissimi Regis, causæ conciliari posse optaret. Quod sperabat fore, veris & commodis sermonibus. Non enim ignorabat quanto odio ubique hæc laboraret, excitato aduersariorum fictis criminibus. Itaque si ipsi in eo perseverarent, ut existimarent suum aduentum profuturum & Galliæ & Ecclesiæ vniuersæ, pollicebatur se paratum promptumque fore ad suscipiendum iter istud, relatis quidem prius

prius omnibus ad illustrissimum Principem, qui haberet conductam operam suam. Itaque omnia fidei prudentiæque ipsorum committere. Quum autem Voræus & studiosius de Philippo ad Regem reuersus loqui, & prolixius promittere, & si accerferetur polliceri aduentum ipsius non dubitasset, ita a Regæ literæ sunt missæ: quibus collaudato studio ipsius, quod Rex ab eo adhiberi intellexisset in sedandis altercationibus inuectis in ecclesiasticam doctrinam, quoniam ipse se laborem itineris non grauatim suscepturum esse ostendisset, quo ad Regem se conferret, coramque illo de concordia doctrinarum cum selectis aliquot Gallicæ nationis viris doctis differeret; ita petebatur, vt literis regiis tanquam fidei publicæ obsidibus fretus, quamprimum adueniret, neque se abduci vllius persuasione sineret a tam pio sanctoque instituto. Nullam enim rem vnquam maiore Regem cura, studio, sollicitudine animi complectendam duxisse, quam vt laceratæ dissensionibus Ecclesiæ detrimenta sarcirentur, & pulcherrima politia illius instauraretur. Denique affirmabatur modis omnibus, aduentum Philippi futurum esse Regi gratissimum.

XLVIII. His literis acceptis omnino erat animus Philippo in Galliam proficisci, neque

que expectationem & spem de se conceptam amicorum frustrari, neque operam suam, quæ nauari posse crederetur, subtrahere afflictæ Ecclesiæ. Sed ut veniam hanc ei illustrissimus Princeps ipsius daret, & potestatem cum bona gratia in Galliam se illo tempore conferendi faceret, impetrari non potuit. Quum alia autem obstare visa sunt, tum non minimo impedimento fuit bellum, quod Rex Galliæ aduersus Imperatorem Carolum non meditari aut moliri, sed iam mouere & gerere ferebatur. Cognitum quoque est, maleuolorum quorundam obtreptione optimi & præstantissimi Principis animum ad quandam hæitationem fuisse perductum, ut nonnihil Philippo diffideret. Itaque denegans & plane præcidens petenti Philippo copiam sibi clementissime fieri in Galliam veniendi, literas misit ad eum verbose & seuerè scriptas. In quibus hoc potissimum mouit Philippum & a consilio itineris Gallici deterruit, quod ostendebatur verendum esse, ne ista profectio non modo nihil fructuose perficeretur, sed ne detrimenta maiora acciperentur, & causæ darentur, quibus de causis publica Germaniæ quies turbaretur, neue adeo ipsius Principis quædam negotia redderentur difficiliora. Hoc omnino periculum in se recipere ille noluit.

noluit. Itaque cum magno dolore multorum, non etiam nullorum reprehensione, cum Voræo, quemadmodum Rex voluerat, non est profectus. Et ei literas dedit abeunti, quibus inprimis Regi gratulabatur cupiditatem sanandæ Ecclesiæ, non violentis remediis sed vera ratione & Rege Christianissimo, quo ipse titulo ornaretur, digna: qui in dissensionibus illis ita studeret vtriusque partis impetus moderari, vt explicata doctrina Christiana atque perpurgata, simul gloriæ Christi, & dignitati ecclesiastici ordinis, & tranquillitati publicæ consuleretur. Orabatque, vt non desisteret Rex in hanc curam cogitationemque incumbere, neque asperioribus scriptis aut iudiciis quorundam sineret se adduci, vt etiam res bonas & Ecclesiæ vtilis deleri pateretur. Se quidem, literis Regiis acceptis quantum potuisset conatum esse atque contendisse, vt statim ad Regem accurreret. Quod sibi nihil esset optatius, quam vt pro sua tenuitate aliquid opis afferre posset Ecclesiæ, quodque in optimam spem venisset, postquam cognouisset eam esse pietatem ac moderationem Regis, vt in commune gloriæ Christi consultum cuperet. Nullo vero se modo potuisse tunc iter ingredi, propter maximas difficultates, quibus adhuc esset implicatus. Quas posset Rex cognoscere

scere ex Voræo, cui essent notæ. Quamuis autem moram quandam illæ afferrent, tamen non esse animum suum ab illa profectioe auersum. Quod & ipsum planius & copiosius expositurum Voræum esse confideret. Atque ita Voræus dimissus Regem inuenit in belli Italici apparatu, cui postea ista res curæ non fuit. Estque deinde etiam atrocius suppliciorum sæuitia vexatum regnum Galliæ. Itaque, ut sit, alii de tota re aliter sentire & loqui. Quidam credere, si Philippus aduenisset, multa Regi indicari demonstrarique potuisse, quorum ignorantia causam daret, ut & ipse iuberet iratus abhorrentia ab ingenii ipsius naturæque bonitate, & ad ea, quæ gererentur inhumanius, coniuerset: plurimum habituram momenti existimationem de Philippo singularem: futuram liberam de magnis & paruis disputationem: neque offensuram Regem in asserenda veritate libertatem orationis, ac constantiam potius cum magnopere delectaturam fuisse, qui iam inciperet intelligere aliquid. Nisi enim ita esset, neglecturum fuisse, ut antea, rem totam, & iracundiæ suæ indulgentem vindicaturum offensiones. Plurimum situm in eo, ut audiatur interrogatio, & responsio statim subiiciatur. Valdè autem cauendum fuisse, ne Rex, cui propemodum certo promissus esset ad-
ventus

ventus Philippi, ex illa frustratione, vel opinionem conciperet leuitatis, vel suspicionem hauriret diffidentiae, atque ita de integro & a causa alienior, & in aduersantes sententiae suae asperior immitiorque redderetur. Alii incerto dubioque euentu, in tam magna gravique re, periculum faciendum fuisse in Rege illo causae conciliando, & secretum a caeteris cum ipso colloquium instituendum, nullo modo censebant. Erant etiam qui Philippo soli committendam talem actionem potuisset negarent. Experiebaturque iniquitatem ille fortunae fatalem, ut minus recte iudicaretur a nonnullis de consilio hoc ipsius. Neque deerant qui omnia in partem deteriore interpretarentur. In qua veluti palæstra miseriae totam vitam illius luctatam esse scimus. Sed prudentes & callidi aliud actum quaesitumque existimabant, quum in ipso belli, quod aduersum Caesarem Carolum gereretur apparatu maximo, susceptas institutasque tales tractationes cernerent; & plerique inuidiam in Principem, cui seruiret Philippi opera, deriuare vel minima ex parte oportere non putabant. Sic igitur illa profectio tunc repressa postea evanuit, & sunt in Republica & Ecclesia ea secuta, quae, nisi quatenus ad Philippum Melanchthonem aut temporum negotiorumque, quae hac narratione

tionē continuanda putauimus, seriem proprię pertinent, a me iam non exponentur. Sane Philippus Melanchthon inuitus retentus est, & aliquantisper remanendi in Saxonia animum habuit hæsitantem. Amicique eius non sine cura fuere, ne quid ei tristius accideret. Verum ista quasi vulnera clementissima humanitate illustrissimi & optimi Principis ipsius & celeriter & facile fuerunt sanata. Non duxi silentio prætereundum, quo horum negotiorum & difficultatem & fortasse pericula significata esse credi posse videatur. Nam quo tempore propter pestilentię contagionem Wittenberga plerique scholastici, tam magistri quam discipuli, urbem relinquere decreuerant, paucis ante horum discessum diebus flamma de cœlo decidit ante ædes Philippi Melanchthonis, & templi tectum visa est lambere. Quum quidē alias etiam significationes notasse eum constet, quibus ab earum rerum, quæ secutæ fuerunt, molestia curisque & periculis quoque præmonitum se fuisse intellexerit & recordando sæpe commemorarit. Atque istæ fere de Gallico itinere curæ molestiæque tunc exhibitæ Philippo fuere. Nihilo autem minus ambire visus est deinde Rex Gallię societatem Saxoniorum, & cum ipse quoque legatis de capitibus controuersis eccle-

ecclesiasticæ doctrinæ est disputatum. Sed Britannici magis assidui fuerunt in hac parte, & cum Philippo inprimis libere collocti. Inter quos Nicolai Heti & eruditio & humanitas ab ipso laudabatur. Ab his etiam est vel commoditate verborum persuasum Philippo, vel precando expressum, ut Regi Britannicæ quasi dicatum epistola præposita librum ex suis vnum peculiari compellatione mitteret. Redierunt mox anno Christi M. D. XXXVI. Wittenbergam Magistri doctrinæ publicæ & discipuli, quos discesse metu pestilentie diximus. Et Philippus hypochondriacis doloribus est conflictatus, quos usu herbæ chamæleontis mitigavit, & scimus efficacitatem illius remedii eum prædicasse. Dum autem cum Britannicis legatis acriter de capitibus doctrinæ ecclesiasticæ disputatur, & eo res deducitur ut de plerisque conueniat, deque diuortio tantum dissensio reliqua est; id accidit de coniuge altera a Rege ducta, quod omnium animos valde perturbauit, & legati circiter mensem Iunium Wittenberga discesserunt, & solitudine Britannici itineris Philippum liberarunt. Nam hæc illis flagrantibus vna cum aliis fuerat ei destinata.

XLIX. Sunt tamen aliæ tunc deliberationes actionesque institutæ atque susceptæ

L

Theo-

Theologorum colloquiorum, quorum eventus quum sollicitum habuisset inprimis Philippum, ipsius moderatione & diligentia effectum est, ut ille satis esset felix. Atque ita quod diu conceptum animo iter habuerat tandem est ingressus, ut & in patriam & Tubingam ad nos veniret. Vbi, quemadmodum dictum est, habuimus eum aliquantisper gratissimum hospitem, & autorem consiliorum ordinandi res scholasticas & doctrinam publicam constituendi in illa Academia. Estque eum illustrissimus Princeps Ulricus clementissime complexus. Deque eius sententia accersendum curauit Iohannem Brentium e salinis Sueuicis, cuius annua opera Ecclesia & schola saluari & bona ysa est. Habuit comitem eo itinere clarissimum virum Philosophiæ & inprimis Medicinæ artis professione Iacobum Milichium, cuius ingenium rectum, sincerum iudicium, in consiliis prudentiam ac fidem, animum firmum, voluntatem perpetuam atque constantem, in optimarum artium disciplinarumque studiis colendis, & tuendis amicitiiis, perspectam maximi faciebat, ut par erat, Philippus Melanchthon, & Milichium diligebat inprimis. Hic Friburgum Brisgoicum patriam habuit, natus loco perquam honesto. Quumque consedisset Wittenbergæ, quemadmodum

dum & alii externi complures, post multorum annorum actam ibi vitam, summa cum laude & præcipua plurimorum vtilitate, anno Christi M. D. LIX. maximo omnium luctu mortuus est, agens annum ætatis LIX. Hæc excursio, cuius & valetudo, & cupiditas videndi amicos causa fuisset, varios rumusculos commouit, vel a maleuolentia inuidiæ & odii, vel temeraria leuitate vanitatis ortos. Aliqui literis dissipauerant, ita discesse Philippum Wittenberga, vt dissidentem a Luthero & reliquis, neque reuersurum illuc. Alii, quamuis rediret, coniunctionem firmam non fore augurabantur, quod nimis philosophica esset doctrina Philippi de actionibus virtutis & officiis. Hæc ventilabantur ab imperitis bonarum artium, & quibusdam qui in sola vehementia, & abhorrente ab humanitate ac moderatione genere tam docendi quam viuendi, spem existimationis alicuius collocabant. Sed Philippus Melancthon cursum tanquam nauigii directum tenuit, vt studia optimarum disciplinarum & artium excoleret quibuscunque modis & rationibus posset, vtque veritatis cœlestis doctrinam simplicem docendo traderet, & eam spinosis superiorum temporum disputationibus expurgatam, propria & pura oratione explicaret. Quod agentem, & huius generis

ris pulcherrima & præclarissima opera elaborantem, quum religiosæ pietatis & honestatis amantes omnes, tum Lutherus ipse, non modo diligere sed suspicere etiam ac colere. Neque sine eius consilio quicquam institueret quod momenti aliquid haberet, & ad cuncta informanda, componenda, explicanda, opera ipsius vti. Quæ se non posse carere ingenue fatebantur, & gratis animis agnoscebant maxima merita ipsius; neque inhumanissimo & pernicioso isto, qui paullo post frequentari cœpit, more, in quo viribus ipsi deficerentur, eo excellere alios ægre ferebant, neque metuebant ne alterius splendor existimationem eorum deminueret. Quorum iudicio & sua ante omnia conscientia contentus Philippus, vsque adeo nihil curabat cæterorum maledicos sermones, vt penitus contemneret, in quo & constantissime perseueravit.

L. Eo anno orbis solis & lunæ obscuratus fuit, & de scalis lapsus Philippus eam partem dorsi, quæ nominatur os sacrum, grauiter afflixit, & aliquot diebus pertulit magnos cruciatus. Sed nihil postea sensit ex eo casu incommodi aut mali. Hoc eodem Christi anno obiit mortem D. Erasmus Roterodamus, ætatis suæ LXX, Basileæ, quo se Friburgo receperat. Hunc toto vitæ suæ tempore coluit atque veneratus est Philippus
Melan-

Melanchthon: neque de eo prædicari a me quicquam vel necesse est vel etiam decet, omnibus vbique locorum atque gentium noto ac celebri, & cuius scriptorum monumenta passim extant habenturque in manibus, cuiusque totum curriculum in spacio doctrinæ liberalis & piorum studiorum defūdauit & elaborauit ad vtilitatem publicam omnium, quibus doctrinæ & veritas & eruditio cordi est. His temporibus Academiae Tubingensi nonnihil difficultatis allatum est cuiusdam offensione, cuius esset munus, Romani Pontificis autoritate, faciendi collegiis proficientium facultatem optimarum artium & disciplinarum potestatem, vt meritis conferrent honores & decernerent titulos dignitatum scholasticarum. Hoc enim facere ille pertinaciter recusabat, & oppido excesserat, neque patiebatur se mitigari, quamuis ad eum præcipui ex Academia missi & egissent negotium cum reuerentia personæ ipsius debita humanissime, & nihil proficientes testati de iure Academiae ita discessissent. Prætebatur autem in negando mutatio status ecclesiastici, & scholastici, quem, nisi Romani Pontificis permissione & venia, approbare adiuuareque sibi nequaquam liceret. Habet nomen munus istud Cancellarii, & est Tubingæ mandatum Præposito administrationi illo

in oppido Ecclesiæ, benignitate Pontificis Romani singulari. In consultationem igitur res venire, & non respondere idem cuncti: placuitque tunc sententiam ac consilium Philippi Melanchthonis exquirere, ad quem literæ publicæ datæ fuerunt. Is quum aliorum quoque iudicia explorasset, suum plane & perspicue explicuit scripto, ad Academiam cum aliorum etiam literis missio. Cuius scripti summam si demonstrassem, neque ab instituta hoc narratione abhorrens visum iri, neque cognitionem infructuosam habiturum esse, duxi. Affirmatur autem illo tanquam minime dubium: Ecclesiam Dei habentem scholas, & conuentus seu collegia docentium & discipulorum, posse & debere testimonia dare auditoribus. Testari id consuetudinem literarum publicarum, quas *formatas* vocarent, & aliquas Synodos decrevisse, ne sine his reciperentur ulli sacerdotes. Deum autem ipsum velle frequentioribus Ecclesiis adiunctas esse scholas literarum & doctrinæ, quæ Ecclesiæ necessaria est, sicut fuerint olim scholæ Alexandria, Antiochiæ, Casareæ, vnde mitterentur huc & illuc doctores cum testimoniis. Quapropter posse nunc quoque Ecclesiam, habentem adiunctam piam scholam, dare testimonia, hoc est, renunciare Doctores Theologiæ. Hæc, inquit,

quit, sententia de Theologis non dubia. Neque hic disputandum est de privilegiis aut iure annulorum aureorum. Nam hi quum mittantur ad Euangelii præconium, scire debent sibi crucem & æumnas perpetiendas, non opes & voluptates quærendas esse. Et promotiones tales Theologicæ fuerunt Patrum, Prophetarum & Apostolorum temporibus, & postea florentibus Ecclesiis Alexandria, Antiochiæ, Cæsareæ, longe antequam Romani Imperatores aut Pontifices aliquid sanxerunt de Academiis. De reliquis tribus ordinibus, profitentium aliarum artium facultatem, responsio ipsius hæc fere complectebatur: scire se quæ essent nunc opiniones vsitata, nec esse eum, qui cuperet mutari præsentis politias, nec cum iis, qui istam politiæ formam defenderent, rixari vellet. Consuetudinem esse annorum fortasse trecentorum, confirmari statum scholarum publicarum autoritate Pontificia & Imperatoria, & ferri privilegia. Favere se moribus præsentibus honestis; sed arbitrari, ne Parisiensem quidem Academiam initio Pontificum Imperatorumque Romanorum decretis fundatam esse, & quæri posse hac in parte & de Bononiensi & de Pisana. Atque se esse ea in sententia & ita statuere: vnamquamque Rempublicam, & eum penes quem

summa rerum est, posse constituere collegium docentium & discipulorum utilia ac bona. Immo hoc facere eos debere, quorum fortunæ & opes magnæ sunt. Et hoc, inquit, collegium optimo iure potest dare testimonium auditoribus. Neque sunt gradus dignitatis scholasticæ aliud, nisi ista testimonia. Quod si forte disputetur de lege generali, eam iam, ait, latam esse: ut approbati a suis collegiis exerceant artes. Quemadmodum Imperatoris Valentiniani pulcherrima lex testatur, Codice de Professoribus. Sed ex Iurisconsultis & Medicis fortasse hac communi collegii autoritate contenti esse aliqui non volent. Neque ego cum his rixari, inquit, velim: in Philosophicis tamen cæteris studiis conservari possent gradus decernendis titulis, si tamen adessent omnium artium Professores & Magistri. Ridiculum enim fortasse sit, ibi creare Magistros artium liberalium, ubi ne tradantur quidem præcipuæ artes. Certe scholam Atticam constat dedisse testimonia diu quoque ante, quam ab Imperatoribus sanciendo hoc confirmaretur. His ingenue & libere, more suo, addit: causam quoque considerari oportere, qua de causâ iam tales confirmationes denegentur. Non velle enim aliquos propagari veram atque puram Evangelii Christi Iesu doctrinam.

doctrinam, quæ necessaria sit Ecclesiæ; & ideo certis personis & congregationibus illos esse inimicos. Qui istam tamen doctrinam amplexi sunt, principes viri & ciuitates, facere debent officium suum & constituere collegia honesta docentium discentiumque bonas literas & artes. Posse autem collegia testimonia dare, iam ostensum est, & dari ipsa par est, vel vt eruditi & docti emineant, vel ne imperiti per audaciam aliis imponant, & ita quum adolescentia perperam instituendo corrumpatur, tum dogmata falsa serantur, & tam Ecclesiæ quam Reipublicæ quies & tranquillitas turbetur. Quum Iulianus, inquit, edicto prohiberet admitti Christianorum liberos in scholas publicas, Christiani proprias scholas & peculiare discentium cœtus habere instituerunt. Nec est dicendum, non licuisse tunc Christianis dare testimonia auditoribus suis. Immo crescentibus tunc scholis & studiis Christianorum, plures homines doctrinam Euangelii admiserunt, inuitati honestis studiis & disciplina Christianorum. Estque credibile, libentius misisse multos in scholas Christianorum liberos suos, vbi esse mores honestiores & integriorem vitam cernerent. Hæc fere sunt, quæ Philippus Melanchthon, a Tubingensibus consultus, tunc respondit. Sed res ista quadam veluti Iu-

ra ratione & via in Synodo procederetur, quid ad instaurandam in Ecclesia concordiam, & pacis communis causa, Pontifici Romano & Ecclesiasticae potentiae videretur esse concedendum. Sæpe autem boni, & quibus cordi erat religio, & amantes patriæ, questi haud obscure fuerant: tantas illas res non tam solícite & diligenter agi, quam magnitudo earum postulare. Sed ista tunc consilio optimo & maxime laudabili suscepta, partim inter agendum adhæserunt, partim admodum lentas habuerunt progressiones. Neque enim Pontifici de Synodo quicquam concedere, neque de doctrina exquisitè differere consultum plurimis visum. Et non parum impeditæ tractationes illæ fuerunt graui periculo quoque morbo Lutheri: de cuius vita quum pene desperaretur, improbantibus & aduersantibus plerisque omnibus, iussit se illinc auertere Lutherus. Quod clarissimus vir Georgius Sturciades Erphordia accersitus, ut ipse mihi postea narrauit, quum non omnino improbaret, se illi itineris comitem adiunxit. Et nocte quæ discessus diem est secuta, melius habere Lutherus cepit. Itaque illo conuentu neque accurate de doctrina disputatum est, & legato Imperatoris responsum datum, quo talis Synodus, tali ratione indicta, recusabatur. Iussi autem

Theo-

Theologi sunt aliquid componere de Pontificis Romani potestate. Quod a Philippo perscriptum fuit. Simul etiam recognosci placuit capita Augustanæ Confessionis, & explorari de illis sententias omnium & audiri: num quis quid requireret, aut aliquid improbandi dissentiret? Quum præclara esset consensio de vniuersis, ita ille est conuentus solutus. Petitum tunc fuit a Senatu vrbs Augustæ, vt Philippus ad se accederet, sed hoc multis grauibique de causis est denegatum.

LII. Dum autem bellis occupantur Reges, interea a consultationibus Synodicis nonnihil otii fuit: Philippum vero calumniarum & obtreccionum improbitas non desinebat exagitare. Qua etiam Principis contra eum indignationem pene commotam fuisse accepimus, instigantibus quibusdam & indoctis & leuibus hominibus, quibus semper patuerunt magis fores & aures potentum quam grauib & bene institutis. Quod & antiquitas animaduertit ita se habere, quæ veteribus heroibus Ioue genitis, Libero & Herculi, in numerum etiam superstitione sua relatis Deorum, adiunxit comitatum ridiculum, Silenorum & Satyrorum Dionysiacam turbam, & Cercopum sodalitatem Herculanam. Neque quicquam reprehensioni in
Phi.

Philippo aut culpæ expositum erat, quam fuga altercationum & rixarum, studiumque & cura tranquillitatis & quietis. Qui nisi de necessariis non putaret contendendum, posse autem arbitraretur conuiui ad nonnulla, multa ferri debere. Quum interea non cessaret operam dare & anniti, ut doctrina esset perspicua, & ambigua explicarentur, & confusa disponderentur, & mirabilia quædam ad communem intelligentiam proprietate expositionis simplicis ac planæ reuocarentur. Id quibus displicebat, ii modo hoc modo illud, quod notarent, arripere, & inuidiose deferre ad alios; ut sæpe Philippus, priusquam animaduertisset, odio oneraretur, & interdum vocaretur in periculum quoque. Inter alia & hoc crimen sustinendum ei fuit, quod literæ ad ipsum ex Italia mitterentur ab iis, quos causæ esse inimicos constaret. Quod suspiciosum esse isti volebant, & causam afferre dubitandi de voluntate & fide Philippi. Miserat autem paullo ante literas ei Iacobus Sadoletus, cui post Petrum Bembum tribuebatur sapientiæ & eruditionis laus præcipua. Hæc epistola scripta eleganter & forma sermonis Latini exquisita, a Philippo ostendebatur omnibus, tantum aberat ut occulte aliquid & astute ab ipso fieret. Atque cogitabat respondere diligenter & accurate, & eadem,

eadem, vt dicitur, mensura aliquid illi vicissim emetiri. Sed occupatus negotiis, & curis oppressus infinitis, facere hoc intermisit. Atque haud scio an etiam penitus omiserit. Verum criminationes illæ, accusatorum & futilitate & manifesta prauitate, facile euanuerunt, adeo vt qui illas admiserant, eos mox puderet procliuitatis istius. Epistolæ Iacobi Sadoleti, cuius mentio facta est, putaui hoc loco exemplum inferendum, quod & verbis eleganter & sententiis præclare esse illa scripta mihi videretur. Atque isto studui quasi emblemate nostram narrationem reddi spectatorem, quum aliis aliorum scriptis, quibus plenior & ornatior fieri hæc potuisset, certo consilio variandam eam esse non duxerim. Epistolæ autem istæ, inscriptæ nominatim Philippo Melanchthoni, adscripta erant hæc: *Amantissimus tui Iacobus Sadoletus, Cardinalis Carpentoraënsis. Carpentoraëti quum essem, quo in loco statutum habere me credens domicilium perpetuum vite fortunarumque mearum omnium, repente tamen inde decedere, & Romam redire iussu Pontificis Maximi sum coactus. Sed quum ibi essem, accidebat mihi ferme quotidie, vt aliquid nanciscer de scriptis tuis, quæ ego & propter excellens ingenium tuum, & propter elegantiam stili atque orationis, libentissime legere solebam.*

Id quum sæpius facerem, magnaue in legendo delectatione afficerer, sensi paulatim mihi incendi animum ad quandam beneuolentiam nominis tui, vsque eo quidem, vt miro quodam studio tecum ineunda amicitia tenerer. Et si enim nonnulla erat inter nos opinionum dissensio, ea tamen animorum dissidium apud ingenuè eruditos minime faciebat. Iamque erat mihi deliberatum scribere ad te, primasque aperire amicitia fores; quum subito, vt dicere cœperam, ad urbem accersitus, & per causam appropinquantis Concilii, earumque rerum tractandarum & consultandarum, quas mox in consilio agi oporteret, e mea Ecclesia, ubi decennio manseram, euocatus, Pontificis huius optimi & prudentissimi iudicio tacito, inscius atque imprudens, in amplissimum ordinem S. R. E. Cardinalium cooptatus sum. Hac res effecit, vt mea voluntati in dandis ad te literis obsequerer tardius. Non enim dici potest, vt ex illa pristina, pacata atque felice vita, in hanc tumultuosam & plenam strepitus traductus sum, qua sollicitudines, quam multa & graues cura, eademque permolesta, me exceperint. Quod quidem mihi necesse fuit accidere. Hanc enim ego vitam & prius iudicio fugeram, & alteram illam item iudicio fueram persecutus. Quarum nunc utraque quum mihi contra animi sententiam ceciderit, nec
latari

letari possum habere me quod noluissem, & necessario doleo amisisse quod diligebam. Sed quoniam Deo parendum est de nobis sic stantenti, dabimus nos operam, quantum per eius auxilium opemque licebit, ut honorem hunc recte integreque administremus. Quod autem nostra instituta est scriptionis, non est passus meus, mi Philippe, in te animus diutius hoc a me officium differri, quin ut primum e turba & molestiis animus emergere cœperat, literas ad te darem, & pignus mea propensa in te voluntatis & inuitamentum in me tua: si id, quod ego in te amando mea existimationi de tuis eximiis virtutibus tribuo, tu humanitati tua, ut me pari benevolentia complectaris, esse dandum duxeris. Quod quidem te rogo utifacias, neque me sitientem familiaritatis tua deseras. Non enim ego is sum, qui, ut quisque a nobis opinione dissentit, statim cum odio habeam. Arrogantis est hoc & elati animi, non mansueti & comis, quas me potius ad partes natura mea vocat. Sed faueo ingeniis, virtutes hominum colo, studia literarum diligo. In quibus tu, ut doctrina & ingenii, sic amoris mei non mediocres partes possides: nec dubito quin tu eadem mente & voluntate sis pradius. Isto enim animo, qui tam liberaliter artibus ingenuis expolitus sit, nihil agreste neque asperum inesse potest. Quo etiam maiorem
mihî

mihi spem virtus tua facit, meas hoc apud te ponderis literas habituras, ut qui locorum spaciis disiuncti sumus, animis tamen & benevolentia coniungamur. Quod ego maxime aueo expetoque, tibi que prorsus persuasum cupio, in numero eorum, qui te diligunt & florentem cupiunt, (quorum magna est profectò, pro tui nominis celebritate, multitudo) me principem locum appetere, nihilque vehementius cupere, quam dari mihi locum probandi tibi reipsa & declarandi amoris erga te mei. In quo tu si ansam mihi aliquam occasionemue mea explenda huiusce cupiditatis prabueris, magno me abs te beneficio affectum arbitrabor. Omnia quidem, que tibi grata esse sensero, tanto studio ac diligentia exequar, ut nec fide quisquam exequi maiore nec benevolentia possit. Sicut & mea natura officii inprimis colens, & susceptus iam erga te amor, & perpetuum meum erga doctos viros studium postulat. Vale, mi doctissime Melanchthon, & nos tui amantissimos dilige. Roma XV. Calend. Iulii, M. D. XXXVII. Vixit Sadoletus annis totis septuaginta, post hanc missam epistolam decem. Fuerat autem is, qui vna cum Petro Bembo primus considerauerat attentius, & accuratius vsurparat, non modo elegantis & speciosæ, sed disertæ atque dilucidæ & illustri orationis rationem & compositionem.

M

Quæ

Quæ non solum cuiusque linguæ propriis & significantibus verbis apta, sed sententiis quoque non vulgaribus neque leuibus concinna esse debet; simul vt prudenter cogitata, quæ exponuntur, simul vt eorum, qui audiunt aut legunt, intelligentiæ, & ad penetrandum in animos ipsorum operam datam esse appareat. Ad quæ quum singulorum verborum electio, tum iunctorum comprehensio requiritur talis, vt & conceptorum animo quasi membra eloquendo distinguantur, & totum veluti corpus illorum conueniente ambitu exprimatur. Atque hoc studio multorum passim animi ad imitationem & similes conatus excitati inuitatique, & bonarum literarum atque artium excercitationes frequentari magna assiduitate cœptæ sunt. Quumque & Philippo Melanchthoni idem probaretur, & esse præclara res ista percolendaque modis omnibus videretur, essetque ipse minime duro aut rustico agrestique ingenio; ab eruditis & doctis & humanitate præditis benevolentia & fauore eum esse comprehensum, non est mirandum, quum momenti plurimum ad amicitias coniugandas afferre nemo fere ignoret voluntatum studiorumque similitudinem. Sed a suspicionum prauitate tutata esse, calumniarumque morsus vitare, integritas atque innocentia nunquam potuit.

Vt

Vt tunc acciderit Philippo Melanchthoni quod antea aliis, quos arrodere non dubitavit odii inuidiaque malevolentia atque improbitas, & posthac quoque bonis & quietis placidisque hominibus idem periculum eademque est fortuna subeunda. De quo satis, vel nimio etiam plus, quam argumentum postularer, non alieno tamen, ut opinor, loco neque intempestive quum disputatum sit, redeamus ad rem.

LIII. Inter illa igitur quæ commemorauimus & de istis literis, quum alii rumores dissipati fuerunt, tum fama sparsa, non bene cum suis Philippo conuenire, Principesque quidam pertrahere eum in suas Academias studiose conati sunt. Sed ipse a proposito publicæ vtilitati consulendi, & seruiendi aliorum non suis commodis, sese nihil omnium deducere passus est. Conspectus est & hoc anno cometes in plaga, aquilonari, de quo traditas epistolas Philippus ad amicos, quos sciebat studio philosophico delectari, misit. Eodem anno in Britanniam quidam Saxonici profecti fuerunt, qui de capitibus doctrinæ ecclesiasticæ exponerent doctis Britannia sententiam suam, & alias etiam fortasse res agerent. Quumque disputationes essent initio commodæ, postea digressis Saxonis, contraria decreta proposita sunt,

quum tamen duceret Rex desponsam sibi sororem Ducis Cliuensis, quam paullo post repudiavit. Ferebatur autem rursus expeti aduentus Philippi a Britannis, & significabant quidam, nulla alia re ad moderationem & æquitatem flecti posse animum Regis, nisi si legatio mitteretur, quæ non mediocrem haberet splendorem, & Philippus vna adveniret. Sed ista in vnum aut alterum annum excurrerunt, quibus commota negotia diversa tam sacra quam profana exagitarunt vehementer Philippum Melanchthonem. Romanenses nescio quid, quasi emendationem & correctionem vitiorum in statu suo meditarentur, conscribere. Quod etsi nequaquam diuulgari placuerat, & in manus tamen multorum peruenit, & sermonibus scriptisque atque adeo picturarum contumeliis est vexatum. Quum & notarentur in illo scripto ea, quæ manifestam haberent turpitudinem, (vt non tam, si remouerentur, laus speranda, quam, esse tam longo tempore lata impune atque licenter vsurpata, nefarii sceleris crimen sustinendum videretur) & nugatoria quædam inculcarentur: quale erat, de quodam scholastico libello Erasmi Roterodami excutiendo de puerorum manibus. Principum autem quorundam conventus de Republica agebatur in vrbe Saxo-
nica

nica Brunsviga; in quo non temere a nonnullis metuebatur, ne quorundam priuatis cupiditatibus & emolumentis prætenderetur publicarum commoditatum & vtilitatum respectus. In Gallia autem animaduersionum sæuitia non desinebat corripere eos, qui vel transuersum, vt dicitur, vnguem a pristinis qualibuscunque obseruationibus discedere, & in doctrinam Ecclesiæ, quamuis optimo & pietatis religiosæ cupidissimo animo, inquirere auderent. Carolus etiam Imperator & Gallorum Rex Franciscus, pacificatoriam personam agente Papa Paulo, plane in gratiam secum rediisse credebantur. Neque cessabat Pontifex Romanus Synodicum congressum indicendo vrgere. Iam & belli Turcici sparsa fama plurimorum animis timorem iniecerat. In Saxonia autem & causæ dabantur indies nouæ perniciosarum turbarum, & odia vetera aliqui non patiebantur sedari, qui iidem quietis & otii inimici haud scio quo consilio, quauē sententia atque spe, armis decertando quam disceptando verbis dirimi controuersias malebant. Inter quæ doctrinæ ecclesiasticæ labes quoque inferri cœpit, quorundam vel curiosis vel ambitiosis disputationibus, qui in illa præceptiones & iussa legum proponi atque explicari, non solum non necessarium, sed plane superua-

caneum atque alienum esse contenderent. Suspiciabantur nonnulli, in Philippum Melanchthonem ista potissimum strui & intorqueri. Sed eadem, vt veritatem cœlestis doctrinæ conuellentia, Martinus Lutherus & oratione & scriptis reprehendendo vehementissime oppugnavit, & grauissime confutauit, & autores eo adegit, vt inceptivalde eos pœniteret, vtque errorem confitendo ipsi priorem sententiam suam sine dissimulatione improbarent. Quo tempore, vt aliis omnibus, non tam priuatim aduersando refragandoue vlli, quam publice vera ac recta atque certa afferendo, & facere officium suum Philippus Melanchthon, neque de curriculo suo vsquam deflectere.

LIV. Anno autem Iesu Christi M.D. XXXVIII. quo gubernatio Academiae, semestri æstiuo, vt mos consuetudoque fert, commissa fuit Philippo, quidam libellum edidit Wittenbergæ epigrammatum. In quibus quod putarentur esse, quibus fama aliquorum læderetur, irritati præcipui quidam censuerunt autorem comprehendendum. Sed is fuga salutem quæsiuit. Tunc igitur rursus facti inuidia in Philippum detorqueri. Aliqui ab ipso admonitum, aliqui ope necessariorum Philippi adiutum, euasisse aiebant. Hæc omnia aliis quibusdam criminibus cumula-

mulabantur, quorum erat caput, quod non arbitrio alieno certos quosdam homines odisset, & aspergeret conuiciis, vel etiam a suis ornari pateretur. Sane illa, de quibustumultuatum adeo fuit, epigrammata ad nullius manifestam contumeliam, vel certe atrocem iniuriam, incorrupte & simpliciter iudicantibus visa sunt pertinere. Et quæ notabantur, ea carebant tam scelerum quam flagitiorum turpitudine. Autor tamen elapsus impudentissime mentiendo tam fœda atque impura postea scripta emisit, ut neque priorum veniam dandam ei, & quicquid accidisset, id lenius, quam nefaria ipsius vesania mereretur, omnes boni statuerent. Eodem hoc anno, & mea cupiditate impulsus, & aliis quoque de causis, quæ indicandæ modo non sunt, profectus ego fui Wittenbergam, ut Philippum Melanchthonem potissimum conuenirem. Quo in itinere accidit, ut pedis malum, quod mihi iamdiu non solum molestum sed infestum quoque fuisset, & tunc videretur satis bene esse situm, quum vestatione irritatum, tum errore quodam curæ recrudesceret, ut metu malorum cruciatuum festinantius Wittenberga discedere cogerer, quam statueram ac volebam. Sum tamen paucis illis diebus, quibus ibi mansi, Philippi Melanchthonis & suauissima con-

suetudine vsus, & ipsius variis de rebus accurata oratione quum delectatus tum instructus. Reuertens ad meos habui comitem Philippo Melanchthoni carissimum iuuenem Matthæum Friderichum, gente Francum, patria Wurcepurgensem, quem *Irensum* nos appellabamus. Atque is paullo post Tubingam ad nos venit, & Lipsiæ deinde nobiscum familiariter est versatus, quum iuris publici & legum cognitioni operam dandam & ciuilem prudentiam persequendam statuisset. Non videor vidisse quenquam pariatate, vel ingenio acriore illustrioreque præditum, vel studio flagrantiori deditum, vel in quo maior esset industria cogitandis, elaborandis, agendis iis rebus, quibus animum intendisset. Memoria autem ea erat, quæ admirabili facilitate comprehenderet & summa fide retineret quiduis. Cum mentis autem tanta vi coniungebatur voluntas recta, & animus auersans falsa fucataque omnia & vera atque simplicia adamans. Vt hoc erepto non patria modo terra, sed exteræ quoque nationes, non leue damnum fecisse videantur. Mortem autem obiit anno Christi Iesu M. D. LI. improuisa atque subita ruina, Spira, (quo excercendi artificii sui gratia se contulerat, quod ibi tum sollemnis confessus esset Imperatorii iudicii) quum clamoribus quibusdam

busdam excitatus trepide ad fenestram projectam, quales sunt veteres in illius vrbis ædificiis, accurrisset, & prospiciendo cupidius & inconsideratius, pondere suo antiqua tabulata quædam depresisset. Cum his enim illo præcipitato, ita grauitè afflictum caput fuit, vt sine facultate loquendi post paucos dies vitam amitteret; omnium, quibus notus fuerat, incredibili dolore, deplorantium & eius vicem, & factam talis amici, necessarii, sodalis iacturam. Atque ita fere decurrit iste annus.

LV. Sequens vero M. D. XXXIX, rursum deliberationes perquam sollicitas & valde arduas attulit de Republica. Quumque placuisset, vt Ordines coniuncti in Confessione ea, quæ supra qualis esset ostendimus, religionis conuenirent Francofurti ad Mœnum, eodem proficiscentem Principem suum iussus est sequi & Philippus Melancthon, idque iter ingressus est pridie Calend. Februarii. Quod autem incertum omnino esset, quid de pace impetrari obtinerique posset, & multi timerent conatus violentiæ & iniustæ oppressionis, iussus tum fuit Philippus, de legitima & concessa neque contraria voluntati diuinæ Defensione, scriptum componere. Cuius ille in tres partes diuisi filuulam, vt ipse appellabat, tunc instituit.

De compositione sollicitum fuit studium Philippi. Animaduertens tamen quorundam non solum callida sed fraudulenta esse consilia, cum illis certare verbis destitit. Atque fuit tum quidem res in summo discrimine. Quo tempore in morbum inopinatum Princeps Hassiæ incidit. Sed post longas difficilesque & odiosas contentiones, inducias & pacem fecerunt. Reuersum domum Philippum curæ laboresque aliæ exceperunt, quod illustrissimo Principe Georgio Saxonæ Duce mortuo, & totius regionis gubernatione ad fratrem ipsius Henricum deuoluta, de constituendis Ecclesiis & Academia ad Martinum Lutherum & Philippum referretur, & priorem statum Dux Henricus mutari quamprimum cuperet, Successio ista inexpectata aliquando & prorsus insperata, a quodam tamen vaticinante ante multos annos prædicta fuit: qui in Frisia bellum gerentibus fratribus, Georgio & Henrico, Henricum vniuersæ regionum Misnicarum ditionis futurum Dominum esse affirmarat, non sine indignatione Henrici, quem iniquo animo illam prædictionem tulisse constat. Grauißimum etiam vulnus inflictum est eo tempore Philippo, quum se absente, & in vicinam Marchiam profecto, mortuus esset vna cum coniuge, vxoris Philippi sorore, optimus & clarissimus

mus vir Sebaldus Munstererus Iurisconsultus, malo a pueris Noricis præcipuæ familiæ ipsi commendatis illato in ædes eius, quum incautius foris illi versantes contagione pestilentia infecti domum rediissent. Hunc Sebaldum, cuius antea quoque mentio facta est, habui in pueritia condiscipulum ego Lipsiæ, & postea constantissimum & fidelissimum amicum. In quo præter doctrinam probitas & religiosa pietas fuit admirabilis. Et ipsa mors, quæ eripuit affines, orbosque liberos horum illi curandos reliquit, & genus mortis miserabile, ingentem dolorem attulit Philippo Melanchthoni. Inque hoc veterum etiam ærumnarum suscitata memoria nouorum cruciatuum, quibus laceraretur animus eius, causa fuit. Itaque tum & tristitia & solitudine & variis magnisque laboribus sic afflictus est, ut de vita quoque nonnihil esset periculi. Consilia de Academia Lipsiaca occasionem obtulerunt Philippo, ut cogitationem susciperet, me illuc, ubi puer discipulus fuisset optimarum literarum atque artium, ad docendum eas reducendi, quum ex eo tempore, quo alter alteri notus esse cœpit, expetere consuetudinis nostræ vsum nunquam destitisset. Sed pestilentia, quæ hoc anno Lipsiæ fuit, rem distulit. Itaque anno demum XLI. denuo accersitus ab illu.

illustrissimo Principe Mauritio, qui patri Henrico successerat, Lipsiam me contuli: & ita deinde propter vicinitatem iucundiorvelutique vberior fructus a nobis percipi mutuae necessitudinis. Decretum fuerat, vt Hagenoæ ad Rhenum conuenirent Theologi, deque controuersis capitibus ecclesiasticæ doctrinæ placide & amanter colloquerentur. Eo proficiscens Philippus quoque Melancthon in grauißimum morbum incidit, remansitque Vinariæ; vbi clementissima Principis benignitate & diligentia amicorum, evocato etiam Erphordia Georgio Sturciade medico, quem ille diligebat & magnificiebat, id in curando studium & ea industria adhibita est, vt vita illius Dei æterni propitio fauore conseruaretur. Accurrit tunc ad illum Martinus Lutherus, & decumbenti omne officium præstitit, eumque iacentem in grauißimis perturbationibus erexit, quum consolando, tum admonendo, tum etiam interdum leniter obiurgando. Morsus autem erat ille doloris, cuius cruciatus ita eum prostrauerat. Qui in iis solis, quibus culpam aliquam suam inesse credebat, sustinere tenerrimæ conscientiæ quamuis paruas labeculas non posset, quum esset cæteris casibus animo patientissimo atque fortissimo. De quibus negotiis & rebus narratio copiosa alie-

alienior videri posset. In quibus tamen si quod peccatum fuit, peccatum illud vel ignorantis vel melius sperantis Philippi fuisse certum est. Recuperata valetudine in Vangionas ad aliquoties iam dilatum colloquium venit.

LVI. Hoc anno post natum Christum M. D. XL. incendium ortum Tubingæ fœdam stragem dedit. Ea enim subita visflamarum inter procellas ventorum plures quam LXXII domus celeriter conflagarunt. Ac quamvis vndique accurreretur ad opem ferendam, & in restinguendo opera strenua daretur, vix tamen ignis sæuitia potuit opprimi. Neque potuisset omnino, nisi ventus ex improviso sese in contrariam partem, ad eaque iam deflagrauerant, conuertisset. Suspiciones erant, non fortuita negligentia illud excitatum fuisse, quod aliis compluribus in locis damna tunc similia data, a conductis pecunia, nunciarentur. Sed certo deprehensum est, in quodam stabulo lumine relicto stramenta ignem concepisse, & inde nocte profunda in vicinas hunc ædes satis lente quasi procedentem ita creuisse, vt serum esset auxilium. Hic casus animum Philippi, in recordatione vitæ iuuenilis Tubingæ in studiis actæ, cum omnium benevolentia atque amore, & ipse maximo dolore affecit. Colloquium

quum autem illud tergiuersantibus aduersariis in annum XLI. est extractum. Affuit ibidem legatus Romani Pontificis. Hic quum oratione habita, ad tempus & rem præsentem accommodata, actiones illas esset exorsus, Philippus respondere ei cupiens, a Granuellano, qui Imperatoris Caroli loco præsidebat, prohibitus fuit hoc facere; metiente, ne vehementius aliquid initio ille diceret, quod impedimenro esset progressionibus, de quibus bona spes adhuc erat. Quumque Philippus, hoc animaduerso, semoderate responsurum esse dixisset, postulauit Granuellanus ab eo perquam benigne, ut eum labore superfederet. Et scio, inquit, te posse tibi moderari, quando vis. Ita breue & minus elaboratum ab altero quodam responsum datum, in eruditorum quorundam dicta incurrit. Etsi autem aderat Eccius, qui fulcire quasi sedem Pontificiam putabatur; & causæ tamen bonitas, & rerum de quibus agebatur veritas, & Philippi etiam Melanchthonis doctrina, facile tutata est partem illam: & aduersarii tum non parum perculsi, colloquium institutum non illi quidem recusare, id quod honeste facere non poterant, sed clanculum impedire, & disputationes defugere. Et modo moram quærere congressibus, modo nouas condiciones ferre;

ferre: tandemque eo deuenire, vt conscripta a se capita postularent publice recitari, & omnes vt ea approbarent, illisque subscriberent, autoritate præsidis adduci. Non poterant his assentiri Saxonici. Atque ab aliis quoque compluribus simplex & euidentis disertaque præcipuarum controuersiarum explicatio, præferbatur tortuosis & obscura varietate implicatis istorum formulis. Quo offensis nonnullis nouæ artes tentatæ fuerunt, & institutum vt singuli accerferentur & audirentur coram iis, quibus gubernatio colloquii illius commissa fuerat. Estque actum primum cum Henrico, Theologo illustrissimi Principis Frederici Palatini, sene illo quidem neque eximie doctrinæ laude celebri, sed viro optimo & in veritatis exploratæ atque certæ professione defensioneque acerrimo & constantissimo. Post hunc existimabantur audituri Alexandrum Alesium, Theologum illustrissimi Principis Ioachimi Marchionis. Qui quidem & paratus erat & cupidus conflictus. Sed huic obstitit iussum præsidis, qui & Alesium ad pugnam instructum sciret, & talem administrationem rei vitiosam esse animaduerneret. Nam Saxonici cumque his coniuncti, cernentes quæri suorum distractionem, & concipi ab aduersariis spem, fore eos separatos timidiore, epistolam a Philippo com-

compositam illis & in consilium aduocatis miserant. Ea testati, se ex animo piam concordiam expetere, & bono studio profiteri id doctrinæ genus in quo versarentur, (quem iudicaret esse consensum catholicæ Ecclesiæ Christi, eumque illustrari & patefieri oportere) significarunt non aliqua se cupiditate, non petulantia, non morositate, dissidia alere, qui tanta pericula tot ærumnas, tam dira odia sustinerent: & orare se cum reuerentia, scripsere, vt se illi interpellari boni consulerent, ab iis qui propter communem Ecclesiæ Christi necessitatem aduenissent. Post hæc ostenderunt, audire ideo differri colloquium, vt noua capita excudantur ipsis deinde proponenda, quibus cogantur assentiri. Et hac ratione ad concordiam rem adduci posse, fortasse aliquos arbitrari. Quos & falli certum sit, & discrepare hæc a Decreto Haguenensi. Se aduenisse, vt doctrinam placide conferrent cum aduersariis, non vt acciperent leges capitum flexiloquorum & insidiosæ scriptorum, quibus non tollerentur sed magis inflammarentur dissidia. Eo accedere & illud, quod iniquum sit, non audita vtraque parte ire in suffragia. Fortasse argumentis auditis atque perspectis, ex vtraque aliquos parte mutatueros sententias, quas adhuc retinerent. Itaque graue esse præiudicium

dicium suffragia præripere. Recusasse se synodum Pontificiam, quod iniquum sit adversarios & hostes esse iudices. At in synodo minus fuisse periculi futurum, quam si iam aduersarii velint necessitatem imponere assentiendi capitibus suis. Conuentum enim synodi habiturum plures doctos & moderatos, & externarum nationum homines, minusque indulgentes affectibus animorum suorum: fortasse & hoc tum futurum fuisse, ut & attente audirentur ipsi, & res erudite disputarentur. Atque perhiberi a quibusdam sapientibus dici, ne esse quidem opus disputatione, quod illæ sint non rerum sed verborum controuersia, quas proffit obruere potius quam agitando excitare. Quumque res sit eadem, horridiora quædam verba leniri posse: quo iudicio vtramque partem grauius lædi. Si enim verborum tantum sint dissidia, interrogarunt illa in epistola Saxonici & socii ipsorum, cur suæ doctrinæ assentientes interficerentur? cur tot mortales, totasque adeo gentes deletas aliqui vellent? Perinde esse hoc, ac si Sarmata velit interficere Germanum, propterea quod lingua alia sit. Nimis se graues pœnas dare inscitia, si ideo plectantur, quod non satis facundi aduersariis videantur. Se etiam sceleratos habendos, si Ecclesiæ & Reipublicæ tranquillitatem

N

tatem

tatem turbent, non necessariis rixis verborum. Sane si quando exarserunt ciuiles dissensiones, in ea quoque parte, quæ iustam causam tuetur, minus interdum moderate certari. Ideo non esse fortasse nullas in vtriusque partis disputationibus rixas verborum. Sed eas facile posse tolli. Et ubicunque res conuenit, non reprehendere se verba, quibus & ipsi sæpe iisdem sine cauillatione vtantur, quamuis sentiant proprietatem sermonis in doctrina ecclesiastica seruandam esse. Non igitur litem de genere sermonis, sed rerum magnas esse controuersias: de vero Dei cultu & veneratione: de vera invocatione. Eas non esse eludendas hac specie, quod sint verborum certamina. Nisi aliqui fortasse omnium religionum dissidia verborum esse certamina putent, a qua philosophia Christianos prorsus abhorreere deceat. Se vnā verā Religionem esse statuere, quæ certo verbo Dei tradita consensus sit Catholicæ Ecclesiæ Christi, in qua regnet Filius Dei, & implorantes se audiat & impertiat salutem atque vitam æternam. Quapropter orare se, ne capitum nouorum præiudiciis onerentur, neue rebus nondum disceptatis suffragia præripiantur, sed vt institutur secundum decretum Hagenoense colloquio. In ea se operam duros, vt omnes
honeste.

honesti viri intelligant, quod non abhorreant a moderatis consiliis. Vere enim posse affirmari, sic esse se affectos, ut morte etiam sua piam Ecclesiæ concordiam redimere cupiant. Vtrum vero aduersarii hanc querant, an potius prauarum superstitionum confirmationem, iudicandum se relinquere bonis & veritatis amantibus. Neque fucosas compositiones restituturas esse tranquillitatem. Quod si de rebus ipsis integre planeque disputari placeat, cur non secum potius agere velint quam cum aliis? Nam se sperare, suas explicationes piis mentibus satisfuturas esse, & omnino existimare, inuietissimi Imperatoris Caroli eam esse virtutem, ut veritatem patefieri, & consuli saluti Reipublicæ velit rationibus optimis. Ideo orare se, ut petitio illa sua in bonam partem accipiat, eamque proficisci non ab impudentia, sed pio studio, iudicetur. Quod si pergant aduersarii præripere suffragia, quale sit futurum iudicium bonorum ubique de conuentu illo, non esse obscurum. Quorum spem & expectationem falli non debere, neque sibi imponi necessitatem iustarum querelarum. Sequē confidere futurum, ut autoritate præsidentum interposita, ad veritatem patefaciendam studia conuertantur, & aliquando vno pectore & vna voce omnes ecclesiastici cœtus Deum celebrent.

His literis redditis, ab incepto illo audiendi adoriendique singulos, autores suasoresque eius destiterunt, rursusque polliceri facultatem congressuum publicorum; quum prius contendissent ut pauci quidam utrinque deligerentur, & rationem quærerent qua inueniretur aliqua controuersiarum moderatio. A quo consilio Saxoniorum cumque eis coniunctorum quibusdam non abhorrentibus, vel quia timore quodam afficiebantur, vel quia præsidii obsequendum esse statuebant, Philippus, qui publicæ quietis gratia nihil non, quod recta conscientia posset, faciendum tolerandumque duceret, quid periculi tamen illa in re esset, libere demonstrauit. Seque existimare ostendit, ideo proponi angustius illud colloquium, ut dubiæ aliquæ & fucosæ confirmationes sententiarum inueniantur. Quumque iam eum talium actionum magnopere esset pertasum, & ludibriis aduersariorum prouocaretur, vehementius tum etiam locutus est. Negauitque se talium actionum participem, multo minus administrum esse velle. Non dicere sententiam, non scribere quicquam in hoc genere, non etiam si quid constitueretur approbare. Non, si exercitus hostium, qui ad portas esset, metu terreretur. Doctrinam necessariam in Ecclesia illustrem & claram esse debere:

eius

eius luci ut caligo præstigiæ offundatur, se autorem adiutoremque nunquam futurum. Ita ad congressum publicæ disputationis res est reducta. Ibi tum rursus postulatum, ne dissentientes suas rationes pronuntiando explicarent, sed ut traderent perscriptas. Hanc occasionem aliqui abrumpendi colloquii censebant non esse amittendam. Quorum in Philippum absentem (is enim e consilio discesserat, hortatus ut quid optimum esset diligenter considerarent) minus etiam clementem orationem fuisse cognouimus. Sed pluribus visum est, hac etiam in parte præsidibus esse gratificandum. Conuenit igitur ut scripta offerrentur. Idque quum faciendum esset, mutare rursus autores huius consilii sententiam suam, & moram injicere, & tandem ad disputationem verborum relabi. Itaque ea statim has quasi velitationes secuta est. Certatum fuit de naturæ vitio & prauitate, & Eccio suo more iactata iam pridem enarranti, non sine maledictis contumeliosis in eos, qui ista aliter differerent, quum tamen aliter eum priuatim de quæstione illa locutum esse constaret, Philippus Melanchthon postero die respondit, & suæ partis sententiam veram exposuit plane & diserte, & a conuiciis quidem abstinuit, nonnihil tamen salis in Eccianis ineptiis de-

ridendis asperfit. Post paucas congressiones, rursus dissuadente Philippo, obtinuerunt ut duo ad præsidem accederent, qui de capite, disputatione agitato, formulam congruentem perscriberent. Protulit tum Eccius quandam suam. Sed postea auocatus Granuellanus ab Imperatore Carolo, qui venerat illis diebus Spiram, tota res ita relicta & ad conuentum, qui Ratibonæ mox ageretur, reiecta est. Hoc quasi præludium magna sollicitudine affecit Philippum, neque passum est bene sperare de vllis talibus congressibus. Neque ille aduersariorum doctrinam, non potentum vim metuebat, minimeque omnium causæ diffidebat: sed astutiæ fraudes & laqueos in concinnandis & colorandis discrepantibus sententiis, & falsitate quasi illuminanda infuscandaque veritate, pertimescebat. In istis, autem actionibus, quantumuis parvæ & leues offensiones, mirifice excruciare animum ipsius solebant. Neque præfagia ista fuerunt inania. Nam proximus annus non modo fucata & tenebricosa illa negotia retulit, sed eorundem priores difficultates auxit, nouis inuolucris & integumentis additis. De quibus aliquid suo a nobis loco dicetur. Atque Granuellanus tum ita discessit, ut & bona existimatio eius de Philippo Melanchthone videretur esse, & ipse præ se ferret voluntatem

tatem atque studium, quibuscunque modis posset perficiendi, vt Germania pacem haberet, pollicens se ad mansuetudinem flectere Imperatorem velle, & hortari ad conservandam tranquillitatem, & iudicii publici nimiam feueritatem coercendam; denique pia & salutaria sua consilia omnia futura esse professus est.

LVII. Anno Christi M. D. XLI. egit conuentum Imperator Carolus Ratibonæ ad Danubium, quæ Regenoburga a fluuio vicino appellatur, atque Ptolemæo esse existimatur Artobriga, colonia Tiberii. Ad quem quum actiones de doctrina ecclesiastica superioris temporis essent prorogatæ, ita eo etiam iussus est proficisci Philippus Melanchthon. Qui illo itinere in finibus territorii Palatinorum, quum vectoris culpa essedum, quo ipse & alii vehebantur, euersum fuisset, manum dextram ita afflixit, vt nunquam integer vsus illius restitutus sit. Vel luxata, vel certe quasatis ossiculis detorta fuerat commissura cum cubito. Itaque & curationis tum & postea debilitatis ea parte incommoda molestiasque perferre est coactus. Protulerunt ibi librum, nescio quorum opera conflatum, de quo persuasum Imperatori fuerat, eo ipso vtriusque partis errores, quos dissidentibus altercationes attulissent, posse corrigi. Postulabatur

igitur ut ille probatus reciperetur. Id quod neutra pars facere voluit: quum Saxonici illum quidem non penitus rejicerent, sed censerent emendari oportere, inque eo operam suam pollicerentur; aduersarii autem horum, totum librum repudiarent & damnerent. Ut infelice admodum fidere natum hunc librum existimari debeat: qui recens veluti, in pueritia sua omnibus inuisus & clanculum educatus, postea adultior causa maximarum calamitatum fuerit, quando Interim dum Synodus cogeretur, eodem ferme, sed accuratius vestito, ut ferebatur, prolato, quid fieri seruarique placeret, definitum fuit. Atque erat Ratibonensis expositio talis, quæ, nisi disceptando & concertando diffidentia alienationesque animorum corroborata essent, ferri admittique recte posse plurimis videbatur. Sed acutiores multa notabant, partim occulta falsitate inserta, partim callide & insidiosè perscripta. De quibus pacis & tranquillitatis amantiſſimum Philippum curæ agebant die noctuque, ut somnia etiam quædam, quorum visis per quietem territus esset, diuulgaret. Sed tunc quidem, magis aduersariis quam Saxonis reclamantibus, de libro multiplicibus & variis notis interpolato nihil constitutum fuit, & dimissus conuentus sat bonis conditionibus,

Impe-

Imperatore Carolo ad calamitosi exitus bellum Africanum festinante. Multorum etiam summorum virorum nunciata, interque eos præcipuorum amicorum, funera, maximum luctum & grauißimos dolores attulerunt Philippo Melanchthoni: inprimis Simonis Grynæi & Eobani Hessi, quorum ille Basileæ, vt supra dictum est, hic, de quo nostra extat peculiaris narratio, Marpurgi mortem obiit, sæuitia pestilentie continua annis pene tribus vastante regiones ad Rhenum & Harciniam. Quibus & Argentina, quum alios præstantes pietate & doctrina viros; tum Wolfgangum Capitonem & Iacobum Bedeorum amisit. Fuisse eo tempore cognouimus Philippi Melanchthonis animum iterum inuitatione Gallica tentatum, cumque eo actum, vt intermissam aliquando profectiorem tunc susciperet atque perficeret: sed negotium istud neque tractando accurate gestum est, & inter initia statim euauit. In Britannia autem Rex diuortiis coniugiisque ludere, & pro arbitrio suo edere decreta, & quoscunque ea improbantes crudeliter tollere e medio, siue Pontificis Romani seu Saxonice Ecclesie doctrinam amplecterentur. Id enim modo obtineri omnium assensione studebat, quod ipse in animum induxisset, & sibi passus fuisset arridere. Quæ & ipsa quum

eorum respectu, qui atrocibus suppliciis interimebantur, tum priorum actionum memoria, animum Philippi vehementer & dolore & interdum indignatione commouentia affligebant. Sunt autem deinceps ea negotia secuta, quæ perpaucis animaduertentibus, quum a plerisque parua & futilia ducerentur, a multis nihil prorsus curarentur, causas vel dederunt vel cumulatunt atrocium barbararum & calamitosorum euentuum. De quibus si Philippi Melanchthonis sermones, periculum præuidentis, & ea consilia quæ capiebantur quorsum euasura essent metuentis, iam recenserem, vereor ne non deessent, qui fingi ista suspicarentur: id quod impune facere liceret, & esset in procliui rebus gestis & confectis. Ne igitur in his moram faciamus, perstringentur ea & breuiter indicabuntur, quibus ipse partim non repugnans implicatus est, partim volens interfuit, partim etiam cum magna vtilitate & fructu præfuit. Hoc autem vere commemorare possum, nihil postea accidisse, quod ille non timuerit & prædixerit, quum quædam suscipi & tali ratione administrari minime probaret.

LVIII. Fuerat rei Naumburgensis in Duringia & cura ecclesiasticæ eo loci gubernationis commissa illustrissimæ familiæ Palati-

latinorum Principi Ernesto Philippi F. Is mortuus est hoc anno, in quem narratio nostra iam excurrit, Iesu Christi M. D. XLII. Et suffragiis collegii illius surrogatus ipsi Iulius gente Pflugius, quæ est Misnicæ nobilitatis primaria. Hoc effectum non consulto neque assentiente se, Iulius Fridericus Princeps Elector grauiissime queri, neque actionem eam ratam esse pati. Causas etiam exponere quasdam, cur antistitem Naumburgi præsidere Iulium sibi tolerabile non videretur. Atque mirabantur nonnulli, Iulium, ingenio eccellente doctrinaque literarum instructum, & percultum optimarum disciplinarum artiumque studiis, iis etiam ab adolescentia rebus gerendis exercitatum, ut non vulgarem prudentiam adeptus esse crederetur: hunc igitur talem virum, & tam dubiis rebus difficilibusque & turbulentis negotiis cupiisse implicari, ne temporibus quidem consideratis, quibus parendum esse sapientes præcipere & necessitatis vim tribuere non ignoraret, erant quibus mirum videbatur, quique non possent, quid rei esset, decernere. Sed ipse & scripto quodam edito consilii sui rationes reddi studuit, & alii, ut fit, tunc alia quam suspicari, tum affirmare, pro eo atque factum istud probabant aut improbabant, & de Iulio bene aut male existimabant.

bant. Atque tunc Iulius solii Naumburgensis possessionem adipisci non potuit, quum ius suum nihilominus proprietatemque esse docere conaretur & dignitatem nominis retineret. Postea tamen & illo, rerum statu in his regionibus alio, post infelicis belli exitum, est potitus. Postquam autem Princeps Elector decreuit, se non esse passurum illo loco præsidere Iulium, & rei Naumburgensi iussit alterum præfici; voluit Philippum Melanchthonem adesse eo tempore, quo in sedem Naumburgensem ab Electore Principe designatus solenni collocatione imponeretur. Intercedebat Philippo cum Iulio singularis usus, & literæ utriusque, scriptaque edita Philippi, quanti uterque alterum faceret, testabantur, & constabat summa benignitate a Iulio Philippum comprehendere. Neque contra dignitatem & amplitudinem Iulii quicquam a Philippo est factum. Qui ideo sine recusatione suscepit iter illud, ut ecclesiasticæ ac scholasticæ administrationis diligentius constituendæ vel autor vel adiutor esset. Neque enim de cæteris, quæ ad gubernationem terrarum, aut bellorum motus, aut ordinandi statum Reipublicæ spectarent, ad hunc magnopere iam solebat referri. Itaque eo erat non quidem sollicitudo de euentis illius leuior, sed dolor, si quid forte accidisset graui-

gravius, minus acerbus; quod se culpa omni carere, & istiusmodi neque consiliorum neque actionum socium esse sciret. Etsi interdum mandabantur ei operæ quædam scripti-
onum, vt eo bello, quod hoc anno inter ap-
paratus armorum, quæ contra Turcicam in
Pannonia vim expedirentur, aduersus Hen-
ricum Brunsvicensem Ducem susceptum ge-
stumque est. Quam sic dedit, vt & vera in-
primis & ad spem tranquillitatis ac quietis
accommodata perscriberentur. Sed horum
narratio a proposito nostro aliena est. Vt
autem explorata turpitudine & manifestum de-
decus, neque adiumentis ullis quasi fulcien-
dum, neque ope consilioque tuendum est;
sic quæ prudentes esse interdum eiusmodi,
vt omnium reprehensionem non possint ef-
fugere, & aliqua ex parte labascere vident,
ea non dubitant studio industriaque sua su-
stentare, ne grauiores ruinæ atque labes fi-
ant. Non illi quidem committentes quod
malum sit & inhonestum, spe euentus lauda-
bilis ac boni, sed hac ipsa moderatione & ef-
fugientes vitium & in præsentia rebus afflictis
consulentes. Nam qui rebus dubiis & per-
turbatis nimis fortes sunt, ii interdum labo-
rantibus ea remedia adhibent, in quibus me-
dicina plus nocet quam prodest, curantes,
contra prouerbum, malum malo. Hæc ne-
goria

gotia exceperunt alia, quibus Philippus Melanchthon & exercitus & defatigatus fuit. Nam quæ sollicitudo & anxietas de Republica animum ipsius tunc excruciarit, Imperatore Carolo ad bellum in Germaniæ regione Cliuensi excitatum aduentante, de eo nunc nihil dicam, & ad communes curas in talibus propter amorem erga patriam sane molli & teneri, & in consideratione diligente futurorumque providentia fluctuantis animi ipsius, referendo apponam. Proprie autem oblata ei & ab ipso suscepta, ut antea, deinceps persequar.

LIX. Gubernabat ea tempestate rem Coloniensem & commissam habebat Ecclesiæ illius custodiam Archiepiscopus Hermannus, Septemuir creandis Imperatoribus Romanis, annis grauis, amans veritatis, & cupidus rem ecclesiasticam in meliorem formam redigendi; quam non modo ipse intelligeret ita esse deprauatam atque corruptam, ut sine emendatione diutius stare non posset, sed videret eos quoque, qui neque Dei metu neque hominum respectu magnopere tangerentur, non audere tamen negare, plurimis & maximis vitiis laborare cum deformitate fœda & minime occulta. Atque erat ille hoc iampridem facere conatus, & aliquid in eo genere inchoarat, sed præclarum & salutare

tare opus absolutum non fuit. Habebat initio & suasorem & adiutorem præcipuum ex collegio sacerdotum vnum, Gropperum nomine, a quo postea non modo perfide desertus, sed hostiliter etiam oppugnatus est. Hic optimus & religiosissimus Princeps ab illustrissimo Principe Iohanne Friderico Saxonum Duce impetrauerat, vt Philippum Melanchthonem ad se proficisci pateretur. Nam præclarissima & maxime vtili illius opera se vsurum in iis, quæ parabat, arbitrabatur. Quæ eum opinio vt non fefellit, sic concepta spes aliquantulum frustrata est. Quod non accidit vel negligentia ipsius, vel Philippi Melanchthonis culpa, sed importunitate & odio quorundam oppugnantum noui operis veluti structuram. A quibus diuina & humana commota fuerunt, & effectum vt non modo Pontifex Romanus, sua sponte procliuis ad irruendum in Coloniensem sanctissimum Episcopum, incitatus vibraret quasi fulmen execrationis vsitata; sed Imperator quoque Carolus vt diu multumque vrgendo impulsus, contra Principem, in quem more maiorum & iure publico, sine solennis iudicii legitima cognitione, vindicari nullo pacto liceret, iracundiæ & sæuitiæ sententiam tandem pronunciaret. Verum hæc aliquanto post acta, neque mea narratione exponenda

nenda sunt. Sed Philippus Melanchthon anno Christi M. D. XLIII. deducente pietate & virtute atque eruditione doctrinæ præstante viro Petro Medmano, mandato Archiepiscopi, mense Aprili iter ingressus, ad Principem venit Bonnam, vbi ille tum commorans istam rem agebat, & rediit ad suos mense Augusto: maximæque lætitiæ aduentus ipsius fuit vniuersis, sed scholasticis potissimum, qui obuiam illi processere, secuti præceptores plerosque & magistros suos. Quid autem & consuluerit & egerit apud Principem Philippus Melanchthon, de eo & ipsius & aliorum scripta extant, quæ eius testantur diligentiam & solertiam & fidem in cunctis, quibus tractandis adhibitus fuit. Vt minus clementiusque tunc repugnatum fuisse, iam nonnullos optare, existimari posse videatur. Ab Archiepiscopo accersitus fuerat Argentorato Bucerus, cuius nomen erat inuisum inprimis; quum neque in illius vita vllæ turpitudinis maculæ hærent, neque in doctrina errorum vitia deprehenderentur, & ipse neque pericula neque molestiam laboremque ferre, qui pro tranquillitate Deo æterno grata & hominum societati profutura susciperetur, recusaret.

LX. Annus proximus fœcundus fuit caussis malorum, & magnum mœrorem attulit

tulit Philippo Melanchthoni nunciata mors patriæ ipsius illustrissimi & fortissimi Principis, Ludouici Palatini. Quo viuento, nemo admodum timuit, ne errumperent in publicam cladem & perniciem bellorum, multorum animis odia simultatesque inclusæ, quæ veluti antecedentia tempestates sæuas & horribiles murmura iamdudum exaudiebantur. Non diu admodum ante huius Principis mortem mihi scribens Philippus Melanchthon, se per quietem visum esse significabat videre, ab illo se accersi; idque in eam partem interpretabatur, quod tum & curis conficeretur, neque firma valetudine vteretur, se ab illo Principe mortuo ex hac vita euocari. Verum præsagium hoc obitus Ludouici fuit, qui est altero anno subsecutus. Philippus autem vixit non sibi, sed aliis, benignitate Dei diutius. Alterum grauißimum vulnus animo Philippi inflixit acerbissimus casus Hieronymi Pamgertneri Norimbergensis, viri sapientia, virtute, doctrina literarum, eruditione, humanitate excellentis, & maximi religionis puræ & pietatis amatoris. Quem & adolescens ipse adolescentem cognouerat, cumque eo familiarissime in communibus studiis Wittenbergæ vixerat, & progressum ad amplissimos honores in patria ipsius colere perseuerarat, quum quidem ab ipso cum

reuerentia præceptori debita diligeretur. Optimum hunc & integerrimum atque summum virum, in itinere, reuertentem domum a conventu Spirensi, quo missus a sua ciuitate fuerat, quidam tunc, qui se hostes reliquiis fœderis Sæuici profitebantur, comprehensum, inque diuersis latebris, vt necesse fuit, abditum & diu vexatum, tandem pecunia accepta dimiserunt. Atque existimabatur alteri istas fuisse insidias positas, sed rebus instructis ac paratis, quum Pamgertnerus in illas incidisset, præda oblata arripienda fuit. Declaravit Philippus Melanchthon dolorem, quem ex amici fortuna aduersa capiebat, non modo sermonibus & literis suis, sed studio quoque & opera, quum perficiendo vt familia Pamgertneri consolationibus eorum sublevaretur, quorum autoritate eam moueri, & vnde bonam spem ostendi sciebat, tum quaerendo occasiones etiam quasdam liberandi captiuum, & iis a quibus detinebatur placandis, Principum quorundam fauore clementiaque & cura adhibita, & notorum ex equestri ordine hominum adiuncto studio. Sed liberatio illa mirabiliter impedita & res dilata fuit; nonnullaque capto laudabilia atque gloriosa ipsi nocuerunt, de quibus narratio verbosa neque huic argumento congruit, neque a me est persequenda. Cum diuturno
tamen

tamen dolore & ingente tristitia suorum gravissime afflictus, non sine vitæ propter morbos periculo, patriæ restitutus est & rediit domum Pamgertnerus, lætitia omnibus bonis exultantibus, & ad conspectum reuertentis effusa ciuitate vniuersa. Furor quidem iste Martius & vis grassatorum, quin crimen subeat sceleris & impietatis, vereor vt defendi nequeat; sed & vsurpatur tamen ille more, & in hoc mundo suum scilicet malum cuique æquo animo est ferendum.

LXI. Philippus autem aliis etiam tunc aduersis, & malis familiaribus atrociter vexatus est. Quorum commemorationi etsi multa obstabant animo meo, prorsus tamen de his reticendum esse non duxi. Filiam maximam natu Annam, amantissimam sui, incredibili caritate diligebat. Erant autem vehementes admodum incitationes huius in illo viro affectionis, adeo vt aliquibus hæ immoderata & cum indulgentia nimia coniunctæ viderentur. Sed in filia omnino natura optima & præclarum ingenium, pietatisque & omnis honestatis decus, non immerito illam patri magnopere commendabant, matris præsertim partu difficili in lucem editam, & in quam amoris paterni vis se primum quasi effuderat, accedente etiam fortasse aliqua occultiore naturæ conciliatione.

Erat puer gentis Marchicæ, qui tum certis de
caussis clanculum Wittenbergæ in studiis li-
terarum educabatur, inque ædibus Philippi
Melanchthonis degebat, patria Brandebur-
gensis, Georgius nomine. Hic discendi ar-
dore flagrabat, & in eo impetus quidam di-
vinus manifesto apparebat, efferens se ad sa-
pientiæ virtutisque præstantiam; qualis in o-
mnibus, qui vlla in parte & quocunque gene-
re virtutis singularem laudem & egregiam fa-
mam consecuti sunt, fuisse animaduertitur
& esse consuevit. Hinc enim existit immen-
sa cupiditas, impellens atque instigans ani-
mum ad ea suscipienda & agenda, quibus,
quæ aliquis appetiuit, ea se esse adepturum
sperat. Inter quos conatus neque labor fugi-
tur, neque cura alia admittitur, neque co-
gitationi actioniue alteri locus relinquitur.
Inque hoc modo opera datur, vt in quod
incumbendum sibi aliquis duxit, in eo laude
excellentes ipse non modo assequatur verum
etiam antecedit. Itaque dies noctesque
summa contentione enititur, vt ad partem
studio diligentia suæ facultatem, maiorem
aliquam copiam addere & acquisita bona au-
gere possit. Vidi ego hunc Georgium, qui
postea Sabini nomine celebris fuit, valde te-
nera adhuc ætate, lacrimas profundentem ad
lectionem boni & elegantis carminis. Au-
diui

diui tristes querelas eius, deplorantis suam infelicitatem in scribendo, quum non solum per ætatem nihil quod perfectum esset ipse elaborare, sed ne intelligere quidem rationem perficiendi elaborandique adhuc valeret. Huic sane iuveni puellam filiam suam desponderat Philippus, duxitque eam ille anno Christi M.D. XXXVI. Quumque non modo scientia literarum donarumque artium excellere, sed dignitate quoque præstare cuperet, & difficultatis & molestiæ in isto cursu nonnihil ei fuit exhibitum. Atque de cæteris prætermitti recte potest narratio. Hoc autem anno, in quo expositio nostra occupatur, ostensa spe melioris & splendidioris conditionis in Prussia, haud scio quo pacto, inter focerum ac generum non quidem odium aut simulas, sed alienatio tamen quædam & prope dissidium ortum fuit. Narrationem autem talium ideo nequaquam omittebam ducere, non modo ne quid præterea- tur quod expositionis fides requirere videatur, sed ut huiusmodi quasi vulneribus inspectis, quam misera interdum vita sit magnorum virorum intelligatur, quum ad onera Reipublicæ pondus etiam domestici doloris adjicitur. Fons autem erat omnium, quod Sabinus focero nimia cupiditate illustris fortunæ videbatur ardere. Ille autem non tan-

tum adiuuari & quasi promoueri se ab ipso, quantum optabat & posse arbitrabatur, ægre ferebat. Scholasticæ vitæ genus amabat Philippus, & illa humilitate delectabatur. At Sabinus eminere & conspici volebat, amplitudine etiam honorum & opulentia. Itaque magna ille spectare, neque nominis celebritate, quam rectis studiis sibi comparauerat, esse contentus: hoc agere, vt vulgi oculi in se conuerterentur, & ipse in Reipublicæ quoque luce versaretur. Ex eo fiebat vt voluntates horum aliquantulum disiungerentur. Quod vbi accidit, quamuis non inimiciæ etiam suscipiantur, amicitiam tamen debilitari variis suspicionum offensionumque causis necesse est. Etsi autem Philippo Melanchthoni nemo inueniebatur ad eleuanda ferendaque ea, quibus interdum grauissime lædebatur, fortior atque patientior, tantum aberat vt ab ipso vllius veluti secessionis occasio daretur; tamen in hac quasi velitatione, multa vehementer pupugerunt animum ipsius, præsertim quum nonnihil tristitiæ vel etiam acerbitatis ad filiam pertineret, quam vt diximus, maximo amore complectebatur, quamque tam procul deinceps abfuturam, & cum marito irritato discessuram esse, valde dolenter ferebat. Aliqui etiam huic aut illi assentando pene effecerant, vt distractio
ad

adiurgia ac contumelias euaderet. Sed ista tamen veluti tempestas sic abiit, vt moderatione tolerantiaque & obsequio Philippi facile leniretur Sabinus, & coniunctio benevolentiae mutuae inter ipsos conseruaretur, & in coniugii vsu nihil insuaue sequeretur, praesertim quum & rei atque dignitatis accessione augeretur Sabinus. Apud quem Philippi filia postea, nulla re dirumpente iucundae consuetudinis amorisque mutui vincula, annis quatuor in Prussia vixit. Decessit enim anno Christi M. D. XLVII. apud montem Regium Prussiae IV. Cal. Martii, qua nocte per quietem patri species mortuae filiae oblata est, eoque somnio significatum esse casum istum & ipse existimauit, & euentus, facit vt credibile sit: eiusque mortem nunciatam magis molliter tulit pater amantissimus illius, quam plerique esse laturum crediderant; vel ratione quasi in gyrum exultantes animi motus reducente, vel diuturnitate temporis ad toleranda omnia factus robustior.

LXII. Priuata haec incommoda solitudine Reipublicae cumulabantur. Nam & bellum periculosum inter Imperatorem Carolum Regemque Galliae Franciscum vtriusque summa contentione impendebat ac mouebatur, & actiones de Brunsvicensibus negotiis instituebantur eiusmodi, vt his se-

mina certaminum tumultuumque nouorum iaci viderentur. Verum & res tandem, Carolo in Gallicum agrum progresso longius, composita est, & pax inter Reges facta, & contentio illa Principum intra verborum maledicta & criminationes tunc quidem constitit. Sed Philippus Melanchthon aliis quasi in portu, id est apud suos, procellis iactatus ita fuit ut pene euerteretur, vel oppressus vel pulsus iniquitate & odio nonnullorum, qui contra ipsum Martini Lutheri animum incitauerant atrocitate accusationum, quarum caput erat moderatio & lenitas, quibus ab illo aduersarios subleuari dicebatur. Atque aliis temporibus concedendo & molliendo quædam, causæ eum nocuisse prædicabatur. Tunc autem renouabantur, cum quadam non modo vehementia sed plane sævitia, disputationes de sacratissima in Ecclesia Christi actione cœnæ mysticæ, quæ est communicatio corporis & sanguinis Domini nostri Iesu Christi. De ea quorundam, qui Martino Luthero ita se dabant, ut doctrinam illius vniuersam non modo cupide amplecterentur, sed eam etiam exaggerare non necessaria interdum amplificatione studerent; horum igitur nonnulla insulsa & propemodum profana tam dicta quam scripta illi, nonnullisque aliis piis & attente rem consideranti-

rantibus, non probabantur. Sed hac quasi nubecula celeriter eo quidem tempore depulsa, turbæque istæ facile sedatæ fuerunt, & temere incitatum iracundiam quibusdam reprimentibus, & Philippo Melanchthone solitam moderationem patientiamque constantissime usurpante. Grauius etiam perculsus tunc ille est nunciata morte Valerii Cordi, qui patrem habuerat Euricius, virum ingenio doctrinaque excellentem. Qui me, quum Erphordiam studiorum causa venissem, humanissime complexus notumque habuit admodum familiariter, suorumque Epigrammatum luculentis versibus studiose ornauit. Eumque ego vicissim obseruans colui, & quibus potui officiis, illa ætate conditioneque mea, adiuui. Neque erat minus in filio præclara natura, & tempora magis opportuna ad illam percolendam optimarum literarum artiumque copia, & occasiones habuerat patre meliores. Hic iam omnibus ad spem expectationemque de eo admirabilem erectis, quum spectatæ eruditionis atque scientiæ opera edidisset, in Italiam augendæ liberalis & utilis cognitionis gratia profectus, Romæ febre laborans moritur. Morbus autem contractus putabatur, nimia defatigatione in locis calidioribus; quod ipse, qui in artis medicinæ studium incubuisset, non prætato

modo ac campos, sed montes vallesque vbi-
que perreptare, herbas, radices, stirpesque ex-
plorans non cessaret. Aegrotavit eodem
tempore ibidem Cornelius Sittardus Colo-
nienſis, qui tum quidem periculum euasit,
sed poſtea Norimbergæ cum maxima laude
& plurimorum ſalute artem Medicinæ facti-
tans tabifico morbo conſumtus interiit an-
no Chriſti M. D. L. Valerium autem vt no-
tum earumque luxit Philippus, ſed magis de-
deplorauit mortem ipſius propter erepta Rei-
publicæ commoda & interceptos fructus,
qui potuiſſe ab illo, ſi contigiffet vita diutur-
nior, percipi viderentur.

LXIII. Sequens annus Chriſti M. D. XLV.
vidit crudeliſſima ſupplicia & ſæuitiam im-
manem in Galliæ regno, non tantum ſingu-
los aliquos corripientem, ſed in oppida po-
pulosque totos graſſantem, iugulando omnis
ætatis, ſexus, conditionis mortales, & inflam-
mando oppida atque vicos regionesque va-
ſtando; quod aliqui in ſtudio veritatis, & er-
rorum manifeſtorum declinatione, tanquam
hoſtes nominis Chriſtiani & deſertores ca-
tholicæ Eccleſiæ accuſarentur. Vidit & con-
uentum indictum in Vangionibus; qui fuit vl-
timus, (nam euasit hic in annum proximum
deductus Ratibonam) in quo verbis & col-
loquiis de controuerſis doctrinæ capitibus
diſce-

disceptari placuit. Nam siue infidiose & calide, seu fatali quadam progressionē, ita res actæ, eaque tum cogitata, deliberata, susceptaque fuerunt, vnde tandem varii multiplicisque conatus belli Germanici eo euaserunt, quo iamdudum cupiditates plurimorum impulerant. Affuit ibi Cardinalis Farnesius. Principes Germaniæ non affuerunt. Itaque cum colloquii de religionis rebus mentione, conuentus alter rursus indictus, qui ageretur ad Danubium Ratibonæ. Interea ad recuperandum principatum suum exul Brunsvicensis tentare molirique quicquid poterat, & collecto tandem exercitu, in suo quondam territorio tunc victus captusque fuit, ductante copias fœderis aduersarii Philippo Landgrafio Hessorum. Hoc anno mortuus est optimus & integerrimus, sapientiaque & virtute, inprimis pietate eximia, præditus Georgius Heltus patria Vorchemensis, quod est oppidum ditionis Pabepergicæ; meus præceptor sic de me meritus, vt non minus gratiæ ei quam parentibus debeatur. Qui neque me aliter quam filii loco toto quinquennio, quo discipulus ipsius fui, habuit, & retinens illam caritatis affectionem dilexit omni tempore vitæ suæ. Vtebatur hoc reuerendissimus & genere, sanctitate, omni-que ad Deum & homines laude illustrissimus

Prin;

Princeps Georgius Anhaltinus, quæ antiquissima & præclarissima Germanicæ nobilitatis familia Ascania est: eiusque autoritate atque fide non facile quicquam aut prius aut potius ducebat. Fuerat autem cum fratre illustrissimo Principe Ioachimo in disciplinam ei adulescens traditus. Quo nomine & erga me illorum Principum clementissimum fauorem expertus sum, qui me etiam condiscipuli appellatione dignarent. Sed tantum tribuebat Heltus Philippo Melanchthoni, a quo & ipse singularem in modum diligebatur & magnificabat, ut sæpe impetraret copiam aliquantis per Wittenbergæ degendi. Vbi illum cerneret cum libellis & chartis ad loca doctrinæ publicæ itare, non minus assidue & relictis omnibus quam infimæ sortis alterum quenquam. Tantus durabat in sene etiam ardor discendi. Nonnunquam de grauibus & difficilibus rebus quærendi consilii que petendi ille causa a Principe eo mittebatur. In quo valde liberaliter potestate facta uti solebat. Atque is tum Dessauia mortuus, & illustrissimis Principibus & Philippo Melanchthoni ingens desiderium sui reliquit. Luxeruntque eum illi ut parentem, hic non secus atque fratrem, & monumentorum operibus ac scriptis studuerunt celebrari. Cunctas ille facultates suas libris coemendis impen-

penderat, habuitque Bibliothecam omnis generis librorum refertam. Cuius æstimatæ pretium, munifice Principes persoluerunt, secundum voluntatem & sententiam testamenti ipsius. Non possum silentio hoc loco præterire quod memorabile videtur. Quum Heltus a primæ pueritiæ annis castissime cælebs vixisset, considerans tamen in quam ætatem incidisset, & cuiusmodi vita moresque essent sæculi huius, certæ pecuniæ summæ fructum annuum honestæ & pauperi alicui virgini, dotis nomine, quo facilius in matrimonium collocari posset, de suis destinavit. Quod matrimonia conciliari ad conscientiæ puræ conseruationem, & turpitudinis multorumque malorum fugam plurimum prodesse iudicaret. Mei quoque ego mœroris & luctus domestici socium eo anno Philippum Melanchthonem habui, quum in patria amissem carissimum fratrem, de tribus vna mecum adhuc reliquum, Hieronymum. Quem Philippus quod cognouisset esse ingenio bono & acro, & morum grauitate, & probitate vitæ, multisque præcipuis laudibus eminere, non mea tantum caussa, sed ipsius etiam admiratione adductus, carum habuerat, & mortuum veræ beneuolentiæ lacrimis deplorabat, quum meos quidem gemitus consolatione amantissima literarum suarum feda-

sedare conaretur. Id quod & ante asperis temporibus nostris ille studiosissime fecerat, quæ curæ ei fuere maiori, quam si propria essent atque sua. Miserat ad eum non diu ante quam moreretur epistolam accurate scriptam, de filia, cui ille, quod minus confiderate & ignorante se consilium de coniugio cepisset, valde irascebatur. Quæ leuitas quantopere parentes honestos & sequentes laudem integritatis offendere soleret, intelligebat quidem Philippus, sed malum istud sanari ignoscendo ducebat esse melius. Quæ & ipsa epistola, vna cum aliis ipsius, si videbitur & res tempusque feret, aliquando edetur. Et ista, nostrarum enim rerum esset expositio, inculcanda non sunt, quum quidem varietatem habuerit tantam vita fratris mei, & ea in vtramque partem illi vsu venerint, vt narrare indignum non esse videatur. Qui & diuinitus ex periculis maximis ereptus, neque secundis rebus insolens, neque aduersis mollis fuit: veritatis amans, integritatis & fidei spectatæ. De quo* prostrato etiam melior existimatio bonorum fuit, quam de iis quorum odio & inuidia conciderat. Verum de his satis. Rediens igitur ad propositum oratio ea quæ restant persequatur: & isti quasi emblemati ignoscatur a legentibus, mentionique tali impetret veniam fraterni am-
mo-

moris affectio , & desiderium amissi huius,
& consanguineæ necessitudinis recorda-
tio.

LXIV. Hoc anno commissâ administra-
tione rei Mersburgensis illustrissimo Princi-
pi Augusto Henrici F. Duci Saxonum, ad-
iungi ad gubernationem ipsius placuit illu-
strissimum Principem Georgium Anhalti-
num, cui respectus & cura Ecclesiæ regendæ
imponeretur: eoque ille munere est functus
diligentia & fide maxima, ad id vsque tem-
pus, quo administrationis istius onus Prin-
ceps Augustus deposuit. Quum enim inde
functionem muneris sui pendere vniuersam
non ignoraret, hanc prouinciam non magis
habente Principe Augusto, suam quoque cu-
rationem sibi adimi & simul extinguï intelli-
gebat. Paulo post, quorumcunque sane o-
pera atque studio, nam mihi ista scrutari non
est visum, effectum fuit vt collegium Mers-
burgense, ommissa antistitis more maiorum ex
suo corpore electione, postulandum ab ex-
terno statuerent vt antistes Ecclesiæ illius esse
vellet, cum qua iam gubernandi regionem
illam principatus rursus cohærebat. Is fuit
ex eorum genere, qui antistitum aliorum suf-
fraganei vocantur, vicarii quidam certis ope-
rationibus sacrorum exequendis. Quos &
ipsum, quod antistitum nomine censerî oportere

tere existimaretur, certarum vrbium titulis ornari, earumque ritu solenni antistites renunciari, tum est cœptum, quum Christianæ religionis veritas superstitionum varia specie commutata fuit, siue errore seu dolo. Atque ille, qui tum Mersburgum accitus ad hoc fastigium dignitatis & opum peruenit, Sidonius appellabatur, natus in terra Ferdingensi, humili loco, & educatus in studiis Tübingæ, ibique & Magistri liberalium artium honorem consecutus: quum vixisset aliquantisper in contubernio fundato ad alendos pauperes scholasticos, quibus certo numero & de domicilio & victu & doctrina prospectum est: inde ad ludos literarum aperiendos discessit, venitque Moguntiacum ad Rhenum. Ex magistro ludi deinde, quod doctior quam alii & facundus esset in primis, factus sacerdos est, concionumque in templis habendarum munus ei datum. Et his gradibus ascendens ex illo, quo diximus, Vicariorum genere, ad Principatum Mersburgensem processit. Postulationi isti illustrissimus Princeps Georgius, cuius in eo collegio spatii temporis longi prerogatiua esset, in quod ipse ante cæteros omnes cooptatus fuerat, assentiri magnis & grauibus de causis noluit. Non quod ipse sibi aliquid commodi quæreret, sed ne temere committeretur summa rerum

nam ignoto, & de cuius actionibus atque scriptis editis suspicio esset, doctrinam ecclesiasticam perpurgatam & probatam sibi, illum non amplecti. Nam quod ad terræ illius dominatum attineret, testabatur, Imperatoris Maiestati se subiectissima voluntate parere, neque recusare, ne, quem huic præesse Imperator voluisset, potestas ista contineret. In qua sententia optimus Princeps constantissime perseveravit. Sed neque de his rebus quæ opinio quique sermones hominum fuerint, neque omnino temporum illorum quasi cursum enarrare, & eo, vnde digressa est expositio, reuocare illam, libet. Princeps Georgius & sapientia & animi magnitudine excellebat, sed religiosæ pietatis & veritatis cœlestis amor atque studium erat in eo eximium & admirabile. Quum igitur ab ipso peteretur hoc adiumentum, & ut in Ecclesia Mersburgensi antistitis loco præsideret, non prius potuit obtineri assensio, quam consultis iis, qui in Saxoniciis regionibus præstare cognitione & scientia veritatis cœlestis, & viri optimi integerrimique videbantur. In quibus primas facile tenebant Martinus Lutherus & Philippus Melancthon. Quorum non modo cohortatione motus, sed sententia atque iudicio impulsus, ferri sibi illam curationem & honorem man-

dari passus est, vt rem ecclesiasticam Merburgi gerendam suscipere, minime tunc quidem constitutam atque ordinatam, ac potius admodum confusam & distortam. Quam illius vigilans pietas, & religiosa industria, in eam formam redegit & tali ratione composuit, quæ firmissimo fundamento nitens, non modo dum ipse præfuit stetit, sed neque postea labefactata est; vel non audentibus ullis conuellere pulcherrimi quasi ædificii structuram, vel non reperientibus quid melius rectiusue elaboraretur. Norat Princeps Georgius non solum sacrarum literarum exquisitam doctrinam, sed consuetudinem etiam & ritus Ecclesiæ, tam definitos & expressos in illis, quam secundum has consensione fidei introductos. Nam a prima adolescentia in his studiis versatus fuerat. Eratque ei exploratum, quatenus a sincera & pura sacrarum literarum intelligentia, doctrina ecclesiastica alicubi recessisset, & quibus in partibus antiquitatis religiosa observatio deprauata, mosque maiorum corruptus esset. At ille in omnibus bonam esse conscientiam & se culpa vacare cupiebat, inque eo maxime sollicita erat circumspectio ipsius & diligens consideratio. Itaque non, nisi suffragiis in vicinia Ecclesiis præpositorum designatio illa approbaretur, & solenni con-
uentu

ventu iudicium hoc fieret, & sententia ipso-
rum cum religiosis ad æternum Deum pre-
cibus publice cognosceretur, vel nominis ho-
norem admittere, vel vsurpare dignitatem,
vel omnino quicquam rei gerendæ capesse-
re voluit. Fuerunt ea tum acta, quæ illa
quidem tunc abiis, qui Romanæ horum tem-
porum Ecclesiæ præscriptionem, vt. mendo-
sam neque amplius ad veritatis normam qua-
drantem, sequi se, scientes & intelligentes
vitia, sine impietatis scelere posse non arbi-
trantur, mutata in vera & recta, (vt ipsi affir-
mant atque demonstrant) non esse legitima
perhibentur ab omnia mordicus tenentibus,
quibus Romani Pontificis nomen & autori-
tas prætenditur. Sed omnes profecto qui
adessent aut spectarent non aut profani aut
dementes, quum reipsa actiones illas reli-
giosissimas, tum specie esse præclarissimas, si
quod sentirent vellent dicere, fateri coge-
rentur. Atque putavi inferendum hoc lo-
co scriptum a Philippo Melanchthone de his
compositum, omnium in Ecclesiis vicinis
præsidentium, qui accersiti fuerant, nomine,
cui & illi, vt fieri solet atque debet, subscrip-
sere. *Gratias agimus Deo aeterno patri Do-
mini nostri Iesu Christi, quod immensa bonita-
te & instituit inde usque a conditione & re-
stitutione generis humani. & seruat omnibus*

saeculis usque ad resurrectionem mortuorum, ministerium Euangelii, & excitat subinde idoneos doctores, ac mandata dedit Ecclesia sua, ut vocet idoneos ministros, & promittit se per eorum vocem daturum remissionem peccatorum, Spiritum sanctum, vitam, & iustitiam aeternam; & oramus eum, ut lucem Euangelii sui non sinat extinguere, sed nunc quoque excitet puram & salutaris doctrinam Euangelii propugnatores & fideles custodes, & colligat sibi etiam nunc in his regionibus Ecclesiam, a qua in omni aeternitate celebretur. Quum autem ad hoc ministerium Euangelii reuerendissimus & illustrissimus Princeps, Dominus Georgius Princeps in Anhalt, Comes Ascania & Dominus in Bernburg, Praepositus Ecclesiae Magdeburgensis, rite & pie vocatus fuisset, ad functionem muneris ecclesiastici adiuuandam in Episcopatu Mersburgensi, accersiti sunt vetere primarum Ecclesiarum more viri docti & graues, qui vicinas Ecclesias gubernant, quorum nomina infra ascripta sunt, ut in ipsa Ecclesia Mersburgensi ad hanc vocationem adderetur publicum testimonium ordinationis. Nos igitur conuocati, quia certo sciebamur, hunc illustrissimum Principem Georgium recte intelligere & constanter amplecti puram Euangelii doctrinam, quam Ecclesiae harum regionum una voce & vno spiritu cum catholica Ecclesia Dei profitentur,

tur, & eximiam eius esse virtutem & sanctitatem; testimonium nostrum de eo, ritu Apostolico, impositione manuum, declarauimus, & ei ministerium docendi Euangelii & administrandi Sacramenta commendauimus. Quumque Paulus Tito praeceperit, ut presbyteros ad docendas & gubernandas Ecclesias passim constitueret; sciat hic Ordinatus, voce Apostolica sibi precipi in hac functione, ut sacerdotes ad docendas & regendas Ecclesias ordinet, & eorum doctrinam & mores inspiciat, & meminerit sibi quoque precipi a Filio Dei: Et tu conuersus confirma fratres tuos. Et quum Filius Dei sedeat ad dextram aeterni Patris, ut sit efficax per hoc ministerium, precamur, ut in tota gubernatione regat & adiuuet hunc Ordinatum, sicut promisit, inquit: Si quis diligit me, sermones meos seruabit, & Pater meus diliget eum, & veniemus ad eum, & mansionem apud eum faciemus. Et ut hac se consolatione sustentet Ordinatus ipse, hortamur. Et si enim multa & magna sunt in gubernatione pericula, nec ulla est sapientia humana par tanto oneri: tamen sciat, Deum vere adesse, & in Ecclesia habitare, ubi vox Euangelii sonat, eamque defendi & seruari a Deo. Hac fiducia suscipiendi & perferendi sunt tanti ministerii labores. Data die tertia Augusti anno M. D. XLV. in oppido Mersburg. His sua qui-

que nomina, qui tum acciti præsentes erant, subscribere, & est res peracta religiosa cum pietate & specie præclara. Qua indicata, ea pergamus narrando persequi, quibus postea quoque Philippi Melanchthonis implicatas considerationes, curas, operas, studium, industriam fuisse comperimus.

LXV. Conuenerat ut Ratibonæ aliqui de iis negotiis atque rebus colloquerentur, quæ ad religionis sanctitatem instaurandam pertinerent. Huic actioni interesse, qui huiusmodi alias prius moderatus fuisset, Philippum Melanchthonem initio placuerat, literæque ad ipsum ea de re missæ paratum esse instructumque iusserant, ut iter statim, ubi nuncium illius accepisset, ingrederetur. Scriberant amici quoque alii, aliud admonendo subjicientes. In quibus lenia pleraque erant, de vestibus, de comœatu, & similia. Quæ quum illi curæ cordique non admodum essent, aliquantulum indignabatur, in tanto discrimine sollicitari animos respectu ad tam parua, quum præsertim maiora minus attente considerari viderentur. Itaque constat, tunc responsiones ipsius ad quosdam fuisse stomachosiores. Sed consilium istud, de Philippo Melanchthone legando, præter opinionem omnium subito mutatum fuit. Ipso quidem haud ægre ferente; multi tamen neque

neque tunc probare, quum maximum periculum impenderet, remoueri Philippum Melanchthonem, & postea euentui infeliciori causæ aliquid hoc dedisse arbitrari. Itaque qui delecti fuerant quum Lipsiam transfirent, officii gratia Philippus Melanchthon eo usque proficiscentes est secutus. Iam de Synodo indicta, cuius locus Tridentum designatus esset, varii rumores spargebantur, & nonnihil consultabatur. Fridericus etiam Palatinus, qui Ludouico fratri successerat, quod indies magis intelligeret, quo res ecclesiasticæ prolapsæ essent, neque post longam expectationem opem tam misere afflictis, non modo errore sed scelere & improbitate dominationis iniustæ, ferri cerneret, cessantibus iis quorum officium erat morbis illis mederi, ipse subuenire rebus laborantibus in suæ ditioni subiectis terris statuit. De quo quum ad Philippum Melanchthonem imprimis referretur, quumque non modolabentis consilium peteretur, sed literæ etiam mitterentur, quibus ille accersebatur, scriptæ clementissima & benignitate & humanitate, fiebat vt ad cogitationes graues de Synodo, non leues istæ accederent. Atque Synodum illam magis specie quam reuera indictam & inceptam, aliudque simulatum aliud cogitatum fuisse, quum aliis signis de-

prehensum, tum administratione negotii declaratum est. Reginaldus quidem Polus, stirpis Regiæ Britannicus exul, in eorum numerum relatus quos Cardinales vocant, magna cura consilioque graui & ex animo, ut videtur, perscripsit, quid fieri seruarique in talibus cœtibus oporteret; isque liber nuper adeo est editus, ea quæ iamdudum non modo nutant sed plane ruunt substernens atque statuens, perinde ac certa & firma. Consultabatur tamen, ut dixi, ab iis, qui insimulabantur seditionis in Ecclesia, tanquam Pontificia Maiestate læsa & turbata Republica, quid a se, ut tali in re agerent, officium videretur postulare. Verum tunc quidem non admodum laboriosæ deliberationes istæ fuerunt; & aliis ad Danubium missis, Philippus Melanchthon in sua quasi statione remanere cogebatur, neque concedi illi peregrinatio, nedum migratio. Quibuscunque tamen modis potuit, institutum, laudatissimum illustrissimi Principis patriæ suæ adiuvit, quum quædam conscribendo de forma doctrinæ, tum mittendo, qui illi, exercendo administrandoque consentaneas actiones, præessent.

LXVI. *Hoc loco interposita de sequentibus præfatione quadam, dividere*

dere & quasi interpolare continuata narrationis seriem visum est. Ut si quis forte hac cognoscenda putasset, & attentius legendo superiora se sensisset defatigari, tanquam in longiore itinere, sisteret hic gradum, & paullisper acquiesceret. Quum præsertim ea quæ restarent, magis quam priora, veluti in salebris alicubi hærendi necessitatem expositioni impositura essent. Ut mihi ipsi quoque occasio quærenda fuerit, qua, sicut Comici seruuli, quasi respirarem & reciperem anhelitum, quo expeditius reliqua enarrarentur. Peruenit enim iam expositionis contextus ad demonstrationem rerum magnarum & mirabilium, itemque grauium & habentium multiplicem mœstitiam: quæ statim, postquam Martinus Lutberus ex hac vita excessit, motæ susceptæque & gesta sunt, turbasque eas dederunt & facinora ediderunt, quibus diuina & humana, cum pernicie maxima, labefactata & conquassata esse constat.

Atque audiui ego, ante mortem Martini Lutheri annis aliquot, quum sermones haberentur de dissidiis ob doctrinam & ritus ecclesiasticos factis, viros prudentes & autoritate singulari præditos sic loquentes, ut ostenderent se, viuentem Martino Luthero, nullam spem consensionis atque pacis concipere posse. Et comperi, nunciata morte ipsius, quendam Britannicæ gentis, dignitate & honoribus præstantem, dixisse: arbitrari sese, illo tempore, maxime opportuno ad reconcinnandum diuulsa & dissipata componendum, propitii Dei benignitate, e medio abiisse eum, qui impedimento reconciliandæ inter alienatos gratiæ futurus fuisset. Quanta autem sit humanarum mentium cecitas, quum contemplandis perspiciendisque præsentibus, tum impendentibus & futuris præuidendis atque considerandis, hoc etiam casu cognitum fuit. Quem enim non pauci primarii viri obstare tranquillitati ac quieti solum opinati fuerant,

eo ipso remoto, maxima demum tempestates & eluuiēs, tanquam aggeribus ruptis, fœdæ extiterunt. Quanquam autem ista tempestas Germania potissimum oblata est, & hanc inprimis illa calamitas peruasit; non diu tamen post, incitata ingentium malorum vi alia quoque loca correpta fuisse scimus, & an non ad aliquos miseriæ etiam deinde maiores pertinere possint, haud scio an exploratum sit nemini. Ut non debeat pro nihilo duci eorum notatio atque coniectura, qui suspicati fuere: quod illo die, quo Martinus Lutherus mortem obiit, in fastis ascriberetur Concordiæ nomen, eo omen tendere, ut concordiam interiisse significari videretur. De quo sane statum quisque quod volet. Quæ quidem iis temporibus, in quæ incidit Martini Lutheri ex hac vita migratio, tractata & mox designata sint, qui animo cogitationeque percurreret ac comprehendet, is deprehendet atque comperiet, maiores diffi-

*difficultates, & inhumaniores inimicitias, & iras vehementiores, & acerbiora odia deinde quum prodisse, tum per-
gendo in sacris profanisque rebus stra-
ges edidisse eiusmodi, quarum & nunc
detrimenta deplorentur, & quas secu-
tura etiam infelicitates animis pertur-
batisimis metuantur. Quum sint au-
tem libera de dubiis existimationes, ut
alii aliud arbitrari concessum est, sic
liceat, nisi fallor, putare: quod super-
stite adhuc Martino Luthero ne-
que suscepta fuissent neque gesta ea,
quorum cum sensu doloris nequaquam
levis meminimus, & indicia magis
quam enarrationes a nobis deinceps
referentur. Hacque ipsa, habeo per-
suasum recordanti, inclite Princeps Phi-
lippe, vel de mea descriptionis subiectio-
ne, vel alia quacunque occasione, illu-
strissima virtuti sapientiaque tua exci-
tatura esse sensus cogitationesque & a-
nimi motus varios atque diuersos: cui
negotia actionesque omnes nota, & cu-*

ius in iisdem opera occupata, & exercitatus labor, & pericula versata sunt. Etsi autem interea & iracundiæ indignatio, & doloris quoque morsus, repetendo & veluti refricando nonnulla, haud abesse poterit: ut tamen presentibus duris atque asperis rebus, secundum Euripidem,

*Iucunda tristium ac malorum obliuio,
Sic profecto eodem autore,*

Suavis est laborum præteritorum memoria.

Atque abiere sic pleraque, ut quum magnæ quidem iacturæ tum naufragia misera facta, sed recollectæ tamen res atque receptæ, & rursus Reipublicæ quasi nauigium instauratum sit. Quum quidem neque vexatio interim prorsus intermissa cessauerit, neque procellæ ventorum vebementiorum penitus siluerint. Nunc vero id scilicet agendum est, & illustrissimæ tuæ Excelsitati, & cæteris non modo in causa coniunctis, sed quibus patriæ omnino & Reipublicæ uni.

*uniuersa salus & incolumitas cura est :
ut recuperata tanquam ex desperato
pene morbo sanitati & retenta vitæ
tuendæ detur opera , & caueatur ne
denuo incidatur ineundem. Sunt autem
agrotationes magis & periculose &
molestæ , in quas leuatus semel aliquis
iterum delabitur. Me sane de ea ra-
tione disputare , qua quasi bona valetudo
Reipublicæ sustentetur , non decet.
Facere tamen quin moneam nequeo ,
quamuis audacter vel temere etiam fa-
ctum forte videatur. Post cultum
quidem religiosæ pietatis , & veneratio-
nem Dei æterni , & doctrinæ veritatis-
que cœlestis studium , nihil magis ne-
que certius non solum tentationem pro-
hibiturum , sed metum quoque malo-
rum ademturum esse omnium , quam
consentientium animorum illustrissimi
ordinis vestri sinceraque amicitia ne-
cessitudinem , & mutua voluntatis of-
ficia , in procuranda communi utilita-
te , & caritate patriæ præponenda con-
iunctio-*

iunctioni, propinquitati, societatique humanae uniuersae. Hae affectio, & istud propositum atque studium, non poterit non simul vera propriaque commoda singulorum complecti. Vnde etiam optima spes excitabitur, futurum ut sceleratae audaciae violentae aggressiones, & dissolutae vitae turpitudine coerceatur, & ad grauitatem disciplinae veteris mores reuocentur. Per quam diligentiam in genus humanum clementia, sicut per contrariam prauitatem ira Dei aeterni, solet proferri atque incitari. Atque haec iterum quasi prolocuti haecenus, ita deinceps reliquum in terris curriculum Philippi Melanchthonis veluti per vitae ipsius spacium deducendo persequamur.

LXVII. His igitur temporibus, quae inchoarent annum Iesu Christi M. D. XLVI. Philippus Melanchthon comes fuit Martini Lutheri, in suam patriam ad Dominos illius iter facientis. Vnde reuersis ipsis & prospera fortuna usis, quum iterum sine Philippo Melanchthone profectus eodem esset Lutherus,

therus, mortem illic XII. Cal. Martii obiit: sibi quidem felicem, nam religiosa cum pietate & animo magno ac firmo placide decessit, plurimis tamen, & potissimum Philippo Melanchthoni, perquam luctuosam. Non potuit enim non mœrere eò amisso, cum quo annis XXVIII coniunctissime vixerat, & quem ob virtutes eximias colens dilexerat, cuique in perpurganda & illustranda doctrina Ecclesiæ fidelis socius & adiutor fuerat. Facta autem est supra mentio singularis & eximiæ amicitiae inter hos duos. In qua vterque scilicet vitia alterius quum nosset, ita tolerauit, vt quamuis & tempora ad distractiones procliuia, & hominum leuitas dissidiorum cupida esset, caueretur tamen ne simultas existeret, ex qua alienatio animorum nasceretur, & diuelleretur vsus consuetudinis ac familiaritatis. Qui autem viros magnos & magna laude præstantes, si quid in eis vitiosum notetur, culpari putat, is nimis splendide de humana conditione sentit. Solius enim Dei est proprium, vt careat culpa; hominum vero natura hoc non fert. Erat Martini Lutheri ingenium acre & sagax, erat animus ingens & excelsus. Nunquam enim in timiditate & socordia, vel etiam fortitudine & solertia mediocri, ea, quæ egit, susciperentur. Excellentes autem homines sicubi incur-

incurrunt, non fieri id sine quasi fragore quodam potest. Sane lubricum esse hoc loco veluti iter expositionis video. Nam apud quosdam Martini Lutheri nomen adeo odiosum est, ut auditum execrentur; contra nonnulli in illius dictis aut factis aliquid argui omnino pati nequeunt, & si quis hoc facere audeat, eum statim impietatis reum declamitando peragunt. Ego, quæ comperi & verâ esse scio, eâ commemoranda duxi, neque invidiam veritus neque gratiam aucupatus.

Qui quidem Martini Lutheri autoritatem & nomen ita celebrant, ut supra conditionem & modum generis humani non dubitent extollere, iis videndum, ne præstantissimi atque summi viri bonam estimationem tribuendo nimium diminuere, & suæ audaciæ ab illa excellentia præsidium quærere videantur. At isti insectatores, qui non modo omnia scripta illius damnant ut impia & turbulenta, sed nomen etiam auditum tanquam omnis mali detestantur; nunc etiam si quid cordis haberent, poterant reminiscendo considerare, quid acerbitate odii & contumacia peruvicaciaque aduersandi & clamoribus vesanis effectum sit. Quorum enim vulnera sanandi causa attrectantur, eos clamando & obnitendo sibi ipsis nocere con-

Q

stat.

stat. Possitque his narrari Aesopica apud Aristophanem fabula:

*Aesopus a cœna redibat vesperi,
Hunc allatrabat improba & petulans canis;
At ille ad hanc conuersus, o canis, canis,
Hac si repressa, ait, lingua tua mala,
Panem coëmeres, cor tibi esse crederem.*

Et isti, si, quanta inopia laborarent eorum, quibus religiosam pietatem abundare necesse est, reuocarent ad animum suum, sique eis curæ esset, ut sibi ac aliis ea copia pararetur, quam requirit vitæ salutisque conseruatio, scaperent profecto & rebus communibus ac priuatis consulerent rectius. Sed (incidit enim ætas nostra in fatalis cuiusdam conuersionis quasi articulum, quum neque admonitiones quicquam proficiant, & querelis inanibus dolor tantum augeatur) orationem nostram ab instituta narratione recedentem non sinemus excurrere longius. Et de his rebus silentes, vna cum cæteris euentus & ipsos fatales, ut mulierculæ apud Aeschylum se facturæ aiunt, perferemus. Martinus Lutherus, quo tempore diximus, mortem obiit, præsentem infractoque animo & constante in sanctitate religiosæ pietatis, reliquitque & suis & alienis desiderium sui ingens, quamuis ætate graui decessisset; (nam annum omnino LXIII. viuendo eum confecisse comper-

tum

tum putatur) qui lugentes & ita tunc ex-
equias funeris cohonestandas curauerunt, vt
his memoria nominis ipsius quam studiosissi-
me & officiosissime celebraretur, & magni-
tudinem doloris sui gemitibus & lacrimis te-
stati sunt. In quibus Philippi Melanchthonis
studia atque officia eximiae caritatis facile
eminuerunt.

LXVIII. Sunt autem ex res statim con-
secutæ, quibus aliquid quasi remedii ab illo
inueniri potuisse credebatur, vt tam difficili
tempore eum decessisse magis deplorandum
esse existimaretur. Quum enim conuentus
ad Danubium iam ageretur, & inchoatæ es-
sent disputationes de controuersis ecclesia-
sticæ doctrinæ, inter eos qui de illis sedate
& moderate colloqui iussi fuerant, præposi-
tis etiam viris dignitate & sapientia præstan-
tibus negotio illi, a quibus omnia audiendo
cognoscerentur, & administrando ordinaren-
tur; nescio quibus certaminibus exortis, etiam
perculsis vana, vt ferebatur, formidine quibus-
dam, quum essent reuocati Saxonici, cæteri
quoque his adiuncti discesserunt, & ita collo-
cutiones illæ abruptæ sunt, non sine aduersari-
orum criminatione & indignatione præsidum.
Imperator autem inprimis factum hoc graui-
ter & iniquo animo tulit, & ad cætera putatur
cogitando retulisse, quæ ad contemptum sui &

maiestatem Imperatoris minuendam lædendamque pertinere arbitraretur. Instabant huic, qui Ducem Brunsvicensē conquererentur bello iniusto petito, & paternis auitisque terrarum possessionibus deiectum, interquē conatus recuperandi sua oppressum captumque in custodia vel carcere potius detineri, nihil neque lenitate postulationis, neque iussorum seueritate proficiente. Huc accedebat demolitio castelli munitissimi, quod vicinum vrbi Brunonisvici tum demum inter actiones liberandi ducem placuerat dirui: & non paruus cumulus, Iulii de Ecclesiastico solio Naumburgensis Ecclesiæ depulsio. Ad indictum quoque conuentum non venire ii Principes, quorum suspiciosa erat voluntas in refragando sententiæ Imperatoris. Quibus omnibus irritatus ille induxisse putatur tandem in animum & constituisse secum, bello decernere & auctoritatem Imperii sui armis defendere, ad quæ sumenda nullius instigatio hactenus eum adducere potuisset. Qui autem, ista occasione arrepta, Imperatoris iracundiam auxisse credantur, & auxiliis ad bellum pollicendis incitasse voluntatem, & dubitantem confirmasse, & cunctantem impulisse, (quum & occultius omnia facta sint, neque diuulgari ista conueniat, vel etiam multis de causis oporteat) non profertur

retur expositione nostra, parcente hominum personis, & refugiente consiliorum actionumque illarum indignam & inamœnam mentionem. Res quoque illa tota quomodo commota, suscepta, gesta sit, a me non differetur, hoc præsertim loco ad enarrandum minus idoneo, atque adeo alieniore. Ad Philippum quidem Melanchthonem, quæ durante adhuc colloquio agebantur, relata fuisse certum est, de cæteris alii in consilium adhibiti fuere. Afflixit tamen ista clades hunc grauissime, quum dolore Reipublicæ, tum plurimorum misericordia, quorum salutem & fortunas in periculum vocari ista horribili rerum perturbatione cernebat. Iudicii quoque ille & sententiæ contentione quadam mirifice angi. Neglectam enim esse veram & debitam communium malorum curationem non erat obscurum. Quam multa fraudulente & violente tentata designataque essent recordabatur. Neque eos, quibus Imperator tantopere irascebatur, non habere causas non tam aduersandi ipsi, quam recusandi quædam præ se ferentia maiestatis eius imperium, arbitrabatur. Tum animo volvere crudelitatem sæuitiæ in excrucian-
Q 3
atro-

atrocissimis affecti, partim odio immani adversariorum passim interfecti essent, nullius delicti rei, nisi quod non omnia, quæ huius sæculi approbatione gererentur, usurpare, quæque affirmarentur vulgo, iis assentiri ipsi vellet, ac quædam etiam reprehendere & culpæ auderent. Recens etiam tunc facinus patratum, animos plerorumque exulcerauerat, quod superans immanitatem communium scelerum animadversionem meritam effugisse intolerabile videbatur. Omnium enim vna voce ferebatur, & Hispanum quendam, familia Diassium, nefario dolo ob dissensionem de Religione fratrem germanum obtruncandum curasse, se adstante oculosque scelerato spectaculo fatiante; & diligentia eorum, qui fugientem insecuti fuerant, deprehensum captumque, nihilo minus euasisse neque tam impiæ cædis pœnas dedisse. Iam sententia Romani Pontificis excludens Archiepiscopum Coloniensem communione ecclesiastica, & functione muneris privans, quo tenderet non erant coniecturæ dubiæ. Hæc & alia animo considerationeque Philippi quasi luctantia, & tristitia euentus, quemcunque exitum res habuisset, nullam viro optimo & Reipublicæ amantissimo deque Ecclesiæ maxime sollicito quietem concedebant. Bellum autem procedere videbat,

bat, neque apparere auertendi illius rationem ullam; præsertim, qui pacificando & seduli & fortunati sæpe fuerant, e medio sublatis duobus illustrissimis Principibus, Alberto Moguntino & Ludouico Palatino. Nam quicquid hic aut ille vociferetur, hi profecto tanquam aggeres, ne bellorum veluti amnes Germaniam inundarent, obstiterunt. Ita vndique consilio opeque Rempublicam ad tranquillitatem retinendam destitui, perspicue cernebatur. Etsi autem talibus temporibus & rebus magis quomodo ferantur quæ acciderint cogitandum est, quam indulgendum mœorari; fieri tamen nequit, quin boni & prudentes quum causis tum tristitia euentorum magnopere perturbentur. Neque enim ferrei sunt vt non moueantur priuatis & publicis miseriis, & quo attentius omnia intuentur & animaduertunt certius, eo perturbari illos vehementius necesse est. Non modo autem quanta pericula ab externa potentia imminerent prudentium consideratione perpendebatur, sed in ipso apparatu belli maximi, quæ vel agebantur vel negligebantur, ea complures vereri cgebant, quid tandem futurum esset. In quibus non erat leuissimum, inter Saxonicos Principes gentiles gratia paulo ante sic reconciliata, vt verbis quidem illi mutuam beneuolentiam declararent, con-

sentio autem animorum firma non esset, & offensionum memoria causæque suspitionum relinquerentur. Eos tum initio statim non quidem manifeste distrahi tanquam hostes, sed nentiquam ut socios coniungi apparebat. Nunciata autem sunt hoc anno & alia, quorum tanta esset foeditas tantusque horror, ut eis rerum omnium turpis atque terribilis confusio ac peruersio portendi videretur. Ut Andreani in Scotia Cardinalis iugulati interitus. Ut Mechlinii miserabilis, pulveribus tormentorum ictu fulminis incensis, vastatio. Nam quæ rumoribus vulgabantur olenta atque monstra, ea hac narratione recensenda non putavi.

LXIX. Edidit libellum paullo ante hæc tempora Philippus Melanchthon, quo sane haud scio an nullus extet alius ipsius tam simplice libertate orationis compositus. In eo de Ecclesiæ disputatur autoritate, & libris, quos scripsissent doctores in Ecclesia, quasi censoriæ notæ apponi videntur. Id quod ab aliis aliter acceptum esse scio. Neque ego nunc de iis dicam, qui, quoties minus clementer attinguntur eorum vlcera, vociferantur atque clamant immoderate: quum quidem medicinæ leniori ipsi locum iam non esse intelligant, & secandi vrendique tamen cruciatus refor-

reformident. Hos igitur talibus disputationibus & isto libello offensos fuisse mirandum non est. Verum ego ex aliis quoque, in quibus essent neque a causa alieni, & erga Philippum Melanchthonem affecti haud male, audiui, quum de eo libello sic loquerentur, ut illum aperte reprehenderent, tanquam audacius facientem iudicium, & nimis fidenter pronunciantem de iis rebus, quarum hominis priuati & vnius, quamuis sapientis atque docti, cognitio non esset. Ac memini ab vno præ cæteris notatum, tanquam propemodum temere ibi positum: veterum quosdam aliqua minus diserte exposuisse, quum sentirent commodius; quasi illi accusarentur ut infantes atque indocti. Verum enimvero, neque Philippus Melanchthon magis sententiam ferre pronuciareque illa tanquam iudex videtur, quam indicare potius quasi monitor & hortator, ut in omnium libris legendis, quorum humana autoritas est, meminerit aliquis sibi versandum circumspecte & attente. Quod ad elocutionem vero attinet, id tale scilicet est, ut si studium bene & proprie loquendi perpetuo tanquam castæ virginis pudicitia custodiretur, nihil opus esset istiusmodi admonitione. Nunc formam sermonis toties mutatam, & diuersis locis temporibusque

tam diuersum vsum illius videmus, vt sit omnino, quid a legentibus quique scriptores intelligi voluerint, consideratio necessaria. Vt autem vita moresque alii aliam orationem exprimunt, sic etiam orationis mutatio vitæ morumque affert conuersionem. De quibus, esset enim quum longum tum alienum, res in præsentia explicanda non est. Est autem hoc expectandum plane vniuersis, qui proponi sui cuiuscunque modi operis quippiam in publicum voluerint, vt non eadem omnium de illo sententia feratur, quum ex conuiuiis ad vnas epulas inuitatis, *tres saltem dissentire* Poëta affirmet,

poscentes vario multum diuersa palato.

Vt qui fortunam hac in parte subire nolint, & nimis illius quasi rotam pertimescant, eos optimum atque consultissimum sit, nihil proferre neque edere, ac, si quiescere omnino nequeant, quin aliquod artis suæ, quam didicere, opus elaborent, continere domi istud, & secundum præceptum veteris tibi- cinis: sibi canere & Musis. Id quod mihi quoque scribenti ista ante oculos inque animo fuit, qui cernerem quanto cum periculo, vt communis omnium fieret lectio, hanc narrationem emissurus essem. Itaque sapius in hoc descriptionis labore manus sublata est, & de opere tandem absoluto consilium edenden-

edendi adhæsit. Venit autem mihi in mentem eius inprimis, quod grauiſſimus autor Plato ſcripſit; qui arcana naturæ, & ea quæ ſola animi intelligentia comprehendere poſſunt, (ipſe *νοητά* vocat) nequaquam mandanda literis ſcriptisque peruulganda cenſet, ſed memoria cogitationeque retinenda, & contem-
plando apud ſe ſemper & diſputando cum iis, qui ſtudio eodem teneantur, agitanda eſſe. Atque ego non ſemel & de his ſimiliter cogitaui, vel toto hoc ſcriptionis labore ſu-
perſedere rectiſſimum, vel certe nonnulla, quæ in noſtro ſcripto enarrantur, reticuiſſe me & preſſiſſe ſilentio, melius eſſe; vt & nullum in diſcrimen veniremus, & cum iis tan-
tum, quos conſtaret veritatem, religionem, pietatem, virtutem, doctrinam ſapientiæ, ingenuas artes, eruditionem literarum diligere & magnificare, hæc diſſerentur, & recor-
dando quaſi ventilarentur. Sed vicit cupi-
ditas mea proferendi in medium atque lu-
cem omnia, quum præſertim indies eorum familiarium numerus, quibuſcum iſtiusmo-
di ſermones haberi commodè poſſent, mi-
nueretur, & bona vel non mala ſaltem ſpes eſſet, compluribus non modo iucundam ſed
vtilē quoque fore lectionem ſcripti iſtius.
Et ideo propter aliorum vel leuitatem vel et-
iam improbitatem, hos aut voluptate aut
fructu

fructu cognitionis huius fraudandos esse non putauimus. Atque ut verum fatear, confirmato animo contra reprehensores & malevolos, opinionem mihi valde arridentem libenter amplexus sum, ut arbitrarer mihi que persuaderem: bonis omnibus communicatione horum me rem gratam facturum esse, utque ab illis bonæ existimationis de me & studiis meis quasi præmium, videretur nequitiam esse desperandum. Quum quidem tam hebes non esset acies mentis meæ, quin præuiderem, pro sua quemque affectione & sententia, hæc aut illa probaturum improbatumue esse, neque de fore, qui de aliis aliquid criminis inferrent, de aliis suspiciones concipiendo me accusationibus occultis verberarent. Quæ cuncta permittens Deo æterno, diligenter & fideliter expositionem istam perscriptam confidenter neque periculum pertimescens vllum edidi, profuturam, ut existimabam, vel posteris, si ad hos, ita Deo æterno volente, peruenisset.

LXX. His annis ex Franconicis ordinibus nobilitatis antiquæ & valde celebris generosus Comes Berthamensis Michaelus Georgii F. Michaeli N. vna cum auunculo suo, familiæ Limpergicæ & ipsius perantiquæ & nobili, generoso Barone Christophoro, Wittenbergam venit, & inde huc ad nos sese con-

contulit. Quorum nomina vt huic narrationi infererem (quum & illustrissimorum Principum, & eorum qui generosi Comites, &, nescio vnde, Barones appellantur, maximus numerus tum Wittenbergæ longiore aut breuiore tempore degendum putarit) ea memouerunt quæ mox dicentur. Sane Comitum Imperatoriorum esse eam dignitatem dubium non est. Nomenque istud Græci quoque retinuerunt. Barones autem suspicari fortasse liceat appellatos olim fuisse eos, qui apud Imperatores & Reges præ cæteris liberaliter & bene instituti pari quadam existimatione & honore censerentur, ob virtutis studia atque actiones. Cuiusmodi in regno olim Persico fuisse eos accipimus, qui ὁμόπριμοι & ὁμοιοι appellarentur. Nisi alterius forte linguæ istud nomen est. Germanicus quidem hos sermo ingenuos seu liberos Dominos vocat. Sed de hoc vnusquisque licet comminiscatur atque teneat quod libuerit. Comitis sane Michaeli & Baronis Christophori, in pueritia adhuc valde tenera & primis annis, ea indoles animaduvertebatur, qua nulla esse posset melior. Modestia erat summa. Ad Deum & hominem pietatis studium, non ita vt ab institutione in cæteris pueris interdum eminet, sed suapte incitatione admirabile. Veneratio

tio & caritas præstantum sapientia virtuteque & doctrina virorum singularis; inprimis eius quo magistro utebantur, cuius nutus etiam obseruabant, & quem immitiorem quoque ac duriorum non modo non auersari illi, id quod fieri plerumque scimus, neque ab eius usu consuetudineque refugere, sed quum requirere absentem, tum præsentem habere in oculis, atque colere non secus ac patrem. Quod certissimum signum notabatur naturæ in ipsis optimæ, & animi humani atque mansueti. Itaque omnes præclaram de eis spem concipere, fore ut una cum ætate virtutis in illis eximia pulchritudo & splendor ingens conspiceretur & eluceret. Nemo non illos admirari atque laudare, ac de eis omnes vno ore omnia bona dicere, gaudere aspectu ipsorum, conuictu lætari. Ingenium autem in Berthamensi Comite erat suauius, & ad studia literarum atque ingenuas artes videbatur esse aptius. Utebatur apud nos hic doctore dialectices & exercitationum dicendi, instituto magistri sui, Iohanne Cratone Vratislauensi, iuvene & ingenioso & docto atque erudito. Qui postea in Italiam profectus, quum Medicinæ arti perdiscendæ operam daret, hoc consecutus est, aut præstantibus ea facultate viris & Professoribus artis præcipuis non modo fauorem & caritatem, sed

sed admirationem quoque & laudem adipisceretur. Inprimis Montani diligentem assiduumque auditorem atque discipulum se præbuit. Cuius celeberrimum nomen, e-
dendis dictatis præclaris illius, reddidit ipse illustrius. Sed doctrina virtuteque eius indies magis eminente, quum ab aliis multis expecteretur coniunctio & usus huius, primum suæ patriæ inseruiendum esse honestissima sententia censuit. Vnde postea abstractus alio, dignitate & honoribus auctus amplificatusque est. Habuit autem gloria, ut fit, comitem invidiam, quæ secundum Poetam summa petit; perhibeturque cæca, quod obtrectando virtuti, & corrumpendo honores atque præmia ipsius, sibi illa quidem aliquid commoditatis quærat, sed plerumque peius noceat quam aliis. Est enim ea hæc bestia, quæ seipsam arro-
dendo consumit, suppliciumque, ut ait Poeta, suum est. Verum de Cratone & multis alias ob causas, & quod de nostratibus hominibus, qui adhuc viuerent, statuerim meas prædicationes minus effusas atque verbosas esse debere, plura modo dicenda non putavi; quum plurima commemorari potuissent, quibus merita laude celebrarentur, quum aliæ virtutes ipsius, tum experientia, studium, industria, & eruditæ doctrinæ copia. Ut igitur paullisper ad Berthamensis Comitis
men-

mentionem redeam; huius quoque gratia Philippus Melanchthon interdum huc ad nos veniebat. Erat enim eius erga illum affectio amoris præcipua, & expectatio summa futuræ gubernationis, quæ in ipsum vnicum hæredem illustris generis & nominis, vna cum possessione terræ Berthamensis, incumberebat. Quapropter immatura mors ipsius (quam obiit coniunx quidem ille, sed neque relicta sobole quæ ipsi succederet, & ætate adhuc admodum iuuenili) a nobis omnibus deplorata est, & sunt ei iusta facta doloris acerbi, Reipublicæ potissimum respectu, cui illud præsidium, vel certe subsidium, tam difficilibus rebus & dubio statu, de improviso esset ereptum. Verum iam post hanc quoque digressionem, reducatur tandem ad institutum argumentum oratio, & prioribus reliqua adiungantur.

LXXI. Bellum igitur illud, de quo verba facere cœperamus, calamitosum & infelix, instar tempestatis maximo impetu cōortum incitari, & scriptis quibusdam editis odia alienationesque fieri maiores. Qui mos nequaquam bonus iam vsu erat confirmatus. Nam ubi aliqui se iniuria laceratos arbitrabantur, mox prodibant libelli & inceptum causamque defensitantes, & aliorum audaciam atque vim accusantes, quibus non modo

do probra contumeliose, sed insectationes quoque minaciter ingerebantur. Idque quod exemplo fieret, iure iam fieri putabatur, & hoc modo cauere suæ quisque existimationi bonæ & honestati nominis censebat. Ego vero ex viro nostræ ætatis prudente, & versato in grauissimarum rerum tractatibus, id audiui, commemorante patris sui sermones, quod scriptum est eadem prorsus sententia in Plutarchi Timoleonte, hoc ferme modo: Plerique eo sunt ingenio vt maledictis grauius quam malefactis offendantur. Iniquiore enim animo contumeliam ferunt quam damna. Seque manu defendere in bello conceditur, vt necessarium; conuiciorum autem petulantia de superuacanea & nimia improbitate & odio existere putatur. Sed, quod pace dicatur patriæ, haud scio an non solum hac in parte, verum aliis plurimis, externi mores inuecti constantiam & grauitatem veterem gentis dissoluta vita & corruptis moribus quasi eneruarint. Nam quum suas virtutes minus iam admirarentur, propriaque bona tuerentur nostri homines negligentius, placeretque eis fucata magis quam naturalis species, non dubitarunt sese alieno nitore quasi oblinere; vitiaque sua tanquam morbum, indulgendo cupiditatibus, fouere, donec sanitatem pene perdiderunt, & ab integritate

R

præ-

præstantiaque maiorum suorum prorsus recesserunt. Non modo cladibus sane ingentibus, sed impetus sæuitia quadam, & tristitia administrationis, denique rebus modisque omnibus bellum hoc horribile fuit. De quo postea cogitantibus nonnullis, scio in mentem venisse, & fuisse in ore, versum oraculi, cuius sententia est: Plorare victos, perire victores. Dissipatis copiis, quæ contra Carolum Imperatorem Rom. fuerant contractæ & eductæ in expeditionem, quædam illarum pars in has regiones retracta nouum bellum inchoauit: quam veluti incendii flammam inopinatam, qui restinguere noluerunt quum possent, aut furorem illius aluerunt etiam, iis quæ gratia debeatur a nobis dici non est opus. Non defuere sane Principes aliquot, inque iis Princeps Elector Ioachimus Marchio Brandenburgicus, qui pacificationi studiose operam darent. Hanc etsi primum odio & iracundia flagrantibus animis simpliciter respuerunt, postea tamen eo peruentum assiduitate est, vt non multum abesset, quin reconciliata gratia inter disidentes, efficere-
tur, ne tam lacrimabiles casus & euentus indigni sequerentur, neue eo res euaderet, vt nullus iam locus esset vel consilio vel auxilio. Hesiaci quoque legati statim initio tentarunt, possetne intercedendo belli impetus a-
verti,

verti, & quum laborantibus rebus succurri, tum malis, quæ impendere non esset dubium, miserisque futuris occurri. Memini communicatis his cum Philippo Melanchthone, & quibusdam scriptis, quibus conditiones quædam pacificationis quasi informarentur, ei ostensis, petatum esse, ut suam sententiam & ipse indicaret; eumque respondisse: caput sibi videri omnium, ut Imperator placeatur. Ad quam spem ante cuncta necessarium esse se arbitrari, ut Principes aduersarii Cæsari fiant supplices. Tunc, inquit, petetur scilicet, ut foedus inter ipsos & ciuitates ictum dissoluatur. Hoc aliqui, donec poterunt, fortasse impedit. Sperare quidem se aiebat, deprecatione aliquorum Principum a Cæsare pacem impetrari posse, si debita reuerentia omnium res agatur. Erat in conditionibus, quarum paullo ante mentionem fecimus: Ne doctrina contraria & explosa, deinceps damnaretur aut exagitaretur; ante cognitionem legitimam. Ad hoc obligari neque debere neque omnino posse censebat illos. At si expresse poneretur: Nullos Principes aut Ordines turbare velle ditiones Episcoporum, aut aliquid eis adimere, aut nouo onere onerare, credo, inquit, ita Cæsarem placatum iri. Erat & hoc in illis conditionibus: Discerni causas profanas & doctrinæ veritati

tem oportere. Id sapienter & recte cogitatum positumque esse dicebat. Nam in concinne quædam permista esse multos perhibere, & si profana explicarentur atque componerentur, ut verbi causa cum Duce Brunsvicensi controuersia, sperare se hoc plurimum momenti ad mitigandum Cæsaris animum habiturum. Sed hæc tunc frustra suscepta & tentata sunt.

LXXII. Oppugnata est Lipsia & defensa aduersus vim tormentorum, cuius neminem audiui qui similem ad urbem vnam adhibitam cognouisse se diceret. Præsidio autem Wittenbergæ imposito, iam plerique ordinis scholastici, tanquam parum opportuni incolæ illo tempore, abscefferant, errabantque passim in Saxonice fere regionibus, aliquibus perbenigne eos recipientibus, quum nonnullis parum gratus esset aduentus illorum. Paulo post, nam proximo anno Christi M. D. XLVII. hæc sunt gesta, & Rochlicii deiecto præsidio, cui Albertus Casimiri F. Marchio Brandenburgicus præerat, ipsoque capto, Imperator inuitus, ut perhibebatur, accessit cum exercitu altero; & Iohannes Fridericus vel minus cautus nimisque securus in tam arduis negotiis atque rebus, vel aliorum consiliis rationibusque inductus, vel quocunque tandem pacto, celeritate & vi-

gilan-

gilantia & feruore quodam aduersariorum, Mulbergi, quod est oppidum ad Albim fluvium, vltra quem traductis suis illic castra locauerat, oppressus victusque, & ipse fuso, profligato, cæso exercitu, fortissime dimicans, neque a suis recedens, vulnereque aduerso grauitèr saucius, ita captus in potestatem Caroli Imperatoris venit. Auditum est postea Imperatoris Ferdinandi, qui tunc in exercitu, & deinde fratris Caroli V successor fuit, honestissimum testimonium virtutis & constantiæ Principis huius, interque alia & hoc: Si omnes, quos secum ille tunc habuit, tam fortiter atque ipse dimicare, & sustinere animo præsentè hostilem impressionem, & vim repellere voluissent, vix futurum fuisse, vt eo ille die superaretur atque caperetur. Fuit eo die quo prælium istud commissum est, & ante illum pene tribus, solis tetra facies, impediènte lumen & eminentiam radiorum, densior rubore, qui & in tectis ædificiorum & parietibus cum omnium intuentum stupore quodam relucebat. Ego qui tum & ipse, vt mei gregis plerique, cum familia vagabar, illo tempore Wurcepurgi eram, quo me post peregrinationem longam & iniucundam, contuleram ad præstantissimum dignitate, virtute & sapientia Danielum Stibarum, mei amantissimum, cuius & tunc & aliis temporibus.

bus meis nobili viro dignam fidem, & erga me benignitatem sum expertus, & rebus cæteris, & in hospitio domesticoque usu ipsius, cuius tum fructum cepi quamdiu mihi, non illi, libuit. Nam mirifice me retinere discedentem nitebatur. In hac mentione fui longior, (quum & D. Stibari meritas laudes alibi extollere, & conjunctionem amicitiae nostrae non ignorari studuerim) quod nostrum ordinem & genus scholasticum a quibusdam, qui stantes coluissent, iacens & proiectum non admodum fuisse subleuatum compere-
rim. Sed ita fieri solere scimus, ut diligantur felices, miseri deferantur. Ego igitur tum, non optima valetudine utente D. Stibaro, in cubiculo ipsius prima nocte eandem speciem quasi tinctam sanguine conspexi lunæ, iisque qui aderant demonstraui, vna mecum admirantibus colorem illum in luna, quæ quadrati in circulo lateris spacio pene a sole abesset, globo propemodum dimidiato, quando illa insigniter colorari non consuevit. Hæc minus apta huic argumento videri, ut opinor, non debent. Quum enim instituta sit de Philippo Melanchthone narratio, quid temporibus ipsius acciderit, quod & ab illo consideraretur notareturque in primis, & eum afficeret atque excerneret, indicandum esse sum arbitratus. Quibus narrationibus si
inse-

inferuissem interdum aliquid de me, neque hoc alienum aut absurdum visum iri speravi. Quum haud scio an nihil aliud ei curæ cordique vnquam, ex quo inter nos amicitia vsus cœpit, discedenti illi quidem a domestica necessitudine, æque fuerit, atque ego & res meæ. In quo tamen eum seruasse nos modum intelligi confido, vt attingendo omnia hæc perstringerentur, non differerentur explanando.

LXXIII. Philippus Melanchthon in hac quasi tempestate tectum subiit oppidi Zerbستاني, quod est ditionis Ascaniæ. Cuius illustrissimæ Domus clementissimam benignitatem, quæ & ipsa tum in discrimen non mediocre veniebat, perpetuo ille sensit. Atque scimus, non minori curæ fuisse Principibus illis salutem incolumitatemque Philippi, quam suæ dignitatis fortunarumque conservationem. Quum in Saxonia debellatum, & res illæ ex Imperatoris Caroli sententia atque voluntate, itemque Bohemica negotia pro Regis Ferdinandi arbitrio composita perfectæque essent, Philippus Landgrafius in Hassia, summa cupiditate vbique stabilis & certæ pacis, autoribus potissimum Principe Electore Brandeburgensi & Duce Mauricogenero suo, sese & ipsum deditione facta Imperatoris fidei permisit, & ad imperandum

accerfitus, in urbem Saxonicarum Salinarum, ibidem (quod neque ipse tum metuebat, neque quisquam fuerat suspicatus ex iis, qui pro illo deprecati persuaferant ipsi, ut clementiam potius Imperatoris semel, quam iterum vim & arma experiri vellet, quique sane cunctantem eum in tales angustias deduxerant) in custodiam datus, & duriter habitus, parumque liberaliter humaniterque tractatus est. Quæ sic instituta, conformata, acta esse, credibile est postea aliquos pœnituisse, qui vel suadere, vel administrarunt, vel etiam gesserunt. Verum de his & aliis, quæ tunc bello confecto consulta factaque fuerunt, ne vel indicii causa, sicut de aliis, verba faciendo essem longior, per mihi multa obstituerunt; sed omnium maxime dolor & mœstitia animi in recordatione eorum, quæ quum non possem in veritatis commemoratione, ordine & recte esse facta perhibere, ne criminando tamen exagitarem, aut quamvis leniter reprehenderem, pudoris mei esse censisui, & quid adeo vel iucundi vel fructuosi habituræ essent narrationes istæ, non sane videbam. In hoc motu ferebatur tanquam navis procellis ventorum optimus vir Philippus Melanchthon, & ea audiebat, cognoscebat, cernebat, habebatque etiam in manibus, quibus grauiissimæ curæ maximæque anxietates

tes & dolores summi cum ingentibus laboribus ipsi imponebantur, adeunti interea & vitæ pericula, & facultates consumenti; quod sine vlla parsimonia & pene ratione tribueret & largiretur, quicquid habebat ac corradere potuisset, egentibus aliis. Ita ille & in naufragiis rei familiaris, & difficultatibus comitatus, & vario multipliceque metu non tam de se & suis quam alienis, qui se ad eum applicuerant, tanquam fluctibus maris iactabatur.

LXXIV. Confecto bello in Misnia, Imperator Carolus per Salinas Saxonicas & Pabepergam iter faciens, cum omnibus copiis Norimbergam peruenit. Atque illac quum traduceretur victor exercitus, tota vrbs aræque & foci, vtque dicitur, diuina ac humana in potestate Caroli fuere. Quosdam sane ex ordine ecclesiastico metu tum valde debilitatos fuisse constat, qui belli tempore liberius se locutos, & scribendo literasque mittendo fuisse incautiores non ignorarent. Ii etiam sermonibus quorundam magis exterrebantur, a quibus & pericula augeri verbis, & admonitionis sollicitudine animis percussis trepidatio formidoque maior incuti. Erat tum illa in vrbe habendis ad populum concionibus celebris Vitus Theodoricus, ciuis ibidem. Hic a primis adolescentiæ annis

magnam partem ætatis Wittenbergæ in studiis piis ac liberalibus absumserat, perfeceratque diligentia, obseruantia atque industria sua, vt præcipui in illa Academia, & ecclesiasticæ scholasticæque rei capita, quum expecterent vsum familiaritatis ipsius, tum valde eum diligerent. In patriam autem reuersus & vxorem duxit, & concionum mandato munere sic functus est, vt ad ipsum audiendum concursus fierent multitudinis tantæ, quantam omnino templum, vbi verba facere solebat, caperet. Affligere eum morbus celeriter cœpit, in quo acerrimos cruciatus artuum perpeffus est. Quumque recuperandæ sanitatis cupiditate variam opem a medicina peteret, & tandem aquas natura sua calidas placuisset experiri, ita paullo post mortem obiit. Sed illo tempore æger, pedibus adeo enervatis vt ingredi non posset, sibi quoque ne quid accideret grauius, magnopere timebat. Confirmatus tamen & ipse a se, & amicorum oratione, quamdiu in illa vrbe Imperator mansit, neque conspectum deinde vitauit vllius, neque aditu quenquam prohibuit, & fuit animo præsentem atque magno. Sed ab Imperatore Carolo erga neminem vllius ordinis, loci, generis mortalem, consultum factumue est quicquam, quod non modo manifestæ acerbitalis dolorem, sed

sed querelæ etiam occultæ deplorationem haberet. Quamuis, ut ferebatur, non deessent, qui Imperatorem, vehementer instigando, conarentur eo impellere, ut illa occasione utens exemplum ederet in ciuitate præcipua iustæ iræ & congruentis temporis seueritatis. In quo quidem compertum est, non tam existimationi & rationibus Imperatoris prospectum consultumque aliquos voluisse, quam suum emolumentum commoditatesque priuatas quæsiuisse. Verum Imperator, quemadmodum diximus, neque ipse quicquam egit aut statuit tristius in quenquam, neque a suorum aliquo lædi, aut damno, iniuria, molestia affici vllum passus est, & ita transiit, ut nemo ne suspicari quidem posset, voluntatem esse ipsius ab illa ciuitate alieniorem.

LXXV. Ego tunc, quuma Stibaro discessissem, confederam Norimbergæ. Quæ ciuitas & erga me perquam benignam liberalemque se præbuit, & obtulit hospitii copiam Philippo Melanchthoni munifice. Sed hic tandem & ipse redeundum sibi Wittenbergam statuit, & ut eodem se reciperent, aliis quoque non leuibus causis motus, suus hortatorque fuit. Etsi enim illustrissimi Principes Duces Saxonie mandato Patris, qui Imperatorem sequi cogeatur, in Durin-

gia congregabant dissipatas & vagas Musas, & sedem his lenam ad Salam annem oppidum designauerant; & Philippus Melancthon lamentabilem casum Principis, pietate eximia erga Deum & patriam præditi, vtque generis splendore sic omnis virtutis claritate illustrissimi, largis lacrimis deplorabat, neque venerari cessabat animo suo profligatum, cui florenti seruiendo summa diligentia ac fide præsto fuisset: quid tamen non sibi sed aliis compluribus esset profuturum, & res atque tempora ipsorumque adeo Principum rationes ferrent, omnibus momentis suis ponderans quasque examinans, suo sibi loco, tanquam in turbine tempestatis, secundum vetus nostræ gentis verbum, permanendum, consistendumque esse duxit. Verum illuc & tunc & postea eruditione doctrinæ & ingenio optimarumque disciplinarum & artium scientia præstantes viri se contulerunt. In quibus celebritate nominis excellens fuit Iohannes Stigelius, liberali cognitione & virtute atque sapientia & facultate carminum, non facile alteri vlli suæ ætatis cedens, vir animo excelso præditus, & patriæ suorumque in ea Principum ita amans atque studiosus, vt illustre exemplum ipsius in hac parte pietatis eximiæ proponi posse videatur. Confluxerunt tamen eodem & alii, qui vt tempor-

poribus illis admissi, sic aliquanto post multo libentius dimissi fuerunt. Quorum insolentia atque peruersitas bonis & probis & vtilem operam dantibus multum negotii fecit, & malitia nonnihil creauit periculi, & quum animos quorundam mœstitia & angoribus, tum fortunas ac corpora damnis & cruciatibus afflixit. Neque abhorret a vero, indignationis dolorisque perturbationem, quem aliquot annis ceperat Iohannes Stigelius, ex necessaria magis quam expetita coniunctione nonnullorum, perculso ei debilitatoque celerioris mortis causam dedisse; quem quum adhuc in his conscribendis occuparemur lugebamus, virum & amicum summum, & plurimorum scriptis epitaphiis aliisque mentionibus lugubribus dolenter deploratum. Eodem tempore exclusus dudum Ecclesiæ communione, decreto Pontificis Romani, reuerendissima canitie innumerabilibusque laudum nominibus illustrissimus Princeps Hermannus Archiepiscopus Colonienſis, etiam gubernatione terrarum priuabatur mandato Imperatoris Caroli. Qui ne belli aut cladis alicuius repugnando novam tempestatem excitaret, cessit volens, & eorum, quibus æternæ salutis & vitæ copiam studuisset conciliari, corpora fortunasque cruentis gladiis & sæuitiæ immani hostium obici

obiici noluit. Quam moderationem atque pietatem, etsi laude dignissimam, ipsique adeo ad reliquæ vitæ optandam quietem opportunissimam esse Philippus Melanchthon videbat, non poterat tamen dissolutione eorum, quorum instituendorum ipse socius atque particeps fuisset, non vehementer perturbari. Augebatur ægritudo tristitia nunciorum de amicis, quorum aliqui eiectione sedibus suis & dignitate fortunisque spoliati exulabant, aliqui capti in custodia tormentisque detinebantur. Quorum præcipui indicabantur Iohannes Brentius, qui concionibus sacris præfuerat in Salinis Suevicis, quique Tubingæ Erhardus Schneppius, & Vlmæ Frechthus, & Chembergi (oppidum hoc est vicinum Wittenbergæ) præpositus Ecclesiæ venerabilis senex, Philippoque singulari necessitudinis & familiaritatis usu deuinctus.

LXXVI. Iam Mauricius Dux Saxonix periculo liberatus, atque modo dignitate Septemuiratus auctus, de restituendis Academicis ambabus, & recolligendis iis qui discesserant, & reparando otio studiis, sedulo diligenterque cogitarat & egerat; fueratque Lipsiam accersitus Philippus Melanchthon, ubi ad necessarias deliberationes Ordines terræ subiectæ Ducis Mauricii potestati convenerant. Neque ille Wittenbergam sibi deces-

decessione sua relinquendam, ac multorum potius rationibus atque vtilitatibus consulendum, quam sibi peculiari respectu videndum esse duxit. Cuius consilii atque sententiæ, a plurimis improbatæ atque reprehensæ, nunquam eum poenituit. Neque illa prudenter cogitata casus ullus, quod interdum fieri solet, deinde quasi infuscando contaminauit. Fieri autem aliter non potuit, quam vt scissa studia hominum rebus ita, quemadmodum strictim indicauimus, gestis diuiderentur, & voluntates essent diuersæ. Atque inuidiosæ omnino actiones quædam erant, æque ab æmulis, vt fit, acerbis criminationibus infamabantur, iis potissimum, quibus neque exploratæ illæ essent, & qui in eam partem, vnum vituperando, laudando alterum, cupide prolaberentur, in quam propendens affectio impellebat. Iamque Imperatore Carolo disceptationes de Religione eo deducere contendente, quo multis annis & magno labore conatus esset, & Augustæ Vindelicorum iussis adesse Principibus & Ordinibus Imperii, quum ante conuentum se Vlmæ acturum edixisset: Augustæ igitur Imperatore Carolo postulante, vt vniuersi Synodi decretis se obtemperaturos esse promitterent, maleuorum sermonibus spargebatur, a Duce Mauricio hanc promissionem commoditate orationis obtinu-

isse

isse Imperatorem, cuius fauorem, vel maxime liberandi Soceri ille caussa, retinere vellet. Idque actum esse in priuatis colloctionibus. Est autem genus quoddam hominum sane leue, qui de maxime occultis atque abstrusis audacissime pronunciare & affirmare non dubitant.

Hi simulant se scire omnia, nec quicquam sciunt,

Quod quisque in animo habet aut habiturus est, sciunt.

Id quod in aurem rex regina dixerit Sciunt, vt ait Senex Plautinus:

Quae neque futura neque facta sunt, tamen ii sciunt.

Falsum an vero laudent, culpent, quem velint,

Non floccifaciunt, dum illud, quod libeat, sciant.

Atque iisdem, ibidem dicitur, nihil esse stultius neque stolidius, neque mendaciloquius neque argutum magis. Atqui neque tunc neque vllis in tractationibus aliis compertum est, neque planum fieri potest: Ducem Mauricium vel pollicendo vel approbando vel assentiendo integritatem sinceræ Religionis labefactasse. Hinc tamen quum ad Philippum tum alios, qui ab illo non discedebant, aut ei non maledicebant, inuidia

mana-

manare, iique, quasi causam proderent, seque retexerent, & a veritatis assertionem deficerent, plane impietatis accusari. Id quod illo quidem tempore & recentibus belli stragibus timidius occultiusque; aliquanto autem post audacius magisque impudenter esse factum scimus. Atque primum quidem hæc disceptationum de Religione, cuius paullo ante meminimus, difficultas expedita fuit ab iis, qui in Synodo congregati decreta facere coeperant. Nam tanto bello occupato Imperatorem Carolo, quod ad defendendam & tuendam Synodum geri prædicabatur, Tridento Bononiam subito est discessum. Quam migrationem Imperator iniquissimo animo tulit, & interpretans Synodi dissolutionem, auctoribus adiutoribusque huius vehementissime succensuit. Misitque ea de re legatos ad Pontificem Paulum, & ad eos qui Bononiam se contulerant: nam Tridenti restiterant aliqui, inprimis Germani. Sed ea responsa data sunt, quæ & Imperatoris expectationem frustrarentur, & unde liquido perspiceretur, Pontificiis qualescunque Synodi actiones procedere, atque confirmari, in animo fuisse nunquam.

LXXVII. Quum Philippus Melancthon se Wittenbergensem Academiam non deserturum esse statuisset, rursus coepta est

S

ibi

ibi doctrina publica instaurari & frequentari. Lipsiæ autem etsi restitutio omnium magis in proclui erat, desiderabatur tamen opera diligentiae absentium adhuc quorundam, mortuo præsertim, cuius antea quoque a me mentio facta est, Caspare Bornero Theologo. Qui quum præsentissimo fortissimoque animo toto oppugnationis tempore in vrbe remanens scholasticas ædes pro virili sua tueri, & publicam priuatamque aliquorum supellectilem conseruare anniteretur, defatigatus nocturnis diurnisque laboribus, & contagione læsus (nam lues inuaserat promiscuum vulgus, quod sub vrbe, tuguriis exustis, aduentante exercitu oppugnaturum urbem, in spaciolis locis & fere vacuis ædium illarum raptim confederat) & vigiliis, & victus cultusque negligentia, atque potissimum mœrore & indignatione debilitatus, in morbum, acquiescente iam aliquantulum animo, & metu periculi depulso, incidit; quo confectus obiit mortem, cum bonorum omnium deploratione & ingente mœrore, anno Christi M. D. XLVII. III. Non. Maii, annis nondum grauis neque effectus ætate. Neque ego hoc viro cognoui, neque extitisse vsquam alterum existimo, dignitatis vtilitatumque suarum minus studiosum, dum rem scholasticam publice stabiliret, augeret, amplificaret, ornaret.

ret. Itaque illius memoriam nulla dies de-
lebit, quamdiu literæ eruditæ loquentur, qui-
bus non modo huius viri doctrina, quæ fuit
eximia in omni genere disciplinarum, sed in-
tegritas, amor veritatis, fides, virtus, sapien-
tia celebrabitur. Vetus & singularis cum
hoc necessitudo fuerat Philippi Melanchtho-
nis, qui tunc non modo lugebat amici præ-
cipui mortem, sed requirens rebus dubiis &
negotiis impeditis vel ducem peritissimum,
vel comitem gratissimum consiliorum actio-
numque omnium, societatem coniunctio-
nemque sibi talis illo tempore viri ereptam
esse in maximæ tristitiæ sensu querebatur.

LXXVIII. Interea Carolo Imperatore
omnibus viribus annitente, ut Synodus incho-
ata Tridenti ibidem perficeretur, & Pontifice
atque iis qui Bononiam transierant refragan-
tibus, proque sua autoritate & iure, respon-
dendo postulatis Imperatoriis, acriter propu-
gnantibus: Imperator reputans, neque se id-
ignum, intermitteri illarum rerum tractatio-
nem, quarum maxime causa tam periculo-
sum & graue bellum suscepisse ipsum gessisse-
que asserbatur; neque suis multiplicibus
promissis de controuersiarum ecclesiastica-
rum cognitione consentaneum esse, relinqui
tunc quoque, quum nemo voluntati ipsius
aduersari posset, incerta, dubia, litigiosa o-
mnia,

omnia, Pontificiis tam manifeste tergiuersantibus; cum quibusdam deliberata re, consilium cepit, excerpenti quædam ex iis scriptis, quæ superioribus annis ad concordiam dissentientium, de religione fuerant non tam absoluta atque comprobata quam instituta & proposita. Atque ita rursus liber paucorum quorundam clandestina & tenebricosa opera congestus &, ut vetere verbo utar, confusus fuit; quo præscribatur, quid interim, dum decreta Synodi prodirent, fieri seruarique oporteret, ab iis quidem, qui in doctrina Ecclesiæ & ritibus vlitatis aliquid innovassent. Vnde liber ille quasi tituli nomine est vocatus *Interim*. Et dedit facietis multa false dicendi occasionem. Quum quidem neutri parti placeret, & utrique, etsi non eodem modo atque proposito, eum repudiarent. Suntque postea multo maiores & deformiores dissipationes atque etiam ruinae consecutæ. Conuenerat autem & eo consilio prolatus fuerat iste liber, uti ne a Pontificias quidem partes sequentibus improbaretur, utque adeo Pontifex ipse vel concedendo indulgendoque, vel dissimulando & conuiuendo, illum admitteret. Atque mirabantur plerique, a quibus vera consideratione resperpendebatur, Carolo Imperatori persuaderi potuisse, ut in eam sententiam rationem.

onemque incumbendum putaret, quam pro sagacissimi animi prudentia, & diuturna experientia, quod similia negotia quo euasis-
sent non ignorare posset, videre intelligere-
que deberet, neque re ipsa consistere ac va-
lere, neque temporibus congruere, magis-
que ac citius nouas contentiones atque pu-
gnas commoturam, quam certamina at-
que rixas priores sedaturam esse. Sed occa-
cantur nimirum animi maximorum quoque
& sapientissimorum virorum, quando infrin-
gi suam vim fata non volunt. Sane constat,
vrgendo minime clementer, ac admodum
potius imperiose, iussa de recipiendo libro
illo & præscripta in eo exequendo ad omnes
Ordines delata, & tanquam de his consensis-
sent vniuersi, neque recusationem, neque
preces, denique nihil quod contradiceretur,
admissum esse. Neque defuere, qui insidio-
se etiam quædam tentata factaque fuisse per-
hibere non dubitarent. Tum quidam, & ii
potissimum quos supra nominaui, & cæteri,
qui iis nollent assentiri, quæ esse contraria-
veritati haberent persuasum, afflicti atque
exati fuere; quum & aduersus Philippum
Melanchthonem Caroli Imperatoris ira iam
esset fuscitata, cui tunc succensendi vehemen-
tissimus ille etiam stimulus fuisse credebatur, quod
ales compositiones ipsi displicere, ad Impe-
rator-

ratorem odioſe deferri, cum inimica tam de præteritis quam præſentibus oratione, animadverteretur. Atque tunc eorum, qui Philippum Melanchthonem oderant, machinationibus vita eius eſt petita; eademque proteſta ab amantibus illum, & quibus viri innocentia atque probitas nota erat. Neque deſuere qui ſuſpicarentur, talia diuulgari perterrendi Philippum Melanchthonem cauſſa, ne conſiliis actionibusque recentis conciliationis reclamando officeret. Sed & ille in præſente discrimine, & incolumitas ipſius rebus communibus tunc conſeruata fuit.

LXXIX. Hoc anno ad grauiffimas Philippi Melanchthonis curas de rebus communibus, & rei domeſticæ labes, & ingentem triſtitiam propter Eccleſiæ vulnera, novus dolor acceſſit nunciata morte filiæ Annæ, quam & cariffimam patri & a marito Georgio Sabino in Pruffia n abductam fuiſſe, acceſſito a Principe Alberto, ſupra diximus. Eum tamen caſum tulit ille moderate, vt antea quoque indicauiſus, & magis toleranter quam amici laturum eſſe ſperare potuerant, qui ſcirent quanta amoris paterni erga illam fuiſſet affectio. Sed meditatione euentus, & quodam prioribus ægritudinibus veluti concoquendis uſu, hebetiorem tunc ſenſum habu-

habuisse eum credibile est, quum quasi occalluisset animus dolendo, metuendo, perpetuando. Veri quoque simile est, publica mala immensa & multiplicia & varia, quibusque tunc laborabatur, & quorum timebatur accessio, morsus priuatorum retudisse. Quemadmodum in morbis, qui intensi magis sunt, ii non patiuntur plane sentiri remissiones, & hos quasi obscurant. Non facile autem possunt scribendo explicari illa, quæ bonorum tunc neque leuium & patriæ in primis amantum animos & dolore præsentis & metu in posterum excruciarint ac sollicitauerint, non solum illa numero infinita & magnitudine immensa & pondere intolerabilia, sed varietate quoque & dissimilitudine & mutabilitate formidanda atque terribilia. Edebantur externorum hominum scripta, & picturæ diuulgabantur, quibus Germanicæ nationi in calamitate insultabatur, &, tanquam ex dolore victæ triumphus ageretur, captiuæ illius vincula catenæque ostentabantur. Quæ sane multorum animos acriter pungebant. Alii de dignitate fortunisque suis minus anxii, hoc orabant obsecrabantque tantum, ne imperio humano obedire & terrenam laudem quærere cogerentur conscientia sua, & æterni Dei iussis editisque aduersando, & cœlestis gloriæ spem

S 4

labe-

labefactando. Sed qui induxerant Carolum in eam rationem, quam ille secuturum se esse iam demonstraerat, iidem annitebantur, ne inde recedendo, aut aliquibus indulgendo, non tam inconstans quam timidus haberetur; id quod isto tempore rerumque statu minime conducere, vel maxime potius nocere posset. Quæ neque temporibus opportune, neque rebus ipsis apte, neque omnino vera ratione geri, & intelligebant ii, quorum iudicia amore odique erga aliquos non deprauabantur, & iustissimis querelis Philippus Melanchthon deplorabat: cuius sermones in tristitia atque indignatione vehementiores delati ad Cæsarianos, & ab inimicis invidiose & obtrectatorie expositi, nonnihil crearunt, quemadmodum paullo ante significatum est, periculi ipsi; non modo alienato sed etiam irritato Imperatore, & plane infesto, ut cui inculcaretur, consiliis actionibusque ipsius impedimento esse Philippum Melanchthonem præ cæteris, quod plurimi illius autoritate moti & exemplo confirmati, resistere iam atque repugnare auderent. Etsi autem hic, quum, quid institueretur, cerne-
ret, non dissimulabat metum suum, quod exitum talium inceptorum nullum videret, ac ne progressiones quidem faciles, vel non potius admodum difficiles & ubique incur-
ras

ras prospiceret, atque eos, a quibus talia nasci proferrique credebat, non dubitabat aperte reprehendere & accusare: in eo tamen constantissime perseveravit, ut puram sinceramque doctrinam retinens, in parum necessariis & externis quibusdam ritibus non impiarum observationum moderationem nequaquam, id quod quidam faciebant, damnet. Sed de his paullo post plura dicenda erunt. Istud modo breuiter indicandum putavi, contra Imperatoris Caroli, inhumanis quorundam & iniquis sermonibus instigati, mandata non modo seuera sed plane sæua, ut Philippus Melanchthon sibi traderetur, defensus, protectum, conseruatum tum fuisse eum, studii diligentiaque patrocinio atque præsidio illustrissimi quum aliis laudibus tum pietate & virtute Principis Mauricii, rebus omnibus dubiis & admodum difficilibus. Quod quale sit nequaquam intelligi perspicique potest ab iis, qui quasi fluctuantes alienos in mari de terra spectant otiosi, sine sensu periculi & proprii exitii metu. Quin tamen ista in Philippo Melanchthone tuendo D. Mauricii constantia gloriam cumulet illustrissimi nominis ipsius, nemo profecto, nisi furiose in odio & inuidia improbus, inficiari poterit. De his igitur hætenus. Non autem omitendum putavi id, quod in Italia tunc accidit.

Nam in oppido quodam ditionis Venetæ, quidam, quod contra conscientiam ad negandum quædam prius asserta, & retractandum confitendo disputata de dogmatibus ecclesiasticis, cogi se passus esset, adeo perturbatus fuit, ut ex dolore animi corporis morbo contracto, ita per extremam desperationem, nullius consolationem admittens, interiret. Huius casus narrationes diuulgabantur, & qua oratione, qui affuissent, conati essent mederi afflicto, & prolapsum erigere, explicabatur. Quam quidem commodiorem magisque appositam haberi potuisse Philippus Melanchthon censebat, demonstrantem & urgentem inprimis hanc sententiam: venisse filium Dei in hunc mundum, ut peccatoribus salutis autor largitorque existeret; & eas, quæ cum hac congruere viderentur. Sed ille tunc ita decessit, fane miserabiliter, ut traditur.

LXXX. Anno M. D. XLVIII. inter alia turbulente & audacter tentata atque gesta, vrbs Constantia, (quam habuisse priscis temporibus nomen quidam putant Nantuatium, quidam Harudum, quidam etiam Vitoduræ perhibent) sita ad lacum, per quem, fluuius Rhenus amœno tractu quasi spatians, deinde suo alueo defertur, aggrèssione occulta Hispanicarum copiarum
pene

pene capta fuit, securiore tunc ciuitate inter tractatus pacis; de qua legatum tunc ad Imperatorem abfuisse accepimus, vna cum aliis quibusdam primariis viris, Thomam Blarerum. Hunc habuit Philippus Melanchthon inprimis familiarem eo tempore, quo ego Wittenbergam veni. Erat autem ille in sua ciuitate præcipuo loco natus, & generis splendorem auxerat bonitas ingenii virtutisque ac sapientiæ & inprimis religiosæ pietatis studium. Ea vero grauitas & constantia eminebat in adolescente quoque, vt a plerisque tum adeo ille obseruaretur, quum humanitas quidem ipsius & amabiles mores incredibilem commendationem haberent ad omnes. Hic, etsi non successerant insidiæ factæ patriæ, & oppugnationis etiam vi propulsata a ciuibus fortissime dimicantibus, reuersus domum, quod fieri tamen status prioris mutationem animaduerneret, neque possent pauci resistere multorum vel formidini vel etiam cupiditati, ita ipse in agros suos concessit, & aliis administrationem publicorum deinceps munerum in patria sua reliquit; quod veritatis æternæ ac cœlestis professionem liberam retineri pluris faceret, quam amplissimorum honorum functiones, paratas volenti sese & rationes suas temporibus accommodare, quibus seruire prudentia humana inprimis confuevit.

LXXXI. Eodem hoc anno in compluribus conuentibus, qui indicebantur de capitibus libri Cæsariani, Philippus Melancthon vehementer est iactatus. Quæ res tractationesque ab aliis sunt vero & accurate expositæ. Interque tales colloctiones, disputationes, consultationes annus hic effluxit. Venit ea tempestate in Belgicum Imperator Carolus, ad quem ex Hispania Rex Philippus filius illius accessit, ad solennem illarum regionum possessionem tradente patre accitus. Eumque tunc & locutum quædam præclare, & in conspectu omnium amantissime filium esse complexum accepimus, quum quidem filius exquisitè esset humili gestu veneratus patrem. Decretum autem Augustanum in Germania turbas dabat: quod ut Imperator ratum esse volebat, ita indies magis connuere eum animaduertebatur in quibusdam non prorsus illud exequentibus, modo non detraheretur aliquid de ipsius maiestate, neque contemni imperium videretur. Versabantur etiam in Germania legati Pontificii tres, cum mandatis concedendi autoritate Pontificis quædam, de quibusdam transigendi, quæ quum iamdudum vsurparentur & recte fieri statuerentur, non multum curare plerique quid ab his permetteretur prohiberetur. Sed quum metus Imperatoris, tum cupiditas

tas publicæ tranquillitatis, tum vero officii cura, in morem gerendo aut recusando aliquid multum habere momenti. In Gallia, tunc nominatim Philippi Melanchthonis nomen pronūciari auditum, inter eorum, quibus notā inurebatur grauissimi criminis, quod rem ecclesiasticam turbarent. Et sunt supplicia atrocia sumta de compluribus, tanquam desertoribus Religionis publicæ, qui *Lutherani* ad vulgus execranda appellatione nominabantur. Fuisseque magis probrosum & turpe, atque adeo perniciosum alicui hac capitale, sic vocari, compertum est, quam patricidam aut prædonem. Quum neque res neque causa exploraretur aut cognosceretur, sed sufficeret ad condemnationem nominis infamia. Neque minoris sæuitiæ animaduersiones in Belgio huius generis animaduvertebantur. In Germania autem fieri discordiæ indiēs maiōres, quum audacius reclamantibus, si qua displicerent, plurimis suis cupiditatibus indulgendo effrenatis, tum diffidentia & alienatione augescēte Principum quidem maxime, sed & aliorum, ut quique huc aut illuc animis inclinabantur. Magdeburgum vrbs est ad fluuium Albim supra Oceanum, quæ aliquot annorum operibus munita, quantumuis magnam vim oppugnationis facile sustinere posse credebatur.

Eius

Eius ciues Caroli Imperatoris edicto hostes appellati fuere, vt esset ciuitas in extremo discrimine. Sed ea tum & defensionem edere, & de implacabili Imperatoris ira conqueri, & quosdam sibi propter constantiam in sanctitate Religionis insensos accusare. Et nullum esse peccatum delictumque suum, neque aliam oppugnationis causam affirmare, quam quod puram doctrinam veritatis coelestis retineri, neque eam corruptelis vllis deformari, aut calliditate inflecti, studerent. Equidem quanquam de controuersis ecclesiasticis quid sentirem, nunquam vel dissimulando texti, vel negando inficiatus sum, & cum quibus me coniunctum intelligi vellem, aperte tuli semper: non tamen etiam mihi necesse esse existimaui, neque nunc existimo, vel aliqua singulatim disputare subtilius atque limatius, vel in hos accusatorie inuehi, illorum quasi patrocinium suscipere; sed quæ iudicarem verâ, ea professus, a certaminibus & rixis, quæ commoueri partium studiis solent, abstinere, & meæ personæ conuenientius, & ad futuros casus prouidentius esse, semper credidi. Neque hæc ostentatio prudentiæ & quasi sagacitatis existimanda est, quia neque præditum me esse fateor, & cuius calliditatem in diuinis negotiis quum futilem tum perniciosam, quoque esse scimus; sed
tenui.

tenuitatis nostræ confessio , & veræ atque simplicis expositionis confirmatio haberi debet.

LXXXII. Migrauerat secedendo Magdeburgum Illyricæ gentis homo, qui sibi Flacii nomen imposuerat. Fuisse enim familiare aliud ferebatur. Hic adolescens ad optimum & doctissimum virum Matthiam Garbicium aliquando se contulerat; quem ab integritate & memoria beneficiorum in se externum collatorum, inprimis laudare possum. Neque ego hanc laudem parua, ac potius in maximis ducō, hoc præsertim tam ingrato seculo. Erat idem honestatis vitæ studiosissimus, & ad hanc docendo assuefaciendoque adolescentiam non maiore cura, atque seueritate institui & adduci ægre ferebat, quum intelligeret, quam disciplinæ custodia & Deo grata res & in hac vita utilis esset. Hæc sententia verissima atque præclarissima non caruit obtreptione quorundam, quasi superstitione implicaretur. Quid enim disputando probaretur, magis iam spectabatur, quam qualis degeretur vita; & libertatis oblitterata doctrina sic reuocabatur, vt ad licentiæ infinitæ usurpationem efferretur. Est autem profecto disputatio omnium demum egregia atque illustris, ea præsertim quæ de religione, pietate, officio, virtute habetur, quum non modo
verbis

verbis aliquid scite concluditur, sed actionibus consentaneis etiam exprimitur. Quis enim non habeat pro nugatore & sui ipsius derisore eum, qui, quæ oratione constituat, ea euertat viuendo? Sed redeat ad Garbicum narratio. Ad hunc igitur, profitentem doctrinam Græcarum literarum in Academia Tubingensi, popularem suum, se tunc Flacius contulit, quum eodem ante biennium & ego venissem. Vfusque est hospitio Garbicii pro facultatibus ipsius non illiberali, & expertus meam quoque & aliorum beneuolentiam ac studium. Inde discedens Wittenbergam est profectus. Eumque humanitate aliquanto maiore complexus est Philippus Melancthon, quod a nobis aduenisset. Itaque omnibus rebus eum adiunxit, augens & ornans hominem, suis etiam facultatibus sustentans. Id quod ab ipso in promptu erat cunctis. Non solum enim docebat discere volentes vniuersos, sed pascere etiam esurientes, & nudos vestiebat, bonitate quadam naturæ beneficiendi cupida sine discrimine omnibus. Flacius, qui mediocrem sermonis Græci scientiam teneret, in cognoscendam linguam Hebraicam tunc totus incubuit. Magistri ibi bonarum artium titulum, atque insignia assecutus est, & data ei vxor, & publicæ doctrinæ munus assignatum. Hic
sive

siue ingenii turbulenti ferocia & ambitione, seu malitia inferuiente voluntati alienæ: nam de homine simulatore mirifico, in quo nihil simplex & apertum cognosceretur, variæ suspiciones fuere: sed quacunque sane re aut spe impellente, tunc Flacius sciscitari curiose quid ageretur & esset in manibus, & clanculum scripta fictis nominibus spargere, notantia omnia quæ carerent audacia aduersandi quietis consiliis. Hanc enim aiebant esse & veritatis desertionem & corroborationem falsitatis. Quæ erat illis temporibus & isto rerum statu admodum plausibilis & grata, vulgo oratio. Sed initio astute tegere Flacius ea quæ animo agitabat, & alienationem atque odium dissimulare. Relicta eodem tempore statione sua ad Danubium, venit Wittenbergam Nicolaus Gallus, fugiens periculum imminens in illarum regionum civitatibus iis, qui reclamarent Augustæ decretis. Cum quo Flacius statim familiarissime se coniunxit, & discedentem sic, ut nihil præ se ferret inimicitiarum aut simultatum, paullo post clandestino abitu secutus est. Et confederunt ambo Magdeburgi, exitiosæ peruvicaciæ adiutores & incitatores strenui & vehementes. De huius vrbis consiliis actionibusque, etiam fortuna, nihil modo dicam. Quæ obsidionem, excitato bello

T

tam-

tamdiu tulit, quam diu illa in penuria ad extremum rerum necessariarum pene omnium & summis difficultatibus sustineri potuit. Sed qui bello huic gerendo fuerant præfecti, iis si Magdeburgici maturius fidem habere voluissent, futurum fuisse existimatur, vt citius iis malis liberarentur, quibus tandem fracti, deditionem facere sunt coacti.

LXXXIII. In regionibus Misnicis res erant per se illæ quidem tolerabiles, vel satis etiam bonæ, si non calumniarum insectatione vexarentur. Ipse quidem Philippus ex illis perturbationibus & quasi tempestatibus tantum doloris cepit, quantum alius nemo. Sed quum aliorum vel improbitate vel leuitate causam occasionemque eis datam esse, & culpa se vacare sciret, faciundum sibi statuit idem, quod medici fideles solent, qui & misericordia ægrotantum afficiuntur, & morbum, si possint, sanant, si nequeant, non tamen augment, & neque ope suâ destituunt depositos, neque non necessaria acerbitare affligunt. Nam qui temere remedia adhibent, quibus vita interemta tollitur morbus, illis ea gratia debetur scilicet quæ sicariis. Considerabat Philippus Melanchthon conuersionem, vna cum rebus mutatis, animorum. Videbat quam multa contra opinionem omnium accidissent, & posse alia accidere similiter intel

intelligebat. Erat hoc igitur rectissimum, & tutissimum: salua & integra & incorrupta doctrina cœlestis veritatis, cui labem inuri aut aspergi maculam ferendum non esset; de cæteris, quæ temporibus & locis diuersa, semper fuisse constaret, ita conueniri, vt vel mutatis vel nouatis aliquibus tranquillitati consuleretur. Etsi in eo ipso falli aliquos eum non fugiebat, prouidentem vna parte, pacatis rebus, nihilominus aliis turbas excitatum iri. In his igitur quasi procellis & ista tempestate, non currendum huc illuc putauit, neque excedendum iis locis, in quibus sine impietate ad Deum, & culpa ad homines non improbos neque iniquos, consistere liceret, & transeundum eo, vbi neque extra periculum & maximis itidem in curis molestiisque atque angoribus futurus esset. Hominum autem præsidia vel urbium munita, quibus protegeretur, quærere, clamoribusque importunis tumultuari, & quasi tribunitio furore maledictisque vesanis in quoslibet debacchari, omnino noluit. Quodque semper fecerat, vt frena laxari cupiditatibus hominum, & auram popularem atque plausus captari oportere non censeret, id multo magis tunc præstandum esse statuit; neque, vt de aliquo veluti editiore loco, ad arma infeliciter paullo ante sumpta aliquos denuo vocaret

caret, vel se decere, vel placere Deo, vel ad ullam spem bonam conducere, est arbitratus. Itaque in hoc immotus perstitit, quicquid Flaciana factio diceret ac moliretur. In Flacio perfecta cognitio linguæ Germanicæ nunquam fuit, sic, loquendi scribendique diserte vt facultatem adipisceretur. Sed libelli ipsius nomen præferentes passim prodibant, quos pro suis ille agnoscebat. Erat autem eadem cantilena omnium, de iis, qui apud Principem Mauricium illis temporibus remanerent, & ecclesiis scholisque conseruandis nauarent operam, in quibusdam etiam conuiuentes, dum disiecta recolligerentur, & ordinarentur confusa, & res essent in regionibus illis mediocri in statu tranquillæ. Quum autem quæreretur de iis, quæ quasi indifferentia seruari aut omitti impium esse non videretur, Philippus Melanchthon edito scripto luculenta hoc breuitate explicauit, & definiendo solerter & exemplis illustrando. Sed nihil proficiebatur ad eos, qui neque audire quæ dicebantur, neque ad ea, quæ demonstrabantur, aspicere volebant. Qui & verbositate indiserta, & nominum mirabili ignotaque specie, fucum faciebant & imponebant multitudini imperitæ, *Interimistas* & *Adiaphoristas* eos per ignominiam appellantes, a quibus secesserant. Quorum omnia dicta & facta

facta in deteriore[m] partem interpretando rapiebant, pronunciantes etiam audacissime de cogitatis. Petebatur tunc conuiciis impudentibus non Philippus modo & alii, sed reuerendissimus etiam & illustrissimus Princeps Georgius Princeps Anhaltinus, cui ne mortuo quidem scelerata petulantia pepercit. Nec non improbissimorum partim mendacia, partim simulatio cuiusdam ardoris in veritate asserenda, partim etiam alia, quæ talium temporum miseriis comprehenduntur, tantum efficere potuerunt, ut docti & pii nonnulli, inque his nobiles atque principes viri, aliquid ab eis dici initio crederent, & ipsorum fauerent conatibus. Sed tum capita huius factionis, Flacius & Gallus, Magdeburgi declamabant, & libellos atque picturas diuulgabant contumeliosas in personas & rationes eorum, qui ipsorum temerariam vel certe præposteram vehementiam improbabant, & abhorrebant a turbulenta peruersitate. Inde, quum vrbs defendi amplius non posset, digressi, in aliis deinde locis tanquam turbo vastitatem & strages dederunt; admissio Flacio Ienæ qui Theologiam doceret, & reuerso Gallo in priorem nidum ad Danubium. Cum his quasi conspirauerant & alii contra Philippum Melanchthonem & eos, qui in Academiis & Ecclesiis Misnicis docebant.

Aliquoties autem iubente & volente Principe Mauricio conuentus diuersis locis acti sunt. In quibus illi clamatores, corrumpi doctrinam puram atque sinceram, odiosissimis criminationibus disseminabant, adeo vt non paucis vbique suspecta redderentur omnia, quæ tum in Misnicis regionibus suscipiebantur & fiebant. In quibus tantis tempestatibus periculose iactari Philippus Melanchthon, & ad durissimos offensionum scopulos allidi; quum nihilominus cursum directum ad veritatem æternam teneret, neque immutaret velificationem, quantumuis reslantibus ventis, in diuinæ gubernationis certa fiducia. Versute autem cauillari isti noui magistri pene syllabas in omnibus; quæ a Misnicis proferebantur. Neque pudebat falsa & ficta ingerere, & secundum hæc perfricta fronte pronunciare, & optima scripta vituperare, & homines innocentissimos condemnare. Quum ipsi nihil vtilitatis in commune docendo afferrent, omne studium in maledicendo, obrectando, insectando, criminando ponentes. Dicat enim, qui potest, quidnam obscuri ab his illustratum, quid ambigui definitum, quod dubium amotum, denique quod lumen doctrinæ ecclesiasticæ illatum sit? At liquet, turbas ab his perniciosas esse datas, datas causas occasiones
que

que diffensionum & alienationum, data damna inimicitarum, affectos tristitia bonos, conciliata gaudia malis, ereptum vsum fructumque suauitatis & caritatis mutuae, impeditos congressus salutare, quibus veritatis celestis doctrina & confirmaretur & illustraretur. Hæc facere se illi, tanquam ardore quodam mentis religiosæ, aiebant: quum interea distraherent & violarent nefarie societatem fraternæ coniunctionis, & a ciuibus recederent, non fugerent hostes. Visique mihi hi idem facere sunt, ac si quis exquisitè confectas subductasque ab aliquo rationes reiicere & confundere audeat, vt ipse edat & subiiciat nouas. Nam quid egere aliud? quam, quod disposita & collocata apte & splendide, diligentia atque studio inprimis Philippi Melanchthonis, conuellere dissipareque sunt aggressi. Sed chartæ istorum volaticæ ac scurriles & euanuere magna iam parte, & penitus aliquando euanescunt; manentibus ac mansuris grauib; atque solidæ doctrinæ refertis scriptis Philippi Melanchthonis, dum studium non intercidet cognoscendi & sequendi incorruptam veritatem.

LXXXIV. Proponebantur in Misnia capita libri Augustani, deque illis iubebantur Theologi sententias dicere. Non enim Princeps Mauricius sine exceptione assensus

fuerat decreto, quo liber ille quasi omnium
Ordinum iudicio approbatur; sed promissa
Imperatoris de religione vrgens, & quid
ipse suis esset pollicitus commemorans, o-
stenderat sibi necessitatem imponi, vt ad suos
ea de re referret. Id non negligi vt con-
staret, diuulgata capita quædam fuerunt, de
quibus quæsitum Lipsiæ fuerat; perscripta illa
quidem moderatione ea, vt a constantia in
veritatis cœlestis sincera doctrina ne trans-
uersum quidem, vt dicitur, vnguem rece-
deretur, sed quibus tamen tempus rerum-
que inutatio obtrectandi daret occasionem.
Quam improbitas maleuolorum & turbu-
lentorum tunc cupide arripuit, & ea prolixè
vsa est. Anno autem Christi M. D. XLV.
prius omnino quam somniare aliquis posset
Augustani libri compositionem & editionem,
volente Principe Mauricio, reuerendissimus
& illustrissimus Princeps Georgius Princeps
Anhaltinus conuocauerat Lipsiam præcipu-
os Theologos & Misnicarum Ecclesiarum
præsides, eos fere, quibus curâ illarum com-
missa esset viuente adhuc Principe Henrico,
Principis Mauricii patre, ætate plerosque se-
nes, spectatæ dignitatis & vitæ honestate ce-
lebres omnes; vbi de communi concordan-
teque omnium sententia, administrationis
ordo descriptus, & ratio tam doctrinæ quam
rituum

rituum informata fuit. In quo libro omnia ea ad eundem modum continebantur, quo tunc capita illa, de quibus diximus, promulgarunt. Atque licet ex his etiam perspicere, quantum sit situm in temporibus. Tunc enim certe, quum ista tractata & conscripta sunt, si ederentur, nemo reprehenderet, ac laudarent potius omnes. Iam vero prolata eadem tam contumeliose respuerunt isti, qui ipsi soli fulcire Ecclesiam, & huius ruinas prohibere se, credi postulabant. Et si tragœdiæ istæ, quas excitarunt, commenta tantum suspicionum, & falsæ coniecturæ argumenta, & suæ acerbitalis odiique interpretationem, & temporis occasionem continebant. Quæ ad vulgus imperitum momenti habebant plurimum. Diligentiores autem celeriter, quonam tenderent,prehenderunt. Philippus Melanchthon, quo ista suadente non instituebantur, quique præ se ferret potius ab omnibus talibus illo tempore consiliis actionibusque voluntatem alienam, non tamen studium operæ suæ rebus communibus voluit denegare. Atque veritatem doctrinæ religionisque sinceram integritatem retinere constantissime perseveravit: de cæteris non existimavit vel opus esse, vel omnino expedire, ut dimicaretur. Neque ego ab illis dissentio, qui de isto libro decretum maximo-

rum malorum causam fuisse censent. Et hinc enim quæ incommoda distractionum extiterint, patet, & quid denique futurum sit magnopere metuendum est. At enim quorum hæc culpa sit, reperiendum, & eos infectandos arbitror, non furioso latratu & indignis conuiciis appetendos quoslibet. Sed cum amantibus rixas, & qui pascuntur contentionibus, frustra disputatur, præsertim ad omnia, tanquam clypeum, Religionis sanctissimum nomen obicientibus. Horum itaque tanquam rabiosi canis impetum, quoad conceditur, declinando vitantes, conficere curriculum illos suum sinamus, & attexamus reliqua.

LXXXV. Eadem tempestate quum nescio quo pacto de laudabilium piarumque actionum, quæ operum bonorum nomen habent in ecclesiastico sermone, necessitate, renouatæ essent disputationes, quidam tumultuosissime refellere non dubitarunt & veras neque ambiguas aut incommodas de illa sententias, cum plurimorum grauissima offensione. Idque crimen statim in Philippum Melanchthonem quoque tanquam telum intendi, & iam illius aliis quoque in partibus scripta lacerari atque carpi, inque primis refutari tradita de hominis voluntate, de con-
uersi-

versione ad Deum mentis humanæ, de Evangelii proprietate & natura; eoque resprogreſſi, ut conſultatum ſit in iſtorum conuenticulis, de prohibenda lectione certorum librorum Philippi Melanchthonis. Sed huic conatui prudentia Principis obſtitit, & eum repreſſit. Ut autem apud Homerum Ageleos monens procos, ne temere quaſi effundant ſimul iacula omnia, ſed comiciant aliquot certo numero ac ordine, petentes Vlyſſem,

Iuppiter aſpiret nobis (inquit) ſi forte favorem,

*Ut noſtris manibus cadat interfectus Vlyſſes,
Et noſtrum victrix hæc Martem fama ſequatur,*

Namque alios, vno hoc occiſo, nil moror omnes:

Sic variis diuerſisque calumniarum obtreſſationumque quaſi venenatis ſagittis nomen & exiſtimatio bona Philippi Melanchthonis propoſita erat vna ad confiſcandum; quod ipſius autoritate veluti conſoſſa atque extincta, ceteros omnes non admodum, formidandos eſſe ducerent. Sed haud ſcio an aliquanto patientius tulerit iniurias iſtas Philippus Melanchthon, quam oportuerit, atque tolerando quam repugnando fuerit fortior.

tior. Verum de hoc ipso fortasse postea plura dicemus suo loco.

LXXXVI. Venerat Norimbergam ex Bauaris ante multos sane annos Andreas, qui familiæ suæ nomen pene ridiculum mutaverat in Osiandri, vnde sonus non longissime recederet. Is, quod Hebraicarum literarum cognitionem profiteretur, in Augustiniano cœnobio doctrinæ suæ primum mercedes quasdam accipiebat, carus ob ingenii acrimoniam, & studium industriamque eruditæ, præcipue Wilibaldo Pircamero, dignitate honoribusque & sapientia doctrinaque præstanti viro, quos tamen deinde rusticitate morum & præfracta animi elatione ab se plerosque alienavit. Commendatus autem primoribus ciuitatis facundia sua potissimum, concionibus in æde Laurentiana habendis est præfectus. Consecutus fuerat autoritatem primis contentionibus de religione, quum monachis iam corruentes superstitiones retinere cupientibus vehementer restitisset, & coram Antistite Pabepergensi de illis controuersis copiose, quum plurimorum admiratione & applausu, disputasset. Iam autem promulgatione libri Augustani, vel rogatione potius illa, in Germania passim motus periculosos miscente, arripuit occasionem relinquendi eam urbem, in qua dignitatem

tatem & aliquid facultatum fuerat adeptus, contulitque sese in Prusiam; ubi & ipsius audacia, & quorundam aduersantium illi importunitate, eæ contentiones sunt excitatæ, quæ totam fere Germaniam peruaferunt, ingentiumque odiorum, turbarum, iurgiorum fuerunt causæ. Quum & nouitate disputationum Osiandricarum animaduersiones atque notationes plane censoriæ aliorum excitarentur, & in refragando quisque maxime fortis atque acer videri cuperet. Osiandrum sane, qui ingenio naturaque esset eccellente, & doctrina varia ac multiplice, & facultate præclara in pronunciando quæ cogitasset, præditus atque instructus, non cavisse apparet, ne oppugnando alios, & suspectam formam doctrinæ callide introducendo, novas quasi secures impingeret rei ecclesiasticæ. Estque ab hoc Philippus Melanchthon & ipse spurcissimi scripti atrocibus contumeliis appetitus. Neque possum in animum inducere ut credam, ipsum autorem, tam vecordem fuisse, quin illius eum quoque recognoscentem forte puduerit. Tulit etiam hoc æquisimo animo Philippus Melanchthon, & in simplice, vera, puraque doctrina exercenda perrexit; quæ ipsa esset responsio grauisima & firmissima defensio ad omnia. Atque ego scio, Philippum Melanch-

lanchthonem tam inhumaniter acceptum ab Ofiandro, postea tamen sæpe honorifice eius meminisse, recordantem veteris consuetudinis necessitudinem, eamque illi laudem tribuisse, quam deberi fatebatur. scientiæ multarum cognitione dignarum rerum præclaræ. Atque nos in hac narratione studuimus, id quod ante oculos versaretur, neque dubium aut controuersum esset, de quocunque nominatim aliquid recensuimus, commemorando exponi: quæ sunt nimirum vel dicta alicuius vel facta, vel his, ut ita loquar, cognata atque inhærentia. Non enim ego sum, qui de aliorum consiliis & proposito atque sententia pronunciare soleam. Hæc enim occulta sunt, quæ suspicando detorqueri maleuolentiæ est & odii, extollere vero altius ab integritate alienum. In quo utroque, priore tamen magis, sibi licentia seculi huius nimium indulget. Enimuero ubi dictum factumue & manifestum neque ambiguum extat, licet, vel oportet, ut opinor, id de eo commemorari, quod congruit veritati. Sed alia sunt aliorum quum ingenia, tum voluntates, tum studia quoque. Prauitatem sane, vel procreatione insitam, vel usu contractam, tolli emendando, non corroborari exercendo conuenit, cui quid prætendi possit quærere, extrema est peruersitas. Scripsitque

psitque hoc præclare Iustinus Martyr: Naturam viuendo sequi esse eius, qui nondum peruenit ad Fidem; at æmulationem inuidiæ, longe adhuc a veritate abhorrentis ac remoti. Quapropter ne quis seipsum decipiat, neque specie simulationeque fallatur. Nam reperiuntur, qui iracundiæ in reprehendendo & insectando quoslibet audaciam, atque etiam conuiciorum acerbitem, Scripturæ sacræ & sanctorum hominum autoritate exemplisque defendant. Quorum si vires cupiditati responderent, iam dudum iacerent demissi orco aduersarii. Quantum tamen in ipsis est, & damnando, & supplicia decernendo, & maledictis insuper ingerendis, satisfaciunt acerbitati suæ. Quantum enim vidit ætas nostra scriptorum, quantum dictorum audiuit, de suspicionibus & opinionum coniecturis! Quoties concurrentes aliqui clandestinis operis, modo doctrinæ neque necesarios neque opportunos tractatus, modo disputationes superuacaneas & verborum, magis strepitu quam rerum pondere nitentes atque fultas, modo etiam sæuas & contumeliosas in alios accusationes instituerunt, composuerunt, ediderunt! Quibus nihil nisi præliorum & belli causæ darentur. Quum autores inter quasdam veluti scenicas exultationes personis prodirent alienis, tanquam
veteres

veteres heroes cum cothurnis atque sceptro, vehementiam & libertatem orationis iactantes, & volentes esse superiores vbiq̃ue, idque valere tantum quod ipsi statuissent; & affectando oris liberi copiam fucum facientes imperitis, specieque ista libertatis gravissime sauciantes bonam aliorum existimationem, & quietis diuinum donum perturbantes. Huiusmodi autem hominum profecto animi contentio & propositum sententiæ periculi plenum est, dumque cedere nunquam volunt, sed victores esse aliorum omnium, sit fere, vt ea victoria potiantur, quæ est tristissima, & prouerbio Græcorum Cadmea perhibetur. Atque ista in hac narratione, reticenda, & talia vitia silentio, quin notarentur, prætereunda non fuerunt. Vt autem ad rem redeamus, multas amaras tunc quasi potiones, vt dicitur, hausit Philippus Melanchthon, & concoxit tacendo atque tolerando. De quibus omnia sunt in medio, neque suspicando a nobis fingitur, aut argumentando exquiritur fere quicquam. Iam vero ne mortuo quidem parcitur, sed dissentientum quoque, vt diximus, proteruitas in illo infamando insolentiaque concordat. Si inuidia impellente, quanta sit generis istius improbitas ex eo apparet, quod nouam ac inusitatam illud viam ingreditur; quum inuidia,

dia, tanquam ignis, materia deficiente, extingu-
gui & delabi in cineres obliuionis post alicu-
ius mortem soleat. Sin odio incitante: quum
oderint eum, quem boni omnes amarunt vi-
uum, & mortuum singularis beneuolentiæ me-
moriam cohonestant, quales ipsi perhiberi pos-
sint, si scaperent, poterant cogitare. Sed
nominis scilicet aliqui celebritate offendun-
tur, & ea oppressa fore vt ipsi emineant,
confidunt. Ita sane se res habet, vt omni-
bus temporibus vera atque solida virtus rara,
nunc rarissima sit: quumque perpauca sua vir-
tute excellere & quasi in altiore locum
peruenire valeant, plerique alterum crimi-
nando & contumeliarum insidiis appe-
tendo, aut etiam impudeuter infectando,
vt conspiciantur, ascendere nituntur. Hoc
quale sit patet. Non certe præstantiam &
amplitudinem promittens, sed afferens sce-
leris amentiaque ignominiam, vt illud agen-
tes & stultitiæ & prauitatis coargui posse vi-
deantur. Sed quod aggresso hoc expositio-
nis opus inuito necessitas imposuit vt non
omitterem, in eo neque longior neque dili-
gentior sum futurus. Vt igitur ad Osiandri
mentionem reducatur oratio, fuit is & inge-
nio acri præditus & haud vulgari doctrina
instructus, sed animo & elato & admodum
confidente, & moribus nequaquam modera-
tis

tis atque suauibus. Hæc naturæ interdum vitia educatione liberali & disciplinæ diligentia corriguntur; quæ Osiandro defuisse constat. Sed confecto ille curriculo vitæ suæ in Prussia mortuus, & splendido funere clatus atque honorifice est sepultus, anno Christi M. D. LII. XVI. Cal. Sept. apud Regium montem.

LXXXVII. Redeundum autem est ad superiora tempora, vt narratio ordine procedat. Quæ quidem perquam turbulenta fuerunt, & non modo curis & anxietatibus animi, sed corporis quoque laboribus atque defatigatione Philippum Melanchthonem, grauiter, afflixerunt. Anno Iesu Christi M. D. XLIX. incipiente, mortuus est, cum ingente Philippi Melanchthonis dolore & tristissimo desiderio amici carissimi, Caspar Cruciger, diuturno languore conflictatus, & grauissimis, ob ea quæ tum gerebantur, perturbationibus debilitatus. Ita autem obiit mortem, vt ardentissimis precibus opem diuinam sibi & propter religiosæ pietatis studium periclitantibus cunctis imploraret, & vitam suam traderet in manus Iesu Christi, auctoris salutis vnici, cui seruierant fideliter studia ipsius, & quem sanctissime coluerat. Hunc condiscipulum non multum ætate inferiorem habui in puerili institutione Lipsiæ, quum vno & præceptore atque magistro Georgio

orgio Helto, & doctore literarum Græcarum familiariter vteremur Ricardo Croco Britanno. Erat autem in eo puero tanta statim ingenii vis, ut quæ cæteri nos magno labore vix perdiscebamus, ea ille sic celeriter comprehenderet animo, ut ludere & iocari videretur, nobis admodum serio omnes, ut aiunt, nervos contendentibus. Perpetuam autem consuetudinem hanc seruabat, ut in dissimulando scientiam, quæ erat in eo multiplex variarum rerum, perseveraret. Nihil in eo ostentationem habebat, nulla gloriæ aut nominis præstantiæque cupiditas animadvertebatur. Studii labores suscipiebantur perferebanturque incredibiles, sed tam occulte & quasi furtim, ut familiarissimi etiam de iis celarentur. Morum vitæque maxima erat in illo honestas atque probitas, & in quotidiano quidem conuictu suauitas perquam amabilis, ergaque omnes summa humanitas, in negotiis autem gerendis & fides & grauitas spectata. In loquendo admodum parcus. Ad omnes vero iuuandum consilio opeque promptissimus. Cogitationes ipsius sapientes, oratio circumspecta, insignis taciturnitas, fides certa. Quibus eximiam auctoritatem ille consequèbatur, & dignitate excelebat. Neque inueniebat facile apud se alium Philippus Melanchthon, cui sua consi-

lia confidentius crederet, aut cum quo liberius communicaret sententiam rationesque suas, aut cuius iudicio plus tribueret, quam Casparem Crucigerum. Quem quum tanti fecisset & tam vehementer dilexisset, morte ipsius non potuit non in luctu mœroreque ingente versari, ea præsertim quæ ante tempus illi accidisse videri posset. Excessit enim e vita hac confecto anno ætatis suæ quadragésimo quinto.

LXXXVIII. Iam & obsidio vrbs Magdeburgensis multarum variarumque difficultatum causas dabat, & Imperatoris Caroli in exequendis iis, quæ ordinando edicendoque instituerat, studium paullo ante remissius visum, rursus intendi, neque de seueritate demonstrata multum remitti. Non paucis igitur in locis religionis causa aut tumultus excitabantur, aut mutationes fiebant non periculosa modo, sed perniciofa etiam. Et publicata iam erant hoc tempore anni M. D. LI. literæ, quibus Synodus oecumenica a Pontifice Romano Iulio III, qui ante legatus præfederat in Tridentina & Bononiensi, rursus indicebatur, & Tridentum de nouo omnes, qui adesse deberent & a Pontifice Paulo III vocati prius fuissent, se conferre iuebantur. Hoc Imperator Carolus, ægre & vehementer vrgendo Pontificem, tan-

tandem obtinuerat. Præfiniebatur autem, dies Calend. Maii conuentui, & exordio actionum, quibus Paulina illa Synodus continuaretur. Carolum Imperatorem magnopere studere rem ad legitimam cognitionem deduci apparebat, quam sciret Synodi oecumenicæ esse propriam. Sed ita & fuerant ante Synodi indictæ, & eæ literæ de hac scribebantur, vt non deessent qui suspicarentur, a Pontificiis nihil peius metui, quam ne procederent instituta negotia. Ipsum etiam Imperatorem tales literas non probasse, existimabatur. Sed sunt illæ recitatæ in confesso Principum Augustæ, vbi tum conuentus ordinum Imperii agebatur. Qui ita solutus est, vt Imperator, ad Synodum celebrandam & frequentandam, cunctos accurate & vehementer hortaretur & admoneret, seque propius accessurum, & propugnatorem omnium defensoremque actionum fore, polliceretur. Non etiam intermittebat urgere vniuersos, vt ea, de quibus Interim seruandis, dum Synodus oecumenica aliud decerneret, liber editus fuerat, exequerentur perficiendo. Et ideo quum aliis locis magnopere trepidatum fuit, tum Argentoratum varie & multipliciter vexatum. Estque mortuus in Britannia Martinus Bucerus, cum quo Philippo Melanchthoni magnus fuerat fa-

miliaritatis usus: itaque morte eius non parvum dolorem eum accepisse intelligebatur.

LXXXIX. Non putavi alienum hoc loco de Bucero pauca ultra superiorem mentionem commemorare, cuius nomen apud quosdam mirifice invidiosum fuisse constat; quum illius neque studium prauum, neque operæ peruersæ, multo minus improbitas aut malitia deprehensa sit. Patriam hic habuit Weissenburgum oppidum ad Rhenum situm. In pueritia autem, id quod multis accidit, literis & alia doctrina sic fuit institutus, ut finis proponeretur in re ecclesiastica muneris alicuius functio. Vnde postea factum est, ut se daret in familiam seu sodalitatem Dominicanam, spe, ut videtur, vitæ melioris atque sanctioris. Verum offensus, ut alii quoque, superstitionum impietate, (quæ iam ne specie quidem aliqua religiosæ pietatis occultarentur, sed quum doctrinæ falsitate, tum rituum pene iocularium usurpatione, manifesto deprehenderentur, quos vulgo etiam deridere plerique inciperent, accedente præsertim vitæ atque morum dissolutione) deseruit illam congregationem, & evoluit se erroribus quibus temere fuerat implicatus. Versatus deinde fuit aliquantisper apud Franciscum Sickingensem, qui ingrati motu suscepti belli difficilis, quod periculo-

eulofam seditionem excitaturum esse nobilitatis concursu multi metuebant, in sua arce Landestallo oppressus mortem obiit anno Christi M. D. XXIII. Postea Argentoratum Bucerus se contulit. Vbi studio & diligentia magna concionando populum docuit, & multa opera scribendo edidit, quæ compendio doctis & veritatem amantibus præclara, & vtilia videri. Inprimis operam dedit ut controuersia, quæ tunc quædam Ecclesiarum consentientum pacem tranquillitatemque turbabant, dirimerentur, & restitueretur concordia. In quo nihil laboris aut defatigationis recusauit, vel non potius cupidissime suscepit atque pertulit. Quod crederetur autem esse ingenio placido ac miti, adhibitus deinde quoque fuit ad consilia actionesque consensionum, & tollendorum dissidiorum. In quibus tractatibus moderatione sua cauit, ne nimis offenderentur aduersarii, neue omnem concordia spem abiicerent. Itaque opinione de eo satis bona accersitus fuit Augustam, quum liber ille concinnaretur, sententiam Imperatoris pronuncians de iis, quæ Interim dum Synodus cogeretur fieri seruarique oporteret, de quo supra dictum est. Sed frustratus est expectationem plerorumque, & conceptam opinionem fefellit, improbando aperte scriptum illud, & demon-

frando insidias atque corruptelas. Quod igitur tum Imperatoris potestate tam late patente, ut aliorum quorumvis ditioni subiecta loca complecteretur, neque Argentorati neque uspiam in Germania tutus videretur fore, ita accersitus perquam honorifice in Britanniam se contulit, ubi, ut diximus, obiit hoc anno mortem.

XC. Orto autem bello Parmensi, Synodo, quam Imperator Carolus non modo procedere sed maturari maximopere cupiebat, impedimenti non nihil & moræ illatum fuit. Quo tempore obsidione Parmam, & Mirandulam Cæsareanæ Pontificiæque copiæ cinxerunt. Sed Imperator nihilo minus rem apud omnes urgere, missisque literis instare ut ad Synodum undique conveniretur, & metum periculi, ne qui illum prætereire iure possent, modis omnibus adimere, ac tuto cunctos & venturos ad Synodum & ibi futuros indeque decessuros esse polliceri, denique securitatem, quocunque pacto posset addere. Magno pere fuerant omnes conturbati rebus atque negotiis post victoriam Imperatoris Saxoniam susceptis atque gestis. Et quoniam conventus aliquando de Religione constituenda actos ab iis, qui defectionis ab Ecclesia Romana insinulabantur, Imperator in eam partem interpretatus fuerat, ut ad Reipubli-

cæ statum conuellendum pertinere suspicaretur: non pauci abhorrebant illo tempore a necessariis etiam congressibus, in quibus communi eandem doctrinam religionemque profitentium ac colentium sententia statueretur, de Imperatoris postulatis, & Synodicis actionibus. Princeps autem Mauricius mandata tunc dedit Philippo Melanchthoni, ut scriptum componeret, quod ea, quæ Synodo exponerentur, si quos illuc mitti placuisset, comprehenderet. Hoc quum ille absoluisset, conuocati Lipsiæ Theologi & præcipui vndique Ecclesiarum præsides, iubentur audire recitationem scripti, & de eo dicere quid sentirent. Vniuersis id approbantibus, neque vlllo fere quicquam requirente aut reprehendente, vnus tamen aut alter aliquid notare in actionibus superioris temporis, & culpæ quædam ut suscepta gesta que timidi. Sed neque horum sermones confessionem turbarunt, & ipsi etiam commoditate & mansuetudine aliorum, veritatisque imprimis demonstratione, quod falsis temere fidem habuissent, facile sunt placati. Quanquam autem & simplex erat istius scripti expositio, neque vllius nominatim criminationem complectebatur, eorum tantum de quibus controuersiæ iamdudum erant explicationem continens; non visum tamen

est cum aliis ipsum communicare, nonnullis Principibus viris & ciuitatibus hoc magnopere expectentibus. Et aduenere ea de re legati quidam Theologi Wirtenbergenses & Argentoratenses, & attulerunt librum ad eundem vsum conscriptum a Iohanne Brentio, qui apud Wirtenbergensem Ducem illustrissimum Principem Christophorum Ulrici F. postquam ex Sueuicis Salinis discesserat, erat in singulari pretio & existimatione, in maximo honore, quamuis occultius aliquanto, habitus; quum Hispanica præsidia adhuc detinerent præcipua in illis terris loca, quæ hoc anno tandem fuerunt educta, restituta libera Principi suorum possessione, post ingentia damna data regioni Wirtenbergensi, non modo direptione facultatum & detrimentis fortunarum, sed morum simplicis & probæ gentis corruptela, & integrioris vitæ dissolutione. Quam cladem vastitate agrorum & pecuniarum rapinis boni omnes grauiorem foedioremque duxerunt. Cum Iohanne Brentio antiqua necessitudo intercedebat. Philippo Melanchthoni, & hunc Princeps Wirtenbergensis paullo post eximio fauore complexus & dignitate & opibus auxit. Sed id scriptum quod a Philippo Melanchthone compositum fuisse diximus, congregatis in Synodo offerendum, cum iis, qui illarum re-
rum

rum caussa in Misniam venerant , tandem communicatum , & postea conuentu Wittenbergæ acto ab aliis compluribus, coram quibus recitatum fuerat , approbatum , & tandem editione quoque Repetitæ Confessionis Augustanæ titulo diuulgatum est.

XCI. Interea autem dum hæc cura atque sollicitudo exercet Philippum Melancthonem, oritur aliud malum , & excitatur tempestas , quæ mirifice perculit omnium bonorum animos, & eripuit spem feliciſſimi eventus, quod ad tractatus quidem de Religione pertineret , vniuersam. Cunctis enim sperantibus fore, vt congregatis iam iis, qui de controuersis ecclesiasticis cognoscerent , res essent vbique interea quietiores , quum præsertim existimarentur in illa Synodo affuturi causamque dicturi, ii qui defectionis insimulabantur : & hi quotutius venire ad Synodum, ibique liberius versari, & omni metu adempto negotium gerere possent, D. Mauricius perfecerat, vt non modo Imperatorio diplomate ea fides daretur, sed autoritate etiam Synodica confirmaretur: Hac igitur in spe atque expectatione hominum, noui terroris & magnarum perturbationum occasio data est. Nam de improviso Augustæ decem curantes docentesque in Ecclesia , cum quibusdam in ludis litera-

literarum magistris, coram Antonio Granvellano, Præsule Atrebatensi, maximæ apud Carolum autoritatis, iussi fuerunt apparere. Is sibi adiunctis præcipuis Imperatoris consiliariis, in ipsorum doctrinam inquirere, & vehemente oratione eos increpare, & ne a contumeliis quidem abstinere, denique inhumanissime & durissime acceptos ita dimisit, ut tyrannico edicto vrbe eiiceret. Eandem acerbiter & aliæ ciuitates Sueviæ tunc expertæ fuerunt. Quod factum tam sævum sermones querelasque varias commovit, & animos bonorum mœstitia compleuit. In quibus Philippi Melanchthonis cogitationes erant imprimis tristes, & oratio audiebatur quum seuerâ, tum miseriam infelicitatemque nostræ ætatis deplorans. Commemorabantur autem tum a nonnullis ea incommoda atque mala, quæ alios præstantes ingenio & usu maximarum rerum considerare oportuisse existimabatur: eos præsertim, qui potuissent auertere, quum ipsis nihil nisi in mœrore & anxietate lacrimæ concederentur. Hæc erant istiusmodi fere: dissensiones de Religione non esse similes aliarum, ac tales potius, quibus potentia moderari, quasque coercere ac reprimere vis vlla nequeat. Sed esse de his cognitione & iudicio opus, propterea quod animi impendantur metu,

ne

ne quid impietatis concipiant. Quod si ita affectos cogere velis, apud fortiores nihil sis profecturus. Vitam enim hi amittent potius, quam mutent sententiam: immo hanc aliqui laudem affectabunt, ut in confessione veritatis afflicti esse dicantur. Alios reddideris improbos ac malos; qui iam dicere face-
reque non dubitent quiduis, quique commutare dominos per occasionem libenter velint, denique infidi hi erunt & leues. Si enim in rebus humanis, quum id proditur, quod verum rectumque esse aliquis decreuit, ex eo vitio proditioes amicitiarum & rerumpublicarum nasci comperitur; qui a persuasione veritatis diuinæ metu aut spe depellitur, & de illis rebus contra animi sententiam iam loqui sustinet, eumne quis vlli mortalium fidelem fore putabit? Dicet aliquis, redire hos in viam, neque eam esse veritatis desertionem, sed erroris. Id tum demum fortasse dici posset, si rebus disputatis & explicatis, sublataque dubitatione, abessent minæ, terrores, violentia, illecebræ obsequii, & spes emolumentorum. Itaque de quodam Arianae sectæ legimus, quod, quum intellexisset vnum orthodoxum ex amicis præcipuis amplecti illam doctrinam sibi gratificantem, indignatus animo iusserit caput ipsius ceruicibus abscindi, quum quidem increpans eum dixit-

dixisset: tunc ego posthac mihi fidelem fore confidam, qui hominis causa fidem fregisti, datam Deo? Sed contra Imperatoris decreta hoc aut illud commissum omissumue esse aiunt. Iis scilicet in rebus, de quibus semper hoc in promptu est: magis Deo quam hominibus. Constantinus Magnus quum de religione orta controuersia statum ipsius a concitata multitudine euersæ fuissent, quaestionem ea de re haberi noluit, ne religionis negotia cum profanis permiscuisse perhiberetur. Quæ vota quam longo tempore fuerunt bonorum, ut de religione suscipi fierique cognitionem potius priusque studerent ii, qui deberent ac possent, quam aliquid edicendo constitueretur, quod: neque duraturum, & in aliorum dicta, in aliorum manifestas reprehensiones reclamationesque incursum esset! Quam multi sunt anni, quibus expetitur, ut necessaria maxime omnium, legitima cognitio de controuersis ecclesiasticis! Hæc res quum tandem magno labore perfecta putaretur, & cognitio illa esset inchoata, talibus actionibus eam interturbari non oportuisse plerique censebant. Non hi quidem disputantes, quomodo negotium illud cognitionis institutum esset, aut quid eo quæri videretur, sed hoc perpendentes: si illi, qui nollent & negarent posse ea probare

bare & admittere, quæ differendo notassent
 & essent infectati: illi igitur, si cogerentur
 dubia & incerta iam amplecti, aut si reni-
 tentes exterminarentur, quænam Synodus illa
 futura esset, ad quam vel non integrum ve-
 nire iam quasi deiectis de iure disceptandi,
 aut venire esset necesse debilitatos atque
 fractos, quum liberæ tantarum rerum tracta-
 tiones promitterentur, & plurimi esse tales
 iudicarent foreque sperauissent. Dolebat
 quibusdam, non saltem respectum fuisse
 quendam habitum maleuolorum. Non
 enim possunt certe omnium voces & ora
 interminando occludi. Quid igitur male-
 voli tum dicere possent non cogitatum, ne-
 que circumspectius res istas fuisse gestas, mo-
 leste ferebant aliqui. Quod negari non pos-
 set, dissentaneum esse, in ipso articulo o-
 stensæ cognitionis talia facta fieri, quibus iu-
 dicii omnis libertas adimi videretur. Quum
 tamdiu aliquos tulerint, quædam dissimula-
 rint, & vt pater adolescentis, quemadmo-
 dum ex nescio qua fabula vetere adducitur,
 Comici, quamuis ille oleret vnguenta, ta-
 men odorari se negat: sic isti, quanquam
 essent in conspectu, quæ improbarent, tamen
 oculos auerterint; nunc vbi dies venit, quo
 decernatur de iis ipsis & rebus & hominibus,
 isti iubentur præiudicare id damnando, quod
 diudi-

diiudicari debeat, aut si nolint extorres profugere coguntur. Quid hoc sit aliud, quam quod apud Poëtam de simili peruersitate dicitur:

*Pacem orare manu, pretendere puppibus
arma.*

id est, ostendere liberam cognitionem, & interim alligare animos atque deuincire velle, vt facere necesse sit, quicquid imperetur, siue probent aliqui seu improbent, nullis argumentis adducti, aut in refragando perseuerantes exulent, vel grauiore etiam pœnas persoluant? Atque scio fuisse quosdam suspicatos, de sententia Caroli isto pacto rem administratam non esse, & demiratos vnde extitissent hæc consilia, optasseque vt vulneri isti remedium inueniretur, ne mala malis exaggerarentur. Videbant enim fore, vt tunc multi terrerentur, afficerentur varie, grauius perturbarentur, denique ingentem ista paritura esse confusionem. Atque contemperi suasisse quosdam, qui non modo iustitiæ sed vtilitatis quoque respectu mouerentur, mutandum decretum illud, reuocandos expulsos, & institutæ cognitioni cursum liberum relinquendum esse. Sed vicerunt scilicet fata seculi nostri, & secuta mala quæ initia atque causas, tum incrementa impulsionisque, habere oportuit. Et in pertinacia
tunc

tunc obtemperatum est iracundiæ, quæ quum nihil considerando prospiciat, exitus habere solet eiusmodi, vt, si quem facti sui aliquando pœniteat, non mirum esse videatur. Atque exponuntur a me ea adhuc, quæ mediocriter prudentis hominis ac sani rationibus comprehendendi colligique possunt; quum in istiusmodi negotiis nihil prius, neque antiquius sibi esse pati debeat quisquam, veritatis cœlestis, cuius doctor & explicator est Spiritus sanctus, perspicientia, qua relicta aut negligentius exquisita, cultum & venerationem Dei æterni, & pietatem religiosam, labare & conciderè necesse est. Sed longe sane digressi, redeamus ad nostræ narrationis seriem.

XCII. Et hæc ad istum modum Augustæ acta sollicitum habebant Philippum Melanchthonem; & crebræ multiplicium quarundam etiam mirificarum literarum eo maxime tempore ei interpellationes obstrepabant; & qui eiiciebantur consilium ab ipso opemque inprimis pêtebant, & ad eius fidem misericordiamque confugiebant; & consultationes de Synodo, quæ inter Reipublicæ graues motus renouabantur, curas maximas afferebant. Etea cernebantur quasi conseri, vel ad herbam etiam perducì, quorum qui fructus futuri essent, nemo bonus sine anxietate

singulari cogitare posset. Nam quod & Gallici regis, qui Imperatoris hostis vel certe inimicus esset, animus ita alienaretur a Pontifice Romano, vt in Synodo contra rationem illam & institutas actiones testatam esse vellet sententiam suam, nec non mutux inter Carolum & hunc Regem criminationes, quæ diuulgabantur, & recepta occupataque vrbs Magdeburgica a Duce Mauricio, & Imperatorem, qui ad Oenipontem desideret, frustra interpellari de Landgrafii liberatione, cuius promissæ sponsor appellaretur gener D. Mauricius: hæc omnia, inquam, attentos formidine futurorum carere non patiebantur. Et Philippus Melanchthon, iam tertius ad Synodum legatus, cum literis Principis Mauricii in viam se dederat. Earum literarum talis erat sententia, quæ subiiciebatur præscriptæ saluti & compellationi honorificæ, qua reuerendissimi Domini & reuerendi Patres ille conuentus nominabatur: Quum Cæsarea Maiestas clementissime voluisset, vt ex Ecclesiis subiectis ditioni suæ aliqui ad Synodum mitterentur, noluisse D. Mauriciū deesse voluntati illius, quum præsertim optaret & ipse veritatem illustrari ad gloriam Dei æterni, & constitui piam ac perpetuam in Ecclesiis totius orbis terrarum concordiam. Quæ duæ res maxime essent expetendæ

tendæ omnibus mortalibus , præcipue vero
iis, quibus gubernatio aliorum diuinitus sit
commendata. Tum deinde indicabatur,
qui mitterentur ad Synodum, ii quidem illi,
quorum honestatem vitæ & pacis publicæque
concordiæ studium Princeps ipse prædicari
intelligeret. Addebatur petitio : vt hi ex-
ponentes publice, quid de omnibus contro-
uersiis docerent communi sententia Ecclesiæ
in regione sua, audirentur. Et significabatur:
esse ipsis mandata data , vt pie placideque
& sine priuatis affectibus recitarent & decla-
rarent doctrinam , quam esse existimarent
vniuersæ Ecclesiæ necessariam. Conclusio
literarum complectebatur & admonitionem
humanissimam & vota plenissima pietatis: Sci-
re eos, qui conuenissent, pro sua eccellente
sapientia, ipsorum confessus Deum iudicem
intueri , & Ecclesiam vniuersam, tam cœle-
stem quam terrenam, ab his postulare & ex-
petere, primum vt gloria Filii Dei vere illu-
stretur , & sanentur conscientiæ faucibus , &
vera his inuocatio monstretur, deinde vt ta-
lis concordia constituatur, qua non stabiliantur
veteres abusus. Neque enim Deo gra-
tam, neque diurnam tranquillitatem sine
veritate esse posse. Negandum autem non
esse omnino, manifestos errores quosdam &
non leuia vitia in Ecclesiam irrepsisse, quæ

diffidiis horum temporum dederint occasio-
nem. De quibus tantis rebus, & audire eos
Ecclesiarum querelas, & remedia salutaria
quærere, sapientiæ esse ipsorum. Atque o-
rare se Filium Dei Dominum nostrum Ie-
sum Christum, vt vulneribus Ecclesiæ vete-
ribus & recentibus medeatur ipse, sicut Sa-
maritanum illum ait, saucio viatori opem
tulisse. Qua imagine quum sese exprime-
ret, ostendit scilicet affici se calamitatibus
nostris, & velle nobis opitulari. His literis
in vrbe illustrissimæ aulæ Dresda datis, di-
es adscriptus erat Iduum Ianuarii, anni Iesu
Christi M. D. LII. & nomen Mauricii cum
præcipuis titulis subscriptum. Hac Epistola
accepta Philippus Melanchthon cum comiti-
bus iter est ingressus. Dictum autem eis fu-
erat, vt Augustæ Vindelicorum subsisterent,
donec vel ab ipso Principe vel legatis ab hoc
ad Synodum literas accepissent, quibus signi-
ficaretur, quid facere deberent. Tota res erat
magis comparata ad aliorum arbitrium,
quam de consilio & sententia Philippi Me-
lanchthonis instituta. Sed nihilo tamen mi-
nus ille, sine recusatione, vt consueuerat
semper obtemperare iussis eorum, quibus
seruiebat opera ipsius, quoad quidem bonæ
mentis conscientia pateretur, sic tunc paruit,
& muneri legationis illius vt præflet facile
passus

passus obtineri, & cum comitibus iter ingressus fuit. Venerunt igitur illi Norimbergam, ubi pro singulari erga Philippum Melancthonem amore, & studio purioris doctrinæ, accepti habitique fuerunt humanissime & benignissime. Publice eis ædes assignatæ, procuratæ res necessariæ, & omnia summæ benevolentia præstita officia. Dum in vrbe illa commorantur, & ociose expectant quidnam porro deinde agere iubeantur, interea rumores dissipantur de expeditione belli adversus Imperatorem, & D. Mauricii Gallicis consultationibus. De quibus maximis & admirabilibus quum inceptis tum effectionibus, neque argumentum hoc fert ut enarratio instituat, neque mihi libet has res exponendo iaculare. D. Mauricius & constantiae diturnitate, & excelsi animi robore, & consiliorum prudentia, & rerum gestarum amplitudine, tum declaravit non esse prorsus oppressam neque captam Germaniam, ex qua scriptis picturisque editis externi quidam triumphos iamdudum agerent. Neque vicit ille quidem tum Imperatorem inuictum, sed hoc tamen armatus obtinuit, quod inermi supplicando diu multumque hætenus fuerat denegatum. Memini in harum rerum motu quid alii sperarint, alii metuerint. Atque audiui quendam festivum, quum iam bellum

lum fieret, quodam in coetu sollicitis admodum iis ex Mauricianis, quibus tota res erat exploratior, & qui omnia perpendebant diligentius cogitando, per iocum iubere eos esse bono animo, nam a Carolo vinci Mauriciam non posse. Quærente vno, quid esset cur tam audacter hoc ipse affirmaret? respondit iste: veteris diuinationis esse eam fiduciam, qua prædicta fuisse perhiberetur Achilli victoria superaturo Hectorem. Nam vt Achillis nomen numeris, qui literarum, notis indicarentur, plenius esset quam Hectoris; sic Mauricii statim initio nomen Caroli nomine esse numerosius. Sed hæc tum ioco dicta familiariter, cum eo exitu, qui notus est omnibus, congruerunt. Philippus autem Melanchthon, qui Augustam pergere certis de causis noluiſſet, & satis, vt putabat, diu expectasset Norimbergæ literas, quibus quid deinceps agendum esset ostenderetur, neque tali tempore, & a disputatione, verborum negotiis ad armorum vim traductis, apud externos desidendum diutius existimaret; dimissus ab illa ciuitate perquam amanter, & publico munere vecturæ equestris instructus, in has regiones & ad suos tandem est reuersus. Non defuerunt qui deplorarent euentus istius infelicitatem, qua impeditæ essent de maximis & maxime necessariis

cessariis rebus, non fortuitæ quædam neque extraordinariæ, quales sæpe habitæ fuerant, sed legitimæ atque exquisitæ cognitiones. Animaduvertebatur enim, & existere indies maiores voluntatum alienationes, & dissidia crescere, & perturbari mentes pias, denique præparari in distractione extrema Reipublicæ interitum. Etsi autem ferebatur, aduentum eorum, qui iamdudum quasi hostes iudicati essent, ad Synodum ideo tantum expectari, ut, vel simpliciter parerent atque subiicerentur auctoritati Synodicæ, neque ad illius decreta omnino hîscere, ut dicitur, nedum respondere quicquam auderent, vel audirent ultimæ condemnationis tristissimam pronunciari sententiam; omnium tamen rerum negotiorumque exitu incerto, erant, qui non malam spem conciperent ac fouerent: si Philippus Melanchthon Tridentum accessisset, futurum fuisse, ut, audita enarratione, doctrinæ quidem imprimis, sed præterea quoque causarum, ex quibus tantæ tamque insanabilium malorum difficultates ortæ essent, multorum animi ad considerationem salutarem & vera iudicia conuerterentur, qui in ignoratione rerum omnium præoccupati institutione puerili & sermonibus maleuolorum, non possent vel de doctrina vel de professoribus illius bene commode-

que sentire. Et erat Philippus Melanchthon ita animatus, ut neque itineris longi eum tæderet, neque laborem ullum aut periculum ipse vitandum fugiendumque censeret, dummodo operæ studijque aliquid nauaretur rei ecclesiasticæ tam conturbatæ & afflictæ. Sed ista scilicet ad hunc modum geri oportuit, neque seculi nostri improbitas remedia tam grauis & mortiferi morbi admisit. De qua miseria quamuis multa dici possent, quum frustra tamen a nobis dicerentur, tum inculcanda non fuerunt. Persequamur igitur reliqua.

XCIII. D. Mauricius iis rebus confectis & ea consecutus, propter quæ expedita arma fuissent, pacem fieri facile libenterque est passus. Atque fuisse qui inter tractatum compositionis & pacis tentarent & molirentur disturbance nem bene præclareque institutorum, & actionum salutarium euerisionem, sollicitando animum D. Mauricii ad copiarum ipsius, dum illæ interea otiosæ essent, turbulentum usum. Sed quum D. Mauricii virtus, rectique & honesti propositi firmitas, tum eorum, quos eo tempore secum habuit, fidele studium libere aduersando restitit postulationibus iniustis atque perniciosis. Imposuit autem D. Mauricius toti negotio eum finem, quo fama ipsius non modo modera-

tionis

tionis sed pietatis quoque celebraretur, abductis copiis suis in Pannoniam, & suo adventu territis repressisque hostibus, qui & occuparant iam quædam opportuna loca, & progressuri ulterius ingentemque cladem videbantur toti Pannoniæ allaturi. Est autem in istis consultationibus D. Mauricius quum aliorum prudentia ac fide præstantium viro- rum usus opera, tum, ut antea sæpe, Christophori inprimis Carolouicii, ex nobilitate Misnica equestris ordinis præcipui, & a pue- ro optimis disciplinis ac artibus præclare in- stituti & egregie exculti, & in Reipublicæ maximis grauiissimisque negotiis cum summa laude versati. Cuius ipsius quoque retinen- tis atque vrgentis studium bonarum litera- rum ac humanitatis inter Reipublicæ curas constantissime, prædicari posset copiose in, protegendo caput Philippi Melanchthonis, & ab hoc pericula, quæ ei, ut supra indica- tum est, creabantur, propulsando, incredibili non modo diligentia sed solertia quoque & necessaria tunc calliditas, præstantis tem- pore difficili amicitia veræ officium, & per- soluentis beneuolentiæ meritæ memoria ani- mi grati debitum. Sed tunc pax est facta, Id quod gratum acceptumque cunctis, quo- rum auxilio in eo bello D. Mauricius erat v- sus, non fuit. Itaque ipso suas copias in

Pannoniam abducente aduersus Turcicos exercitus, recessit ab illo Albertus Marchio Brandeburgensis, & per vastitatem eorum locorum, qua iter erat, transiit in castra Gallica, quæ aduersus Imperatorem Carolum oppugnationem Metensem in manibus habentem mouebantur.

XCIV. Annus agebatur tunc Iesu Christi M. D. LII. Cuius primo die Calend. Ianuarii mortuus est Lipsiæ Bernhardus Zieglerus, de quo supra quoque mentionem fecimus, Theologus ex nobilitate Misnica ingenio doctrinaque excellens, Hebraicarum, que literarum scientia ea instructus, ut in istius linguæ cognitione facile cuncti in his regionibus primas ei concederent. Quamquam autem vitam tempestiua hilaritate, conditam, more gentis nostræ cum lætitia colere non dubitabat, erat in eo tamen quum in vultu tristis quædam seueritas, tum in verbis libertas, tum etiam vocis asperitas, ut durus & acerbus aliquibus videretur. Ficta, simulata, commenticia, ostentationem vanitatemque omnem mirifice oderat, & leuitatem atque mobilitatem vehementer auersabatur. Idem supra modum officij memor, inque eo exequendo diligens. Usque adeo autem cupidus benefaciendi aliis & sublevandi egestatem tenuium, ut & suas nequaquam

quam copiosas facultates in aliorum commoda impenderet, neque puderet eum vndique, quod pauperibus tribueretur, corrogare etiam mendicando. A Philippo hic Melanchthone non raro impetrabat, ut operas ille doctrinæ suæ instrueret, & eam ob rem nonnunquam se Wittenbergam conferebat. Neque non facere interdum, ut fores conclavis obsideret, in quo sedentem aliquid eum conscribere sciebat, quod sibi tradere-
tur, neque admittere aduentantum quenquam, ne instituta opera interpellando impedirentur. Obstabat autem effectiōibus doctrinæ, quod nullum manuum usum haberet, quarum dextram casu de ædificio extrui cœpto in terram puer adhuc delatus fregerat, & gestabat de curatione mala enervatam atque inutilem. Itaque cogitandi quoque incitatio minus erat ad elaborandum opus aliquod doctrinæ acris atque vehemens, & mentis vis quasi languescebat. Sæpe postea & iucundam consuetudinem ipsius Philippus Melanchthon & accuratam considerationem atque solertiam in multis sacrae Scripturae locis interpretandis requisivit, & mortuum crebris gemitibus desiderare se testatus est. Sed de hoc & supra, quemadmodum diximus, est mentio facta, neque plura nunc commemoranda duximus.

mus. Pergat igitur instituta narratio, & ea quæ restant exequatur.

XCV. Huius anni bellieas clades in aliis locis, exceptit in Saxonis & Misnicis terris pestilentie malum, quo & Wittenbergenses & Lipsenses congregationes scholasticæ dissolutæ fuerunt, aliis alio se conferentibus, quamvis initio Dorgam Wittenbergenses complures, cumque eis Philippus Melanchthon, concessissent. Ego cum familia mea primum Neostadium ad Orilam me contuleram, ubi quum hiematurum me esse constituissem, res ita tulit, ut in patriam pergens proficiscerer. Interea improuisa ac potius incredibilis plerisque, tamen quidam præsensissent & prædixissent, reconciliatio inter Imperatorem Carolum & Marchionem Albertum accidit, cuius fuit quasi foetus bellum Franconicum. Nam quum superiore anno Marchio Albertus ciuitate Norimbergensi grauiter afflictæ, & ipsa vrbe oppugnata, Præsules duos vicinos in suas condiciones perdixisset, rationibus non admodum æquis, quod Pabepergensibus agri sui eriperentur, a Wurceburgensi ingens pecuniæ summa extorqueretur, quumque Imperator edicto suo omnia ea esse irrita iussisset tanquam cum hoste Imperii contracta negotia; rursus ferebantur eadem illa pacta conuenta autoritate eius.

eiusdem Imperatoris confirmata, & soluta obsidione Metensi, Marchio Albertus parare se ad occupandum denuo recuperata ab Episcopo Pabepergenſi, & auferendam a Wurceburgenſi ſummam pecuniæ quam poſtularat, & præ ſe ferre ſuum ſe ius armis perſecuturum eſſe; quibus quum inſtructior eſſet, nimirum cauſa quoque ſe potiorẽ fore exiſtimabat. Vnde ſequens annus M. D. LIII. bellum attulit ſæuum atque crudele. Quo & patria mea Pabeperga in poteſtatem Marchionis Alberti tradita & atrociter vexata fuit, arcis caſtello vicino Aldeburgo dedito, & ipſo ſtatim & a Marchione inflammato, inexpugnabili aliquando credito, & capto olim tandem, quum Dominus eius, qui & ipſe nomen habuit Alberti, a Præſule Moguntino prodiſus fuiſſet fraudulente, & traditus in poteſtatem Ludouici Imperatoris III. Sed iſtis nunc & his ſimilibus narrationibus inſtituta expoſitio non eſt interrumpenda. Et alios tunc amicos, & inter hos me, non parvas curas attuliſſe Philippo Melanchthoni cognitum eſt. Quum ad metum periculaque peſtilentiæ bellorum quoque calamitas adiungeretur. Ipſe quidem ad mentionem huius morborum tunc paſſim vagantis dicere fere ſolebat: ſe non eam peſtem pertimeſcere, ſed alias, quæ & infeſtæ eſſent Reipublicæ,

blicæ & perniciem interitumque communem minari viderentur. Significabat autem quum dictorum tum factorum audaciam impudentem, quam augeri & conualescere ubique in maxima omnium rerum licentia cerneret, atque simul alienationes Principum potentumque & occulta odia, & facinorum nefariorum defensionem approbationemque, & erga hos aut illos studia commota, non rei negotiorumque æstimatione, sed inclinatione & proclivitate voluntatum ad personas. In quibus quamvis toleranda aliqua aut negligenda viderentur, exempli tamen & imitationis periculum magnopere esset pertimescendum.

XCVI. Commissis autem duobus acerrimis bellatoribus, Duce Saxone Mauricio & Alberto Marchione Brandenburgensi, & Maurieio victore, dum ipse ingentis animi nimia alacritate inuehitur in hostes, fortuito ictu machinæ vulnerato, & post dies tres in castris mortuo, procul eiam tunc absente fratre Augusto in Dania apud Regem socerum, rursus suspensi omnes expectatione futurorum & anxii fuere. Atque est intellectum, verissimum esse quod veterum quidam scripsit: Qui in exercitu dux sit, eius consilia animique contentionem longe potius esse viribus effectiionibusque corporis:
neque

neque tantum boni ab vilo copiarum ductore fortissime dimicando & profligando hostes manu propria conciliari, quantum damni malique detur morte ipsius. Sed ad hunc casum magnitudine animi, & generosi impetus vehementia, & non viuendi sed vincendi cupiditate ardentis Principis Mauricii, fata scilicet abusa sunt. Atque erat in Duce Mauricio animosa virtus inprimis, neque ille viro hoste moueri periculo, quod metum incuteret aut haberet cautionem, sed cogitatione cupiditateque inuehendi & gerendi rem quasi calcaribus instigari, vt tanquam generosus catulus temere etiam aliquando excurreret, & peteret aduersarios quum ferocius tum inconsideratius. Et ideo in Pannonia quodam tempore in maximum capitis discrimen venit. Et militans quondam in Imperatoris Caroli castris bello Gallico, quum vrbs quædam oppugnante Carolo strenue tormentis globos illos ferreos eiicientibus defenderetur, neque D. Mauricius tamen prouheretur circumspectius aut timidius, conspectus est Imperator Carolus accedens & eum seducens, quod diceret: non scire omnes, quo pacto inter volitantes illos globos decurrendum versandumque sit. Ego ante duos fere menses quam prælium istud committeretur, Lipsiam redieram, quum
Aegram

Aegram transiissem, vbi tunc legati Cæsaris Ferdinandi, & multorum Principum, nonnullarumque Ciuitatum, consultabant de motibus bellorum, quibus tota fere Germania flagrabat. Non abstinebant autem vrbanī in illis tantis ærumnis ioco, quum dicerent: non boni ominis locum ad deliberationes eas fuisse delectum. Sane ita ægre res processit, vt inter non diuturnas tractationes euanescerent omnia. Quum Marchio Albertus inter ea in Franconia suo se ludo oblectaret, & excitaret maiora indies bellorum incendia, quæ tandem in Saxonicas regiones peruaserunt, cum eo inprimis exitioso euentu, quo D. Mauricius excessit e vita, & quo multis præstantissimis viris interfectis, ita Marchionis Alberti fractæ vires fuerunt, vt nunquam postea quantumuis subleuatus erigere sese & denuo confirmare potuerit.

XCVII. Hoc anno perquam carus Philippo Melanchthoni mathematicus doctissimus Erasmus Reinoldus est mortuus. Et in Britannia decessit Rex Eduardus adolescentulus optimæ & præclarissimæ; vt ferebatur, indolis atque spei. Deque eius interitu varii & quorundam non admodum clementes sermones auditi. Dessauia autem migravit ex hac vita terrena illustrissimus Princeps Anhaltinus Georgius, quum ego mense Iulio
in

in Franconiam me recepissem. Principis istius monumentum versibus ornauit Philippus Melanchthon, quem viuus ille & suorum consiliorum autorem & actionum adiutorem fidelissimum atque diligentissimum habuerat. Fuit autem Georgius Princeps is, in quo excelsitas generis atque conditionis cum singulari humanitate coniungeretur; quumque sapientia atque doctrina excelleret, tanta tamen erat in eo modestia, ut paruas etiam res non facile exequeretur; vllas, nisi prius diligenter deliberatas, & ad aliquos, de quorum sapientia atque fide bene existimabat, relatas. Quem talem Principem, qui Saxonicarum rerum statum temporis illius nouit, cogetur fateri, propitii Dei clementissimo concessu atque munere histegionibus impertitum fuisse, cuius diligentia, virtute, pietate, fide, sanctitate niteretur salus ipsatum. Sed de huius Principis illustrissima excelsitate, deque maximis in Rempublicam & inprimis ecclesiasticum statum atque ordinem meritis atque beneficiis, quasi praterendo verba supra quoque fecimus, quum accuratiorem copiosioreque expositionem illa desiderent, deque eo & nostræ & aliorum extent narrationes pleniores atque copiosiores. Mortuus est cum omnium ingente mœrore XV. Calend. No-

vembris. Et dolores Philippi Melanchthonis, quos isto casu acerbissimo acceperat, mox cumulati fuere allato nuncio mortis Iacobi Sturmii Argentoratensis. Cum hoc viro ex nobilitate ciuitatis illius, principe Senatus, & præstante sapientia, virtute, doctrina, experientia & vsu rerum, facultate quoque disertis sermonis ac copiosi præclara prædico, singularis necessitudo intercesserat multis annis Philippo Melanchthoni, & plerisque in consultationibus de negotiis Religionis rationes sententiasque suas illi contulerant. Antecedebat autem Sturmius Melanchthonem ætate, ferme annis septem: qui solebat admirari in hoc summam prudentiæ considerationem, cum admirabili robore excelsi animi coniunctam, quæ diuersis temporibus laus in ipso eminens, vel nullo vel raro certe exemplo, conspecta est. Mutatæ etiam res in Britannia & significatione molestiam exhibebant, & curas afferebant cogitatione Philippo. Nam consobrina Imperatoris Caroli Maria (quam solam inter abortiones crebras viuam pepererat Catharina mater dimissa ab Henrico Rege, quum mox aliam post aliam ille duxisset) Regina facta, quæ deinde nupsit Philippo Caroli Imperatoris F. Hispaniarum Regi, Ecclesiarum statum, quem frater con-

sanguis

sanguineus ipsius paullo ante confirmatum, reliquerat, prorsus conuertit, non etiam nullis antiquatis a patre Henrico sancitis. In quibus præcipua fuit subtracta obedientia Pontifici Romano, & vendicata Regi. Quæ omnia tum rescissa, & sub potestatem ditiorumque Pontificiam denuo subiectum regnum illud fuit, & horribili sæuitia crudelitatemque vexati sunt aduersarii & dissentientes, exiliisque & direptionibus bonorum afflicti, & igne ac ferro necati: neque pepercit tum vlli sexui, ætati, generi, conditioni, immanitas arripientum pro seditiosis atque impiis, quacunque de re non assentientes rerum summa potentibus in cunctis, quæ eis forte placuissent.

XCVIII. Quum autem in Prussia res essent admodum perturbatæ, & contentiones indies crescerent, & dissidia augerentur, illique veluti igni materia ab externorum quoque peruerso studio præberetur, in restringendo eo incendio diligentia atque labor Philippi Melanchthonis parum proficere potuit. Atque corripuit ea flamma generum quoque ipsius Sabinum, qui impatiens quarundam, vt ipse putabat, iniuriarum, eo tempore ex Prussia discessit. Etsi autem erat ea hominis virtus & doctrina & experientia rerum, variæ denique & singulares ingenii

ingenii dotes, ut a compluribus expeteretur opera ipsius, inque his ab Augusto Principe, Electore Saxonum Duce; ad suæ tamen ille patriæ Dominum, clementissima benignitate accersentem & luculentam conditionem ferentem, sese contulit. Inter quæ & curarum nonnihil & plurimum negotii exhibitum fuit Philippo, non tam respectu suorum, quam solitudine de Sabino, quem diligebat & quam ornatissimum esse cupiebat, quamvis ab eo non leuiter, id quod supra perstrinxi, aliquando offensus. Atque Prusliaca negotia iam implicabant alios complures, apud quos eadem controversiæ idseptabantur non modo vehementer sed alicubi tumultuose etiam. Accusabanturque a nonnullis Theologi Wirtenbergenses, quasi neque satis attente & caute ad quædam interrogata initio respondissent, & plus concessissent auctori illarum turbarum, quam viderentur debuisse. Edebanturque scripta a diuersis eiusmodi, quæ non tam ad rem explicandum, de qua litigabatur, quam alienationes animorum maiores faciendum, momenti aliquid haberent. In Misnicis etiam regionibus de liberationes de Ecclesiis scholisque constituendis excercebant Philippum Melanchthonem, quem & consiliorum omnium illustrissima aula socium, & consiliorum administratorem volebat esse. Pro-

pone-

ponebantur autem capita de inspectione Ecclesiarum, de iudiciis ecclesiasticis ordinandis, & quibusdam ad rem scholasticam pertinentibus. In quibus si non omnibus vndique, aliquid tamen alicubi operæ nauatum, & nonnulla vtiliter conformata aut correctæ, quædam vtilibus institutis rationibusque sustentata esse constat. Placuit anno Christi Iesu M. D. LIIII. vt quidam, maxime propter Prussiacas rixas, conuenirent Naumburgi in Duringia. Eo accessit cum Philippo Melanchthone optimus vir & doctissimus Theologus Iohannes Forsterus, Hebraicarum literarum inprimis peritus, qui varia & durior aliquando fortuna conflictatus, tandem Wittenbergæ confederat, doctrina sua Academicam illam communitatem augens atque ornans. Vbi & mortem placide obiit anno Christi Iesu post millesimum quingentesimum quinquagesimo sexto. Accesserunt & alii, & ex Academia Lipsensi Alexander Alesius patria Scotus, valde carus Philippo Melanchthoni, rei theologicæ intelligentissimus, & artifex excellens congruentium disputationum, & vir dignitate atque doctrina exquisita præstans. Ex Hessiacis affuero quum alii tum Adamus Craustus, de quo alibi mentio a me facta est, magis vt a me fieri potuit honorifica, quam pietas,

sapientia, virtus ipsius mereretur. Argentorato autem Iohannes Sleidanus aduenerat, autor libri historiarum paullo post editi, & ab alijs in aliam partem accepti, quod ipsum postea cura sollicitudineque varia affecisse, compertum est. Wirtenbergenses, qui in viam se dedissent, & non abessent longissime, (Gotham enim, quod oppidum Düringia est, venisse eos nunciabatur) nescio quam ob rem aut famam, non perrexerunt, neque in illo conuentu affuerunt. Perscripta sunt quædam tunc de communi sententia omnium, breuiter illa quidem, sed id, de quo quærebatur, plane & luculente explicantia, & quæ non paucorum dubitationes sustulerunt. Atque ita fere annus iste abiit, inter disputationes de doctrina & bellorum causis, atque tractatæ conuentibus actis rationes fuere componendi res & sedandi commota. Sed frustra pleraque omnia suscepta atque tentata. Itaque solennis Imperii Romani conuentus indictus, & frequentes conuenire iussi sunt ordines Augustam Vindelicorum. Et in Germania turbulenti homines passim Ecclesiarum status turbare, & rueri Marchio Albertus, donec & ipse prorsus concidit, & causam dedit, ut in Franconia vrbs Imperii ad Mœnum vetus, quam occupatam præsidio copiarum suarum tenuerat, mise-

miserabiliter inflammaretur. Multa prodigia nunciata tunc fuere. Visum in Silesia ardere cœlum, alicubi conspecta species exercituum, quasi qui commissuri prœlium essent. Teterrium autem, quod multis in locis sanguine pluuisse constaret. In Franconia apparuisse narrabatur viri species cruorem effundentis in solem, & prope hunc conspectam esse aquilam conantem altius euolare, itemque virum adstantem equo. Non longe autem a Wittenberga sol cruentus dividi visus est, & partes dilabi, & exercitus confligentes, & quasi in excelsa monte cervus. Quibus animaduertebatur valde commoveri Philippum Melanchthonem, sed ex omnibus vno maxime, cuius simile neque audiisse se neque legisse aiebat; quum pro certo & explorato haberetur, in oppido Doringiæ, cui Nebræ nomen, sobolem muliebris sexus modo natam interiisse flamma necatam, quæ erupisset ex utero materno. Multa quoque templa de cœlo tacta passim esse affirmabatur.

XCIX. Non putavi omittendam mentionem externorum quoque hominum, cum quibus singularis usus aliquis & eximia familiaritas Philippo Melanchthoni intercessisset. Voco autem externos eos, qui Germaniam nostram patriam non habent.

Fuit igitur perquam curas illi gentis Pannonicæ adolescens nobili admodum genere natus e familia Iaxitia, quem mortuum Wittenbergæ ita luxit Philippus Melanchthon, vt quantopere eum dilexisset, & quam tristi desiderio afficeretur amisit, plane liquidoque perspiceretur. Multum etiam & perquam familiariter vsus est Sigemundo Geloo, qui postea in sua patria admodum honoratus præcipuis muneribus functus est. Ex Italia adueniens Lælius Mariani Socini celeberrimi Iurisconsulti F. se, & patriam, & florentem opibus & dignitate domum, & spem amplissimæ fortunæ, solius Philippi Melanchthonis videndi gratia reliquisse, præ se ferebat. Animaduertebatur hunc ardere studio cognoscendi iis de rebus, quæ tunc disceptabantur, certi firmique aliquid. Eumque nunciabatur postea adhuc iuuenem ingenio summo & doctrina præclara excellentem mortem obiisse in Heluetiis. Ex Hispania habuit Philippus Melanchthon secum virum gravem admodum constantemque, & fortem in iis asserendis defendendisque, quæ vera atque recta esse discendo comperisset. Eum nominabant Franciscum Dryandrum. Sed familiæ, vt ferebant, apud suos inprimis nobilis appellatio alia erat voce gentili, quam Græcum illud nomen quodammodo interpretaretur.

De

De Anglis supra aliquid dictum est. Gallicæ autem nationis Hubertus Languetus Heduus (Burgundi nunc nominantur) multis annis vixit versatusque est apud Philippum Melanchthonem, quum Wittenbergam venisset anno Christi M. D. XLIX. Neque ab ipso discessit, nisi interdum per interualla quædam peregrinationum, quibus mirifice delectabatur, donec Philippi Melanchthonis vita in terris durauit. Vt horum consuetudo annum attingat duodecimum. Erat autem Philippo grata atque iucunda multarum magnarumque rerum, quas ille tenebat, commemoratio, & oratio de Regibus Principibusque gubernationum, & aliis sapientia, virtute, doctrina præstantibus viris horum temporum. Neque ego audiui vllum alterum, qui tam prudenter, & certo, & plane, dilucide, diserte exponeret, quicquid narrare instituisset. Non ille in hominum nominibus falli, non indiciis temporum errare, non confundere rerum negotioque seriem. Erat autem in eo singularis sagacitas in notandis naturis hominum, & coniiciendo, quo quisque suo apte ingenio deferretur, & quæ esset voluntatis inclinatio. Consiliorum etiam solertissimus æstimator, & eventuum futurorum prouisione admirabilis. Hunc lectio libri cuiusdam in Italia, vbi

tunc ipse degeret, a Philippo Melanchthone compositi, cupiditate incenderat videndi autorem illius, & ea stimulos perpetuo admo-
uens perpulerat tandem, vt in Germaniam veniret & Wittenbergam se conferret. Vbi more consuetudineque sua accepit cum Philippus Melanchthon humanissime, & perspecta virtute integritateque eius, secum esse libenter passus quoad vixit; & obseruantiam fidemque ipsius est expertus, summam benevolentiam erga illum perpetuo retinens. Suntque sæpe auditi sermones Philippi Melanchthonis, prædicantes accurate Huberti probitatem, & studium veritatis, & prudentiam, & explicatam cognitionem atque scientiam earum rerum, quarum periti & sibi laudem & aliis vtilitatem acquirere conciliareque consueuerunt. Hubertus vero eam grati animi significationem honoremque Philippo viuo, & mortuo meritorum recordationem pietatemque, præstari semper studuit, vt perspicue declararetur animi ipsius singularis erga illum affectio, quem omnibus officiis præsentem coluisset, & cuius erepti nomen honore venerationeque perpetua, & memoriam desiderio ac lacrimis prosequeretur. Sed hætenus in isto indicio consuetudinis cum externis hominibus Philippi Melanchthonis moratam esse narrationem.

nostram habeatur satis, quum alios innumera-
biles vndique locorum ac gentium ad
ipsum videndum, compellandum, audien-
dum, aduenisse non sit obscurum neque igno-
retur. Adiungantur ergo iam expositis re-
liqua.

C. Hoc Christi anno M. D. LIIII.
illustrissimo atque laudatissimo Principi Io-
hanni Friderico Saxoniae Duci, post obitum
illustrissimae coniugis rebus omnibus pacatis
placide mortuo, Philippus Melanchthon cum
bonis vniuersis memoria animi grati & veri
doloris luctu iusta fecit, cuius fortunam &
casum saepe deplorauerat, qui excessit e vita
V. Non. Martii. Huius Principis virtutem,
constantiam, animi excelsi magnitudinem,
& perferendis, quae necesse esset, patientiam,
fidemque ad Deum & homines, suspicientes
admirati fuerunt & praedicarunt hostes quo-
que. Quod si iste laudum tantus splendor
leui forte macula aliqua aspersus putetur,
ita scilicet intellectum est, hominem cum
fuisse, quorum haec est conditio, vt nemo o-
mnium penitus labis expers sit. Atque vt aliud
aliis vitii est, secundum Comicum, sic acci-
dit magnis & fortibus animis, vt interdum
altius extollantur quam aequum esse vide-
tur. Vnde fit, vt ea suscipiantur mouean-
turque, quae, nisi processus habeant fortu-
natos

natos & exitus felices, omnem omnium reprehensionem effugere nequeant. Quidam autem ita peruersi sunt, vt neminem satis laudatum putent, nisi sermonibus suis aliquem in cœlum ferant, &, quemadmodum veteres locuti fuerunt, cum Deorum immortalium laude coniungant. Neque vident hoc pacto non ornari sed deformari eum, quem celebrare instituerunt, quum de homine verba facientes non hominis effigiem exprimi studeant & perpoliri oratione sua. Sed & de his satis vel nimium potius.

CI. Anno Iesu Christi M.D.LV. Non. Febr. præsentæ Augustæ Vindelicorum Ferdinando Rege & Principibus non multis, proposita fuere capita deliberationum. Quumque in mentione de re ecclesiastica, quod Religionis negotium appellabatur, tres rationes indicarentur, quibus laboranti illi & dilapsæ consuli subueniri que posse existimaretur, fuit, vna ex his congressus doctorum hominum, qui rursus de Religionis negotio colloquerentur. Itaque & Philippus Melanchthon iussus fuit parare se, & expectare literas, quibus, quid agendum & iter illud quando ingrediendum esset, ei significaretur. Sed tum quidem molestia hac affectus non est, & reperta alia via ad incommoda ac mala

mala illa non tam sananda quam mitiganda, & procurandum ne latius saltem serperent. Hoc quale sit, coniecere licet ex præcepto & sententia Peligni Poëtæ de eo, quod ipse vocat inmedicabile vulnus. Permissa tamen tunc, non paucis admirantibus, concessaque fuit vsurpatio aliqua eius doctrinæ, cuius assensionem prius vltima supplicia & gravissimæ poenæ constitutæ fuissent, & adhuc alicubi essent. Sane quid suscipi tentarique forte potuisset, incertum est, & erat expectatio omnium fere sollicita atque anxia. Nam Romanus Pontifex Iulius III Augustam ablegarat Iohannem Hieronymi F. Moronum, Cardinalem, quem aiebant & prudentia & eloquentia esse instructum, & vias nosse quibus se in animos quorumcunque insinuans, illorum voluntates gratiamque sibi facile conciliaret, eosque perduceret in sententiam suam; & iis artibus præditum præ cæteris, istoque nomine in præcipua esse eum existimatione. Idem, quum Episcopus Mutinensis illo tempore nominaretur, legatus ad eum quoque conuentum, quem Ratisbonæ egit Carolus Imperator anno Christi M. D. XLI. antequam ad bellum proficeretur Africanum, existimatioque, de eius sapientia virtuteque & facundia imprimis perquam præclara fuit. Habuit hic patrem
supe-

superiore ætate sapientiæ laude celebrem, cuius consiliis gubernatam rem Mediolanensem esse ferunt. Deque eo quod accepimus, huic narrationi si inferuissem, neque prorsus hoc alienum visum iri, neque ingratum lectori futurum esse speravi. Quibus temporibus inter arma Cæsariana atque Gallica Franciscus Dux Mediolani tanquam in maris commoti sæuissimis undis iactabatur, aliquando postulatum ab ipso fuit, ut in castra vicina Cæsariana se conferret. De qua re quum accurate deliberaretur, non putarunt consiliarii faciendum esse, ut ipse Dux illo accederet, manifestum præsens periculum, quemadmodum coniiciebatur, aditurus. Atque principem consilii sui mitti illuc placuit Hieronymum Moronum. Credebatur hic de iis, quæ fieri aut non fieri deberent, admoneri voce quadam, quæ, nemine nisi ipso exaudiente, emitteretur ex annuli cuiusdam conuersa ad aurem pala. Consuevisse igitur ferebatur, quoties de euentu aliquo certior fieri cuperet, quasi de proposita re cogitaret, cubito nitentem manum & ita annuli palam auri admouere, ut de quibus quærebat aliquid cognosceret, quumque id ipsum tunc quoque fecisset, sermone Italico pronunciata audiisse hæc verba: Ibis redibis, non eris captiuus. Quæ quum ipsius intelligen-

gen-

gentia sic distinguerentur, ut significaretur id quod optabat, profectus fuit in castra, atque ibi captus & duriter crudeliterque tractatus, illorum verborum aliam sententiam fuisse, & se disiungenda copulasse, demum perspexit. Hunc Cardinalem in non paruum, discrimen paullo post venisse dicebatur, potente rerum Iulio IIII. Sed tunc ille, nuntiata morte Pontificis Romani Iulii III, cum festinatione summa Romam, relictis omnibus, recurrit. Atque eo tempore, quemadmodum narrari coeptum est, liberatus fuit Philippus Melanchthon sollicitudine & labore scriptorum disputationumque de Religionis negotio. Amisimus hoc anno nos ambo usum summi amici Danieli gente Stibari, ordine equitis Franci, dignitate Canonici in collegio primarii templi Wurceburgensis. Amicos enim non dubitabat ille nos appellare, & esse se amicum reipsa declarare non desistebat. Quum me quidem propter societatem honestorum studiorum, qua coniuncti a prima ætate fuissetus, fratris nomine dignaret. De huius viri virtutē, animo constante & magno, ingenua orationis libertate, beneficentia in suos, amore patriæ, liberalitate & humanitate erga omnes, tota denique vita, digna generis sui nobilitate, & alibi vera narrauimus, & nunc in his exponendis morari minus opportunum videri possit. Quare
prose.

prosequamur commemorando proposita, & id agamus, quod est in manibus.

CII. His igitur temporibus in Anglia ea patrabantur, quibus & Philippi Melancthonis & aliorum animos ingente dolore affici necesse erat. Crudelissime enim interficiebantur ferro ignique innocentissimi & sanctissimi viri, in quibus venerandus Senex Latimerus nominabatur, & Cantuariensis Episcopus Thomas Crammerus. Sed hic quod esset dignitate ac loco summo atque primario, supplicium aliquanto sumtum est de eo posterius. In Latimero, singulari olim Erasmi Roterodami amico, & religiosæ pietatis cœlestisque veritatis ardentissimum, studium, & idem exquisita cognitione optimarum literarum atque artium, & facultate eruditæ doctrinæ celebris fuit. Qui vbi cum socio criminis pulcherrimi atque gloriosissimi, quod Euangelium Iesu Christi Filii Dei profiterentur, Episcopo tunc Londinensi, ad rogam constitisset, productum eodem de carcere, ferebatur, etiam Crammerum fuisse, ut mortis atrocitate & horrore spectaculi illius deterritus sententiam mutaret. In qua quum nihilominus hic permaneret, atque supplice etiam gestu oraret, cum sanctissimis illis viris ut mortem sibi communiter afferri decerneretur; falsi auto-
res

res consilii huius sua opinione, istos quidem viuos comburendos, hunc autem in carcerem reducendum curarunt. Vbi primum, in squalore, & mox spe quadam bona & commodis quorundam sermonibus inductus, traditur aliquantulum vacillasse, & nomen suum subscripsisse, nescio quibus, aberrantibus a simplice veritate cœlestis doctrinæ, quam ipse esset professus: sed mox illustri confessione sententiam pristinam declarasse, & manum etiam detestatum, quæ se nefario operi ministram præbuisset, atque ita crematus fuisse. Similis sæuitiæ in alios complures tam in Anglia quam Gallia incitatum, odium rabiose est debacchatum illo tempore, tanta importunitate, vt prior calamitas iam fuisse tolerabilis videretur, quæ fuisset maxima atque acerbissima. Verum hæc nostra commemorazione enarranda hoc loco non sunt, & hætenus producta mentio sufficere poterit instituto nostro.

CIII. Indicatum autem supra est, quid turbarum fuerit commotum, importuna quadam nouitatis vsurpatione in doctrina ecclesiastica ab Andrea Osiandro. Huius mortui etiam factio non quiescebat, & vt verum fatear, exulcerari negotium videbatur importunitate quorundam, ambitiose magis quam necessario quasi ventilatum

diffidium illud, & non patientum flammæ contentionum extingui. Exarseruntque passim certamina de illis rebus plane gladiatoria. Quæ tanta extiterunt Norimbergæ, ut ferri in ciuitate pacata diutius non possent. Eo igitur ventum est, ut peteretur a Philippo Melanchthone iam non consilium, quod ante dederat, sed auxilium, quod perturbatæ Ecclesiæ ferret. Ita, impetrata hac venia ab illustrissimo Principe Electore Augusto, Norimbergam ille est profectus, adiuncto sibi hinc Alexandro Alesio, & tum forte hospite Iacobo Rungo Pomerano, quibus & ego me eo itinere comitem præbui. Atque fuit præsentibus Norimbergæ præcipuis in Ecclesia docentibus ea controuersia ita disputata & sedata, ut ab hac deinde quæta fuerit omnino ciuitas illa: complexusque est dogma scripto Philippus Melanchthon, breui illo quidem sed disertò & illustri, sine vllius reprehensione aut insectatione, veritatis simplice oratione exposita, qua assererentur probata, & refutarentur ea quæ damnabantur. Id quod optimi & sanctissimi veteres quoque fecisse animaduertuntur in Nicenæ Synodo, declarata sententia vera atque recta Ecclesiæ Catholicæ, & refutata contraria, inculcato nullius aduersantium nomine. Spes fuerat, aduenturum esse eodem Iohannem

nem Brentium, sed literis hic missis ostenditur accedere eo tempore non licuisset, & differuit quædam de rebus illis quæ tractabantur. Duo, qui quærere disceptareque amplius vellent, neque explicatione prolata contenti essent, tunc discesserunt dimissi benigne. Cæteri inter se concordantes tranquillitati in ista parte studiose operam dederunt.

CIV. Reuersum autem mox domum Philippum Melanchthonem exceperunt rursus aggressiones quorundam de disputationibus & turbis Flacianis. Sibi enim Flacius iam non modo vulgi studia, sed nonnullorum magnorum & principum virorum voluntates astute circumuentas adiunxerat. Ferebanturque leges Philippo, quibus inter ipsos gratia reconciliari videretur posse, & tantus furor erat hominis, ut lenissime dicam, improbi, ut accedere tandem propius non dubitaret, & euocare ad colloquium Philippum. Hic vero quum de ea re scribebat, respondens literis quorundam, grauiter & plane, tum illa talium congressuum postulata præcidebat. Et quia prohibere quasi illuuiem illam insaniam non poterat, intra suam stationem resistens, & faciens, ut prius, officium, neque ab hoc sinens abduci sese, iracundia, odio, cupiditate, spe, iniuriasque omnes perferens, & contem-

mnens incitationes stolidæ vehementiæ, ita permittebat Deo æterno cætera. At hi illo ipso irritabantur, & libellos scriptorum turbulentorum emittebant in vulgus, & arripiebant; ad lacerandum plurimos optimos & doctrina atque pietate præstantes viros, quibus maledicendo acerbitati indulgebant animorum suorum; & odiis conceptis obsequabantur. Vera falsa, certa dubia, consentanea dissentanea; propria aliena, conuenientia absurda, proferrentur in medium, non curabatur. Et satis erat; crimen aliquod illatum esse. Nam adhærescebat in hac parte, quam Philippus Melanchthon deferendam sibi non putarat, statim quicquid esset tanquam telum accusationis & culpæ coniectum. Vt autem magi ignotis & barbaris nominibus simplices infatuant; sic isti appellationibus mirificis & obscuris vulgi animos percellebant, & quasi inhians sibi circumducebant, Adiaphoristas, Synergistas, Maioristas, & nescio quæ alia vocabula nuncupando comminiscendoque offundentes. Fiebat autem, vt confusa negotia publica ac priuata; & ecclesiasticæ ciuilesque res, materiam darent insimulandi inuidiaque grauandi eos, a quibus aliquis alienior forte esset. Et Elaciana factio iactans ardorem quendam & flagrans studium rerum diuinarum, si qui illam

illam vehementiam improbarent, & moderationem lenitatemque, aliquam adhiberent, statim desertores & proditores causæ eos esse vociferari, & ingerere conuicia, & disputationum conflictus poscere, & veluti in arena exultare atque prouocare aduersarios ad luctandum. Quæ omnia ad vulgus & imperitos & rerum negotiorumque ignaros erant speciosa, & celebritatem nominis Flaciani augebant. Atque inueniebantur quidam, qui paria facerent, & veris contumeliis istos appeterent, neque sciente, & si rescuisset, perquam grauitè & moleste ferente Philippo Melanchthone. Sed ii tantum proficiebant, quantum ad restinguendam flammam infusum oleum. Ad vnum enim probrum in promptu statim erant quæ obiiicerentur decem. Diceret quispiam falsa de inanibus rumusculis collecta aut conficta ab ipsis spargi: aliquam illi fabulam contra narrare, & eludere crimen, & scurrarum more impudenter inde noui vitii infamiam detexere. Quæ autem dicebantur ac docebantur vere & vtiliter, ea peruertendo & cauillando detorquere, & conquirere atque venari vndique omnia, quibus de quietis & pacis cupidorum & paullo modestiorum existimatione aliquid detraheretur, & his inurerentur maculæ. Vetera ac noua, dictaque & facta,

atque syllabæ pene, calumniarum malitia ad ignominiam arripiebantur eorum, a quibus ista caterua discesserat: quum docendo magistros, benefaciendo pene parentes haberent plerosque, & propter ætatem certe & dignitatem atque excellentiam plurimi ex his eos obseruare & colere deberent. Quemadmodum autem olim, quum histrionum ars cognita atque probata fuit, pluris fieri cœpisse actores fabularum quam scriptores traditur; sic accidit tunc prauitate hominum & vulgi leuitate, vt isti simul atque alii, eorum, quibus præceptoribus vsi fuerant, dicta ac scripta diuersis gestibus iisque partim inæptis partim turpibus agerent, & quum malitiose interdum corrumperent, ita applaudentes sibi inuenerent complures. Quia autem diserebantur res arduæ & magnæ, ideo ista cohors tumultuari, & vehementia declamitandi perturbare audientum animos, & assentari hominum cupiditatibus, & hoc pacto facile reperire assentientes seque eis adiungentes. Grata erat plurimis reprehensio atque notatio eorum, quibus licentia vitæ coerceretur, & maior prohiberetur dissolutio. Libenter igitur admittebatur, & fortes isti perhibebantur, tanquam libertatis defensores, erantque in pretio. Quid vero melius, rectius, salutaris omnium isti protulerunt, docuerunt,

runt, enarrarunt, quam ii quos tam hostiliter oppugnabant? Sed erant illa scilicet iam vsitata, ac nouitate delectabantur homines, quorum voluntati istud genus speciose inseruiit. Quemadmodum autem erga ciues plerumque propter vsam consuetudinis affectio est remissior, ita vulgus, quantumvis bona & vtilia, iam familiaria atque consueta, minus curare solet, & aucupatur externa ac noua. Atque isto quasi turbine, multa honesta consilia, non pauca præclaræ actiones peruersæ sunt, spes tranquillæ cuiusdam quasi serenitatis debilitata atque erepta, pietas & religio labefactata, quum interea fulcirentur superstitionum & errorum vitia. Quod nunc cœptum est ab iis quoque intelligi, qui istos aliquando vel foverunt vel non certe excluderunt. Quum enim ista factio audacissime, vel potius impudentissime, sine omni rerum, personarum, temporum, consideratione effutiret & dissiparet, quicquid non in mentem, quam haberet nullam, sed in buccam, vt dicitur, venisset; in hoc malo id inerat boni, quod fiebat, quemadmodum Tragicus Poëta ait improbis & vanis vsu venire, vt cogitationum voluntatumque

Certum atque verax indicium lingua faceret,

declarans illa ac profitens, nihil se esse petulantius neque magis leue atque futile, & proferens quum scelerate & nefarie conficta de optimis & innocentissimis ac publice privatimque bene meritis viris, & sese antesignanam ducemque præbens ad Reipublicæ reliquam quietem exturbandam, ad vastitatem inferendam Ecclesiis, ad laxandam multitudinis promiscuæ licentiam, ad totius denique adhuc consistentis honestate quadam nonnulloque pudore vitæ dissolutionem. Haud sane nescimus, huic importunitati prætendisse istos exempla sanctæ antiquitatis: quo quidem non minima ex parte eminebat vel furor vel certe stultitia ipsorum, qui nullis consiliis aut actionibus similibus & conferendis, tanquam latrones aut hostes, sub illorum exemplorum quasi tecta subirent, ubi lateret impietatis istius detestanda perniciēs. Etsi autem adhuc reperiuntur hic aut illic nonnulli, qui pertinaciter defendant quamvis perspicuam peruersitatem atque vesaniā: & fit tamen indies, etiam in satietate quadam, assensio infirmior, & aperiuntur plurium oculi, & contracta damna intelliguntur, & dissensiones inde tum manifestæ tum occultæ existunt. Est autem profecto non leuissima causa miseræ istius, seculi nostri effrenata exultatio, & infinita licentia, & sum-

summa dictorum factorumque impunitas, non modo declamitandi & concionandi pro eo, ut cuique libet & fert impetus animi commoti, sed proferendi quoque & edendi mandata literis ea, quæ unusquisque somniasset aut vigilans fingere comminisque potuisset. Sed inprimis liberæ & crebræ tunc erant disputationum dimicationes, & criminationes confutationesque mutux, & iurgiorum contumeliæ; quique alterum insectando vehementissime exagitaret, & in eum inueheretur acerrime, & pro suis quilibuscunque audacissime propugnaret, is fortissimus habebatur & laudabatur inprimis. Omnes itaque librorum officinas, accusationibus, defensionibus, purgationibus, insimulationibus, & pugnacibus sævisque scriptis refertas cerneres. Hoc loco mihi venit in mentem, quod legibus antiquis constitutum fuisse traditur, ut alterum in iudicio falso & temere accusantes eam poenam sustinerent, quam luere oportuisset reum si convinceretur. Erat enim æquum, valere idem in eos, qui contradicendo inscite & nugatorie & perperam refellere aliquem conarentur. Quia vero actio datur illa quidem in iudiciis iniuriarum: ficta autem atque falsa crimina alicui inter altercandum inferri, & obtrectando maculas aspergi, modo præten-

Z 5

datur

datur ardor asserendæ & defendendæ veritatis, non modo animaduersione caret, sed laudem etiam passim inuenit; ita scilicet fit, vt optimos & grauissimos viros leuissimi deterrimique insectentur & exagitent. Quanta autem nunc copia quoduis argumentum, sed præcipue aliquod sanctæ Religionis caput, explicantium & de hac dimicantium librorum euolat? In Aegypto olim, quemadmodum fertur, quod quisque in aliqua arte excogitasset, id in conuentu peritorum consideratum & diiudicatum sic demum, si approbatum esset, curabatur tanquam verum in columnis perscribendum, quæ in sacris quibusdam locis seruabantur. Tales conuentus nunc quoque agi erat optandum, & expediret, vt de iis scriptis, quæ proferenda aliquis in lucem & edenda existimasset, docti & sapientes consulerentur, deque eorum sententia vtilia ac bona publice reponerentur, mala atque perniciofa oblitterarentur deleando. In quo melius esset, ne nomen quidem scriptoris conseruari, id quod in Aegypto quondam factum fuisse accepimus. Hoc sane pacto obuiam iretur cupiditati immodice ambitiosorum, & gloriæ appetitio reprimeretur, & non complerentur animi hominum opinionum mirabilium absurdarumque varietatē. At nunc, quoni-

quoniam & scribendi facultas conceditur cunctis, & iudicandi potestas datur cuilibet; qui sunt audacissimi, ii vulgo in pretio honoreque habentur, & omnia ubique perniciosis & turbulentis contentionibus personant. Verum apponantur & ista ad miseriarum nostri temporis aceruum, & fatalium poenarum gravitatem.

CV. Inter hæc dissidia & istas secessiones, qui adhuc supererant, pauci illi sane ex vetere sodalitate & quasi grege eorum, qui initio ad veritatis cœlestis & optimarum disciplinarum doctrinam colendam sese coniunxerant, cum maximo dolore recordabantur præteritorum temporum, & tantam mutationem vitæ atque morum deplorabant. Meminerant, sua ætate inimicitias etiam inter aliquos manifestas non fuisse expertes humanitatis & moderationis, contentibus illis non hostiliter sed ciuilitè: in suscipiendis autem gerendisque rebus quibuscunque communicata consilia, & collatas sententias rationesque, magno studio & opinione mutuz beneuolentiæ singulari. Quæ tradere docendo aliis, quæ composita scribendo edere aliquis volebat, quæ negotia, conficere agendo, ea tunc non temere sed deliberata & recognita cum amicis ita aggre-

gredi, si videretur, & proferre, aut, si non videretur, relinquere & premere. Hancigitur suauitatem illi superioris temporis participes adhuc reliqui in tantam acerbicatem, & vitam, ex congregabili atque mansueta, tam feram ac soliuagam euasisse, dolebant, & miserabantur prolapsionem ætatis suæ, & nihil læti de futuris poterant ominari, accedente etiam senectutis diffidentia atque difficultate. Sed his temporibus, in quibus versatur ista pars narrationis nostræ, & dum ea, quæ exposuimus, ad hunc modum geruntur, multi interea ex Boiemia fuere edictorum sæuitia eiectioni, qui aliquid dicere aut facere, ausi fuissent prioribus & antiquis obseruationibus & ritibus contrarium. Exulabantque complures, coniuges præsertim sacerdotes, perquam miserabili specie. Et amisit Philippus Melanchthon amicum præcipuum Iustum Ionam. Hic celeberrimo Iurisconsulto Henningo Gœdæ, præposito rei ecclesiasticæ Wittenbergæ, successerat, & hoc anno Christi Iesu M. D. LV. migravit ex hac vita, vir dignitate excellens & præstans doctrina, quum Wittenbergam prorsus reliquisset, in superiorum annorum bellicis tumultibus, & mutatione gubernationis. Etsi illinc abesse cœperat, & conciones habere, antea quoque in Salinis Saxonice. Sed tunc his regionibus

bus excessit, & aliquantisper in aula Ducum Saxoniae D. Iohannis Friderici FF. commoratus, praefectus deinde Ecclesiae in oppido Eyssfeldo, ibi mortem obiit, habens annos LXIII.

CVI. Ad Danubium autem conuentus agebatur anno Iesu Christi M. D. LVI. Et de Religionis negotio iam conuenerat: ut delecti aliquot vtriusque partis congregarentur in Vangionibus Berbetomagi, deque controuersis ortis inter se placide colloquerentur. Nominabantur autem iam alteri non magis Protestantes, ut olim, sed addicti Confessioni Augustanae; alteri Catholicorum, & antiquae Religionis, nomen obtinebant. Accesserunt illuc quum alii tum Philippus Melanchthon: serius hic quidem, quod eo anno profectus in Cimbricam Chersonesum ad Regem Daniae, affinem suum, Dux Augustus, iussisset operiri illum mandata sua. Tandem vero aestate anni M. D. LVII. est tamen iter & ipse ingressus, deducente eum, qui ab Augusto Principe legabatur, generoso & nobili Comite Ludovico Neogardiensi. Ibidem affuerunt & a Saxoniae Ducibus D. Iohannis Friderici FF. missi Theologi, & earum rerum de quibus differendum esset periti, & spectati homines quum bonarum artium tum caeterarum doctrina-

ctinarum, & viri non vulgari autoritate præditi. Sed a Flaciana, quæ tunc apud illos Principes in existimatione præclara erat & regnabat, factione, eas leges habebant latas præscriptasque & constitutas condiciones, vt alienæ sententiæ actores non autores suæ advenirent. De quibus rebus hoc primum optatum, famam omnem perpetui silentii latebris occultari & æterna obliuione potuisse obrui. Sed quoniam illæ multorum sermonibus & quorundam scriptis quoque celebratæ sunt, pauca hoc loco a medici, ad instituti operis rationem & meam diligentiam fidemque pertinere duxi. Erant ad decretum colloquium, de controuersis in doctrina ecclesiastica capitibus, designati præfides, primum Spirensis Præsul, sed hic obire munus istud morbo impeditus non potuit. Suffectus igitur fuit in locum eius Iulius Præsul Naumburgensis. At Mersburgensis, princeps erat sui gregis. Hunc Sidonium nominabant, quod in eorum numero, qui Suffraganei vocantur, Moguntia aliquando titulum habuisset Episcopi Sidonis. Ita enim ludere in maximis rebus non est veritas, posteaquam os perfricuit & omnem pudorem abiecit, superstitio, vt præesse iubetur aliquis prouinciæ, quæ vel nulla extaret omnino, vel nullo pacto certe obtineri gerique

rique posset. Adolescens ipse humili loco natus ex vicinis Alpibus Tubingam studiorum causa venerat; ibi in contubernio pauperum (Martinianum vocant ab autore institutionis) educatus, dum bonarum artium Magister renunciaretur, literas deinde docere coepit, & Moguntiae ludum aperuit, & postea etiam ad ecclesiasticas conciones habendas animum appulit. Ad quas maxima frequentia quum concurreretur, ita est ei ista curatio lata, ut sententia atque voluntas arctius devinciretur, & ipse statum illum fulciret studiosius, & magis enixe sustentaret. Atque hinc est ad illud honorum fastigium euectus, rebus bello conturbatis, & discrepantibus iudiciis, diuersisque studiis collegii, producente eum Imperatoria Maiestate, cui ita commendatus fuerat, ut illius opera nihil non effici posse crederetur. Quae eadem, ferme eodem modo supra a me commemorata quum, his perscriptis, recordarer, non volui tamen delere, neque iterum hoc loco legi alienum duxi. Sane erat ingenium in homine acutum, industria haud vulgaris, facundia etiam & copia orationis egregia. Is igitur tunc quasi primum ordinem duxit eorum, cum quibus congregari deberent defensores eius doctrinae, quae nomine Confessionis Augustanae significabatur; eratque veluti

veluti caput horum Philippus Melanchthon. Cognitioni autem; præesse loco D. Augusti Principis Electoris legatus ipsius debebat, magnitudine animi, constantia, virtute, sapientia, humanitate etiam excellens, quod in adolescentia optimis literis præclare esset institutus, is quem supra nominauimus, Ludouicus Comes Neogardiensis. Habuerat hic aliquando præceptorem Fridericum Staphylum: quem iamdudum vel ambitionis impetus, vel nescio quæ cupiditatum quasi procella ablatum inter aduersarios constituerat, cuius ante quoque facta mentio est, hominis, vt nihil dicam amplius, despicati & leuis, quum non esset ab eruditionis doctrina profusus imparatus. Omnino ex ipsis iam illis, qui antiquæ religionis patroni perhibebantur, non plane dementes, fateri cogebantur, suas partes & doctrinæ & rituum & vitæ vitis aliquibus laborare, & non immerito notatos esse errores quosdam. Atque hi initio statim petierunt, vt disputationes non colloquendo sed scribendo haberentur. Id quod facile impetrarunt, quod non minus scribendo quam loquendo se valere confiderent defensores Confessionis Augustanæ. Qui quum præclare starent, inter ipsos optatissimum aduersariis dissidium exitit. Nam ab iis, qui accesserant cum Flaciano consulto,
de

de illius sententia ante omnia postulare: ut damnati pronunciarentur quidam, qui illis, quorum paullo ante meminimus, nominibus mirificis & fictis infamabantur. Nisi enim hoc fieret, non fore inter ipsos firmam consensionem. Nihil fere erat inter hos, atque ceteros istarum partium, controuersiae aut litis de dogmate. Petebatur itaque ab ipsis amanter, ne sine causa autores esse vellent perniciosi dissidii. Quin etiam damnationes promittebantur, sed suo loco & rebus explicatis. Dicebatur, ideo esse conuentum, ut causa non controuersa ageretur, eam par esse ut ipsi concorditer tueantur. Alia quoque commemorabantur, quibus posse eos a proposito illo abduci spes esset. Sed nihil horum ipsi admittere, & urgere postulas damnationes secundum praescriptam formulam. Ibi tandem eis dictum fuit, licere initio, & esse melius, discedere, quam impedire actiones bonas & salutes. Tum demum illi & assensi sunt, & promissere sese vno ore & animo defensuros doctrinam Confessionis Augustanae. Sane Philippus Melanchthon cupidus congressus, qui quod nihil impedimenti aut morae inferri vellet susceptis actionibus, non repugnauerat contra postulata damnationum, atque has adeo coeperat agitare. Sed sociis atque collegis ma-

Aa

gnope-

gnopere reclamantibus, ab hoc consilio destitit. Iam vero procedentibus disputationibus, quum res ageretur scriptis mutuis, rursum nescio qua noua causa aut cogitatione impellente, requiri flagitarique damnationes, vociferationesque existere, & perhiberi, illis neglectis non posse coniunctionem esse stabilem atque certam, idque apud omnes, etiam aduersarios, testantum clamores audiri, & ita turbari inchoatae disputationes. De quo alii tum aliter. Atque ita mirabiliter omnia miscebantur, ut nulli non suspicioni locus esset. Plerique tamen ad impotentiam animi & vetera partium odia illum discessum referebant, quem placuerat testatum esse forensi etiam quadam cautione. Erat autem additus Theologis istis quidam ex scriba Ludimagister, ex Ludimagistro factus Iurisconsultus, tanquam vel custos vel emissarius; quem animaduersum est, & loquendo & scribendo quasi flabello seditionis Flacianas conspirationes ventilare atque insuper conflare, & furiae instar volitantem vbique odia atque discordias excitare:

cui tristia bella

*Iraque insidiaeque & crimina noxia cordi,
Mille nocendi artes: secundum Poëtam. Atque
rumusculi de tota re sparsi fuerunt varii,
non*

non etiam nulli inanes & falsi. Verum hoc quum aliis dissidentibus delectationi fuit, & doctrinæ, quæ Euangelica perhiberetur, obtrectauit, quod ista daretur occasio tam execrationibus, quam ridiculis quibusdam dictis; tum accidit contrariarum tunc partium defensoribus peropportuno, qui iamdudum animaduernerent, certamen illud iniquius esse comparatum. Nam se neque doctrina neque usu exercitationeque iis, quibus opponerentur, pares esse sentiebant. Bonis autem pietatisque religiosæ ex animo studiosis illa tam intempestiua defectio ingentem attulit dolorem, quod pene parta victoria pro veritate se pugnare affirmantibus e manibus eripi videretur. Sed vrgebatur sic quoque progressio inceptæ disputationis, ab iis qui remanserant. At præses Iulius, vir prudens atque doctus, quod pro altero præsideret, ostendit, necesse se habere, rem perscribere Regiæ Maiestati.

CVII. Dum mittuntur autem literæ, & responsum expectatur, omnia fuere interrim quietata, & profundum Berbetomagi otium. Inque hac actionum dilatione. accersitus Philippus Melanchthon ab illustrissimo Principe Palatino Principe Electore Othone Henrico Eytelbergam, vt de Academiæ con-

stitutione eo præsente deliberaretur, est profectus. Erat ibi Iacobus Micyllus, cultor & antistes, ut ait Poëta, rectorum & liberalium studiorum. Quo adiuncto, itemque aliis quoque doctrina & prudentia singulari præditis viris, administratio tota illa ordinata, rationeque conueniente ac laudabili, Philippi Melanchthonis consilio & autoritate, constituta est. Neque post hæc Micyllus integrum annum deinde vixit; qui natus Argentorati quum ingenio & bono & acri esset, Musis, id est, optimis disciplinis atque artibus se totum addixit, & quum veterum scripta explicando, tum componendo noua, & nauauit operam inprimis & nomen celebre est consecutus. Commilitonem primum hunc habui Erphordiæ in Duringia, vbi de quadam actione scenica dialogi Lucianici, in quo personæ vnius hoc nomen esset, ita appellari est cœptus, neque nomen postea ei mutare visum. Maximum damnum literæ & erudita doctrina huius viri morte fecit. Et Philippus Melanchthon nosque cæteri, quibus notus ille fuerat, quique tum apud ipsum accepti amantissime & supra modum hilare cum maxima iucunditate fueramus, summo dolore sumus affecti. Nam ego quoque illuc veneram, exoratus ab amicis communibus, ut relictis rebus, quas tunc plane neces-

sarias

farias in manibus habebam, & posthabitis negotiis, quæ sane erant eiusmodi, ut celeriter expediri mea referret plurimum, ad Philippum Melanchthonem me quamprimum conferrem, ut nuncio accepto domestici luctus, ex mea præsentia, cuius consuetudinem & usum ei iucundissimum esse scirent, aliquid illi contingeret allevationis. Nam quum discedens filium unicum, Philippi ipsum quoque nomen habentem, reliquisset periculose ægotantem, convaluit hic quidem paullo post, sed uxorem Philippi Melanchthonis mox sustulit improuisa tunc quidem mors, inter sæuos cruciatus commotarum in toto corpore fluxionum mirificarum. Laboraverat autem & illa graviter eo quo vir ipsius morbo, cuius nomen Græcum diximus esse *λιθίασιν*, Latini, quoniam tunc concreescunt in corpore quasi calculi, ita etiam illum morbum appellarunt. Sed concurrerunt tunc aliæ etiam difficultates, fortasse minus animaduersæ. Atque obiit illa quidem diem supremum suum non aliena ætate, quod annum sexagesimum omnino tunc habuerit, verum quæ & potuisset tamen per illam, si ita Deo æterno videretur, vivere diutius, & fuisset hoc marito opportunum atque utile. Quum autem Eytelbergam ad ipsum venissem, reperi ibidem & fratrem eius Ge-

orgium. Gener vero Caspar Peucerus secutus illum fuerat domo abeuntem, neque ab ipsius latere uspiam discedebat. Meo adventu mirifice eum gaudere est intellectum. Nam ita acquieuit in complexu colloquioque meo, ut nulla de re publica aut priuata quicquam percontaretur, sed tempus omne consumeret consuetis nobis sermonibus. Indicium igitur casus domestici placuit paullisper differre. Sed veriti ne ex aliis ille hunc cognosceret, & succenseret nobis qui celassemus, ita postero die, quid euenisset, ei ostendimus. Non dedit significationem ullam vehementis perturbationis, quum ingente dolore affici ipsum nemo dubitaret. Atque nominatim vxori mortuæ valedicens, hoc modo addidit, sese eam breui secuturum esse. Et mecum seducto ad cameras vitium, nam in Principis hortos tunc forte concesseramus, multa locutus est grauitè & pietatis atque prudentiæ plena consideratione, de Republica & asperitatibus ac confusione rerum pene vbique omnium, & deplorauit de iis, quæ fierent, verissimas querelas, & multorum tristissimorum euentuum causas commemorando, quæ etiam deinceps consecuta sunt, nimis vere nonnulla prædixit. Atque doloribus ob Rempublicam omnino opprimi, inque eo minus sentiri ipsius proprium, quam-

quamuis recentem atque acerbum, apparebat. Quibus tamen implicatis tristitiam augeri necesse fuit, qua corpore etiam languescente grauissime tunc laborauit suo illo malo morbi supra indicati, & maximis cruciatibus non sine periculo est affectus, calculis grandiusculis in vrinæ viis hærentibus diutius, quod fractis debilitatisque viribus minus strenue ea præsertim ætate eiicerentur. Sed ad Berbetomagenses actiones narratio reuocanda est.

CVIII. Regis Ferdinandi illuc responso tandem allato, quo iubebatur: ante omnia, si fieri posset, instaurari ita disputatio, vt tolleretur omne vndique impedimentum illius, vtque in eorum, si necesse esset, qui discessissent, locum surrogarentur alii, & ita negotium continuaretur. Id quod cum decreto Ratisbonensi congruere videbatur. Tunc igitur ii, qui antiquæ Religionis causam defendere se gloriabantur, sane perculsi, negare hoc sibi faciendum, neque aduersariis dissidentibus, disputationem producendam. Quid enim hoc profecturum? aut quæ ratio omnino incunda esse videatur? quum ignoretur ad quas sententias respicere debeant. Concordarent igitur prius aduersarii, vt sciri posset quid ab ipsis constanter retineretur & assereretur. Atque etiam hi

tunc de damnationibus quibusdam, imitantes eos qui discesserant, postulationes inculcarunt. Sed fuit diserte responsum : Totam rem decreto Ratibonæ facto, & regiis literis esse explicatam, & Augustanæ Confessionis defensores præsto esse, neque defugere aut recusare ullos legitimos congressus, & testari, si abrumperetur disputatio, sua id culpa nequaquam fieri. Nonnihil molestiæ solitudinisque tunc Præsidi oblatum, sed altera illa parte nullo modo prosequi volente institutas disputationes, ita tandem iste conuentus dissolutus fuit. Quique ibi remanserant ex defensoribus Augustanæ Confessionis, Præsidis quoque testimonio laudati sunt. Et ipsi inter se quum priore necessitudine confirmata, tum noua societate inita, domum suam quisque reuersi fuerunt. Fridericus deinde Staphylus, qui se in aulam Regis Ferdinandi insinuasset, & augeret numerum eorum qui refellere deberent defensores Confessionis Augustanæ, scriptum edidit, tam futile, vt contemni, tam vero improbum & malum, vt animaduersionem non effugere debuisse videatur. Cuiusmodi & alia illius fuere vniuersa, quæ, postquam prodita causa desciiuit ab amplectentibus doctrinam expositam capitibus Augustanæ Confessionis, diuulgauit. Atque mirabantur prudentiores, tantum licentiæ con-

concedi leuitatis furori, neque intelligi, quæ stabiliri isti vellent, ea vehementius eodem labefactare, præsertim quum similis vesaniæ & ab hac infeliciū euentuum exempla essent in medio. Quidam Auius etiam nescio quid tunc effutiuit scribendo. Philippus autem Melanchthon breuiter ille quidem & strictim ambobus, sed grauitè atque luculente, respondit. Atque hæc fere sunt tunc gesta, quibus Philippus Melanchthon & interfuit & præfuit.

CIX. Hoc eodem anno, post quasdam coram Principibus disputationes, cessit maleuolentiæ & odio Flacianæ factionis Iustus Menius, & Lipsiam se contulit, vbi humaniter & benigne acceptus diutius anno integro vno ecclesiasticas conciones habuit, cum audientum fructu & admiratione, mortuus placide III. Id. Sextil. anno Christi M. D. LVIII. Commendatus fuerat Senatui illius vrbs a Philippo Melanchthone, neque alibi defuturus ipsi locus fuisset, sed Lipsiæ contigit opportunus atque commodus. Varia atque multiplex fuit huius viri fortuna. Quicunque nostra ætate eruditionis & doctrinæ fama celebres fuere, cum iis vniuersis ipsi notitia necessitudoque & vsus intercessit, & hi illum carum habuerunt & magnificerunt. Multis annis fidelem & vtilem operam dedit

in regionibus Duringicis, & tandem ingra-
vescente ætate, insolentia & clamoribus acer-
bitatis turbulentæ exagitatus, quietiorem se-
dem quæsiuit, & inuenit reliquæ ætati suæ
non longæ, vt diximus. Mortuus fuerat
ante hunc Wittenbergæ Iohannes Bugenha-
gius Pomeranus, pastor Ecclesiæ illius, vir di-
gnitate præstans & in rebus maximis cum,
summa laude versatus, contentus quidem ea
conditione & illo loco in quo primum fuis-
set constitutus, quum ad amplissimos hono-
res potentiamque & opes eximias peruenien-
di præclaræ occasiones ipsi darentur: ad quas
non ille quidem contenderet, sed inuitare-
tur peneque attraheretur. Spectatissima hic
cum fide & assiduitate mirabili officio suo an-
nis triginta & quatuor functus est, & curatio-
ni latæ præfuit studiose ac solícite, & patiens
& nequaquam fugiens laborum. Excessit ex
hac vita annos natus septuaginta tres, quum
quidem aliquot annis fuisset perquam imbe-
cillis, superiore fere tempore integris & fir-
mis viribus vsus. Quamuis autem immatu-
ra ea mors videri non posset, neque ætati
ipsius aliena, neque decedenti grauis acci-
disset; diurnæ tamen vitæ, communiter in
rerum præcipuarum societate peractæ, me-
moria, & vsus illius desiderium, magno do-
lore affecit Philippum Melancthonem & a-
lios,

alios, moerentes ob veterem & singularem
amicum laborumque omnium & curarum,
participem amissum. Hic quum sensim viri-
bus tam animi quam corporis deficeretur, &
non morbi grauitate sed diuturnæ debilitatis
languore velut euanesceret, animaduverteba-
tur quasi simulacrum prioris viri, in omnibus
rebus agendis alacris & prompti, intuentem
Philippum non leuiter perturbari. Audi-
tæque sunt voces ipsius deprecantis, ne sibi
talis senectus contingeret. Id quod secun-
dum optatum ipsius accidit. Nam ne mor-
bus quidem, quo confectus obiit, vel impe-
diuit præclarissimas cogitationes pietatis &
sapientiæ ipsius, vel obstitit memorabilibus
& eruditis sermonibus, vel reprimere potuit
laborum, quibus consueuerat, defatigationes,
vt decesserit non admodum de statu vitæ tra-
ductæ recedens.

CX. His temporibus neque Res-
publica quieta fuit, & in Ecclesia varie tur-
batum. Atque rursus de conflanda Syno-
do verba fieri, & quibusdam tumultuanti-
bus sine fine, & modo hoc modo illud arri-
pientibus ad exagitandum, iamque inter se
iis, qui assertores defensoresque veræ & sanæ
atque salutaris doctrinæ videri volebant, fœde
dimicantibus, & contumeliosa Scripta edenti-
bus, multorum animi grauitè perturbari. Sed
hoc

hoc magna pars nihil curare. Quasi Religionis caput esset, acerbitas dissensionum ac contentionum. Etsi, ut ingenia atque naturæ & institutio, sic consilia voluntatesque & actiones dissimiles animaduvertebantur. Neque probabantur adeo omnibus omnia, quæ a suis quoque fiebant. Sed Berberomagi acta valde reprehendi a Flacianis: & dari opera ut iis, qui suarum partium essent, congregatis decreta de illis fierent. Alii quoque cupidi tranquillitatis atque concordie, iudicare conuentu actio partis vtriusque laborantibus rebus consuli posse. Sed prudentiores statuebant contrarium, de exemplis antiquis & recentibus. Itaque nonnihil quidem negotii factum laborisque & molestiæ inter tales consultationes exhibitum, fuit Philippo Melanchthoni. Sed ultra deliberationes & conatus atque studia tunc non est processum. Incidentibus præsertim & aliis grauioribus negotiis. Nam & Imperator Carolus omne gubernationis ius & Imperii maiestatem tradidit in manus Principum Septemuirum creandis Imperatoribus Romanis, & est idem paullo post mortuus in Hispania. Consilium hoc cepisse eum etiam ante annos triginta affirmabatur; sed tunc & exhaustis viribus & aduersis euentis fractus, desperatione quadam rerum omnium

um

um & amissione nonnullarum opportunitatum, id executus est, quod ratione quadam olim se facturum esse constituisset. Audiui, quum aliqui ab ea sententia abducere ipsum vellent, Carolum dixisse: Impendisse se quæ habuisset omnia, & quidem in fulciendum tuendumque maxime ecclesiasticum statum; pecuniam, quæ quidem reparari idque damnum sarciri forte posset; sed amissam quoque esse existimationem nominis, & valetudinem bonam, & studia hominum, quæ recuperaturus esset nunquam.

CXI. Annis duobus antecedentibus mortem Philippi Melanchthonis hospitem, hinc ad ipsum misimus senem Cappadocem Cæsariensem, qui habebat literas Patriarchæ Constantinopolis, Græce scriptas, quibus itineris ipsius causa indicabatur & commendabatur nomini Christiano. Pro filiis hic suis numerare certam summam pecuniæ debebat, qui interea in potestate Turcarum haberentur. Non deprehendebatur fraus vlla, eo magis animi omnium misericordia ipsius commouebantur, & renouabatur memoria Philippo Melanchthoni Basilii Episcopi, quem ciuem huius solebat appellare. Venit postea ad illum Demetrius quidam, gente Mysus, qui in Græcorum Ecclesia Constantinopoli Diaconus fuerat, sermonis Græcipe-

ci peritus: isque satis diu in his regionibus commoratus est. Et Sabini duas filias elocauit Philippus, & nobiscum luxit obitum. filix atque neptis meæ, & aliis domesticis incommodis communiter dolore est affectus. Sed neque curarum quies erat, quas afferebant & conuentus Ordinum Imperii qui Augustæ habebatur, & scripta quædam de ecclesiastica doctrina singularia atque mirifica, nec non edicta seueræ; & alii item casus, conatus, molitiones, quæ multiplices & mirabiles hæc tempora quasi inundarunt.

CXII. Anno Christi Iesu M. D. LX. mense Ianuario obiit mortem valde senex & iamdudum decrepitus Argentorati Nicolaus Gerbelius, vir optimus atque integerrimus, & humanitate, suauitate morum, doctrina omni genere solidæ laudis excellens. Hic Iurisconsultus diu dederat operam collegio in illa vrbe sacerdotum primario, & aliquando Viennæ Austriacæ cum Iohanne Cuspiniano, & illius ætatis optimarum disciplinarum atque artium fama celebribus, vixerat familiariter. De quo accidit quod nullo modo reticendum putauī. Quum enim is esset vir ille, quem diximus, & probitate innocentiaque ac studio religiosæ pietatis commendaretur inprimis, quæ erant laudes in ipso decoræ & illustres, & prædicabantur ab omnibus:

bus : quidam in libello Rhetoricorum præceptorum suo exponens exemplum actionis capitalis, hunc tanquam sacrilegii reum nominatim introduxit, & ab accusatore peragi fecit. Quod factum, ut autor affirmabat, inconsiderate & temere, (etsi non est illa in professore Rhetorices bella defensio) & optimus atque innocentissimus vir Gerbelius, & amici ipsius grauitè, quemadmodum par erat, & perquam inique tulerunt. Deque ea iniuria tam atroce querelas suas ad Philippum Melanchthonem detulerunt, cui illius libelli scriptor notus esset; & significarunt, se constituisse, quibus modis possent pro fama & dignitate nominis Gerbeliani propugnaturus, & eam contumeliam ab ipso propulsaturus vindicaturusque esse. Ea res quum & Philippo Melanchthoni & nobis omnibus magnum dolorem afferret, videreturque magnopere vel exempli causa animaduertenda, & esset tamen autor libri is, in cuius persona etiam aliorum respectus verteretur, Philippi autem Melanchthonis animus, ut semper, sic tunc quoque, ad pacem atque concordiam inclinaretur, ita ab hoc est negotium illud his fere conditionibus transactum: ut criminis infamia ante omnia remoueretur, & nomina temeraria, ut affirmabatur, incuria falso inculcata statim inducerentur, & ipse
autor

autor peculiari scripto fateretur iniuriam, eamque a læso deprecaretur. Est autem omnibus nobis facinus illud visum perquam indignum & malum, siue cogitatum seu perimprudentiam commissum. Quæ enim, si proposito & consilio factum esset, pœna auctori irrogari deberet, constabat. Quis autem, a tali culpa fraudem malam abesse, possit dicere? Sed in scribendi edendique scripta infinita licentia, & leuitate ambitionis, & famam doctrinæ affectantium insanis cupiditatibus, & hæc & huiusmodi alia praua atque peruersa accidere necesse est; quibus profecto plus damni datur moribus & vitæ, quam vllarum rerum demonstratione aut explicatione bonæ vtilitatis conferatur. Atque tum & maiora quoque & cætera omnia fere sic gerebantur, vt & in præsentia admodum turbulentæ res essent, & in posterum nihil spei bonæ sese ostenderet.

CXIII. Sed Philippus Melanchthon, abducente eum propitio Deo & eripiente, flammæ inuidiæ odii que maioris, & liberante grauioribus malis miseriisque, vel ærumnis potius, euentus istos vitauit, & ex periculis laboribusque & angoribus, denique tristitia aduersisque omnibus, euasit ea morte, quam illum obiisse iam diximus, & de qua extant narrationes copiosæ aliorum. Cuius diei
anni-

anniuerfariam memoriam celebrat nunc quoque perquam studioſe Academia Wittenbergiſis XIII. Calend. Maii. Quum vixiſſet annos LXIII, & totidem pene dies. Elatus eſt cum funere ſpecioſo totius ciuitatis frequentia, ordinis ſcholaeſtici inprimis, & proſequentibus exequias illius externis quoque, in quibus & ego fui. Monumentum poſitum eſt ad ſepulcrum in templo ad arcem, opere præclarum, cum verſibus epitaphiis & effigie ipſius. Feſtinaueram autem ego, vt viuentem adhuc reperirem; ſignificatum enim fuerat, rem eſſe in præſente discrimine, quum ante dies paucos ab eo diſceſiſſem, non mala in ſpe, illo ipſum morbo non interiturum. Nam & tunc quinta tentatio (λειτουργία Græcis ſunt & παροχύσμοι) ſperabatur vel nulla vel mitior acceſſura, & ipſe cupidum me remanendi diutius reuerti domum ad meos iuſſerat vultu hilari & lætis verbis; quod diceret, proximo mercatu, qui iam appropinquabat, ſe ad nos venturum. Addens quidem hoc: vel vna perpetuo futuros aliquando eſſe in æterna vita. Sed ſeptima incurſio morbi finem fecit vitæ in terris ipſius; idque ego in itinere cognoueram. Cætera ab aliis ſtudioſe commemorata a me omitti recte potuiſſe exiſtimaui. Febri illum diſcedentem a nobis Lipſiæ, tempore parum opportuno, hæſiſſe

laborare animaduersum est. Quæ neglecta ab ipso, etiam ingrauescens, in periculosum imprimis genus putabatur euasisse, quod Medici *ἡμικρανία* vocant. Sed, vt aiebam, hæc accurate & copiose enarrata ab aliis me repetere non est necesse, vel non etiam oportet.

CXIV. Vt luxerunt autem hunc mortuum boni vniuersi, sic nonnulli petulantes & improbi infectati fuerunt, controuersiaque ecclesiasticae coepere fieri atrociores. Renouantibus quibusdam quicquid possent contentionum acerbissimarum & plane capitalium; & commouentibus maxima & exitiosa mala, quædam non pessime etiam sita; denique molientibus omnibus viribus distractionem, qua, quod adhuc utcunque cohæretet & esset coniunctum, penitus discerptura dilaceraretur. Erupit autem tunc odium & inimica atque plane hostilis alienatio, eo diuerticulo quod iamdudum quæsiuerat, quum aggressiones apertæ minus fuissent efficaces, vel ita fuitiles & infirmæ, vt primo conatu statim languescerent & frangerentur. Arripueruntque nomini Philippi Melanchthonis infesti disputationes quasdam, quæ erant ad vulgus commouendum imprimis idoneæ, de sacratissima actione in Ecclesia, qua instituto Iesu Christi conuenitur ad communionem corporis & sanguinis ipsius, participantibus
iis,

iis, qui sine controuersia sunt in cœtu ecclesiastico, vt ritu religioso celebretur conuiuium dominicum, quemadmodum veterum quidam appellauit. Quæ res quum sit eximia, & inter illa quæ arcana habet & peculiaris congregatio Christianorum, casta etiam oratione de ea vtendum esse semper Philippus Melanchthon statuit, & non potuit dissimulare interdum dolorem, quem caperet ex quorundam temerariis & absurdis declamationibus; quum præsertim in certamen ventum esset, & acerrime pugnaretur tanquam prælio commisso, non de veritate doctrinæ, sed sua cuiusque opinione & verborum locutionisque præscripto vsu. Prodiert quoddam de ea quæstione scriptum Philippi Melanchthonis, quo consilio quauē occasione aut omnino causâ, non habeo dicere; sed prodierat, tale quidem, vt hoc, qui ex animo religiosæ pietatis studiosus & vir bonus esset, offenderetur nemo, diligenter etiam & attente considerantes multa vtiliter subiici admonerique animaduernerent: non ita tamen quasi limatum neque perpolitum, quemadmodum in isto genere sunt ea quæ edi divulgarique ipse voluit, & continens mentiones de quibusdam liberioribus. Quibus citatum istud genus hominum ferox atque intratum, excurret immoderate, & eo est pro-

veſtum, vt neque pietatis ad Deum, neque officii ad homines, neque exiſtimationis propriæ reſpectus ullus curæ eos attingeret. Equidem non dubito, quin apud aliquos ea vel ſuſpicionem vel crimen ſubitura ſint, quæ de his negotiis atque hominibus ad talem modum a me exponuntur, tam affectionis cuiusdam priuatæ atque ſingularis, quam iudicii & ſententiæ peculiaris ac fortasſe parum prudentis. Verum enimvero ob huius illiusue exiſtimationem de me & hac narratione ſermones, quum & initio & inter ſcribendum cogitarim atque præuiderim euentus fortunam, non putaui quicquam omnium omittendum, quæ & vera eſſe ſcirem, & prodita arbitrarer a bonis libenter lectum iri, & nonnihil quoque momenti allatura eſſe ad curam diligentiamque excitandam tractationis & conſiderationis earum rerum, quarum adhuc reliquas tanquam morbi afflictiones & tabem metuiffe ſemper magna animi perturbatione Philippum Melanchthonem ſcimus, & ſæpe audiuiſus dicentem : in hoc extremum periculum & ſummum diſcrimen cauſam eſſe venturam.

CXV. Quum autem iſtas res & hæc negotia poſt mortem Philippi Melanchthonis tres inprimis exagitare, & illis inſolentia verborum ciendis, quaſi camerinam, vt dicitur, com-

commouere cœperint, ad institutum fortasse argumentum de his & contra illorum impudentem peruersitatem aliquid a me differi, pertinere videatur. Sed mihi ne nomina quidem istorum exprimere scribendo libet, & supra prauitas malitiaque eorum est a me notata. Etsi autem dolendum est, occasionem eam tandem nactos esse, quam diu quæsiuerunt, improbos ac malos, ut, postquam e medio abiit Philippus Melanchthon, & in hunc cæterosque declamitare eis audacius liceat, & liberior sit potestas quasi curriculum furoris sui conficiendi; in dolore, tamen propter misérias nostras & augescentes dissipationes, erupisse tandem omnem acerbitatem odii & maleuolentiæ impetus, gaudio videtur esse dignum. Nam neque quid amplius isti tanquam de penu turbulentæ malitiæ proferant, restat, neque iam præterea habent quicquam, quod ad Philippi Melanchthonis auctoritatem diminuendam & nomen infamandum inculcari possit. Petebatur ante annos ille aliquot primum obscurius, mox deinde aperte accusationibus & reprehensionibus quorundam quieti & otio inimicorum. Assentari potentibus insimulabatur, & errores stabilire, & fulcire manifestæ impietatis ruinas. Quod rebus perturbatis non esset autor desertionis & fugæ,

quodque veluti de naufragio tabulas colligi studeret, & perferenda arbitraretur omnia, quæ bona conscientia & sine scelere tolerari possent, neque noua vulnera infligenda esse censeret rebus communibus. De his quas telas grauissimorum criminum, & quam sævas accusationes detexuerit ingrata quorundam improbitas, non est fere cuiquam ignotum. Quibus iam in vehementia & insolentia euanescere incipientibus, ecce altera ad vulgus, cuius fere arbitrium spectatur, plausibilior causa offertur, & huius actores iam exultant, & vrgent reum, mortuum illum quidem & fruente[m] requiete sempiterna, quemque tales clamores & insectationes non amplius attingunt. Quum conculcare tamen immanitas odii iacentem gestiat, & huius nomen cupidissime arripiat, ad ipsius quidem, vt putant, ignominiam inprimis, cui infensi sunt, & pro maximis beneficiis eam referunt gratiam, vt memoriam eius omnibus probris aspergere conentur: sed hoc tamen interea agitur, ne vsquam ad Reipublicæ salutem & dignitatem consentiatur, vtque noua quædam impedimenta obiciantur concordie speratæ. Veritatem autem peruestigari, & futes atque nugatorias fabulas & declamationes populares cohiberi, non esset vtile omnibus. Quod multi, qui in ista
confu-

confusione opinionum & licentia vitæ & hominum leuitate magni sunt ac conspiciuntur, rebus negotiisque explicatis & constitutis, contemnerentur & laterent. Quinetiam non paucis tunc pericula impenderent, & causa dicenda esset quum factorum tum dictorum. Turbulenta igitur esse tempora eis prodest, vt captantibus anguillas, secundum Græcum Comicum, aquam turbidam. Atque vnus ex ista cohorte, id quod antea quoque indignantes attigimus, procurrens non modo viuos, sed mortuum etiam Philippum Melanchthonem prouocat, & optat superesse eum in hac vita, vt suas vires congregiundo cum ipso ostendere possit. Nos vero multo magis & verius, adhuc viuere in terris, si ita Deo æterno videretur, velle-
mus Philippum Melanchthonem; non tam explorata spe, facile istam temerariam audaciam ab ipso refutatum iri, quam certa sententia, non solum multorum vociferationes reprimi, sed tranquillitatem & pacem Reipublicæ, & doctrinæ cœlestis puram integritatem, optimarumque disciplinarum & artium honesta studia, huius viri respectu, cura, diligentia, industria, pietate, fide, potuisse conseruari. In quibus quæ labes fieri cœptæ sint, nimis est euident, & quid calamitatis immineat, audacissima vel potius impuden-

tissima istorum scripta indicio esse possunt. Nam si hoc concedatur & liceat vesaniæ, in quosuis arbitrio suo inuehi, & quodcunque libuerit, ex ore inuerecundo, conceptum animo proteruo emittere, & chartis temere illitum ita in vulgus spargere, vt aniculæ etiam legere & cognoscere possint; neque doctrina veritatis cœlestis sincera retinebitur, & hic furor statum adhuc qualemcunque rerum & studiorum priorum fortunam conuellet, contemptumque pariet horum, & reddet inuisa plerisque tribuentibus hanc culpam hominum ipsi studiis. Ac ostentare sane videtur isti & prouocator ille glorissime eruditionis literatæ copiam. Quam cur aliquis eis inuideat causa non est. Inferant sane Græca aliquot verba, & excerpta de commentariolis & libellis Grammaticis quædam agglutinent, & affectent nitorem orationis. Nemo vt admirabitur, ita fortasse hoc reprehendet. Sed id pene est horribile, quod dialecticam subtilitatem & complexionum solertiam eam adhibent, qua, sua quidem opinione, vincunt atque prosternunt vniuersos. Eius tamen profecto facultatis nisi viam rationemque demonstrasset Philippus Melancthon quæ illa esset, genus omnino istud ignoraret. Etsi male didicerunt hi, si quid tamen didicerunt, & tanquam simii id, quod illum

illum facere viderunt, peruerse imitantes, doctis sunt ridiculi, quum grauiore admodum ipsis etiam irascantur, quos maximis in rebus non pudeat ineptire & prodere incitiam suam, vel ludere etiam scientes. Quod tamen haud scio an non faciant, quum tanto supercilio rationes futes atque dissentaneas colligant ac concludant. Quemadmodum autem simiarum, (nam huius animantis similitudo isti nationi inprimis conuenit) conantium gestus humanos exprimere, prauitas eminet, si vna cum hominibus illæ moueantur aut saltent: ita istorum futilitas fit manifestior, quando suas nugas doctrinæ applicant, & contra ea, quæ sunt ab aliis vtiliter & præclare scripta, suas ineptias proferunt. Atque videri possit alicui non aliena etiam his Platonica fabri calui & pusilli imago. Vt hic enim pecuniam nactus, iam lautus & ornatus filiam Domini ducit coniugio abhorrentem; sic ipsi temere irruentes in professionem omnium præstantissimam, populari applausu quasi ditati, & præceptoris sui rapientes eruditionis atque doctrinæ opinionem, infelice & præpostero vsu veluti progignunt commenta vanitatis atque dementiæ, ad fallendum & turbas dandum apta atque nata, & accommodata ad accelerandam ruinam Reipublicæ, quasi mœreant nimis tarde eam

concidere. Itaque omnem moram ægre ferunt. Nihil placet exquiri aut considerari. Sed tanquam equi habenis ruptis infano cursu efferuntur, quæ ipsi arripuerunt ea retinentes, & impetum temerarium facientes in omnes. Interea, quid cui congruat atque consonet, non curant. Tanta scilicet acrimonia tamque eccellente vi ingenii præditi, ut, quamvis cuncta misceant, confundant, inuoluant, perturbent, ipsi tamen placere, sibi & cæteros præ se contemnere valeant. Quod si aduersantes sibi nullo alio argumento refellere potestas detur, tum in promptu est aut interrogatio mirabilis & infesta, nullam attentionis & diligentia responsionem admittens, aut petulans irrisio, qua eludantur si qua contradicuntur, aut conuicium maledicum aduersarios proterens. Postremo, omnibus aliis artibus & viribus consumptis, ad zeli iactationem & ostentationem Fidei deferuntur. Non cogitantes, peruersum aliquem solere & improbum zelum expertem necessaria cognitionis, & omnem Fidei sanctæ doctrinam esse consentaneam oportere, ne analogia illius conturbetur. Hanc silentio prætereundam non putauimus vel malitiæ improbitatem, vel dementiam superbiæ, vel odii etiam cæcitatem. Quæ cuncta modo non magis insidiantur neque fraudem parant

parant nomini Philippi Melanchthonis, sed manifestam faciunt impressionem, & quasi machinis admotis illud oppugnant. Vt Homerica scilicet de eo fama ad posteritatem relinquatur Zoilorum & Daphidarum: qui non statuat pietate & doctrina præstantissimi viri, sed multo illustriora monumenta scriptorum ipsius, flagellis nefariorum conuiciorum verberasse perhibeantur.

CXVI. Si quid autem est profecto vnquam editum, neque argumento concinnum, neque verbis elegans, neque aptum, sententiis, neque oratione compositum, sed dissolutum, inane, vulgare, arreptum, vt dicitur, e triuiis, id prorsus est, quod rabies istorum effudit. Tollat enim aliquis importunitatem arrogantiae, leuitatem scurrilem insectationum, petulantiae exultationem; in summa, inducantur inepta, friuola, proterua, nugatoria, falsa, futilia, partium quoque iudicio indecora & mala; perparum relinquatur atque supererit in istis infelicibus chartis, vt admodum pauca aliena, & qui interdum, secundum Poëtam,

*Purpureus late qui splendeat vnus & al-
ter*

Assuitur pannus.

Cur

Cur vero, pugnaces isti inquirunt, non resistentur nostra? Cur nemo respondere nobis audet? Quia enim sunt illa talia qualia diximus, & qui sapiunt cum insanis insanire nolunt, neque existimant ea tractanda esse, quorum qualicunque contactu inquinari ipsos necesse esset: maluntque expectare tempus, quo illa, quasi araneolarum telæ, sua sponte evanescant, quam committere, ut sua veluti propagatione diutius durare possint. Maxime autem omnium demiror, quid in animo vni ex istis fuerit, quum Philippum Melanchthonem *veteratorem* nominandum putavit. Si tamen quid insanis in animo sit, aut quid hi putent, aut omnino quid ab ipsis fiat, mirandum est. Hoc quidem nomine qui recte sunt vsi, ii significare voluerunt malitiosam improbitatem, & fraudes calliditatis, & perplexas astutias. At enim constat omnibus, neque isti, qui crimen hoc infert, ignotum est: fuisse Philippum Melanchthonem alienissimum in tota vita sua ab omnibus fraudulentis consiliis & subdolis actionibus, fugientem ambigua, & perspicua sequentem, inimicum fucatis & tectis & confusis rationibus, & ei quam Sophisticen ille solebat vocare. Quæ tamen minus iam vsurpatur, quum plerique non versute rem inuoluere conentur, sed aperte falsa atque ficta asserere non dubitent.

tent. Quemadmodum seruus Comicus se non tam furacem esse ait, quam antea fuisset, quod rapiat propalam. Dat autem hanc eis licentiam quum vitæ dissolutio, tum migratio Philippi Melanchthonis. Non faciem enim, quemadmodum de se ait apud Homerum Achilles,

Cassidis ipsius contrariaque ora tuentur.

Neque est vero tanta acrimonia ingenii in isto manipulo, neque patientia laboris in discendo, ut fallaciæ conclusionum (quæ sunt Sophismata) callidæ saltem & speciem aliquam habentes ab ipsis vel expectandæ, vel magnopere pertimescendæ esse videantur. Cur vero hi defatigarentur cogitando, comminiscendo, fingendo, quod vel sententiis implicaretur, vel exornaretur verbis; quum admittat leuitas huius ætatis mendacia manifesta, & impune dicatur atque fiat, quicquid audet verecundiæ expers animus? Sed redeo ad veteratoris crimen vanitatis iocularis. Arreptum hoc est de illa quæstione, quam commouit non Philippi profecto Melanchthonis attenta atque religiosa pietas, sed importuna quorundam vehementia, & superba confidentia, & audacia turbulenta, cum pernicie publica & mœstitia bonorum omnium incredibili. De qua quidem nos disputare
nunc

nunc non volumus, neque hoc vlcus intempestiua manu tangere, neque adeo rixandi, quæ a multis quæritur, occasionem suppeditare.

CXVII. Ex his autem vnus, quem nescio quo pacto vt supra nominaremus rei indignitas expressit, quum turpiter descuiisset a causa, essetque iam aduersarius manifestus, qui cum infausta detestandaque nuper terra exorta tanquam Gigantea, & sanctissimum, solumque salutare Iesu nomen infamante familia sese coniunxerat; quamuis vt in agris consitis sues, multos scrobes foderet, & passim huc atque illuc rueret, seque in compluribus veluti herbis salutaris & puræ doctrinæ euellendis defatigaret; in vnâ tamen maxime partem incubuit vehementia iracundiæ suæ, vt obrectando Philippi Melanchthonis nomini cæterorum omnium cupiditatem atque conatus vinceret, cum iis, a quibus aliis in partibus dissentiebat, oppugnando Philippi Melanchthonis dignitatem pietatemque & doctrinam, concurrens atque conspirans, (odii inuidiæque & communium simultatum acerbitate eos alienissimos, tanquam aspides ichneumonesque & crocodillos, contra naturam ipsorum conciliante) vt sanctissimos manes simul insectentur, & religiosissimum sepulcrum Philippi Melanchthonis

thonis perfodiendo violare conentur. Atque isti quum inter se inimicitias aliis de rebus ingentes gerere & vehementer dissidere videantur, specie quidem differunt, sed genere pravitatis extremæ similes sunt atque germani. Vtrique enim ii sunt, quos ipsorum de se præconia non minus quam aliorum delectent, vel qui illa quoque verbose facere consueverint, quum ab aliis aut non omnino aut admodum parce fiant. Videri igitur aliquid esse apud certos homines, quibus sese venditant, & eminere existimatione cupiunt: verum neque res eadem sunt, neque iidem homines vtrisque contingunt. Itaque iam forma tantum diversa est, genus improbitatis vnum. Et congruit nunc istud maxime, quod eandem materiam artifices isti sumserunt, de qua criminationes & probra in Philippum Melanchthonem mortuum exsculperent, illud inquam scriptum, cuius paullo ante facta est mentio. Primum autem quis non videt, de illo litigare cum Philippo Melanchthone neque integri sensus neque sanæ mentis esse, quum ille viuus non e-diderit. Tota enim res hæc ad eos iam pertinet, qui istud diuulgandum curauerunt, magnis & grauib; de causis, consilioque prudente, & ratione, quemadmodum nos credere par est, vera. Hi igitur accusantur cum aliis quibusdam hoc in negotio sociis, inque

inque hos iste improvidus impetus sese infert. Sed quid est tandem, in quo scriptum illud tam male de istis mirificis hominibus meritum videri possit? Nisi quod cupidissime arrepta occasio est, non tam insectandi Philippum Melanchthonem, quam ad præstigiis quibusdam illudendum legentibus, & cæcandas imperitorum mentes, istamque offundendam caliginem. Quæsitæ est invidia Philippo Melanchthoni non ab eorum, quæ scripsit, vitio; verum ab alienæ calumniæ interpretatione, vel, verius ut dicam, cauillatione. Etiam de aliis viri illius monumentis idem fieri comperitur. Et cernimus pene indies aliquid tanquam personæ novæ in scena prodire huius non librorum modo sed epistolarum & dictorum. Quæ fiunt nunc impune omnia & audacter, sublato eo, cuius gravissimis verbis & verorum scriptorum autoritate facile refutarentur, quæ eum læderent uniuersa. Non quod ipse pro se aduersus aliquos dicturus scripturusue fuerit quicquam, qui nunquam suæ famæ aut dignitatis tam studiosus fuit, ut se defendendo & a se impetum atque vim aliorum propulsando, vehementer aut turbulente diceret aliquid aut scriberet, quemadmodum in contentionibus fieri solere scimus; sed rem euoluendo & edisserendo, ambigua remouendo, propria

pria atque certa stabiliendo, falsa confutando, vera asserendo, futilia ac nugatoria reiciendo, id perficeret profecto, ut stolidæ aut peruersæ leuitatis & impudentiæ furiosa temeritas concideret atque reprimeretur, vna Philippi Melanchthonis plana & simplice vel explicatione vel assertionem. Est autem in his attendentibus inprimis molestum atque odiosum, quod mentio sit earum rerum, quas culpantes vel iis non interfuerunt, vel non curarunt admodum cognoscere, vel demonstratas malitiose inuoluendo obscurant. Inculcantur odiose nomina quædam, & dogmata exponuntur, verbis illa quidem asperius & sententiis iniquius, & his aduersatus Philippus Melanchthon aliquando fuisse & resistisse fortiter, & causam postea prodidisse insimulatur. Sic autem ista agitur Tragedia, ut quælibet dissensiones statim mirifico quodam zelo capitales fiant, quique aliquibus non applaudunt ii statim hostes ab ipsis iudicantur. Non libenter verba his de rebus facio, non quod vllorum criminationes pertimescam, qui omnes paullo moderatiores, & non similiter petulantes atque ipsi sunt, per contumeliam neutrales aut transfugas etiam appellant; sed ad alia respiciens, quæ nunc referri necesse non est, timidius ista attingo. Quum autem insultantes mortuo Philippo

Cc Melanchi-

Melanchthoni quum aliis colligendis declamatores, vt sibi videntur, sint acres & vehementes, tum in scripti istius, cuius mentio supra facta est, crimine equitant ferociter, omnibus contumeliis appetentes famam & nomen optimi & sanctissimi viri. Improbasse aiunt aliquando eum quædam. Ille vero semper improbavit neque necessarias & mirificas quæstiones, & multo maxime disceptationes perniciosas, & rixarum causas. Quum autem cerneret, a quibus, quæ res, quam alieno tempore proferrentur, neque ita, quemadmodum oporteret, eas tractari existimaret, nunquam dissimulauit sibi inexplicatam nouitatem magnopere displicere. Itaque aliquorum promulgatores & disseminatores, quæ vel de industria elate vel ingeniorum asperitate dici horride videbantur, nequaquam collaudauit. Opposuitque adeo suas etiam tum admonitiones quorundam procliuatati ad inaudita atque noua, vt inconsiderata leuitas coerceretur, quod omnia vbiq; periculis cerneret esse plenissima. Hæc circumspectio & sollicitudines istæ, non modo hac in parte sed multis aliis notatæ & repressæ fuerunt. Aliis timorem, aliis prudentiæ humanæ rationes criminantibus, non etiam nullis Philosophiæ eruditionem hac occasione exprobrantibus. De quo plura dici nihil

nihil attinet, quum præsertim antea quoque nonnihil sit commemoratum.

CXVIII. Vt autem fortitudo & robur animi, & fiducia virium, & prompta libertas orationis, suam laudem habet; sic, quemadmodum opinor, non est vituperanda in magnis grauibque rebus attentio & cura & prudentia. Quod si (nam humanum est errare) dictum vel minus cogitanter, vel nimis vehementer, corrigendum putasset Philippus Melanchthon, ideo ne tam atrociter fuit ille insectandus? O miseram conditionem omnium, qui scribendo operam, quacunque in doctrina nauant, si sunt errata statim scelera existimanda, & mutatio sententiæ habenda perfidia! vbi igitur hoc? Discipulus est prioris posterior dies. Quam multa sæpe nunciantur negligenter, male, falso? Quoties sibi persuadet aliquis id, in quo decipitur? Quantum etiam momenti in temporibus est situm? Quibus qui mouetur, is statim sapientibus istis levis est atque inconstans, vel etiam veterator & versutus. Immo cothurnus est, quicquid ad ipsorum pedis distortissimum prauissimumque exemplum non quadrat, secundum quod ea calceamenta suta videmus, in quibus iamdudum turpissime, qui illa induerunt, gradientes claudicant, aut certe misere & de-

formiter oberrant. Iam sublato studio enarrandi aliquid planius, disertius, rectius, illustrius, non parum fructus decesserit de doctrinæ tractatione vniuersa. Horum istud genus nihil intelligit neque considerat. Quod acceptum est, id sicut claudus pilam, quomodo aiunt, retinere, & in sententia perseverare, neque si quid in ea absurdi reperiatur putare corrigendum, neque enitendum, ut commodius aliquid dicatur: quasi hoc sit discedere a veritate, & prodere causam. Cum quibus de his ne disputandum quidem est, ab omnis humanitatis sensu nedum prudentiæ consideratione alienis. Est autem illis ad huiusmodi omnia ad imperitam multitudinem perquam plausibile in promptu hoc: rationis ista esse commenta & argumenta sapientiæ humanæ. Quum ipsi quidem de præcipuis & maximis rebus argumentari & ratiocinari in primis conentur. Minime illi quidem ratione & via atque ordine, ad explicandum tamen id quod volunt, & suas maxime cogitationes, quæque comminisci & extruere & conglutinare non dubitantes; modo diuidentes dissipando, modo definiendo magis ambiguum reddentes id de quo agitur, modo complectendo distrahentes & soluentes. Neque enim distinguere hos dissimilia, neque diuersa separare, neque notiones rerum certa

ta

ta descriptione demonstrare videas, & sumere vel falsa, vel dubia atque dissidentanea, & inferre inducereque abhorrentia, vt solum hoc eos moliri putes: disturbare bene collocata, & firma conuellere, & ordinata confundere, denique cum ratione quadam insanire. Hoc vero vitant atque cauent, ne in ipsorum scriptis notari reprehendique fere, quicquam possit, quod nullus in his tanquam formoso corpore n̄uus conspiciatur, sed tota illa futilia atque distorta ac fœda sint. Verum reducat oratio ad propositum.

CXIX. Non modo iam molesta est istorum hac in parte hostilis oppugnatio, sed quum alia proferuntur, tum, vt vereor, proferentur deinceps illi ex ore forte elapsa, prolata sine cogitatione accurata, etiam surrepta, suppositicia, commentitiaque; de quibus & disputari in vtramque partem, & crimina facile confingi in Philippum Melanchthonem poterunt, rebus, temporibus, hominum etiam voluntatibus atque studiis diuersis. Philippus Melanchthon nunquam fauit vel auctori vel actori negotii neque necesarii & impediti atque turbulenti. Nunquam probauit aut adiunxit, vel potius, quantum potuit, repressit aduersando intempestiuas vel etiam temerarias excursions. Fuitque ei curæ semper, vt & ipse considerando inquirendoque verum comprehenderet, & veterum sententias proferendo, aliorum quoque

cogitationes incitatas decertando & excurrentes longius conuerteret, & ad rei ipsius contemplationem diligentiores reuocaret, ne fugerent, ut dicitur, præter casam. Quantum profecerit modo non dicam, quum palam sit, non paucorum vagas & temere effusas cogitationes quasi in gyrum reductas fuisse, moderatione Philippi Melanchthonis, & hoc perfectum, ut iudicia essent attentiora & severiora, certe nemo, præter insanos istos, nocuisse hoc facto ipsum perhibebit. Ea profecto, de quibus vociferatur ista in caput Philippi Melanchthonis coniurata cohors, talibus clamoribus non explicabuntur. Quorum sunt tam inepta atque ridicula scripta, ut contemni ab omnibus sanis credibile sit: sed eadem etiam adeo rabiosa ac venenata, ut animaduersionem perquam diligentem commouere debeant. Quam quidem iis, quibus conuenit, curæ esse æquum est. Quantum sane credendum his sit, si nondum vel iis constitutum est, in quorum illi fauorem se insinuant, at hinc par fuerit æstimare: quod nunc tam exquisitis conuiciis furenter inuehantur in eos, a quibus benigne admissi, & amanter tractati, & multiplicibus beneficiis aucti & ornati fuere, quosque laudibus aliquando maximis extulerunt, & quorum actiones singulari studio defenderunt, quum eis

sele

fese per omnia assentiri profiterentur. Potestne autem ab his constantem sibi voluntatem polliceri, aut eis fretus esse aliquis, qui vel existimationis honorumque spe, vel emolumentum mercede, a priore sententia & animi inclinatione illos desciuisse, & amicos cum inimicis commutasse sciet atque perpendet? Nam commune istud: Dei respectum & veritatis esse præferendum vniuersis; quantum valere in leuium & infidelium sermone debeat, quis non perspicit? Ad Iudæos, ad Sarracenos, ad quamcunque sectam, transfirent isti, idem dicerent. Spectetur igitur hoc potius, quæ causæ istius tantæ mutationis fuerint, quid hi secuti sint, in quæ iam vnde desiliant. Quam nihil grauitatis, honestatis, religionis, nihil humanitatis ac moderationis conspiciatur in consiliis, dictis, scriptis, actionibus ipsorum; atque hinc fiat iudicium, quantum eis tribuendum, quid habendum fidei, quo dignitatis gradu collocandi esse videantur. Quid autem commisit aut deliquit, obsecro, his in rebus Philippus Melanchthon? Nam hoc ad veritatem narrationis istius, vt exquiratur, pertinet. De quorundam audacia est locutus minus clementer. Insanas extructiones damnauit, quibus non cessarent aliqui hyperbolis alias hyperbolas imponere, id est, mirabilia dicta.

mirabilibus exaggerare, & secundum proverbium, arcem ædificare ex arena. Vidit, illum aceruum & hanc molem non consistere. Vidit, ita declinari fumum, ut incideretur in flammam. Monuit, hortatus est quos potuit. Increpando etiam quosdam corripuit sane molli, ut aiunt, brachio obiurgans. Quod sicubi hic errasset, si lapsus esset, si deliquisset; erat profecto istorum, tueri illum mortuum præsertim, peccatum culpamque, quæ in eum conferretur, remouere & tegere, defendere, quantum concederetur, amicum, fautorem, beneficum, magistrum, præceptorem, quod nomen istis morte tristius est. At ipsi quid faciunt? Rimantur quod nusquam est, eruunt omnia, ficta atque falsa ostentant. Tanquam obscœnæ aues ad sepulcrum eius aduolant, aut ut canes cadauera, sic famam nomenque lacerant. Nam quod ad errores, quos confutare isti se profitentur, attinet, ita sese res profecto habet, ut istæ confutationes multo quam ea, quæ ad confutandum sumuntur, plures dent errandi occasiones, præterquam quod sunt vanissimæ, & si quis conuicia, probra, maledicta, criminationes eximat, nihil futurum illis sit inanius. Quin etiam si quid forte esset in iis, quod dici putaretur recte, aut cognitionem haberet cum utilitate coniunctam; non ab istis
tamen

tamen talibus oporteret audiri. Ac potius, quemadmodum quondam Spartiatis visum esse accepimus, ut utilia atque bona dicerentur, non ab ignauo, futile, impuro, quamvis esset audax & loquax; ita si quid notari in Philippi Melanchthonis scriptis oportere existimaretur, æquum fuerat, non hoc ab istis fieri, sed a constantibus, doctis, piis, religiosis, amantibus patriæ. Quæcunque Philippo Melanchthoni explicare placuit, & ad quæ edisserenda tempus otiumque ei concessum fuit, ea haud scio an melius, dilucidius, verius, fidelius, religiosius expositum iri a nullo nostræ ætatis atque gentis existimandum sit. Quæ reliquit inchoata, aut noluit, aut non potuit, impeditus negotiis, tandemque morte ereptus, perficere; de iis cateruam istam silere melius erat, neque hoc sibi sumere, ut illa destruere & alia nescio quæ exædificare auderent. Verum de hominum istorum improbitate & scriptorum impudente vanitate, ad id quod propositum est satis, pro negotii magnitudine, parum diximus.

CXX. De causâ atque re ipsa ut neque institutum fuit, neque mihi fortasse congruat disputare, ita liceat, nisi fallor, mone-re hortarique omnes veritatis cœlestis, patefactæ interprete Filio Dei æterni Deo æterno,

amatores, & fideles Iesu Christo, autori salutis atque vitæ, honestos denique & bonos: ne temere hac in parte prolabantur atque ruant. Tam amplum, arduum, impeditum negotium non conficietur vesanis clamoribus, neque tam intempestiuo stridore, neque istis conuiciorum plaustris. In Christiana religione quum vniuersæ virtutis cultus necessarius sit, decus quoddam certe illius atque pulcritudo eminens temperantiæ modestiæque, non poterit neque debebit omitti atque negligi. Hippocratis veteris Medici hoc est: Remedium esse interdum bonum, si nullum adhibeatur remedium, tam ad aures quam alia multa. Quod idem elegantibus versibus his Naso expressit:

Curando fieri quadam maiora videmus.

Vulnera, quæ melius non tetigisse fuit.

Et vetus verbum, strepitus nocturnos ventorum non durare diu, affirmat, secundum hanc Græci versus sententiam:

Nunquam aquilonem lux nocturnum tertio vidit.

Patiatur pietatis moderatio dicere istos quæ volunt, neque ægre ferat lenitatem ab eis levitatis, & cautionem timoris nomine infamari. Non curetur ignominia falsæ macula, quæ istorum petulantia aspergitur quietis & sanis. Non obstat mentio legum veterum

rum (nam, vt acuti videantur, aliqui eas tanquam in iudicio, quo reus peragatur Philippus Melanchthon, recitant) facta ab iis, qui si scirent aut cogitarent quid omnino lex esset, non tam secure omnes diuinas atque humanas leges contemnerent, & adeo insolenter perrumperent. Quum ipsorum talia scripta sint, vt, si quod vnquam capitale prodiit, & quod in plurimarum legum quasi plagas incideret, istiusmodi centones hos videri, nonnullis eorum quoque, qui causæ, quæ oppugnatur, non fauent, arbitrer. Legibus, vnus ex isto grege, qui se esse in quadam scholastica congregatione νομοφύλακα gloriatur, Imperatoriis teneri Philippum Melanchthonem scripsit, De Mathematicis & maleficis, quod studia ille Mathematicum magnificerit & commendarit. Huicne respondendum quicquam aliquis putet? Alter Solonis etiam antiquam legem recitat: vt orta seditione, neutri se parti adiungere, capitale sit. O hominem bellum, applicantem & interpretantem Atticam sapientiam, sapientiæ humanæ inimicum. Quod si Atticis legibus nugator iste delectatur, cur optimam atque præclarissimam legem scelerate violat, qua maledicta in mortuos omnia capite sanciantur? Talibus igitur scriptis an opponere suorum aliquid iam, quisquam
volet,

volet, qui quidem sapiet, neque pariter atque illi delirabit? At clamant isti, & refellat nos aliquis, inquit. Nam sicut præfidentes pugiles aut irritatæ mulierculæ hoc postulant, iocantes etiam insultando ridiculis, & falsa dicta inculcantes, ab omni vrbanitate atque adeo humanitate natio aliena. Decedatur potius eis, tanquam lutulento procorum gregi, semita: & concedatur eis ista gloria quod inuicti sint. Sunt enim profecto iis armis, quibus ipsi decertant, impudentiæ, dementiæ, clamorum, cæci impetus ruentis in omnia, agitatæ feræ instar. Hoc igitur restat, abire paullisper & abscondere se, dum transeat furoris incitatio. Non est pietatis religiosæ cumulare rixas rixis, neque Deo æterno grata acceptaque vel veritatis talis tractatio. Non adiuuant aut subleuant talia, aut augent, multo minus ornant Ecclesiam Christi. Itaque alia medicina quærenda, vel ad hanc faciendam præparatione opus est. Nimirum, vt quasi caueis quibusdam includatur & sepiatur immanis hominum feritas. Nam ita, quorum hæ partes sunt, ii tuto & sua proponere, & vim aliorum sustinere, & ordine atque ratione quærere de dubiis, explicare obscura, manifesta asserere, falsa refutare poterunt. Quibus omnibus iam dudum obstat & aduersatur vulgaris ista importuni-

tunitas, & turbulenta ambitio, & impiæ secessionēs, & species præstigiarum, quibus non modo multitudinis animi, sed quorundam, etiam præcipuorum decepti fuere. Ne liceat igitur, neque potestas sit ulli, suam opinionem suo arbitrio diuulgare, & condemnare sententiam alterius. Non declamitare ad populum temere concionando; non scriptis impuris dissentientium nomen atque famam contumeliose insectari, ante cognitionem controuersię, & sua cuiusque sponte ac libidine. Cui ignota autem est huius sæculi licentia dicendi scribendique, & imperita plurimorum audacia, & indocta doctrina, & incredibilis quum arrogantia tum pertinacia? Hoc quam breuiter nunc dicitur, tam necessarium illud quidem existimandum est, ad spem veritatem & inueniendi & retinendi. Sed si istud obtineri nequeat, & nisi ita administretur negotium, idque perficiatur, vt & summa diligentię cura adhibeatur, neque labori ulli atque sumtibus parcatur, neque respectus admittatur ad commoda sua cuiusque, ac solius Dei æterni glorię seruiatur; melius fuerit; scilicet, rerum istarum quasi habenas relinqui, vt ferantur omnia, sicut hactenus, regente hominum nemine. Studium omnino religiosę pietatis facile docebit vnumquemque, quod sit officium & munus ipsius.

ipſius. Hoc autem deferentes prætermittendo, aut violantes ſeruiendo cupiditatibus prauis, quicunque tandem ii ſint, horum peruiſacem impietatem, breue longumue fiat, non patietur Deus æternus eſſe impunitam, cuius miſericordiæ & benignitati atque clementiæ immenſæ permittantur cætera. Quorum quidem acerbitas odii in mortuum Philippum Melanchthonem nunc incitatur, quam nihil non exquirunt atque ſcrutantur, quo lædi fama nomenque ipſius poſſe videatur? Si illum ſe cæde, ſi ſacrilegio, ſi perfidia contaminafſe vel mentiri auderent, quanta alacritate & lætitia facerent? Sed non habent ſclerati diſcipuli, quod optimi innocentiffimique & integerrimi Præceptoris vitæ ac moribus probroſum crimen inferant; & doctrina Philippi Melanchthonis non modo contra iſtorum maleuolentiæ impreſſionem, ſed aduerſus omnem omnium oppugnationem, ſatis eſt munita, ſequæ tuetur ipſa atque defendit. Boni quidem certe & pii, venerantesque Deum æternum, & honeſta ſtudia amantes, quibus inuiſa eſt non modo ſuperſtitio ſed etiam barbaria, qui amant veritatem & mendacia oderunt: hi igitur nihilo minus vel ſtudioſius quoque colent memoriam & celebrabunt laudibus Philippi Melanchthonis nomen: deteſtantes, tanquam
furiam

furiarum instinctus, latratus istorum, de quibus nunc potissimum loquimur, & his similes aliorum. Neque sane illius causa grauitermolestaque ferent maledicta, quæ in ipsum conii cere isti non cessant, sed hoc dolebit: tantum licere improbitati inuidiæ & odii acerbitati, ut prætexens hic aut ille veritatis cœlestis patrocini um, tam graui a vulnera, prohibente nemine, infligat Ecclesiæ Christi, adeo hostiliter in nomen Philippi Melanchthonis inuehendo. Quem profecto quorum furor ad insectandum arripit, in eo, ut arietes cornua statuæ æræ inferentes, sic ipsi sese incurrendo comminuunt atque frangunt. Neque ab his iam mali quippiam Philippo Melanchthoni accidit, sed ipsi plane stimulum, quod dici solet, calcibus ferunt.

CXXI. Cum illo vero & est actum & agitur optime. Omnia, quæ ad præclarissimam existimationem & summam laudem, pertinentia optari ab homine fas est, ei contigerunt. Puer infantia opinionem atque spem, pueritiæ adolescens, adolescentiæ vir superauit admiratione omnium, quam ipsam vicit senescentiæ ætatis quasi viriditas mirabiliter operosa, neque industriæ expers neque fugiens laboris, & nullo in munere exequendo languida, & in occupationibus consuetis
perse.

perseuerans. Nunquam ille affectauit titulos neque ambiit honores, & summos atque amplissimos, iudicio consentiente, & vno omnium ore, est adeptus. Qui confusa atque disiecta in doctrina tam cætera quam Ecclesiæ collocando atque disponendo, & implicata quasi enucleando, & expediendo hærentia, & confirmando dubia, & indiferta explanando, non modo plurima, in quibus priores errauerant, correxit, & perfecit vt nostra ætate esset doctrina spectata atque illustris, sed ea reliquit elaborata opera studii & industriæ suæ, vt si non auerti prorsus ruina sinceræ atque puræ doctrinæ, vrgentibus nobis fata nostra, certe differri posse videatur. Fuerit in ipso vitii aliquid. Quædam nescierit, Lapsus deceptusque alicubi sit. Fuit enim homo, & solius Dei esse scimus, vt omni labe ignorantia & macula turpitudinis careat. Confirmare tamen hoc, vt opinor, liceat: inter nostros homines sanctitate religionis, ingenii excellentia, sapientiæ virtutisque splendore, pietate, humanitate, beneficentia, omnis officii munere, ea quidem conditione qua ille fuit & tali loco, parem ei hac ætate fuisse neminem. Futurus ne aliquis sit posthac, incertum est. Cui vero non est perspecta, atque adeo experiendo cognita, Philippi Melanchthonis facilitas in moribus, bonitas erga suos,

suos, comitas liberalitasque in omnes? Si quid autem fecit perperam, eo fecisse profecto perhibere liceat, quod auxit ornauitque indignissimos, quosque etiam Reipublicæ nocituros esse interdum suspicaretur. Tanta autem erat in ipso consulendi rationibus & prouehendis commodis aliorum & benefaciendi quamplurimis cupiditas, ut neque petentibus denegare sciret quicquam, & vltro deferre quibusuis operam, consilium, facultates suas impertireque soletet. Istud igitur sit peccatum ipsius, quod aluit & fovit improbos, & serpentes, secundum proverbium, in sinu. Accidit hoc semper optimis atque probatissimis. Quorum tanta scilicet est & tam absoluta atque simplex bonitas, ut nihil in animum suum penetrare patiantur, quod benignitatem impediat aut obstet humanitati.

CXXII. Atque iis quæ dicta sunt, hoc saltem effici confido, ut omnium iudicio statuatur: melius honestiusque sentiendum esse de Philippo Melanchthone mortuo, quam inter viuos nunc quoque obuersantibus invidis maleuolisque & obtrectatoribus ipsius. Qui quid hominum sint, non dicam; neque eam iniuriam viro optimo & sanctissimo faciam, ut cum istis illum comparare voluisse videar. Quid igitur est? Ut tandem nostra

Dd

narra

narratio concludatur. Optimus & sanctissimus vir Philippus Melanchthon quum ita vixisset, quemadmodum vere commemorasse me etiam inimici fateri cogentur, pie & religiose morte obita, tot commoditatum autor, tot bonorum conciliator, cuius omnibus pietatis virtutisque amatoribus memoria veneranda, & ad posteritatem etiam gloriosior futura est: hic igitur talis & tantus vir mortuus conuiciis laceratur, & ignominie impiorum probrorum appetitur. Quem doctiores quoque & saniores ex aduersariis, quum vix diligere possent, propter constantiam tamen & fidem & admirabiles virtutes plurimas odisse non vellent. Quo quidem ille animo, consilio, proposito, studio, ad cognitionem professionemque ac doctrinam sacrarum literarum accesserit, scit Deus æternus, & est ingenio hoc ipsum laboribusque eius, & operum bonitate, omnibus mortalibus, non malevolentia atque odio cæcis, declaratum. Atque idem Deus istorum quoque, arrodentium nomen & probrum sanctitati labemque integritati Philippi Melanchthonis inferre conantium, siue in calcaria seu carbonaria, ut dicitur, obscurorum opificum, pectora voluntatemque perspicit. Quæ quidem ab eis prodita inque lucem prolata sunt, eiusmodi specimen dant,

vt quid cogitent velintque agendo demon-
stretur. Ex quibus hoc non est postremum:
quod, quum inter viuos inuidia soleat vige-
re, mortuos autem inimici quoque odisse
desinant; tanta istorum non inhumanitas est,
sed immanitas, vt in Philippum Melanch-
thonem mortuum suos demum stringant gla-
dios & tela intendant. Qui, quoad vixit,
& negotiis maximis grauissimisque Reipubli-
cæ & Ecclesiæ Christi est adhibitus, proposita
cunctis in medio quasi palma, studio salutis
& incolumitatis publicæ, cum conseruata veri-
tate coniunctæ; vicit omnes & religione pie-
tatis, & industria atque studio ac laborum
defatigatione, & constantia atque fide; &
tempestiua moderatione. (Quamuis hanc
culpares aliqui audeant; non modo nomini
Philippi Melanchthonis sed paci & quieti
inimici.) Neque quisquam est repertus, qui
se ei præponere non dubitaret. Atque hæc
sunt ignota nemini. Vt autem luctus fune-
ris Philippi Melanchthonis caritatem bono-
rum; ita quorundam lætitia odium etiam
malorum indicauit. Quorum vtrumque
famam existimationemque hominum melio-
rem reddere consuevit. Vitam autem ta-
lem, qualis expositione nostra indicata est;
post grauissimos & maxime vtilis labores;
post operam publice priuatimque nauatam;

post stabilitam illustratamque doctrinam veritatis cœlestis & bonarum artium, post subleuatos, adiutos, auctos, ornatosque innumeros sine discrimine, omnis otii quietisque expertem ille placidissimo & optatissimo sine clausit; ea ætate sua, & eo tempore Reipublicæ, vt, quemadmodum vtens verbis Pauli Apostoli aiebat, decedere hinc & migrare ad Christum cupientem permulta impellerent. Cum eo igitur, vt diximus, optime præclarissimeque est actum. Nostra causa viuere ei licuisse diutius, optandum, & stare quasi in acie, non modo aduersus manifestos hostes, sed qualescunque tranquillitatis turbatores; qui gloriosa temeritate optantes hunc viuere, conspectum omnino & faciem illius ferre sustinereque non possent, fugientesque eo viso & arma abiicerent, & alas dederent, quantumuis modo ferociter ac superbe procurrant atque euolent. Non sane lædatur omnino Philippus Melanchthon ab istis tanquam viperarum sibilis, aut hyænarum bubonumue diris funestisque cantibus ac sonis. Quo ista licentia pertinere euadereque possit, quorum maxime interest, ii scilicet considerabunt, & quum sibi tum aliis in hoc periculo prospicient. Quoties existet, quod alicuius ambitioni impedimento sit, quod cupiditati obstat, quod opinioni refragetur,

getur, toties arripietur occasio vel constituta disiiciendi, vel exulcerata amplius lacerandi, vel excitato incendio vires addendi suggerendo materiam. Quando igitur concordabitur? quando de vlla controuersia decidetur? quod negotium aut quæ res transigetur vnquam? Nos, vt qui e longinquo prælium spectant, mouentur illi quidem alterius vtrius partis fortuna, & optant, sperant, metunt, opitulari neutris valent: sic quid facere possumus aliud? quam perturbari ista cernentes animo, & precari veluti in Tragœdia chorus:

Vt redeat miseris, abeat fortuna superbis;

id est, vt ista elata atque contumax & insolens petulantia in viuos atque mortuos, & turbatrix in præsentia quietis, & spem tranquillitatis in posterum præcidens, & incutiens metum sæuissimarum procellarum & horribilium tempestatum, reprimatur ac coerceatur ab iis, a quibus & potest & debet. Non autem necesse est exempla vestigare eventuum, qui istiusmodi concessos dissimulatosue conatus sunt consecuti.

Ante oculos interque manus sunt omnia nostras,

secundum Poëtam. Vigilent, igitur & attendant
Dd 3

tendant ii, quorum maxime res agitur, quorumque proprium ac peculiare munus, & præstandi officium patriæ, & sibi quoque ac suis prouidendi. Nos cæteri, animæ viles, vt idem Poëta ait, poterimus silere confirmati vtcunque ad ea ferenda, quæ acciderint.

CXXIII.. Absoluimus id opus quod suscepimus ad elaborandum, id est, veram de Philippo Melanchthone narrationem; & officium persoluimus debitum non solum amicitia nostræ, sed omnino meritis ipsius. Neque me fugit, legentibus hæc eorundem repetitionem iniucundam esse, & inde fastidium posse existere. Tota enim, vt ita vocem, farrago huius libri, quid aliud completitur, quam curas, labores, sollicitudines, dolores, denique miseras Philippi Melanchthonis? In quorum expositione eadem sententiæ iisdem sæpe verbis iterum atque iterum recensentur. Sed dabitur venia mihi, vt spero, a non iniquis lectoribus; qui ea sum persecutus, quæ in re ipsa inesse animaduertissem, vt & verum indicium nostrum, & simplex narratio testimonii loco haberi debeat. In aliis, siue quis minus quam oportuerit omittendo, seu inculcando plus quam decuerit, esse dictum, seu notandum in verbis compositioneue aliquid forte

forte putauerit; etiam eum ignoscere velim non tam festinationi meæ, (non parum enim temporis in his conscribendis absumsimus) quam lapsibus, qui sunt etiam acutissimorum sapientissimorumque & doctissimorum. Narrationes sane has verbosiores & totam expositionem pleniorē efficere, adiiciendo commemorata ab aliis, atque adeo nostra edisserendo prolixius, & quasi dilatando, fuisset in prociui. Ego vero & in meis seruandum mihi modum putaui, ne euagarentur illa longius, quam viderentur debere; & quæ aliunde peti facile possent, ea nostris inferere nolui, quod esse rectius arbitrarer, vnumquemque illa per se cognoscere, aut recordari ipsum. Sunt autem plurima & ab ipso Philippo Melanchthone & ab aliis conscripta, de plerisque negotiis tractatibusque & disputationibus religionis causâ habitis, agitis, susceptis: quorum neque intercidit memoria, & quæ sunt articulate edita in vulgus, vt, si quis forte requirat, in promptu sit assumere, & eis hæc nostra quasi accumulare. Fortasse autem non breuitatem aliqui in his accusabunt, sed mentione de quibusdam nimis verbosa offendentur. At mihi, si præterire silentio quædam voluissē, quæ notari aut reprehendi quoque possent tanquam alieniora, aut minus aliquibus iucunda, aut non etiam nullis odiosa: ne vel diligen-

tia studii, vel cura veritatis desideraretur, verendum fuit. Exposui igitur hæc simplice narratione, & quasi iuratus verbis conceptis, & ex animi sententia, sic, bonorum vt his grauatum iri confidam neminem. De aliis neque magnopere sollicitus sum, & displicere nostra illis, quam grata acceptaque esse, malim. Vt ista autem proferrem atque ederem, id, quod vere cum Poëta affirmare possum,

non gloria nobis

Causa, sed utilitas officiumque fuit.

Vt enim de Philippo Melanchthone, qui vix alio familiarius quam me esset vsus, commemorare comperta mihi atque explorata, ad officium meum pertinere, sic cognitionem istorum aliquam legentibus utilitatem allaturam esse duxi. De quo tamen statuatur quisque quod volet, (& esse enim diuersa iudicia diuersorum scimus, neque postulamus, vt contra sententiam animi sui de his aliquis decernat)

& euentus, qui Deo visus fuerit, & hic nostræ expositionis finis esto.



Epitaphium

PHILIPPI MELANCHTHONIS,

*sicut initio conscriptum,
lamina enim creæ spaciū quædam
non admisit.*

PHILIPPO MELANCHTHONI,
SACRARVM LITERARVM SOLERTISS. ET FIDELISS. EXPLICATORI, VERITATIS COELESTIS PATRONO ET PROPVGNATORI IN PRIMIS STRENVO, OPT. DISCIPLINARVM ET ARTIVM QVVM INSTAVRATORI TVM CONSERVATORI: QVI OMNEM DOCTRINAM QVASI VAGAM AC DISSIPATAM COLLEGIT ET AD CERTAM RATIONEM REVOCAVIT: VIRO PIETATE, STVDIO PVRAE CASTAEQVE RELIGIONIS, SAPIENTIA, VIRTUTE, HVMANITATE, BENIGNITATE ERGA OMNES PRAESTANTI, FELICITER ET SANCTE IN TERRIS MORTVO XIII. CAL. MAII, C. V. AN. LXIII. M. II. D. II. H. I. ACADEM. WITTENBERG. CVI ILLE TOTIS ANNIS XLII.

OPERAM NAVASSET,

H. M. P. C.

 M. D. LX.
Vitam

Vitam fortunæque suas studiumque la-
boris

Quique opera sanctam consiliique fidem
Impendit diuina tuis, Ecclesia, rebus,
Teque pius varia iuuat & auxit ope:
Hac in parte sibi post mortem structa Melanch-
thon

Communi in luctu busta Philippus habet,
Quæ templi foribus magni vicina Lutheri
E regione solum quod tegit ossa videt.
Bretta hunc vitales natum produxit in oras,
Bretta Palatini limes amœnus agri.
Vnde propinqua petens adiit bonitate suo-
rum

Diuerso Aonidum templa sacrata loco.
Ludus enim puerum accepit Phorcenidos vr-
bis,

Eytelbergiaci mox schola gymnasii.
Doctrina hinc fecit iuuenem alma Tubinga
Magistrum,

Eximium laudis gessit ubi ille decus.
Inde triumphator monachorum Capnio iussit
Albidos hunc ripam visere Saxonici.
Tunc noua Dux Fridericus ubi collegia Musis
Romani fundans Ensifer imperii,
Vndique conductis præstanti laude parabat
Artis & ingenii reddere clara viris.
Hic & coniugium gentis sortitus honestæ,
Factus & est sexus mox utriusque pater:

Et

*Et socio ipso annis viginti octoque Lutheri
Wittenbergiaca res fuit ampla schole.
Quam septem bis adhuc prouexit deinde gu-
bernans,*

*Fluctuagam ut vastum per mare nauta
ratem.*

*Heu tempestates quas hic perpeffus, & ad
quam*

Sauos hac scopulos acta carina fuit!

*Quantum externi odii, quantum inuidiaque
suorum,*

*Ingratorum hominum quæ maledicta tu-
lit!*

*Ipse tamen quamuis resflantibus undique ven-
tis,*

*Directum est, retinens vera, secutus
iter.*

*Fortia nec clamor latrantis pectora turba,
Nec vulgus strepitu mouit inane suo.*

*Summa petit liuor: Nemo hunc superare nisi
ipse*

Possset, si studiis otia suppeterent.

Ista sub obliquo norunt quoque sole locati,

Quique sub opposito forsitan axe iacent.

Scripta sed illius memorabilia inter & acta

*Plurima, quæ solide nomina laudis ha-
bent,*

*Vnum opus eximium est: Fidei confessio sancta
Ante tuos, Caesar Carele, lecta pedes.*

Extat

*Extat enim illius assiduo hæc descripta la-
bore,*

*Vera reconcinnans dogmata sparsa prius.
Languida qua Christi iamdudum Ecclesia ni-
tens*

*Rursum oculos audet tollere læta suos.
Concurrant inimici omnes licet undique, hic
unus*

*Confutare potest improba dicta liber.
Ac tua nunc terris floret bona fama, Phi-
lippe,*

*Viuit & æternum spiritus ante Deum.
Corpus at exanimum tumulto hoc requiescit hu-
matum,*

*Condecorant grata quem monumenta
schola:*

*Quod tandem expletis, senio curisque gra-
vatum,*

*Sexaginta annis exuis atque tribus.
Sic morbo ut paucis nisi debilitante diebus
Muneris officium feceris omne tui.*

*Atque olim ætherias venies reuocatus in
auras*

*Integer, & mortis liber abinde metu.
Sancte vir & salve pater optime. Nos tua
semper*

Te soboles merita religionis colet.

Doctri-

*Doctrina nobis vera tu doctor & autor,
Hæc tua clara ætas munera laudis habet.
Salve iterum atque iterum. Tua nos immota
manebit
Semper apud memores gloria, nomen, ho-
nos.*

Ioachimus Camerarius,
Pabepergensis Am. S. S. F.



Sarcom

*Sarcophago stannco, in quo Academia Wittenbergensis
in templo arcis, iuxta D. Mart. Lutherum, exuias
Philippi Melanchthonis condidit, impositum
fuit hoc scriptum.*

IN hac sandapila continentur exuiæ Philippi Melanchthonis, qui fuit Professor sacræ Theologiæ & Philosophiæ in Academia Vitebergensi annos XLII: Vir præstans doctrina, humanitate prudentia, vitæ integritate & sanctimonia, Christiana pietate ac tolerantia, beneficentia etga pauperes. Reuerendi viri Doctoris Martini, purioris religionis instauratoris, *ωδυσσεύς* & adiutor præcipuus & fidelissimus in emendatione doctrinæ sacræ, fraude Pontificum Romanorum & Monachorum præstigiis corruptæ, & in abrogatione abusuum, inuektorum ab iisdem: autor Confessionis Augustanæ, quæ est, post inchoatam anno 1517 emendationem Ecclesiarum & mutationem, exhibita inuictissimo Imperatori Carolo Quinto; in comitiis Augustanis; anno a nato ex Maria virgine Iesu Christo Salvatore 1530. Propugnator veritatis cœlestis constantissimus totis annis triginta, quum in pluribus conuentibus Imperii, tum alias privatim & publice, sicut scripta, quæ extant, testantur: Natus est in oppido Palatinatus ad Rhenum Bretta; honestis parentibus, patre Georgio Schvvarzerd; qui fuit Magister armorum apud illustrissimos Principes, PHILIPPVM & RVPERTVM, Palatinos ad Rhenum; Electores Imperii &c. qui & Maximiliano Imperatori, & præcipuis Germaniæ Principibus; propter virtutem, integritatem, prudentiam, & artem carus fuit: Matre vero Barbara Reuterin, anno 1497 die mensis Feb. 16. hora 7. scrup. 6. post solis occasum

sum vesperi. Accersitus Vitebergam, ex Academia Tubingensi, ad interpretationem Græcæ linguæ, ab illustrissimo Principe FRIDERICO III Duce Saxoniae & Imperii Electore, conditore huius Academiae, de consilio Iohannis Reuchlini cognati eius. Venit in hanc in urbem anno 1518 die 25 mensis Augusti, hora prima pomeridiana. Ibi Lutherus motis iam controuersis, quum probaret ingenium eius, copiam ac varietatem doctrinae, & iudicii acumen ac rectitudinem, sibi eum adiunxit. Vxo-rem duxit Catharinam Crappin, natam ex honesta familia in hac vrbe, anno 1520 die 25 mensis Nouembris. Ex hac suscepit filios duos & totidem filias. Filiorum Georgius altero anno mortuus est. Philippus patri superstes. Filiarum Anna nupta fuit Georgio Sabino I. V. Doctori. Magdalena Caspari Peuce-
ro artis Medicæ Doctori. Coniux Catharina deces-
sit ex hac vita anno 1557 die 11 mensis Octobris, quum maritus abesset Wormatiae, missus eo ad dis-
putationem, institutam decreto Senatus Imperii de
controuersis religionis. Ipse Philippus reuersus ad
Academiam, vixit post coniugem in cœlibatu vsque
in annum tertium; quo sub noctem festi die Palma-
rum, vt vocant, feбри correptus, quam medici iu-
dicarunt esse *ἡμικρανία*, tandemque superatus mor-
bo, propter imbecillitatem corporis, confecti ætate,
curis, & laboribus assiduis ac diuturnis, expirauit
placidissime, cum vera & ardenti Dei Patris, Filii &
Spiritus Sancti inuocatione, die mensis Aprilis 19
quadrante horæ ante septimam vespertinam, anno
a nato Christo 1560, a condito mundo 5522, has
terras clementer & feliciter gubernante illustrissimo
Principe AVGVSTO, Duce Saxoniae, Sacri Romani
Imperii

Imperii Electore & Archimarschalco, Landgrauio Thuringiæ, Marchione Misniæ, & Burggrauio Magdeburgensi, quum compleuisset annos 63 dies 63. Anima fruitur conspectu & consuetudine Filii Dei, cum Ecclesia cœlesti, iuxta dictum: Beati mortui, qui in Domino moriuntur. Exuuias, certissima & firmissima spe futuræ resurrectionis, condidit hoc sepulcro Academia Vitebergensis, soluens Patri, Patrono, & Præceptori optimo, fidelissimo & carissimo, gratitudinis & pietatis officium supremum. Anno 1560 die mensis Aprilis 21. Rectore Academiæ, Georgio Cracouio I. V. Doctore & Professore. Professoribus Theologiæ, Paulo Ebero Pastore, Georgio Maiore, Paulo Grellio, Doctoribus. Professoribus doctrinæ Iuris, Laurentio Lindemanno Ordinario, Ioachimo a Beust, Iohanne Schneidevvein, Doctoribus. Professoribus doctrinæ Medicæ, Melchiore Fendio, Casparo Peucero, Iohanne Hermann, Doctoribus. Professoribus Philosophiæ & liberalium artium, Vito Ortel W. nshemio artis medicæ Doctore, Sebastiano Theodorico, Matthæo Blochinger, Petro Vincentio, Esrom Rudinger, Casparo Crucigero, Iohanne Bugenhagen, Henrico Mollero, Eusebio Menio, liberalium artium & Philosophiæ Magistris. Et Academiæ ministris, Nicolao Risenbergio & Michaeli Maio.

Anno, mensē, & die, quo
supra.



De
HELIO EO BANO
HESSO

Narratio
Ioachimi Camerarii
Pabepergensis,
ad

Clarissimum Virum
ADAMVM CRATONEM
Fuldensem,
AMICVM SVMMVM.

I.



Recordanti mihi, Adame, studia
iuuentutis nostræ, quæ nos
singulari vfu coniunctos te-
nuerunt, multæ suaues co-
gitationes excitantur animo
meo, in quibus, tristissimis
A rebus

rebus & durissimis his temporibus, interdum soleo acquiescere. Vt autem qui in febre frigida biberunt, se nonnihil in præsentia subleuari sentiunt, mox vero grauius affliguntur: ita quoque mihi sæpenumero vsu venit, vt iucunditatem illam maiores molestiæ excipiant. Non modo quum hanc ætatem & superiorem nostram confero, & ægre fero tantam contentionem tam celeriter repressam, & ardorem istum extinctum esse; sed quum, vt necesse est, de iis, quæ ante oculos interque manus sunt, vt Poeta ait, coniecturam facio, quæ deinceps consecutura esse videantur. Atque sunt priora illa quidem eiusmodi, vt morsus habeant sane acerbos, hoc vero posterius non solum maximos dolores, sed ingentem etiam metum; commouet: de quo quidem neque possum in acerrima ægritudine, neque in tanta hominum improbitate plura scribere debeo. De altero si tecum disputem, & offensione ad plerosque hoc cariturum esse spero, & ita aberrauerit aliquantulum mens a curis & anxietatibus, quibus cum conflatur, quoties vel in præsentis miseriæ quasi tempestatem intuetur, vel futuræ calamitatis naufragia prospicit. Quæ quidem sola via est declinandi impetum perturbationis. Cui si veluti directa fronte, &, vt Græci aiunt, ἀντιπρόσωπον occurere velis, celeriter percussus & euersus prosternaris. Iam de studiis nostris disserere, vt no-

vt nobis dulce, ita ad alios neutiquam inuidiosum esse potest. Quis enim illa vel colit, vel admiratur, vel iam omnino respicit atque curat? Nugæ hæc esse ducuntur, & in vita communi ἀδύνατα tanquam lusuū puerilium. Habent enim iam homines quod expetierunt, summam statuendi & agendi licentiam. Nihil tam absurdum est, quin animus concipere & lingua proferre, nihil tam audax, quin aggredi cupiditas & manus conari ausint. Non ratio, non modus, non lex, non mos, non officium valet, non iudicium, non existimatio civium, non posteritatis verecundia, vt ait Cicero. Aperuerunt autem studia nostra iter eruditæ & liberalis vitæ, errorum quasi verpibus excisis, & bonis artibus atque literis consuetudine humana perculsa. In hos, tanquam amoenissimos hortos, temeritas & petulantia vastatrix subito irruit. Et sunt Musarum, secundum Poetam, floribus austri sane procellosi, & liquidis immissi fontibus apri. Sed nescio quo pacto, etiam dum fugit tristitia animus, nihilominus ad horum conspectum refertur. Sit igitur hic istorum finis.

II. Ac adspiciamus iam ad illa, in quibus & lætitiæ aliquid & quietis me reperire dixi: id quod & te facere mihi persuadeo, vt libenter memineris tam assiduitatis atque diligentis discipulorum, quam magistrorum attentionis

atque sedulitatis, quam nos sumus experti, & cuius participes quoque fuimus, vel potius quo tempore ac loco nos etiam aliquam laudemque decusque gessimus. Sunt enim anni ferme triginta quatuor, quum ego me Erphordiam contuli, ibique te florentem ætate & ingenio, & fama eruditionis atque doctrinæ reperi; quasque natura alter alteri conciliaretur, ita factum tum est, ut celeriter inter ignotos prius incredibilis animorum benevolentia existeret, nosque in studiorum similitudine amicitia coniungeremur, & ex usu mutæ familiaritatis uterque aliquid fructus perciperet. Colebamus eas literas, sine quibus persuasum nobis erat nullam doctrinam sapientiæ professionem suam tueri posse, & auctores Græcæ & Latinæ linguæ legere studebamus. In qua parte ego, quanquam admodum adolescens, tamen ferebar in oculis, quia audiueram Richardum Crocum Britannum, qui primus putabatur ita docuisse Græcum linguam in Germania, ut plane perdisci illam posse, & quid momenti ad omnem doctrinæ eruditionem atque cultum huius cognitio allatura esse videretur, nostri homines sese intelligere arbitrarentur. Nos quidem certe ita statuebamus, hanc esse viam virtutis atque sapientiæ, & iter directum quum pietatis & reli-

religionis, tum humanitatis & laudis in hac vita & in terris. Verene an falso, non exquisam in præsentia; nos scilicet ita censebamus. Neque spem, quæ concipiebatur de his rationibus, quantiuis tum vānire passi fuissēmus. Fuerit hoc erratum, mihi tamen profecto etiam opinio illa iucunda est, neque possum vel hodierno die animum inducere vt aliter sentiam. τὸ δὲ δοκῶν καὶ τὴν ἀλήθειαν βιάζεσθαι, aiunt. Et fuerit profecto hic error, si error sit, neque turpior, neque nocentior, quam est multiplex & varius error inter homines, vt non debeat nos huius nimium pudere, si quis illum exprobet, & impedimento fuisse perhibeat, quo minus opes, dignitatem, honores consequeremur.

III. Quum autem illius sanctissimæ & optimæ vitæ consuetudinem animo meo repeto, inprimis ante oculos est EOBANVS Hessus, ad quem tu quidem me primum adduxisti. Sed ille tam cupide me complexus fuit, vt neque dulcius neque constantius fieri quicquam potuerit. Nam & fauebat ardori, quo flagrare cernebat animum meum, studiorum bonorum, & diligebat pene puerilem simplicitatem audaciæ, in iis profitendis, quæ tenere me crederem. Et probabat interdum iudicium mediocris considerationis, de iis quæ forte disse-

rebantur; etiam firmitatem animi in similitudinibus negligendis, & contemnendis oblationibus. Meminisse enim te arbitror, quorum invidia me tum impetiuerit, quum tu me acerrime defenderes & innocentiam meam tuereris. Erant autem æmulationes illæ neque capitales, neque omnino culpandæ. Alius alio videri doctior volebat. Dum igitur se præferri studet cæteris, fieri non poterat, quin minus commode interdum de iis loqueretur, quorum existimatione suam famam premi suspicabatur. *ἀγαθὴ δ' ἔστι ἡδε βροτοῖσι*, secundum Hesiodum. Absit modo acerbitas contumeliæ, & odii crudelitas. Sed hæc obliuioni, quasi ventis, dissipanda præbeantur. Quum autem annis quinque postea ferme quam ego Erphordiam reliqui, prospera fortuna me denuo cum Eobano coniunxisset, & augeſcentibus annis in mea vita aliquid mutationis accidisset, & mihi nonnihil trinitatæ oblatum fuisset, ita sum hoc amico vsus, vt & consiliis & consolatione ab eo sæpenumero adiuuarer. Sed præcipua erat suauitas & oblectatio in studiorum communium cultura, quum vterque alteri aliquid a se in hoc opere semper conferret. Nam ego nunquam dissimulaui quantopere mihi profuerit Eobani familiaritas, & ipse, quo erat candore,
non

non dubitabat interdum prædicare, quid commoditatis perciperet de mea.

IV. Quum autem vidissem ante annos aliquot epistolas * huius scriptas ad diuersos, editasque magis studiose quam prudenter, vel ne studiose quidem satis; nam exempla incorrecta & mendosa diuulgata sunt, & te non fugit, qualis Eobanus scriptor fuerit, qui non modo quicquid in buccam venisset, vt dicitur, efferre, & τὸ ἐπιόν chartis committere, sed sæpe admodum in festinatione negligenter exarare literas soleret: huius igitur Epistolarum librum quum vidissem, vt non probarem talem editionem; ita factum illa occasione fuit, vt respicerem ad chartas meas, inter quas scirem Eobani epistolas ad me iacere. Inuenique tunc plures quam omnino putaram, & inter relegendum mirifice fui recordatione illorum temporum & consuetudinis nostræ delectatus. Fuit enim tum mos profecto optimus & humanissimus, & huic, quo nunc viuitur, dissimillimus: candor eximius in tribuendo cuique quod illi deberetur: summa reuerentia eorum, qui virtute & doctrina præstare crederentur: mira facilitas ad reconciliationem gratiæ, si quid forte simultatum incidis-

* Edidit has Io. Draconites Marpurgi anno
M D XLIII. forma maiori.

cidisset: in consuetudinis & familiaritatis usu nihil fucatum aut exulceratum: discendi, quod ignoraretur, inflammati studio animi, & nullus in confitendo pudor, nullum persequendi occasiones tedium, neque fastidium audiendi: inprimis autem parata bene meritis grati animi memoria. Sed ut ad rem redeam, ceperam iam consilium & has epistolas adhuc delitescentes apud me edendi, de quo statim ad te perscripsi: verum ea tempora inciderunt, quæ non hoc modo turbarent, sed alias multas præclaras res pessundarent. Veni tum forte ad nostrum Sturciadem Erphordiam, qui & ipse de editione epistolarum Eobani nonnihil conquerebatur, & quum expressarum tum alia autographa scripta Eobani mihi dedit. Sumsi tum & a Groningo nostro complura. Quæ quo minus hætenus, ut volueram, in lucem prodierint, multa impedimenta fuerunt. Etsi autem rursus is horror tempestatis se ostendit, ut quid omnino de studiis bonarum artium futurum sit, valde metuendum esse videatur; tamen quum nuper incidissem & in hanc congeriem epistolarum Eobani, & ea quæ tu de hoc composita ad me miseras, cupido me cepit, & conscribendi de illo quæ comperissem & mihi nota essent, & emittendi in publicum epistolas Eobanicas nondum editas, quum
ad

ad me tum, ad alios ab illo vere familiariter scriptas. Sperabamque hoc opus, si absolueretur, & voluptatem legentibus allaturum, & non expers etiam utilitatis futurum esse. Multa enim inerunt & liberalibus iocis quasi condita, & utilibus disputationibus de bonis literis aucta, & grauibz etiam sententiis referta. Tibi certe scio, vt mihi descriptio & elaboratio fuit iucundissima, ita lectionem gratam, & hanc operam studii mei acceptam fore.

V. Scripturus autem de Eobano nostro, ordiar de tuis indicationibus, vt narratio ordine quodam procedat. Fuit igitur, vt significatur, quum tuis, tum aliorum, quorum opera in his perquirendis vsus fuisti, literis, Eobani patria ea pars Cattorum, quæ spectat veteres Angriarios ad Visurgin, in finibus ditionis Hessianæ. Parentibus natus est non illis quidem opulentis, sed honestis & integritatis ac pudoris laude inter omnes conspicuis. Mater civis fuit oppidi Gemundini, pater in montibus, quibus territorium Hessianum concluditur, operam suam dedit Conuentui Heinensi. Qui religione iampridem neglecta, & disciplina corrupta, dissipatus nunc est, & mutata res, vt illo loco pauperes aliquot alantur. Quo loco vim quandam admirabilem naturæ consideran-

derandam esse puto, quæ in temporum, locorum, hominum, euentuum, maxima dissimilitudine, similitudinem tamen semper aliquam exprimit, vt in varietate maxima, congruentia summa animaduertatur a diligentibus & attentis. Nam quum Eobanus eam nostra ætate & his rebus præstantiam attigerit, quam olim rebus aliis Homerus, quasi diuinam & suspiciendam omnibus absoluisset, fuerunt inter hos similia permulta. Quemadmodum enim Herodotus tradit, in ripa fluminis Meletis partu editum fuisse Homerum: ita sub arbore in gramine mater recubans Eobanum enixa fuit. Et vt patria Homeri ignoratur: sic non potuit certo cognosci, quo loco in lucem editus esset Eobanus. In pago quidem vno ex eorum numero, qui attributi essent conuentui Heinensi, natum illum esse satis constat, sed non eundem omnes nominant. Non abhorret a vero, in pago natum esse, cui est nomen Teutonicum deductum ab hirco. Nam ille aliquando iocans *Tragocomensem* se appellabat. Fuere & fortunæ origini pares, ac toto vitæ tempore non admodum ille in parte aucta aut luculenta re vixit. Peregrinator etiam, atque oculis hebetibus: hoc vno Homero felicior, quod visum penitus non amisit. Sed quamuis parentes haberet
pau.

pauperculos, cura tamen illis fuit, vt Eobanus liberaliter educaretur. Nam fratrem huius natu minorem officinæ statim delegarunt. Accepimus autem natum eum fuisse, & ita credi ipse postulabat, anno Iesu Christi MCCCCLXXXVIII. Non. Ianuarii, hora post illius diei meridiem XVII, id est, mane hora quinta diei Dominici, quo adscriberentur in fastis Epiphania. Ad quam si describatur thema genethliacum, animaduерteretur non pauca congruere cum themate Homérico, exposito a Firmico.

VI. Puer didicit a quodam Ditmaro, qui in illo Conuentu primas tum esset Ecclesiasticus, prima elementa literarum. Verisimile est, quod celeriter omnia perciperet, & fideliter retineret, placuisse vt literarum studia sequeretur. Missus igitur fuit ad propinquos Gemundam, inter quos præcipuo loco & nomine vnus Hartmannus Arnoldus, paullo natu grandior, qui postea in sua ciuitate magistratus præcipuos gessit, vna cum illo audiuit ludimagistrum cognatum suum virum grauem & satis doctum Iohannem Me'besium, qui hoc stude-ret, vt pueri inprimis Grammaticas præceptiones cognoscerent & intelligerent. Hi duo postea Francopergam profecti fuerunt, ad spem doctrinæ vberioris. Quod ibi ludum aperi-

aperiret eruditione literarum tum celebris Iacobus Horlæus, quum ageret Eobanus annum decimum quartum. Hic vero magna benevolentia complexus Eobanum, quod eluceret in eo indolens eximia, vna cum paucis quibusdam aliis, impendit illi extraordinarias operas doctrinæ, & tradidit præcepta versuum faciendorum. Quumque aliquantulum temporis de hac institutione consumsisset, iussit eos experiri in componendis versibus vires suas. Et proposuit sententiam illis Euangelicæ narrationis, ita vt tum fere commemorabatur, hanc: *Ego sum lux mundi, qui sequitur me non ambulat in tenebris.* In qua statim notasse ferunt Eobanum, quod vna pars numeroſe caderet, ita vt pentameter elegiacus concluderetur. Sic autem accepimus expressisse versibus propositam sententiam, vt iam tum statim magister admiraretur vim promptam ingenii, & se profectus spem singularem de eo diceret concipere; ac arbitrari, diuinitus sibi in mentem venisse, vt illam sententiam tum proponeret, omnisque boni id loco accipere: sæpeque hortari Eobanum, pergeret quo Deus & natura ipsius eum ducerent; non enim sibi dubium esse, quin vir magnus esset futurus. Audiui ipse ex Eobano, aliquando sibi dormienti, & iacenti in quiete profunda, oblatam speciem
qua.

quasi nauigii ad cursum omnibus rebus instructi, quod staret religatum ad littus. Quumque accederet, & intueretur illud solícite, incessisse se cupiditatem nauigandi, & visum fuisse sibi, quod funem solueret, & conscensa nave prouheretur; ita precatus, repente versu composito :

Data tandem fortuna viam, iuuat ire per altum.

Fuisse Horlæum virum optimum traditur, qui mirificam voluptatem caperet de discipulorum profectu. Isque sæpe postea, quum Eobani iam nomen celebrari inciperet, huius exemplo aliis ad discendum calcar cohortatione sua ad mouere solitus fuit. Inprimis autem placuerat illi, & spem singularis excellentiæ confirmarat in Eobano assiduum studium scribendi, & cura ac sollicitudo vt scripta sua emendarentur. Quum enim esset ingenio acri & vehemente, quoties forte versus fecisset, si minus potestas daretur conueniendi magistrum, constat eum tum quæsiuisse alios, a quibus errata corrigi posse speraret, neque repelli se passum fuisse ullis occupationibus horum, quin operam sibi dari peteret. Sæpe in coetu exhibuit frequente versus suos, aut attulit ad conuiuium, & precibus contendit, vt illi statim recitarentur, & si quid vitii in his esset vt demonstraretur : negare rem moram ferre,

B

pos-

posse, sibi alios versus mox esse faciendos. Hac puerili & liberali importunitate multi tum delectati, & istum ardorem studii exosculati in puero Eobano fuerunt, & dicere inter se: fieri non posse quin illa incitatio, & tam feruens studium, admirabile nomen pariturum illi puero esset, si vita ei concederetur; vereri enim se, ne præcox ingenium ad fructum proferendum non perueniret. Quem metum vt Deus inanem esse voluit, ita opinionem ominis illos neutiquam fefellisse exitus probauit.

VII. Quum in illo ludo mansisset Eobanus triennium, annos deinde natus sedecim Erphordiam, quasi ad vberiore mercatum bonarum artium, profectus fuit: operam studii sui illi nauante magistro artium bonarum, patria Francopergensi, qui nominaretur Ludouicus cognomento Christianus, vir pius & innocens ac doctus. Habuisse etiam aliunde adiumenta putatur ad studiorum cultum, & vt in hoc otio perdurare posset, popularium quorundam, qui facultatum copia abundarent. Erphordiæ admodum tum iuuenis carmen composuit de infelicitate amantium, & alterum bucolicum. Quum Erphordiæ eos honores esset consecutus, qui in scholasticis communitatibus tribui solentiis, qui doctrina aliis præstare indicantur; visum illi fuit peregrinatio-

tioni operam dare, non tam, vt ipse aiebat, consideratione,, quam impetu quodam animi. Erat illis temporibus in Borussia ad Vistulam Præsul Rifebergensis, gente nobili Nariscorum Iobus, vir amantissimus omnium studioforum bonarum literarum & artium. Huic conciliatus Eobanus, qui sibi cognomen patriæ sumserat, & ante Eobani nomen Græcum ponere voluerat, quo Sol significaretur, vt esset appellatione tota HELIVS EOBA-NVS HESSVS; (reddidit autem causam, cur *Helii* nomen asciuisset, carmine quod edidit Erphordiæ) Præfule igitur Iobo conciliatus Eobanus, fuit mirum in modum gratus. Admirabatur in adolescente vir prudens vim ingenii, & simplicitatem amabat, & perpetuam sibi illius familiaritatem pollicebatur. Ideoque beneficiis variis obnoxium sibi reddere eum studebat. Scripsit tum Eobanus & alia quædam, & ad imitationem Ouidianam Heroidas, quas postea retexit, & nimis futiles inde fabulas exemit, ac multo meliora & grauiora fecit omnia. Est autem & primum opus memorabile, & eo etiam nomine spectandum, quod initia complectitur facultatis poeticæ, & specimen Eobanici ingenii; præsertim quum non incubuerit illi in compositionem, sed, vt mihi sæpe retulit, maximam partem animo suo

composuerit & absoluerit eques, dum comitaretur forte Præfulem, aut ad venationem proucheretur, aut mandata itinera faceret. Erat consilium Præfulis, vt Eobani opera ad scripturas vtèretur, & negotia ea quæ requirunt ciuilem prudentiam, & ad obeundas legationes, si quando aliquis ad vicinos Principes mittendus esset. Curauit igitur Lipsiæ comparari libros, quibus descriptum ius comprehenditur, studio primum Imperatorum, deinde imitatione Pontificum Romanorum, idèque cœpit Ius ciuile & pontificium appellari. Sumtibus etiam liberaliter instructum Eobanum ad hoc studium Lipsiam misit. Quo venit, quum ego in prima pueritia ibidem discipulus essem optimi & integerrimi viri Georgii Helti Vorchemii, cum vestitu aulico; ea erat talaris vestis, vt tum consuetudo ferebat, punicea. Ipsum eo tempore fuisse Eobanum oportet natum annos viginti quinque. Nam incidit hoc in annum Christi Iesu MDXIII.

VIII. Erat iuuenis ille pulcherrimus, corpore firmiter & procero, & membris elegantibus, facie plane virili & ore seuerò, barbaque conspicua ac profunda genæ totæ vestiebantur. Neque ego facile existimo fuisse quenquam a primo ortu, cuius habitus atque constitutio

ac species cum Eobanico corpore conferri, nedum huic vt illa præferri possent. Omnia etiam quibus exercendo corpus reddi solet quum agilius tum robustius, studio sibi habuerat; vt luctaretur, vt illos gestus dimicationum & chironomias disceret, vt saltaret, vt nataret. Neque in vlllo genere facile alteri æqualium cedebat. Est ad Rifeburgum piscina spaciosa, neque vlla parte sui non diſtat ripa vna huius ab altera ter mille pasſibus: quam etiam, propter hoc quod narraturus sum, ipse quum in Borusſiam aliquando venissem, & illo in oppido pernoctassem, diligenter fui contemplatus. Solebat in ea interdum natare Eobanus, & natando etiam certare cum æqualibus. Quodam die quum vestes reponisſet ad ripam quæ oppidum spectaret, & demisſet se in piscinam, quod ad alteram illius ripam posse se natando procedere gloriatus inter suos fuisset, illo quidem perexit; sed tum demum consideraui animo suo, quam longo ambitu sibi nudo ad vestes redeundum, & quod pagi etiam transeundi aliquot essent. Itaque pudore nuditatis demersit se denuo in aquas, & continuata natatione confecit ad sexies mille passus, potius quam se vllius hominis oculis in via nudum offerret. Erat autem in hoc ingens verecundia, quæ etiam sene-

ſcentem profecuta, ita ingenium hominis temperabat, vt moderatio illa ad augendam rem ei, ita vt fit, noceret.

IX. Quum autem non poſſet non ſentire, quantum & ingenii & corporis viribus valeret, & eſſet in eo animus excelfus, quo fieret ne aliis inferior haberi facile pateretur: non vt ſe vllis præponeret, aut ſua bona oſtendat, id quod ab eius ſumma humanitate longiſſime abſuit; ſed ne, non præſtando quod poſſet, ſibi ipſi contentus autor exiſteret: vnum vereor ne nimis iuueniliter & incogitanter tum non deliberauerit, ſed auſus fuerit facere, quo & ingenium debilitaretur diuinum, & excellentis corporis quaſi ſoliditas labeficeret. Putauit enim ſe etiam inter poculorum certamina, quæ maxime tum in aulis certabantur, & a nobilitate frequentabantur, non vinci ab altero oportere. Aduchuntur in illa loca etiam vina pleniffima. Sed potus coquitur quum alibi, tum maxime Gedani, is qui cerebro infeſtior ſit fumis ſuis, quam vini cuiuſcunque ingurgitatio. Ac eſt ille quidem hoc quoque conſecutus, vt de palma in iſto genere cum Eobano contendere vellet nemo. Sed breui tempore repletionem nimiam iuuenile corpus grauiter afflixit, & vires nonnihil enervauit. Narrabo hoc loco, etſi mihi res non

non placet, & sæpe indignatus fui animo meo, hoc etiam malum corripuisse Eobanum, & communem cladem nostrorum hominum, deploraui, quum illi dicerem: ita tum seipsum oppugnasse, ut castella & arces solerent tormentis. Sed quamuis iucunda mihi mentio non sit, tamen quia scitum est, narrabo quid inter eum & gloriosum alterum potorem acciderit. Aderat forte Eobanus in convivio. Eodem venit ille quoque. Et iussit intro ferri vas grande ligneum, quo apportari de puteis aqua solet, (nos situlam aut urnam possumus, ut opinor, nominare) cuius generis minimum capit ad congios duos. Id posuit in medio repletum Gedanensi cerevisia. Ac præfatus quædam, quæ comperisse se diceret de strenua potatione Eobani, petiit ut ebiberet illud vas, sibi que propinaret. Hoc si fecisset, præmiun se iam ei tribuere annulum cum gemma pretiosa, quem detractum de digito in vas illud abiecit. Eobanus nihil cunctatus, neque multa locutus, non enim solebat, arripit vas, & non longo tempore assumpto euacuat bibendo, & quum euerteret, sicut fert mos compotantium, decideretque annulus in mensam, applaudere illi omnes, & in primis prouocator, & annulum donare, ac incredibile se factum cognovisse dicere. Tum Eo-

banus toruiore vultu, vt consueuerat in commotione, cum intuitus, Quid tu, inquit, me mercede potare censes? ac reiecto ad illum annulo: tuum, inquit, annulum tibi habeto, & idem quod ego feci in vase isto euacuando, vt promisisti, facito. Tum ille ostentator inchoatam rem quum perficere non posset, ab omnibus derisus, & in conuiuio obrutus somno relictus fuit. Hoc igitur illi incommodi, vel infelicitatis potius, ab axe Boreo inflictum fuit. Etsi autem me non fugiebat, hæc futilia visum iri quibusdam, non etiam nullis frugalioribus externorum hominum inepta, tamen ad narrandum hoc me de iuvene Eobano, quum Socratis senis exemplum, qui illum in Platonis conuiuio Pſyctera pene congialem exhaurit propinatum ab Alcibiade, inuitauit; tum prompta simplicitas ad omnia, & in experiundo quiduis strenua Eobani cupiditas, hac etiam in parte declarare visa fuit ingenii vim & corporis robur, quo utroque eum non fuisse ad vllas res malas & turpes abusum, eundem & memorabile & ipsi gloriosum esse iudico. Sed de his statuatur quisque quod voluerit, ac nostra pergat oratio ad alia iucundiora.

-X. Erat Gedanensis quidam æqualis ferme ætate Eobano, neque corporis specie longe inferior,

rior, inferior tamen, pariter & ingenio minor, qui patria appellatione se *Dantiscanum* nominaret. Inter hos præclara contentio extitit ingenii & eruditionis, quum alter alterum operibus Musicis, initio sane, ut accepimus, aliquando infestius prouocaret. Sed Dantiscanus vir prudens celeriter sensit, quam longe in hoc spacio ab Eobano relinqueretur, & ingenua confessione primas Eobano concessit, & ipse aliam laudis ac præstantiæ viam ingressus fuit. Nam Sarmatico Regi se adiunxit: cuius nomine legationibus ad alios Reges & Principes functus, ad dignitatem & opulentiam maximam pervenit. Habuitque semper postea animo suo carum Eobanum, & nonnihil etiam fortunæ suæ commoditatis ad eum transtulit, quum interdum munusculis eum augeret. Eumque vicissim Eobanus coluit & ornauit scriptis suis. Hic est Dantiscanus, qui constantissime dilexit omnes bonarum artium studiosos, & ipse ad extremum usque senium easdem coluit, factus benignitate Regis Poloniæ præsul Varmienfis. Erat autem homo festiuus & perfectus. De quo aliquando mihi clarissimus vir, virtute & doctrina præstans, summus noster Georgius Sabinus retulit, quum Regio monte ad eum forte venisset, fuisse se ab eo acceptum perquam humaniter & benigne.

Postquam abierant dies aliquot, & significasset, se Sabinus velle discedere & reuerti domum, petiit Præsul, vt pranderet prius. Cœperat tum fama spargi, in pagis, qui redeunti transeundi erant, sæuire pestilentiam. Tum Præsul, ecquod haberet contra morborum contagionem alexipharmacum? interrogauit. Sabinus, habere se nescio quid, respondit. Tum Præsul: Nihil, inquit, nocuerit a me aliquid etiam te accipere. Habeo enim præsens remedium ad permulta, quæ iter facienti accidere possunt. Quumque dimitteret Sabinum, tradidit ei ita compositum quiddam, vt speciem vasculi haberet, in quo solent medicati pulveres asseruari. Ac prædicare cœpit vsum mirabilem, & dicere, se esse sapissime beneficium illius medicamenti expertum. Quum in manus accepisset Sabinus, statim sensit, quid medicamenti esset, pondere. Nam arte compegerat Præsul complures argenteos, qui de valle, vbi primum percussi fuerunt, Iochimici vocantur, quos, ne magnificare ipse donum suum videretur, cum hac illi festiuitate obtulit. Sed exeundum nobis e Borussia est.

XI, Lipsiæ igitur ego puer & primum vidi Eobanum, & de fama admiratus fui atque venerans suspexi. Habebat tum Academia Lipsica doctos viros multos. Vnum maleuolen-

lencia & odium quorundam paullo ante expulerat, qui in vicinia ad Albim postea conuenit, & obiit diem suum, vir omnibus bonis carus, Ioannes Aesticanipianus. Sed aderant tum cruditionis & humanitatis principes, Vitus Berlerus & Georgius Aubanus, Franciambo. In meo autem magistro, Georgio Helto, quum neque esset ingenium infelicius, quam in quouis alio, studium vero & industria haud scio an admirabilior, quam in illo; tamen & moderatione animi & metu quorundam, quibus eum obnoxium reddebat institutum vitæ genus, coercebatur ne familiariter cum iis se coniungeret, qui politi & exculti literis tantum videri volebant. Nam quod aliquando hi etiam liberius exultarent, vt fit, maiores nati, qui aliam rem & doctrinam illam esse animaduertent, quam de qua ad dignitatem & emolumenta ipsi peruenissent; offendi, & ex his nonnulli irasci atque repugnare nouitati, quidam etiam inuenti, qui inuidia & odio exstimularentur, & studiis essent iniquiores. Id quod omnibus mutationum temporibus antea accidit, & posthac euenturum est. Sed illi, quos nominaui, minus curare veluti censuram senum, ac sua studia colere, & doctrinam horum profiteri alacriter, & tum sese cum Eobano cupidissime coniungere.

Ibi

Ibi ille, quem natura etiam a Musis aberrare non pateretur, & horror tractationis a studio iuris repelleret, oblitus voluntatis ac mandatorum Præfulis sui, pecuniam confecit, & libros grandes istos Legum atque Constitutionum diuendidit, & mox Erphordiam ad incunabula doctrinæ suæ se retulit.

XII. Paulo post venit Lipsiam Euricius Cordus, patria & ipse Hessiacus, natus in viculo cui nomen Simus, vnde & *Simusii* cognomen tum aliquando assumebat : attulitque secum Bucolica sua, quæ Lipsiæ volentibus audire explicuit. Eum primum vidi apud meum magistrum, Georgium Heltum. Quumque caperetur animus puerilis sermonibus eruditius illius, egregiam rem esse suspicari cœpi Poeticam : nam hos Poetas nominari audiebam. Hic Cordus postea medicus factus, quum a se tum liberis egregiam laudem doctrinæ posteris reliquit. Quæ esset immensa, si filio huius Valerio id absoluere, quod vterque instituerat, licuisset : qui Romæ est cum omnium luctu mortuus, & reliquit ingens desiderium non modo peritiæ & doctrinæ, sed etiam virtutis & humanitatis suæ. Cum patre autem mihi singularis usus necessitudinis intercescit Erphordiæ : neque illo ego quenquam cognoui magis vel vehementius potius studi-

studiosum veritatis, & qui peius odisset mendacia & vanitatem. Erat autem natura asperior, & paullo impatientior, quæque dissimulare nihil fere quo offenderetur ac ferre posset. Quod in causa fuit, ut in aliquorum interdum indignationem incurreret, a quibus potuisset subleuari, si fauorem ipsorum ambiret ac retineret. Declaratur id Epigrammatis quæ edidit, & hoc ipsum studium, quale dixi, tale hominis fuisse ingenium ostendit. *Cordum* nominarat ille se, nam editus fuerat extremo partu matris suæ. *Euricius* autem de *Henrico* fecerat *Cunradus Mutianus Ruffus*, qui in sodalitia Ecclesiastico Gothæ degebat. Et quum esset nobili familia ortus, neque non offerrentur occasiones illi amplissimorum honorum, quod & fratrem haberet in Principis Catto- rum aula primo loco, & ipse non modo animi ac corporis donis, sed Italica etiam disciplina commendaretur; splendori & opulentiaæ fortunam exilem, & infra mediocritatem positam, Gothani collegii prætulit. Abest autem Gotha Erphordia millibus passuum non multo amplius duodecim. Ad hunc primum a te, Adame, adductus, sæpe prædicaui, ut scis, me illum cognouisse optimum & sapientia ac virtute præstantissimum virum. Dignitas in hoc erat summa, grauitas autem ea, quæ ætatem & locum,

locum, quem tenebat, deceret, commista illa, quidem cum comitate incredibili. Mirifice autem latabatur, quum audiret sedulo operam dare literis iuuentutem, & quibus rebus poterat in hoc spacio solebat incitare curren-tes : superstitionibus inimicus, & hospitalis in re tenui admodum, sed erga studiosos literarum tantum. Nam aliorum fere omnium consuetudinem fugiebat, adeo vt nimis fuisse appetens otii studiorum & tranquillitatis hac in parte videri alicui possit, quam *beatam*, præscripto ædibus titulo se arbitrari significabat, vbi & hoc visebatur elogium: *Bonis cuncta pateant*. Sed turbarunt hanc tranquillitatem ea tempora, quorum difficultas & miseria iam inchoata ad eam perducta est tristitiam & calamitatem, quam experitur & cum qua conflictatur ætas nostra. Qui autem finis futurus sit, nulla coniectura humana potest prospicere.

XIII. Solebat Mutianus, tum quidem canus, (nam annis grauis erat quum ad eum primum veni) adolescentibus studiosis literarum, qui ad se visendum accessissent, proponere materiam, quam scribendo elaborarent, & scripta postea emendare, & sæpe non admodum digna collaudare, vt hoc pacto ad diligentiam & curam studiorum excitarentur animi

mi illorum. Erat autem festiuissimo ingenio, & liberalibus iocis admodum delectabatur. Epistolas ad amicos scribebat libenter. Genus autem erat sententiosum orationis & incisum : quale est Politianicum, ad quod in Italia erat assuefactus. Rhythmis etiam ludebat interdum, quum quidem versus faceret sat bonos. Diuulgati quidam fuerunt de improbitate simulantum religionem. Sed ipse neque edidit suorum quicquam, neque reliquit (affirmante etiam hoc optimo & doctissimo viro Io. Marcello Regiomontano, qui adfuit quum moreretur, & in sua omnia illius potestate habuit) quod edi recte posset, & omnino se sua publicari nolle aiebat. Ac mihi percontanti aliquando causam, quamobrem tam pertinaciter premeret scripta sua, quum omnes arbitrarentur, & ego quoque putarem, eum scriptionibus operam dare ; ita fieri respondit, quia sua sibi nunquam satis placerent, ideoque malle se frui aliorum stultitia. Erat nimirum ei persuasum, non facere sapienter illos, qui sua scripta facile emitterent in lucem. Præsertim quum illis temporibus non emitterentur, sed euolarent, vndique omnis generis libri. Mortuus est Mutianus Gothæ, rebus turbulentis in Germania, in dolore, ut apparebat, amissæ dignitatis & diminutæ

nutæ rei familiaris, anno Christi Iesu MDXXV. tertio Cal. Aprilis, vir magnus, & probitate, integritate, virtute, sapientia, humanitate excellens, decus & ornamentum eorum, quibus cum vixit, & patriæ, immo Germaniæ totius, & sæculi sui.

XIV. Sed vt ad Eobanum reuertar, rediit ille Erphordiam, & tum etiam Mutiano, qui antea quoque adolescentem illum fauore profecutus fuisset, quemque ipse in quodam carmine, Eobanus formatorem studiorum suorum nominat, & de quo fecerat versum, qui in ore erat tum plurimis :

Hesse puer, sacri gloria fontis eris.

Huic igitur Erphordiam ille reuersus non modo carus, sed admirationi quoque fuit. Sæpe igitur ad eum scribebat, sæpe ab eo literas accipiebat, sæpe excurrebat Gotham Eobanus, vt cum Mutiano versaretur. Audiui tamen de Mutiano, offensum se aliquando fuisse Eobani moribus in potu : tum enim erat interdum in hilaritate ferocior ; non vt læderet quenquam, sed vt esset paullo sæpe incogitantior, & minus circumspectus, atque animo remissiore. Neque quisquam tamen vnquam comperit dedecus eum etiam in ista lætitia admisisse, vel dicto vel facto. Verum senescen-

nescentis illius grauitas iuuenilem huius exultationem interdum non moleste quidem tulit, sed improbavit tamen. Præsertim quum in flore Eobanus ætatis, & vita liberiore, etiam amare cœpisset. Amauit autem caste virginem Erphordiensem Catharinam, quam postea uxorem duxit, & cum qua multis annis maritus vixit, & ex qua vtriusque sexus numerosam sobolem suscepit. Ea habebat patrem honestum in ciuitate sua hominem, (illarum ædium dominum, quas postea Georgius Sturciades emit, & Eobanus suis scriptis exornauit ac celebrauit) qui moribus aliquanto erat durior, & senecta ætate amarior. Accidit, vt de hoc apud Mutianum quereretur Eobanus; tum ille hoc modo respondit:

Si tibi nata placet, ser patris imperium.

Postea & focerum ille æquo animo tulit, & cum coniuge amanter vixit. Et docuit bonas literas Erphordiæ admodum tenui stipendio: quum neque tum rebus omnibus, quæ ad victum & cultum sunt necessaria, vilibus opus esset multo, neque ipse partem vel minimam curæ impenderet faciendæ rei.

XV. Non ita multo post ego annos natus octodecim, qui Iesu Christi annus fuit MDXVIII, Erphordiam & ipse me contuli, quum Lipsiæ vixissem annis quinque, & duobus

bus operam dedissem Richardo Croco Britanno, qui primus explicuit doctrinam Græcarum literarum in Germania, fuissetque etiam Mezleri & Petri Mosellani auditor. Hanc famam quum attulissem mecum Erphordiam, qui concursus ad me adolescentum optimorum complurium factus, quaque beneuolentia me plerique omnes complexi sint, tu optime nosti, Adame, omnium studiosissimus nominis mei. Sed in meum aduentum incidit discessus Eobani, qui tum adiuncto sibi comite vno, iuvene egregio, bonarum artium Magistro, Bertero, rebus atque temporibus non admodum expeditis & secundis, iter ingressus fuit, vt Erasmus videret ac conueniret in Belgio tunc degentem. De scriptis enim illius, quæ tum crebra prodibant, mirifica cupiditas erga hunc & ingens fauor extiterat omnium. Applaudebatur, quasi in scena, studiorum actori scito & artificioso. Quumque eum admirabantur & magnificiebant & collaudabant omnes, qui a Musis alienos esse se perhiberi nollent; tum congratulabantur sibi eam felicitatem sæculi, in quam delata esset vita ipsorum. Quod si quis ab Erasmo epistolam ad se elicere forte posset, illa vero ingens haberi gloria & hic præclarus triumphus agi. Si autem accederet veluti cumulus colloquii & congressus

Era-

Erasnici, & vt ad eum alicui aditus pateret ;
tum demum sibi in terris is, cui hoc contigerat,
beatus videri. Credebatur enim, vt erat, politi-
oris doctrinæ ille esse princeps, & in vno omnes
contra aduersationem barbariæ satis opis præ-
fidiique esse statuebant. Itaque interpellati-
ones aduentantium nonnihil tædii & molestiæ
illi obiiciebant, præsertim scriptionibus diuer-
sis occupato : quæ tum a librariis magnopere
expetebantur, quum nulli libri libris Erasmi-
cis magis essent vendibiles. Venit igitur ad
Erasinum Eobanus, apud Grudios tunc com-
morantem, & versibus compositam elegantis-
simam epistolam ad ipsum ex diuersorio misit ;
quæ cum Hodoeporico, quo describeretur iter
illud, & aliis quibusdam, postea edita fuit. E-
rasmus quidem, siue occupationibus aliis abs-
tractus, seu propter humilitatem aduentus
Eobanici, qui cum vno comite pedes accessis-
set, siue in tanta salutantium frequentia : non
ille quidem despexit Eobanum, sed neque
tribuisse ei tantum iudicio suo, neque tam of-
ficiosus in ipsum fuisse existimabatur, quam
pro sua humanitate & Eobani studio esse de-
buisset. Etiam postea laudauit Erasmus Eo-
banum remissius. Non, quod iniquior illius
famæ esset, sed quod non arbitraretur, vt opi-
nor, cum indigere prædicatione sua, qui per se

magnus esset, atque illos potius extollendos or-
nandosque, qui vel nullam vel non magnam
dignitatem parare possent ipsi sibi. Eobanus
quidem & Erasmo diligenter & prolixè gra-
tias egit, & nomen illius postea maximopere
defendit, & quum a Leo Erasmus carperetur,
autor fuit ut pro illo Erphordiani eruditi
contra Leum scriptis suis propugnarent.

XVI. Ad Eobanum de Erasmico itinere
reuerſum, tu me, Adame, ut recordari potes,
quum adduxisses, & pro me contra illum, ne-
ſcio quid libere tunc dicentem, de iis quæ ad
eum fuerant falso delata, multa aliquanto
etiam, quam ipse, liberius locutus eſſes: tum
quidem aditum ad amicitiam ipsius, apud
quem plurimum valeres, & cui vnice eſſes ca-
rus, mihi patefecisti. Sed quum postea me-
um ingenium certius perspexisset Eobanus,
sua sponte me adſciuit in gregem suum, & pro
captu & ætate mea plus honoris habuit mihi
initio statim quam deberetur, & quo diutur-
nior consuetudo & familiaritatis vsus frequen-
tior inter nos intercedebat, eo coniunctio ar-
ctior & maior necessitudo extitit, donec veræ
& deinceps inuiolatæ amicitie societas, in
consensione & concordia & similitudine per-
petua studiorum, cum maxima caritate con-
sum-

summata fuit atque perfecta. Tam autem honorifici tunc fuere sermones Eobani de Erasmo, tam plena prædicatio, tanta amplificatio vtriusque illius, ut nullius non animus cupiditate visendi Erasmum incenderetur: quidam etiam ut commouerentur ad idem iter statim ingrediendum, & proficiscendum eo usque, ubi conuenire possent Erasmum, qui in Belgico non vno loco maneret. Inter hos præcipui fuere iuvenes egregii & multis rebus ornati, Iustus Jonas & Caspar Schalbus. Quorum alter annis aliquot post mortuus fuit, tum etiam ætate grandior. Jonas autem ingenii bonitate, & assiduitate studii, virtute doctrinaque & humanitate excellens, ea, quam sibi peperit, claritate nominis nunc etiam viuus fruitur, ita ut indies ab illius pietate & sapientia existimationi amplissima aliquid accedat. De quo minus dicendum nobis est, ne assentationis aliquam suspensionem incurramus. Etiam Ioannes Draco Francus ad Erasmum tum profectus fuit. Qui & ipse multis & variis difficultatibus exercitatus, pietate & constantia celebre nomen consecutus est, quum literarum & artium bonarum scientia iam tum cederet nemini. Vterque horum summus amicus fuit Eobani. Sed Jonas facile inter omnes amicos Eobani principem locum

cum tenebat. Itaque viuebant coniunctissime familiarissimeque, vna crebro deambulabant, crebro domi confabulabantur, crebro etiam cœnitabant.

XVII. Erat familiæ cuiusdam religiosæ (Georgiana nuncupabatur) curator Erphordix vir humanissimus & valde prudens neque illiteratus, cui Henrico Vrbano nomen. Is in Eobanico grege non ferebat postremas, ac sæpe illum cum suis accipiebat, vt res erant ac tempora, fatis prolixè. Augustinianæ autem Iohannes Langus Theologus, non modo amicum habebat Eobanum, sed doctrinæ atque ingentii etiam admiratorem. Huic quum more scholastico autoritas publice docendi solenniter conferretur, inuitatus ad eam festiuitatem Lipsia aduenit Petrus Mosellanus, & secum adduxit adolescentem tum suauissimis moribus, & literarum eruditione eximia præditum, Petrum Suauenium. Apud hos perpetuo Eobanus fuit, quamdiu Erphordix manserunt, & quum de omnibus studiis differendo, tum hilariter vna viuendo, hoc est consecutus, vt ab his ad opinionem iam de ipsius excellenti ingenio & doctrina præstante conceptam, summæ humanitatis & singularis virtutis persuasio adiungeretur. Quorum alter is vir fuit, vt nemini fere est obscurum, qui fan-

sanctitate vitæ & cognitione & scientia bonarum artium & literarum non facile ulli cederet; alter adolescens genere nobili, & quem natura sua ad magnificos conatus duceret, difficile & arduum virtutis iter ingressus, ad dignitatem & opulentiam maximam peruenit. Cum Georgio Spalatino, sanctissimo & politissimo viro, veteris necessitudinis singularis Eobano vsus intercedebat, vt & cum aliis quibusdam, de quibus mihi ignotis quæ narrarem non habui. Habebat inter suos & popularem, quem valde diligebat, Io. Ortum, integerrimum & spectatissimæ fidei hominem; & perquam eruditum & festiuium iuuenem, Nosenum Silesium, cum quibus libenter & multum versabatur. Christophorus Hacus, qui melicis carminibus faciendis præstabat æqualibus omnibus, & Valentinus Capella iuuenis ingeniosissimus & eruditissimus, vna cum Groningo & Eccilio, ætate erant Eobanici, & ad se sæpenumero eum abducebant. Sed ex omnibus familiarissime complectebatur Martinum Hunum, ad quem Medicinæ encomium, in versus de Erasmica oratione translatum, conscripsit; & affectione præcipua in prima adolescentia cognitum constantissime diligebat Petreium Aperbachum Erphordicensem, iuuenem ingenii cultu & eruditione

doctrinæ excellentem, sed ægrum pedibus & valetudine aduersa perpetuo laborantem, qua impeditus eo, quo natura studioque impellebatur, progredi non potuit. Hunc, quum per iocum apud suos se regem faceret, *Ducem* ipse solebat appellare : significans proximum locum a se quasi, in gubernatione regni musici, illi deberi. Sed hoc vnde natum sit, vt *Regem* se nominaret, & ipse ostendit carmine quodam, & ego breuiter exponam. Optimus & doctissimus vir Iohannes Capnio, in quadam ad ipsum epistola, alludens ad Hessi nomen *ἑσῆνα* eum appellauerat, & versum adduxerat Callimachi de Ioue, quem hic negat Hessena Deorum forte esse factum, sed virtute & præstantia sua. * Ex eo in sodalitiis quum Rex *Hessius* vocitaretur, hoc ioco postea utebatur, vt se Regem & alios regni proceres faceret. Nullo enim non modo cruento, sed ne dentato quidem dicto, ludere Eobanus solebat. Neque reperiatur inter omnia scripta ipsius vllum, quo lædatur fama, aut nomen proscindatur alterius. Nisi quod nescio quid in Leum indignationis euomuit suæ, & quendam poeticantem Theologum aliquanto immanius retudit elegia

* Hymn^{us} in Iouem v. 86.

Οὐ γὰρ θεῶν ἑσῆνα πύλοι θεσιν,
Non se deorum regem forte constituerunt.

gia quadam. Quum enim Martinus Lutherus accersitus in Vangionas (vbi se coram Imperatore Carolo V, qui primum ibi conuentum habere instituisset, sistere deberet) Erphordiam illo itinere forte transiret ; Eobanus & ei, cum Croto Rubiano, qui tum administrationi academicæ præerat, aliisque compluribus honoratis viris ac iuuenibus eruditis, obuiam processit, & biduo, quo Erphordiæ Lutherus mansit, cum eo suauissime versatus fuit. Quumque placuisset illas res & actiones describi, interque elaborationem incidisset in manus ipsius libellus editus ab Emsero, quo Lutherum ille maledictis incesse-
ret, & præpositi essent versus scripto perridiculi & mali ; commotus fuit iam incitatus musico impetu animus Eobani, vt eum, qui Poeta esse vellet, Theologum tum paullo grauius acciperet & tractaret inclementius. Hæc sunt, ac præterea nihil, quæ vel ioco vel serio ad alterum exagitandum scripsit aut dixit. Etiam a Philippo Melanchthone aliquando rogatus, vt optimorum versuum pulcherrima opera elaboraret, & componeret rem deterrimam & turpissimam, & sibi hanc operam daret ; primum miratus & requirens, quidnam rei res illa esset ? quum audisset Calumniæ descriptionem a Philippo expeti ; se quidem facere,

non posse dixit, quin ei gratificaretur, itaque hunc laborem se esse suscepturum, quamvis argumentum esset alienum a moribus & ingenio suo, qui neque ioco neque serio, neque monendi aut præcipiendi etiam causa, soleret insectationes aut reprehensiones usurpare. Usque adeo a toto hoc genere inquirendi in aliquos, & vitia aliorum notandi ac exagitandi, animus & voluntas Eobani abhorrebat. Nam post multos annos, quum vna Norimbergæ viueremus, quid consilii agitare cœperit, quum ad se tum me defendendum, quod vterque indigne tractari videretur, a quo minime deberet, quoniam repressus conatus fuit, silentio tegam, quum nostra tum eorum, ad quos illa res pertinet, causa.

XVIII. Sed ut redeam ad institutum, Eobanus in hoc sodalities, quod augebant Iustus Menius, cui neque studio veritatis & bonarum artium, neque laude officii facile reperires quem posses anteponere; & is cum quo ego fraterno amore coniungebar, contubernalis meus Ioannes Francus, qui *Portunus* a nobis cognominabatur; & Megobachus, neque corpore neque ingenio admodum dissimilis Eobano; item Iacobus Micyllus; & Antonius cui *Musa* Eobanus cognomen fecit, vir postea in re ecclesiastica illustris; & pueri adhuc Valen-

lentinus Paeus, cuius nunc etiam pietas, doctrina, eruditio celebris est; & Daniel Stibarus, quo neminem cognoui vnquam flagrantiorē cupiditate discendi, quum innumera-
 bilia ad perseuerandum illi impedimenta ob-
 iicerentur, quique longius dignitate progres-
 sus, voluntatem tamen erga studia & studiosos
 bonarum artium constantissime seruat; & alii
 complures, quibus incensis optimarum artium
 studiis referta erat Erphordiana Academia: in
 hoc igitur cœtu ille tum, virtute, eruditione,
 facultate, scientia literarum, dignitate excel-
 lens, optimos autores linguæ Latinæ explican-
 do operam nauabat discere volentibus. Al-
 liciebet autem fama nominis Eobanici inuita-
 batque permultos, vt in Academiam Erphor-
 dianam vel discendi causa migrarent, vel ad
 visendum saltem Eobanum excurrerent. In-
 ter quos venit eo anno, quo post congressum
 celebrem illum Lipsicum Mart. Lutheri & Io.
 Eccii (qui, autore illustrissimo Principe Geor-
 gio, ad controuersandum publice Lipsiam ve-
 nerant) pestilentiae contagio Lipsiæ infesta
 fuit: tum igitur ad nos venit æqualis, & qui fu-
 isset aliquando condiscipulus & contubernalis
 meus, Sebaldus Munsterus Noricus, qui postea
 summos honores studiorum consecutus, Iu-
 ris publici doctrinæ præfuit Wittenberge.

Quam-

Quumque pietate, & integritate, & probitate, fide, virtuteque excelleret, sæpe nominis Eobanici memoriam renouare honorifica mentione, & prædicare solebat, se vnum omnium illum cognouisse, quum eruditione literarum præstantissimum, tum minime opinionis aliorum cupidum, tum vero ab omni furo & simulatione remotissimum, & eum qui neminem ab usu humanitatis suæ excluderet.

XIX. Sed Eobani, quo tempore quasi decurrens spacium suum ætas vigeat, & incitabatur studium, eo hæc studia, bonarum inquam literarum & humanitatis, malignius augebantur, horumque magistri atque doctores negligentius subleuabantur ab iis, quibus solis ea res tum in manibus erat. Ac Maternus quidem, insignis illa tempestate Erphordix Theologus, non nihil contulit ad culturam harum. Sed ad quem Erphordiam me primum contuli, Georgius Pætus Vorchemius, vir is de cuius pietate & præstantia si commemorare vellem, quæ utriusque nostrum, Adame, nota sunt, iam nouum argumentum oriretur, & aliud scriptum texendum esset. Ille vero tum quicquid potuit clam palamue, suis & aliorum viribus, facultatibus, gratia, autoritate, facere & moliri, in eo neque labori & studio peper-

pepercit, neque inuidiam fugit, neque odium pertimuit, quo minus ea ageret, consuleret, reperiret, institueret, quibus professio optimarum literarum atque artium vndique fulciretur atque sustentaretur. Qui si diutius vitam conseruare potuisset, (dicam fortasse beneuolentia erga illum copiosius, sed vere me dicturum esse existimo) & staret illa schola, & dignitatem ac nomen retineret, quæ quam ruinam fecerit, non possum sine maximo dolore cogitare. Erat Crotus, cuius paullo ante feci mentionem, ab antiquo notus Eobano, vir doctus & egregius, sed quum ingenio vario, tum mutabili sententia. Is magistratu functus regendi Academiam, Fuldæ primum concessit, & in Borussiam postea discescit. Indeque reuersus alienauit a se multorum studia, nescio qua de causa, vel nolo potius perscribere, ne quem viuentem colui, ei mortuo obtrectare videar. Degebat tum (vt significauimus) in familia Augustiniana cognitione utriusque linguæ instructus, & varia ac multiplice doctrina præditus, Iohannes Langus, cui Eobanus fuit amicissimus. Hic postea in confusione omnium solus sua diligentia, studio, industria, & ecclesiasticam rem & scholasticam sustinuit Erphordiæ, vna cum Georgio Sturciade, vsque ad annum fatalem, non modo ipsis sed Germa-

mania, quo vterque sibi quidem neque præ-
mature neque infeliciter, sed Reipublicæ in-
tempestiue & luctuose decessit.

XX. Hic Georgius Sturciades singulari me
amore, quum primum Erphordiam ex Italia
rursus venisset, complexus fuit, vt a natura
ipsa nos quasi copulari appareret, meque rece-
pit in ædes suas, quas de soceri Eobani hære-
dibus emerat. Et multis postea beneficiis au-
xit ornauitque iudicio suo, quum tantum tri-
bueret tam iis quæ a me disputabantur, quam
commendationibus & testimoniis, vt me non
vereretur sæpe grauisimarum rerum autorem
nominare, & nihil vnquam de altero petenti
negauerit, neque si quid a me affirmaretur du-
bitando reddiderit incertum. Cum hoc de-
signatus fui & mox renunciatus decimus no-
nus secundo, vt opinor, loco Magister opti-
marum artium, declarante iudicium de nobis
eorum, qui suffragia tulerant, Eobano Hesso,
qui tum luculentam habuit orationem, vt fert
mos Academiæ. In renunciatione Stur-
ciades non adfuit, reuocatus in patriam iis ne-
gotiis, quæ in aliud tempus differri aut ne-
gligi non deberent, neque possent. Petiuerat
vna hunc honorem Antonius Niger, lauda-
tissimus inuēnis, cuius nunc splendor nominis
& famæ claritas multis nationibus innotuit.

Sed

Sed huic quorundam tum ieiuna maleuolentia quum maxima ipsius gloria obstitit, neque quicquam causæ reperiatur, quam quod bonarum artium & studiorum humanitatis avidior, & in his colendis fuisset liberior. Aliam igitur ingressus viam, nos petitores avertit, & frementibus inuidis consecutus id fuit quod hi negarant, aliquanto quidem, vt ita dicam, pomposius & splendidius, quam ipsi conferre potuissent. Hic annus fuit Christi Iesu MDXXI incipiens. Iunxit autem amicitiam cum Eobano Sturciades quum Erphordiam venisset, quam postea sanctissime & fidelissime conseruauit atque coluit. Sed tum in Italiam rediit, & abduxit secum Euricium Cordum, qui adiutus a Sturciade autoritate publica ibidem Doctor Medicinæ renunciatus fuit. Eo anno & nos Erphordiam reliquimus, iam disidiis & tumultuatione quatefactam, & pestilentiae lue infectam. Reuersus autem ex Italia denuo Sturciades, quem se erga Eobanum gesserit, de Eobanicis scriptis potest cognosci. Is enim erat Eobanus, qui merita aliorum non modo tegendo non obliterare, sed prædicando etiam amplificare soleret. Quamuis autem hæ res fortasse exiles & paruæ esse videantur, tamen de Eobani & Sturciadæ vfu quum caritatis singularis, tum fidei, liberali-

ralitatis, memoriæ, exempla pulcherrima relictæ esse statuo.

XXI. Et si autem multis de causis abhorret animus ab indicatione fortunæ Eobanicæ, quæ ingenio, doctrina, virtute, studio illius, reuocanti forte ad humanæ rem intelligentiæ rationes, indigna fuisse videatur; tamen postulat fides mea, ut non prætereatur silentio id quod quum verum sit, tum apud prudentes diminuere existimationem viri nequeat. Ut enim alia innumerabilia quum disputata sapienter, tum gesta præclare, ad paupertatis gloriam & ignominiam diuitiarum, taceam: quid Solonis (cui in procliui esset principatu ciuitatis, florentis opibus ac viris, potiri, si vellet) elegia canat videamus, de nostra quidem, si placet, conuersione. Sic igitur ille:

*Diuitiis auget multos fortuna scelestos,
Atque bonos nulla commoditate
leuat.*

Nos

* Versus Solonis græci sunt apud Plutarchum (qui alias inter Theognideos referuntur) in Vita fol. 79.

Πολλοὶ γὰρ πλεῖντοι κακοὶ, ἀγαθοὶ δὲ πένοντα.
Ἀλλ' ἡμῖς αὐταῖς ἐ διαμεψόμεθα
Τῆς ἀρετῆς τὸν πλεῖταν. ἐπεὶ τὸ μὲν ἔμπεδόν ἐστι,
Χρήματα δ' ἀνθρώπων ἄλλοτε ἄλλῃ ἔχει.

*Nos tamen haud ducemus opes virtute
priorēs,*

*Hæc est certa, illas fors regit insta-
bile.*

Quum igitur Eobani eo ferme tempore admodum in angustum cogerentur copiæ, ut ait Terentius, & publicus respectus penitus illi subtraheretur, & priuati pauci (inter quos principem locum tenebat Sturciades) subleuarent hominum doctum probumque & innocentem, & quod erat caput, amicum, deliberantibus his de salute propemodum quum ipsius, tum liberum; placuit quaestuosæ eum arti cuiuspiam operam dare, non iam famæ amplificandæ causâ, sed ne fame laborare mox cogeretur. Atque autores illi fuerunt amici, ut medicinam disceret, quoniam priores conatus forenses parum successissent. Hoc ille, fretus potissimum opè & adiumentis a Sturciade, cupidissime amplexus fuit, & statim libros comparauit, & illas res studio maximo cœpit cognoscere. Etsi autem ad factitandam artem progressus non fuit, hoc tamen studium, quamdiu vixit, coluit, & librorum de illa compositorum lectione admodum fuit delectatus. Tum igitur Eobanus, quum propemodum a solo Sturciade retineretur Erphordiæ, ibi hæsit ut potuit, conflictatus cum multis aduersis,

ad annum vsque Iesu Christi MDXXVI. Quo, autore & conciliatore Philippo Melanchthone, qui & amabat & admirabatur & magnificiebat & venerabatur Eobanum eximium in modum, Norimbergam venit, ab illa ciuitate accersitus perquam benigne. In qua vna cum illo ego & Micaelus Rotingus viximus annis circiter septem, & eas literas atque artes, quas didiceramus, docuimus, sine specie quidem dignitatis, sed cum aliquo certe non vulgaris commoditatis fructu. Id quod ab aliis iam statui & dici par fuerit. Præsertim quum rationes nostræ, quasi gestæ prouinciæ, relatæ sint & extent.

XXII. Præerant tum Noricis ludis, omnes optimi & doctissimi viri, sed duo duobus primis, Iohannes Chezimanus natus, ad puerilem institutionem, qui illi ciuitati moriens ingens sui desiderium reliquit; & Sebaldus Heiden, qui, quum hæc scriberemus, suo adhuc loco laudabiliter curabat. Cum his vniuersis Eobano & nobis iucundus consuetudinis vsus intercedebat. Hoc tempore quo Norimbergæ Eobanus mansit, multa quæ ante edita fuerant recognouit & iterum edidit, multa nova fecit carmina, quæ omnia sunt in medio. Attentius etiam tum, quam ante, Græcos auctores legere cœpit: quumque ei in primis Theocriti

criti Bucolica arriderent, in illa conuertenda Latine incubuit. Quem conatum omnibus ego rebus adiuuare studebam. Nam initio multa obiiciebantur illi, quibus impetus animi retunderentur: ipse vero, si quid non celeriter procedebat, haud consueuerat vrgeré. Nihil faciebat omnino anxie aut solícite, sed tantum sequebatur ductum naturæ & ingenii incitationem. Itaque abiecta semel non fere solebat resumere, neque interrupta contexere. Neque non animaduerti a lectore attento hoc facile potest, quod continuo cursu æquabiliter defluant Eobanica omnia, neque vsquam quasi ad considerationis sollicitæ obices refringantur. Itaque noster Milichius dicere solebat: Eobanum solum omnium, quos nouisset, simul facere versus & scribere: quum alii prius commentando modo has modo illas partes absoluerent, & ita tandem scriberent aliquid; alii prius scriberent, & fingendo atque corrigendo demum facerent aliquid qualiumcunque versuum. Quæ quum ita se habere experirer, non nihil negotiû fiebat mihi, etiam calliditatis aliquid vsurpandum erat, ne Eobanus voluntatem perseuerandi in traductione Theocriti deponeret, neue ardor animi illius restingeretur: ita enim profecto opus illud luculentissimum intercidisset, quod

absolutum & celebrat ingenium atque facultatem Eobani, & studiosis bonarum artium ad fructum eruditionis percipiendum propositum est. In quo perficiendo & cohortationem & operam meam aliquid præstitisse lator.

XXIII. Quum autem ita peractum sit illud prope septem annorum tempus, quod consumsit Norimbergæ Eobanus, ut me ille valde diligeret, & ego eum, ut par erat, observarem: quasi perpetuo vna nos futuros esse certum esset, ita in securitate quadam postea sensi fastidium tacite obrepisse mihi eius boni, quod haberem in manibus. Ac nunc quoque intelligo in ætatis iuuenilis leuitate, vel fuisse sensum præsentis felicitatis meum hebetiorem, vel hanc certe minoris me fecisse, quam debuerim. Itaque quum iam carendum esset consuetudine Eobani, tum magis cognoui quantum iucunditatis mihi esset creptum, quam copiam oblatae commoditatis animaduenteram, dum frui illa concedebatur. Etsi autem non ea, qua par fuit, cupiditate videor mihi persecutus esse occasiones familiaritatis & assidui usus amicitiae Eobani, & multis in partibus fuisse negligentior: tamen, quamdiu in illa vrbe simul viximus, nihil ego sine illo in studiis cõslandum moliendumue
aut

aut edendum duxi, nihil ipse suscepit, de quo non mecum communicaret, magis quod conjunctionis nostræ suauitate delectaretur, quam quod opera ei nostra esset opus. Et si ille quidem mihi tantum tribuebat, quantum ipsius epistolæ & alia scripta loquuntur. Inter quæ vnus totus liber carminum mihi ab illo dicatus, & relatus in Syluas eius, ostendit & quantum me (vtinam meo merito) dilexerit, & quam honorifice de me senserit, & quanti fecerit necessitudinem nostram.

XXIV. Habebat autem complures alios, a quibus colebatur, & cum quibus hilariter vivere, & apud quos libenter esse consueuerat. Ex quibus vnus vicinus ipsius Vilhelmus Musicus assiduus comes erat Eobani, quotiescunque hoc agebat, vt vel prodeambulando, vel ad sodalitium se conferendo, curis animum relaxaret, & studiorum defatigationi repararet. Thomæ Venatorii consortium erat Eobano pergratum. Nam & simplex in homine libertas huic probabatur, & communitas studiorum placebat. Thomas enim & ingenio acri erat, & industria studii sui opera doctrinæ edebat luculenta. Ex cæteris, qui doctrinæ sacre præerant, & venerabatur & diligebat maxime Venceslaum Lincum, quum propter pietatem & studium veritatis tum hu-

manitatem atque candorem, quæ in illo viro omnia erant eximia. Vincentius autem Ob-
sopæus, non diu postquam nos venissemus Norimbergam, discessit in viciniam, vbi munificentia Marchionis Georgii illustrissimi Principis & ipse otium in studio literarum traducendum nactus fuit. Bilibaldo Pircamero valetudo obstabat, quo minus crebro ad se accerferet & inuitaret Eobanum. Hieronymus autem Pamgertnerus ex Senatoribus, vt in studiis optimarum disciplinarum & artium educatus, quam humanitatem (quæ erat summa) quum natura ei contulerat, tum addiderat institutio, ea Eobanum complectebatur, oranium cura & respectu dignissimum, & cui subleuatione & auxilio esset interdum opus: quod neque peritus gubernationis domesticæ, neque impendens vllam cogitationem rei familiari vel stabiliendæ vel augendæ, neque sollicitus de patrimonio constituendo, sæpenumero plagam acciperet vel ab iis quibus fidem temere habuerat, vel interdum incircumspecte cum cautis & attentis contrahendo negotia, vel etiam debitis inconsiderate sese implicando. Sed amicorum studio fiebat, vt publica liberalitate, quoties hærebat, explicaretur: quam ipsum sæpe deinde magnifice rædicasse, & nonnunquam in aliis desiderauit.

rauisse comperimus. Dabat tunc operam Norimbergenſi ciuitati Iohannes Mylius Iurisconſultus, vir iuſtitia & prudentia nemini ſecundus, doctrina & virtute cultuque religionis multis prior. Apud hunc ſæpe conueniebamus, & de illius ſententia inſtitutum ſodalitium fuit. In quo præcipui erant ipſe Mylius, Micaelus Rotingus collega noſter, Georgius Hopellus ſcriba primarius Senatus & ſummi viri Lazari Spengleri collega, ego. In orbem autem conuertebatur acceptio, quæ erat potus ad veſperam cum bellariis. Proponere autem materiam oportebat eum, cuius partes erant vt acciperet alios, de qua tum quæreretur & diſputaretur: de hac ubi verborum ſatis feciſſe videbamus, tum reliquum tempus iocis, & familiaribus colloctionibus, atque interdum ludicris impendebatur, dum diſcederemus quiſque ad ſe. Prodeambulationes autem erant quum aliis vicinis locis, tum ad vnum in Silua Norica fonticulum, ad lapidem vnum ferme vrbe diſtanti, qui Eobani verſibus non minus perenni aqua manabit, quam Athenis quondam ſempiternam. in arce olea viriditatem tenere, aut palma in Delo non exareſcere potuit. Hac fere ratione eos annos, quibus Norimbergæ durauit coniunctio noſtra, abſumſimus; præbente

illa ciuitate sedem & hospitium Musis Eobanicis perbenigne & comiter. Vtquamuis illius extent & pietatis præclara opera, & beneficentiæ in alios larga munera; tamen vel hoc nomine, quæ vim & atrocitatem grassationis & populationis, & sæuitiam hostium experiri tam immanem in modum debuerit, indignissima esse videatur. De quo impediore dolore & lacrimis, ne plura scribam. Etiam hoc magis agendum esse intelligo, vt quoniam ætas nostra in hunc fatalium mutationum articulum incidit, ad ea quæ acciderint ferenda, potius nos paremus, quam vt tristitiam euentuum reddere velimus acerbiorẽ querelis nostris. Etsi profecto rabies sæculi huius, & mundi furor, qui indies ingrauescit, non potest non commouere indignationem vel moderatissimorum hominum. Sed hæc quamuis moerentes & animis conturbati omittamus, & ad Eobani mentionem reducamus narrationem.

XXV. Quum fere septennium confecisset Norimbergæ, sollicitatus crebris literis & magnis pollicitationibus Eobanus ab Erphordiensibus amicis, illo reuerti decreuit, quo retraheretur desiderio puerilis & iuuenilis vitæ, & recordatione laudis quoque ac decoris, quod ætate constantiore in illa Academia gesserat.

Mo-

Mores etiam ciuitatis illius admodum ei placebant. Sed haud scio an nihil impulerit illum magis ad reuersionem hanc, quam Langi & Sturciadæ semper expetita coniunctio, et si Groningo maxime & ipso delectabatur. Rediit igitur Erphordiam anno Iesu Christi MDXXXIII. quo postea æstas pestilens fuit, quam in vicino vico cum familia nos vna cum secuta hyemē transeginus. Venit autem illo cum spe eiusmodi, cui euentus non respondit. Et tamen factum est amicorum studio & cura & diligentia, vt satis commode ibi degeret annis fere quatuor : & vt ad illam scholam collapsam non modo instaurandi viam monstraret, sed rationem etiam inchoaret, quam tamen sequi vel noluerunt vel non potuerunt ii, penes quos administratio esset scholæ illius. Docuit illic publice priuatimque, cum vtilitate aliorum & sua laude multa. Multa etiam scripsit, & de Græcis versibus quosdam præclare fecit Latinos.

XXVI. Post quadriennium inuitatus clementissime a Philippo, illustrissimo Hessorum Principe, Marpurgum commigravit, quum neque eum schola Erphordiana amplius liberaliter acciperet, & anni ingrauescerent, & liberi crescerent ætate & numero, & patria quoque dulcedine quadam sui insita omnibus ad

sefe reuocaret occultis blanditiis ciuem suum. Perfecerat autem Princeps Philippus (quod tu melius nosti, Adame, non minima pars rerum illarum, quam ego) vt omni genere doctrinæ celebres & spectati Marpurgi congregarentur, quo in loco consecrato piis Musis, muniticentiaque sua stipendiis non spernendis constitutis, honeste & non incommode vitam ducere possent, in studiorum bonorum cultu, & virtutis ac sapientiæ doctrina. Ibi Eobanus & reliquum ætatis breue tempus peregit, & præclara opera multa elaborauit, ingenii bonitate, & industria ingenii sui, inque primis totam Homeri Iliada conuertit in versus Latinos. Opus autem egregium atque præclarum autore & hortatore Philippo Melancthone inchoare cœperat, vt ad Christianum ritum Fastorum libros conscriberet; cuius vix paucos initii versus absoluit, & hanc decedens palmam reliquit in medio eruditæ seculi ætatis, quam qui amico nostro Iohanni Stigelio præripiat, persuasum mihi est futurum esse neminem: a quo hi libri iam pridem expectantur, exituri propediem, vt speratur, in lucem, & nostris temporibus & autoris famæ gloriam & claritatem conciliaturi sempiternam. Sed nihil est quod in tota vita sua præstiterit maius aut melius, quam quod Psalmos

Daui-

Dauidicos religiose & erudite in Latinas elegias transtulit : primum quidem Erphordia, sed de nouo & maiore cum cura & assiduitate, Marpurgi, vbi & præclara argumenta quaternis versibus comprehensâ præposuit singulis Psalmis, vt prodierit tum vere sacrosanctum opus, omnibus, vt dicitur, numeris absolutum. Quo vir pietate insignis & casto pectore & religioso studio celebrauit æternum Deum, & omnibus non profanis neque vācordibus, occasionem de rebus diuinis cupide & ardentem commentandi præbuit. Qui est ad Deum cultus summus, & maximus ad homines fructus. Hoc igitur opus & hic labor est, quo Eobanus sibi spem singularem gratiæ ac beneuolentiæ diuinæ comparauit, & admirationem sui ac caritatem reliquit posteris : quorum nemo est, nisi improbus & malus, aut imperitus & barbarus, qui non illum hoc potissimum nomine amet & veneretur.

XXVII. Fuit autem non minus Principi gratus præsens Eobanus, quam studio ille habuerat, vt sibi hunc adiungeret, nec iocos & seria cum ipso miscere dubitabat. In primis de simplicitate & candore & studio veritatis amans Eobanum, quod iudicium ipse posset facere, quum de eruditione doctrinæ aliis affirmare.

mantibus crederet. Magnopere delectabatur Eobanus latrunculorum ludo, quo ferunt sæpe Principem suauiter cum Eobano lusisse, quum iracundiam illius commoueret, circumventi & inclusi, dum in celeritate minus caute produceret illas calculorum copiolas. Vere enim ludebat Eobanus, neque considerationi aliquid diligentia impendebat, neque tempus terere cogitando sustinebat. Itaque nihil erat facilius, quam, si quis calliditatis aliquid vsurparet, insidiis eum vincere. Tum igitur quum cernebat se hæere, commoueri vehementer; sed ita vt simul cum amissa victoria illa perturbatio resideret, vel potius abiret. Sed a iocis ad seria redeamus.

XXVIII. Erat Eobanus magnus osor superstitionum, & veritatem quum propter naturæ simplicitatem, tum liberalitatem institutionis amabat. Itaque venerabatur & colebat eos, qui illis temporibus monachorum potentia & barbaria opponere audebant confessionem & assertionem veritatis atque bonarum artium. Quum autem his negotiis, quemadmodum sit, Principum quoque studia admista essent, (nam hoc omnibus temporibus obseruatum est, Ecclesiæ & Reipublicæ quasi fluctuationes aut commotas simul, aut non lon-

go interuallo sese mutuo consecutas esse) tum igitur Principibus quoque eam rem curantibus, conuentus interdum babiti, & necessariae deliberationes susceptae fuerunt. Quum autem Princeps Cattorum Philippus illo tempore operam diligentiae impenderet stabiliendae doctrinae religiosae singularem, conuentum aliquoties harum rerum causa fuit in oppido, quod in syluis Duringiacis situm, propter crebras illis in locis aeris ac ferri fodinas, & huius generis officinas, *Chalcidem* solebat nominare Philippus Melanchthon. Eo igitur, anno Christi MDXXXVII quum celebre concilium indictum fuisset, Eobanus quoque se cum Hefiacis contulit. Atque ibi Iohannem Stigelium, cuius paullo ante mentionem fecimus, tum admodum adolescentem, honesta familia gentis Duringiacae natum, primum familiariter cognouit; & statim incredibili amore complexus, neque obscure neque falso vaticinatus fuit, quam ille facultatem Latini carminis consecuturus esset. Eam nimirum, ut tanquam Germana soboles, laudem ac nomen, quod Eobanus sibi ingenio & industria ac studio peperisset, Stigelius quasi hereditatem legitimam ab illo relictam, paullo post adiret atque cerneret. Itaque iam tum Eobanus non aliter quam filii appellatione vocare

re Stigelium, iocari cum eo suauissime, complecti illum amantissime, materiam & argumenta interdum illi versuum faciendorum proponere, denique ita se gerere erga adolescentem, vt diuinitus animum Senis commoueri, & fauorem excitari, & dirigi iudicium appareret. Stigelius quidem quam non fefellerit præfensiones Eobanicas, quodque veluti soboles ingenua paternum genus referens, in nomen quoque illius atque decus successerit, scripta ipsius facile declarant: neque me plura de his in præsentia verba facere, decet, vel ne amico viuenti atque florēti assentati fuisse, vel ne ad augendam hanc narrationem omnia vndique collegisse videamur. Hoc neque silentio est prætereundum, neque alienum videri poterit, eam a Stigeliō gratiam relatam fuisse amorī Eobani, vt impense eum ille obseruaret, & reuerentia debita patri prosequeretur, & omnibus officiis viuo studiosissime inseruiret, & memoriam fato suo defuncti in terris posteritati elegantissimis suis versibus commendaret, ornatam quum epitaphiis carminibus, vt fieri consuevit, tum accurata mentione aliis in argumentis vbi locus esset, occasioque sese offerret honorificæ commemorationis de illo, aut speciosæ appellationis nominis Eobanici. De his igitur hætenus.

XXIX. Ac nunc deinceps ad tristissimam narrationem, ita re poscente, procedat expositio, ut iis quæ retulimus quasi colophon addatur exitus ex hac vita, & migratio in meliorem locum Eobani: qui suo tempore miseræ & afflictas multiplici clade terras reliquit, quum tamen adhuc rei aliquid, quo ille delectaretur, & spei nonnihil, quo sustentaretur, esset reliquum. Eobanus itaque in patriam reuersus, quum omnibus iis in locis, in quibus fuerat, memoriam præclaram nominis sui reliquisset, & quodam tamen, ut ita dicam, Homérico fato migrationibus exagitatus fuisset; quatuor annis & in re meliore & spe luculenta Marpurgi vixit, annoque illo, qui mortem antecessit, correptus fuit interdum podagricis & athricis morbis. Quibus quum sentiret se tentari, initio tulit hunc casum molestius. Sed ægritudinem simul ac cruciatus die mitigante, desiit queri de hoc malo, ac incidit in diuturnum ac tabificum morbum, præter opinionem omnium, qui fere alios metuebant. Propemodum igitur anno toto magis languoribus quam ægrotatione confectus, tandem III. Nonas Octobris, quum diu tacuisset, de improviso voce emissa, se velle ad Dominum suum adscendere dixit. Idque iis qui aderant approbantibus, quod arbitra-

bitrarentur in animo ipsi esse congressum cum Principe, & affirmantibus Principi id gratum fore; Eobanus nihil ad hæc, sed paullo post placido fine conclusit vitam in terris suam, & in cœlum, vt significarat, hinc commigravit ad ætèrnum Deum Dominum suum, cui fideliter seruierat, & cuius ministeria sedulo obierat, ea gnauitate & solertia, quam ille idem ipsi fuerat largitus.

XXX. Morte Eobani nunciata, affecti omnes tristitia fuerunt, sed Princeps inprimis indoluisset huic fertur. Qui præbuit se permunificum erga relictam coniugem Eobani, scæminam lectissimam, & vtriusque sexus liberos; quibus etiam locum secum esse voluit, & munera aulica demandauit filiis, virgines & matrem commendauit illustrissimæ Principi coniugi suæ. Itaque illi marito & patre amisso, tamen sic postea vixerunt, vt orbitatis quidem & desiderii, sed nullo alio incommodo afficerentur. Reliquerat autem Eobanus, vt hoc genus solet, nihil fere suis nisi famam excellentem, & nomen celebre, & laudem ingenii, doctrinæ, virtutis. Quæ indies ad victum & cultum huius vitæ minus adiumenti afferre incipiebat hæredibus, nunc etiam aliquando nocere apprehenditur.

XXXI. Hic est cursus, quem nos cognouimus peregrisse in terris Eobanum, & quem exponendum esse descriptione nostra duximus. Vixit autem annos LIII, menses VIII, dies XXVIII. Statura corporis erat procera & robusta, pectus latum, facies aliquanto toruior. Vt Albertus Durerus dicere soleret: si illum non nosset, & imaginem expressam adspiceret, suspicaturum se, illam esse bellatoris. Et erat profecto animus in homine magnus, & qui metuere nesciret; sed voluntas minime dimicatrix aut contentiosa. Ipse neque in cibo neque potu delicatus, aut lautitiarum appetens, neque scires quo maxime præ cæteris caperetur aut alliceretur. Salsis tamen pisciculis ac acido olere delectabatur, & in autumno iuglandes recentes incisas superfuso vino ita comedebat, & mustum sic bibebat, ut inde aliquid voluptatis se percipere non dissimularet. Signum, quo utebatur, erat olor per ramum lauri ascendens, & attingens capite nubes. Quod quum depictum fuisset super ianua ædicularum, quas conductas Norimbergæ incolebat, addidit elogium horum versuum duorum:

*Nubila scandentem lauri de stipite cygnum
Hesso stemma suum libera Musa dedit.*

In aduersis, vel quicquid forte accideret quod molestiam afferret, pronunciare solebat nomen *patientiae*; quo se ad ferenda tristitia confirmabat. Nihil minus ferre poterat, neque peius oderat, quam obrectationes aut criminationes aliorum, quas obortas quocunque loco aut tempore etiam iracunde refutabat & coercibat. Mendacium neque ipse dicebat, & dicto grauius offendebatur. Insidias calliditatis neque norat neque cauebat: itaque iniquissime patiebatur se ludibrio haberi, & fidem atque simplicitatem suam malitiæ deridendam exponi indignabatur. Inter iocos hunc libenter exercebat, vt propositum versum aliqua parte sui mutari iuberet. Veluti in hoc: *Vitam quæ faciunt beatiorē*, quid pro ultimo nomine numerose posset reponi, vt quæreret. Ac memini sæpe vnam aut alteram horam talibus permutationibus inter epulas nos absumsisse. Sed in his paruis exercitiunculis immensa vis ingenii Eobanici innotescebat. Versus etiam tum facere, & ad faciendos alios inuitare, statim & sine vllō animi cogitationisque adminiculo, neque cura inueniendi quid diceretur adhibita. In quo genere proferebantur ab ipso sæpe complures versus numeris & verbis ita concinni, vt nihil fieri posse videretur elegantius, sed sensus nullus

nullus exprimebatur. Itaque meminī aliquando quosdam, qui sibi arrogarent aliquid facultatis poeticæ, deceptos fuīſſe, quum argumentum quodpiam explicatum eſſe putarent, & quid rei ſignificaretur quærerent. Solebat & inuertere in conuiuiō voces; non enim poterat quieſcere, & nihil illi, niſi quod & læderet neminem & eſſet ingenioſum, placebat, & ſeria tamen tum non patiebatur admilceri, & oſtentatoribus ingenii, ſiue quis ſapientiæ tum diſputationes explicare, ſeu recitare aliquid ſcriptorum ſuorum, ſeu quocunque modo doctrinæ & eruditionis ſuæ ſpecimen edere conaretur, admodum irascebatur, eorumque ineptias interdum repudiabat aſperius. Inuertere igitur ſolebat voces Teutonicæ in primis linguæ; quod erat factū ideo facilius, quia in hac omnia fere ſunt primæ originis vocabula, vnius ſyllabæ. Ad hanc uſurpationem ita nos uſu aduefeceramus, ut ignari negotiū arbitrarentur externa lingua nos colloqui.

XXXII. Hæc habui, Adame, quæ ducere narranda eſſe de Eobano noſtro: cui ſerius quidem, quam tu voluiſti, & ego debui, ſed fide & diligentia maxima hoc officiū præſtiti, & quaſi iuſta funeris perſolui.

Quum profecto inter præcipua bona numerem amicitia & familiaritatis vñ & vinculum, quo cum Eobano Deus me coniunctum esse voluit. Qui quidem breue curriculum vitæ suæ laudabiliter & feliciter confecit, etsi molestiis non caruit, præsertim rei familiaris. Et hanc vitam in terris eo momento reliquit, quo quasi de conuiuio tempestiue discedens, ita impendentem confusionem & turbas, denique ea ad quæ nostra producit, declinando vitauit. De quibus plura nunc scribenda, & dolori perturbationique indulgendum esse, non putauimus. Eodem anno multi ingenio, dignitate, virtute, sapientia, doctrina præstantes viri diem suum obierunt; vt hunc studiis bonarum artium & excellentiæ humanæ fatalem fuisse credi posse videatur. E quorum numero Guilielmum Budæum hoc loco nominasse satis habuimus. Composuit autem, vt scis, Mycillus noster elegantissimum carmen de Eobano, quo ipso pertexuit historiolum quandam vitæ fortunæque & mortis illius. Quod est in manibus omnium. Nos etiam hoc loco apponere volumus versus quos conscripsimus, quasi ad sepulcrum Eobani apponendos, id est,

Antiph.

HELIO EOBANO HESSO

viro optimo, principi Poetarum,
amico suauissimo

IOACHIMVS CAMERARIVS

Pabepergenſis

F.

Hic situs est Hesus, patria tellure receptus,
 Quo rediit Domino se renocante soli.
 Dum circum huc illucque vagus fert seque domumque,
 Querit & Aonio pramia digna choro.
 Nonnihil ille quidem reperit. Sed pramia Musis
 Huius nulla satis digna fuisse viri.
 Nec potuere dari, neque secula nostra tulerunt
 Tantum, etas Hesium nosset ut illa, boni.
 Gloria sera venit meritis, post fata superstes,
 Inque dies melior fama sepulta redit.
 Et tamen ipse sua cognouit nomina laudis,
 Audiit & tempus se celebrare suum.
 Caput & ingenii de fructu commoda viuus,
 Virtutisque suae crescere vidit opus.
 Sed maiora ferunt insignia scilicet anni,
 Viuentis cedens quos abit ante decus.
 Illi etiam eximia fame praconia, mundus
 Hesso, donec erit, splendidiora ferent.
 Hoc satis est. Hesi busto sepelitur in isto
 Corpus, in aetheria spiritus arce manet.
 Per terras bona fama volat, speciosaque laudis
 Nomina Pieria testificata manu.

ΗΛΙΩ ΕΩΒΑΝΩ ΕΣΣΩ

ἄνδρ' ἐβελίτω καὶ ποιητῇ
ἐμμελεσάτω.

Ατέρρα μεσίων, χαρίτων ἔρν' ὦ, σῶμα φείβη,
Ποιητῶν λιγυρῶν ἡδυδρόν μέλεων,
Κήρυκ' ἀθανάτη τε θεῶ θνητῶν τε δικαίων,
"Εἶσον Ἐωβανὸν τῇδε κέκλυθε κόνει.
Δεξαμένη πατρὶς αὐτῆς εἰς κόλποισι γαίοντα,
ἢ μετ' ἐν ὅκ πολλῶν νοῦεν ἀναστάσεων.
"Εἴη μαραινόμενός τε φθινώδεσιν ἡρέμα νέουσι
"Ώς ἔλθοις ἐλπομένη πῆμα λέλογχε εἶς.
"Ολβιός ὃς κλέος ἐδὼλ' ἐν ἀνθρώποισι λελοιπῶς,
Καθεὶν ἐς ἔρανας ἐνυ βέβηκε δόμους.
Εἰδέω' ἐν τῇ γῇ πολυπλαγκτοσύνῃσι κέκμηκεν,
"Εχ' ἀφ' ὁμηρείας καὶ πῖδε δῆτα τύχης.

ὑπό

Ἰωαχέιμ Καμεραριάδης,
μνυμόσωνον στέασμιον.

«❧❧»ο«❧❧»

Quum in precedenti Narratione p. 25. & seqq. Muti-
 ani Ruffi facta sit mentio, haud inconueniens duxi-
 mus, Jo. Stigeli in eius obitum subnectere carmen; cum
 epistola ad Camerarium, qua ipsi pro Narratione hac de
 Eobano sibi missa gratias agit. Et quia p. 64. Mycilli poe-
 matis in obitum ejusdem Eobani Camerarius indicium
 fecit, adiungemus & istam, prolixam licet, elegiam.

IOHANNES STIGELIVS

IOACHIMO CAMERARIO

*Neapoli otium cum Musis
 agenti,*

Amico carissimo
 S. D.

DOmo abfui hoc octiduum. Reuerso ve-
 ro redditum mihi fuit scriptum de Eoba-
 no tuum, quod perlegi auidissime. Ac mi-
 rum est quantopere me delectarit, non mo-
 do historia illorum temporum, sed etiam ge-
 nus dicendi tuum, purum ac elegans, & ad
 res quas exprimit accommodatissimum. Sed
 quia idem mihi accidit, quod sitientibus so-
 let, qui festinabundi primo impetu oblata
 frigida, ingurgitantes sese, velut abutuntur,
 mox quum paullatim degustant, maiorem
 voluptatem ex sensu saporis capiunt; sic ego
 non remittam hoc scriptum, priusquam eius
 iucundissima lectione sim cum intimæ dele-

stationis sensu ita exfatiatus, ut aliis quoque inde commemorare, quæ meminerim, possim. Quod cupis a me adicii, si quid mihi de illis temporibus cognitum sit, plane tu quidem ex lapide argentum. Quid enim sciam ego? qui admodum adolescens in notitiam Eobani iam senis perueni. *Mutiani* nomen celebre iam puer sum admiratus vnice, de quo quidem audiui permulta, cognitu atque imitatione digna, quæ successu temporis publica perturbatio mihi exemit e memoria, aut ita pervertit, ut res quidem aliquas commemorare possim, ordinem tamen & modum amiserim. Memini me puerum Epitaphio complexum fuisse eius laudem. Id subscripsi ut legeres, meumque desiderium, quale iam tum fuerit, istorum hominum, quos audiebam Poetas salutare, agnosceres.

H *Accumulatus humo Ruffus post fata quiesco,
 Ardua qui clarum nomen ad astra tuli.
 Prima mihi tenere dedit incunabula vite
 Hesperia, fertilibus terra recincta ingis.
 Quum mihi adhuc viridi vernaret flore iuuentus,
 Nec tegeret flauas hispida barba genas,
 Ingenuas colui Musis ducentibus artes,
 Deditus & studiis nocte dieque sui.
 Hinc didici rerum varias cognoscere causas,
 Quasque parit miras terra fructumque vices.*

Inter-

*Interdum versus & blanda poemata finxi,
 Qualia Virgilium nemo probasse neget.
 Quumque mihi vires prouectior adderet aetas,
 Cura mihi leges noscere iuris erat.
 Sed mihi cum Musis & caris viuere amicis
 Plus placuit, trepida quam fora lite sequi.
 Omnia nam quoniam stulte transire videbam,
 Non sitii tituli nomina magna mei,
 Aulas precipue fugi, quia fulmen ab aulis
 Et fortuna piis saepe sinistra venit.
 Aurca me blandi fouit clementia cæli,
 Qua iacet vberibus Gotha beata iugis.
 Hic ego traduxi tranquilla tempora pacis,
 Hic mihi pax vere vita beata fuit.
 Inuida me donec caro mors abstulit auo,
 Et mea sub viridi condidit ossa solo.
 Quam bene nunc recubo florentibus obsitus herbis;
 Hoc mihi perpetui nominis omen erit.*

Et quoniam hæc scribo stans in procinctu,
 ad signum horæ datum recta iturus ad audito-
 rium meum, finem epistolæ faciam. Scribam
 vero proxime copiosius, & mittam carmen de
 Spiritu sancto. Optime vale in æternum,
 Ienæ D. XIX. Septembr. anno MDLI.

VITA HELII
IACOBI MYCILLI

Epicedion

HELII EOBANI HESSI

Poetæ.

ERgo in te sæua tantum potuere sorores?
O decus, o nostri dux Eobane chori?
Nectua te virtus, neque tot texere Camæna,
Legitimum caderes quominus ante diem?
Idque placet superis, quorum violenta potestas,
Iam prope præclarum quod fuit, omne tulit.
Dum prædam totus de nobis exigit annus,
Et spoliū ex omni mors petit atra loco.
Plangite Pierides, ereptum plangite vatem;
Et mecum vestri funera flete ducis.
Plangite quæ celsas colitis, regna Hæssica, sylvas,
Cattiades nymphæ, monticolaque deæ.
Quas circum Veraris fluit, & quas Aedera circum,
Et noua facturus flumina Fulda suo.
Plangite, & hoc veteri persoluite munus alumno,
Et tumulo flores & date ferta nouo.
Non illo melior fuit, aut reuerentior æqui,
Sacula quot retro multa tulere diu.
Nec vestros aque quisquam celebravit honores,
Quicumque Aonijs fontibus ora rigant.
Et tu Lancæ pater, pendente in pectore barba
Hæssica qui longo limite rura secas.

Exue

Exue fronte comas, viridantes exue amictus,
Et noua cultoris funera plange tui.
Vlua tegat faciem, madidique vligine crines
Mæstitiam cultu deteriore notent.
Nec tibi nunc placeant tenero iuga consita Baccho,
Aut virides ripæ, lataque culta satis.
Nec te detineant calidis vernantia lymphis
Labra, quibus certa membra leuantur ope.
Hic ubi vicinos iacet inter Amisia colles,
Hesficaque occiduum distinet arua nemus.
Sed mæstus sine honore means, sine numine, lento
Ad dominum Rhenum gurgite perfer aquas.
Atque aliquis cernens defectam flumine ripam,
Quis nouus hic amnis squalor, & vnde? roget.
Quis Deus huic animum, quis cursus tantus ademit?
Vt gressu solito languidiore venit?
At tu, sed modica gemebundo murmure vocis,
Ille meus, dicas, ille Poeta iacet.
Mortuus ille iacet, cuius super athera cantu
Flumina cum Nymphis nota fuere meis.
Atque ita dilapsus tacito sub gurgite, tecum
Hæc vatis desse tristia fata tui.
Nec te pœniteat tanti, pater optime, luctus,
Aut hæc non tali digna dolore putes.
Non magis Odrysiæ celebrauit carmine syluas
Orpheus, & ripas Strymonis vnda tuas.
Nec plus Virgilio debent tua flumina Minti,
Quamuis huic ætas non tulit vlla parem.
Flumina quam debent & Nymphæ Cattides Hesso,
Et quantum Hesfiaci restat vbique soli.
Ille tuas primus celebrauit carmine gentes,
Ille dedit ripis nomina, Lane, tuis.

Nec

*Nec notus Veraris fuerat neque Fulda futurus,
 Flumina quæ pariter iuncta Visurgis habet.
 Nec quantum a Mæni distat vagus Adrana ripis,
 Cognita cum populis pars foret illa suis.
 Si non hic patriæ seruasset nomina terra,
 Atque eadem illius carmine nota foret.
 Præcipue sed enim tanto se iactat alumno,
 Quæ vetus a Franco vertice nomen habet.
 Mons ubi Christipara celeberrimus ade puella,
 Dum culta est nati mater honore, fuit.
 Nunc melior postquam pietas caput extulit orbi,
 Desertum tacitis Aedera lambit aquis.
 Quas sedes olim Francos tenuisse colonos,
 Deque suo nomen, fama, dedisse loco.
 Hic ille in superas primum fuit editus auras,
 Hic patria, hic illi tecta domusque fuit.
 Hinc puer egressus, late virtutibus orbem
 Et fama implevit nominis ipse sui.
 Namque ut prima tibi repetam cunabula vita,
 Et versu peragaxi tempora tota breui:
 Ter quinque exierant post natum sacula Christum,
 Sublatis annis sed quater inde tribus;
 Quum satæ ille nouas partu procescit in auras,
 (Lux fuit hæc Nonis Iane dicata tuis.)
 Non huic diuitia, non magnum nomen auorum,
 Non domus antiquis fulsit imaginibus.
 Qualia mirantur vulgo, qui facta parentum
 Quam sua laudari pulcris esse putant.
 Sed simul ac tenera matris progressus ab aluo,
 Vagitus infans edidit ore nouos.
 Mox jacilis primo fuit huic ætate Minerva,
 Quæ natum gremio suscipit ipsa suo.*

Hinc

Hinc puero ingenii vires, animosque valentes
 Indidit, & pulcri fecit ut esset amans.
 Ac velut vda solet formas, quasiunque iubebis,
 Cera sequi, & faciem ferre subinde nouam;
 Sic Dea crescentem cunctos molliuit in usus,
 Pectoraque ad studium quodlibet apta dedit.
 Atque ita seu verbis gauderes lege solutis,
 Non facile in prosam largior vllus erat.
 Seu malles numeris certis adstricta modisque,
 Pangebatur spacio carmina mille breui.
 Quin etiam verbis mutabat Græca Latinis,
 Vertebaturque modis scripta vetusta nouis.
 Usque adeo partes pariter pollebat in omnes,
 Nil huic inuictum, quod modo vellet, erat.
 Quamuis ipse sacras solitus præferre Camanas,
 Ante omnes semper carmen amabat opes.
 Carminibusque diem peragebat, carmine noctes,
 Nec semel & fessi somnia carmen erat.
 Siue aliqua ista fuit naturæ caussa latentis,
 Quæ cœuiure suo mollia corda rapit,
 Hasque ita nascenti vires infudit ab ortu,
 Quæ non a cum niueo fulsit olore Chelys.
 Seu vere Deus est, quo vatum corda mouentur,
 Atque iidem taciti numinis instar habent.
 Certe non aliis studiis potioribus usus,
 Quæcunque huic esset sors obeunda fuit.
 His puer accreuit, medio his excelluit æuo,
 His etiam clausit fata suprema senex.
 Ergo idem primis nuper digressus ab annis,
 Tempora quum lustris conderet acta tribus;
 Turperatus patrios nunquam liquisse penates,
 Contentumque vno consensuisse solo.

*Partim etiam accensus famæ potioris amore,
 Doctorumque volens ora subire virum.
 Egressus patria, Thuringam venit in urbem,
 Cui vada fecerunt nomen Hiera tua.
 Nam fuit hæc quondam sedes celeberrima Musis,
 Artibus & studiis nobilitata bonis.
 Quum nondum placidas premeret discordia diuas,
 Aurea quæ sancta tempora pacis amant.
 Hic operum specimen primum dedit ille suorum,
 Hic sua cantari carmina seque tulit.
 Dum sedet & gracili celebrat modulamine sylvas,
 Pastorumque casas, amnicolasque deas.
 Et prius ignotis componit nomina ripis,
 Sine tuis Vnster, seu vage Nesse tuis.
 Ergo nouo ornatus pridem cognomine vatis,
 Et fretus Musa carminibusque suis;
 His quoque digressus, quas tunc celebrauerat oras,
 Disita longinquo venit in arua solo.
 Terra iacet gemino procul hinc subiecta Trioni,
 Pigra gelu, & cana tota perusta niue.
 Hinc mare, quod Venedi saclo coluere priore,
 Vnde gerunt tenera succina lecta nurus.
 Illic externum secludit Martius hostem,
 Sanguine qui pastus Sarmata vixit equi.
 Ipsa vetus retinet generosa Borussia nomen,
 Teutonici quondam militis ense potens.
 Huc illum euectum per millia multa viarum,
 Seu fors, seu rerum certa cupido tulit.
 Hic cum Principibus crebra versatus in aula,
 Et mores hominum vidit & ingenia.
 Atque uti Neritius quondam iactatus Vlysses,
 Hinc circum terras, hinc freta longa maris,*

*Antiphatem, & Cironas vidit, seuumque Cyclopa,
Lotophagumque dapes, Alcinoique nemus;
Sic ille in media variorum gente virorum,
Nunc bona, nunc a quo pertulit ore mala.
Sed neque tunc Musas posuit, curamue priorem,
Aut studio versus languidiore dedit.
Nam partim alterno descripsit carmine sensus,
Quos mandat Diuo Diua puella viro.
Partim etiam syluis cepit mandare canoris,
Res, populos, urbes, funera, bella, viros.
Hic ubi vicino mergit se Vistula ponto,
Et secum raptas in mare vertit aquas.
Quamquam etiam nigri cantantem ripa Viadri
Audiit, & Sueni proxima terra soli.
Et quæ Sarmatico paret Cracouia regi,
Vrbs vetus, & veteri nobilitata schola.
Quæ loca noscendi studio prius omnia vidit,
Quam vidit vitæ bis duo lustra sua.
Hinc tandem patrias animus reuocauit ad oras,
Et redit in terras lenis Hiera tuas.
Quasque nouo quondam celebrabat carmine sedes,
Has iterum veteri captus amore petit.
Hic precio & solita conductus lege docendi,
Explicuit Vates, Rhetoras, Historicos.
Ipsi ubi tum multa nos hunc grauitate legentem.
Vidimus, in magno pars quotacunque grege.
Ac minor huius erat non illo tempore fama,
Quam tua per Latias, Quintiliane, scholas.
Tam bona facundæ manabat gratia lingua,
Tantus & in toto sedent ore decor.
Fors etiam vitam terra clausisset in ista,
Vno hanc si claudi fata tenore finans.*

Sed

*Sed fortuna bonis quæ rebus ubique repugnat,
Hunc quoque non vno passa vigere loco.
Namque ubi iam senior requiem finemque laborum
Sperat, & extrema littora puppe secat;
Sine hominum invidia, seu sorte trabente coactus,
Hæc tum matavit sedibus arua novis.
Norica qua Pyrgi iactat se nomine tellus,
Artibus & cultis inclita terra viris.
Huc illum adscivit sapiens cum plebe Senatus,
Ut veheret Musis hæc quoque regna suis,
Effet & illius decus & nova gloria gentis,
Et regimen cæpta norma que certa scholæ.
Nam fuit hæc pulcris urbs semper dedita rebus,
Inuentrix operum, & laudis amore flagrans.
Et quæcunque aliquo virtutis nomine fulgent,
Hæc illa ante alias ingeniosa colit.
Ergo iterum patria post tempora longa relicta,
Mutavit veterem conditione nova.
Ac socios inter Ioachimum Græca docentem,
Et te pars nostri, Micalæ, magna chori.
Hic sibi tum laudis tantum, famæque paravit,
Quantum fas ulli conciliare viro.
Nam neque muneribus caruit, nec honoribus unquam,
Dignaque factorum præmia multa tulit.
Quamquam etiam ista sua turbanit commoda fraude,
Quæ nihil integrum Noxa maligna sinit.
Et mox Thuringos iterum revocatus in agros,
Rebus ut auxilium ferret opemque malis,
Colligeretque diu passim & sine honore iacentes,
Desertasque hominum fraude locique deas.
Ut bis ab externis fuit has accitus in oras,
Sic bis ad externas inde repulsus abit.*

*Fortuneque fuit veluti pars ludicra quadam,
 Perque vices trepida summa vel ima rota.
 Donec ad hanc veteris sortem respexit alumni
 Ille tui princeps, Lane, Philippus agri.
 Acrumnamque viri & sortem miseratus iniquam,
 Iussit ad antiquos hunc remeare lares.
 Hic tandem reliqua transegit tempora vite,
 Cumque suis natis, coniuge cumque sua.
 Hic idem Aonias patriam renocavit ad undas,
 Adduxitque novas ex Helicone deas.
 Cum quibus extremos aevum perduxit in annos,
 Dum clausit summum meta peracta diem.
 Sed fors priuatos hominis quoque noscere mores
 Queris, & ut vitam degerit ille suam.
 Nam modo non paucos obscuræ fama poetas,
 Musa quibus facilis, vita nefanda fuit.
 Quique suis recte quum possint dotibus uti,
 Turpia carminibus præposuere bonis.
 Ut qui ferali furiarum concitus æstro,
 Lemniadum æquauit nomine reque malum.
 Aut qui, Vangionum dum censet in vrbe gregatos,
 Stridenti miseras luncinat ore deas.
 A quibus hic noster toto sic absuit auro,
 Ut cælum extremo distat ab Oceano.
 Nam neque luxuriam vitamue secutus inertem,
 Nec ventri aut veneri deditus ipse fuit.
 Sed simul ac iustos aui peruenit ad annos,
 Iamque ætas illi facta virilis erat;
 Consortem vite legit, sociamque laborum,
 Ingenio, fama, nobilitate parem.
 Huic talamo iunctus, tædæque fideque iugali,
 Protulit in lucem pignora multa nouam.*

Quorum pars etiam vitali vespitur aura,
Atque tuos passim, Lane, pererrat agros.
Pars, ita propositum fatis repetentibus ævum,
Ante suum rapti morte obiere diem.
Nec rursum invidia stimulis agitatus & æstro,
Effudit nigro carmina felle lita.
Aut studuit fame cuiusquam aspergere labem,
Verbaque latrantum fingere more canum.
Sed pariter vita servans linguaque pudorem,
Et præstare potens & retinere fidem,
Nec minus ingenio quam puro candidus ore,
Scripta dedit passim moribus æqua suis.
Nam partim cecinit laudum & virtutis amorem,
Quæ pariant animis commoda multa piis.
Vt quæ pastorum iuuenis cantavit avena,
Dum patriam atque artes cuebit ore bonas.
Aut quum sylvarum celebrauit nomine sparsim,
Cum populis, urbes, regna, ducesque suis.
Partim etiam versu mutavit Græca Latino,
Et docuit Latias illa sonare togas.
Hinc & Simichides Siculis transgressus ab arvis,
Ausonia celebrat pascua voce sua.
Hinc & Pelides, & Troiæ euerfor Vlysses,
Verba facit populo sæta, Quirine, tuo.
Præcipue accensis diuorum pectora ribus,
Inclusit numeris sacra Deumque novis.
Nam modo digressus primis cantavit ab annis,
Quæ mittat sancto sancta legenda viro.
Mox etiam Solymi conuertit cantica vatis,
Iussit & Ausonios illa referre modos.
Atque utinam poterat producere longius annos,
Nec properent triplices fila secunda Deæ.

Iam quoque digestos legeres in carmina fastos,
 Et seriem sacrae totius historiae.
 Nec plus Peligno laudis fameque poeta
 Pontificum parerent eruta festa libris;
 Quam mihi tunc noscer meruisset carmine vates,
 Exposita tota cum pietate fide.
 Sed fera quae rapiunt ipso bona cuncta sub ortu,
 Inuidere nonis his quoque fata bovis.
 Idque opus inceptum praeventus morte reliquit,
 Dum velut e medio tranunte raptus obit.
 Quo te non debet tanti, pater optime, luctus,
 Aut tanti vatis, Lane, pigere tui.
 Sed velut hic alios supra caput extulit omnes,
 Quicumque Aoniis ora rigantur aquis;
 Sic decet hunc omnes lugere hominesque deosque,
 Hesiacci quotquot nutrit arena soli.
 Nam quid maius in hoc restat, quo vivimus, orbe?
 Quidque aliud superis nos facit esse pares?
 Gratia quam vatum, & praecordia docta sororum,
 Concita quae vatum numine corda regunt.
 Quis veterum nosset laudes & facta virorum?
 Fortes Aeacidas, Neritosque duces?
 Aut quis Scipiadas, aut quis te maxime Caesar?
 Teque tot inuictum, magne Camille, malis?
 Nomina si nulli servassent ista poeta,
 Nectantus sacri carminis esset honor?
 Nulla foret laudum, virtutis nulla cupido,
 Ni moveant vatum tot monumenta viros.
 Illis debemus quascunque accepimus artes,
 Illis debemus sacra fidemque Deum.
 Adde quod his, tali superum qui mente reguntur,
 Nec sceleri aut vitiis obuia corda patent.

Nullus auaritia stimulus, non ullus amorum,
 Excepto si quem fœdera casta ligant.
 S. d. siue in solis peragunt sua tempora syluis,
 Pieriis inter flumina nota choris;
 Siue etiam mediis regum versentur in aulis,
 Carminis est illis vnica cura sui.
 I de sacri vates & diuum cura vocantur,
 Cœlestumque sua numina voce canunt.
 Et quisquam a lacrymis sibi temperet, aut tua fata
 Aspiciat siccis, tante poeta, genis?
 Nec, quod mœsta solit mater viduata nepote,
 Quum sedet ad tumultum crine soluta nouum;
 Nos etiam duras leges, immitia fata,
 Et graue Parcarum voce queramur opus?
 Heu, quantum amisit tecum tua patria nomen,
 Heu quale & quantum Teutonici ora decus!
 Omiseris homines, o spes incerta laborum,
 Quam cito, quod longo tempore creuit, abit!
 Quæ vero superi, quæ tandem damna paratis?
 Artibus cequis bonos post super ullus erit?
 Aut erit, ut merito quisquam aut virtute fruatur,
 Quando bonos eadem fata malosque premunt.
 Nam quis finis erit? vel quis numerauerit omnes,
 Tempore quos ætas abstulit ista breui?
 Occidit omnigena spes & decus artis Exasmus,
 Sacula quo maius nostra tulere nihil.
 Primus qui cæco Musas reuocauit ab arco,
 Fregit & eloquio barbara regna suo.
 Occidit & lingua pariter memorandus utraque,
 Attica quam tilius Itala quamque tulit,
 Vrica Sequanica Budæus gloria gentis,
 Quam late Rhodanus cingit & arua Liger.

*Occidit, Hesse, solo tecum prognatus eodem,
 At procul hinc alio Cordus humatus agro.
 Ambas qui studio coniunxit Apollinis artes,
 Idem seu medicus, siue poeta bonus.
 Occidit Vrsinus regum versatus in aulis,
 Pannoniam rapidis qua secatur Ister aquis.
 Carmine qui variis rebus quaesivit honorem,
 Atque idem Musas iunxit & historiam.
 Occidit & noster notus bonitate Philippus,
 Principis a veteri nomina monte gerens.
 Qui pariter Musis, pariter virtute decorus,
 Summa fuit populi gloria, Mæne, tui.
 Ut memor, in neque te Viues, quem mille per artes
 Externo cultum misit ab orbe Tagus.
 Nec te, qui terris obijt fata Cheruscis,
 Heu procul a patria rapte Bolere tua.
 Atque alios quibus ampla sua stat gratia fama,
 Sed fugiunt versus nomina longa breues.
 Et quasi paeniteat tante fera numina cladis,
 Sitque parum summos tot cecidisse viros;
 Ecce eadem inuisa mortis vis abstulit Hessum,
 Hessum, cui tellus non tulit ista parem.
 Qui pariter Græcas Musis sociando Latinis,
 Absolvit tota quidquid in arte fuit.
 Atque aliquis speret melioris tempora mundi,
 Quæque futura, eadem prosperiora putet?
 Heu mihi, quæ rerum facies? quis nascitur ordo?
 Qualia nos & quam barbara secula manent?
 Quæ qui securo poterit contemnere vultu,
 Idem etiam patriæ funera letus agat.
 Nos certe casus quisquis tua fata sequetur,
 Plangimus heu mortem, care Poeta, tuam.*

Quaque licet lacrymis testamur & ore dolorem,
Saucia quem tanto vulnere corda gerunt.
Quem neque longa dies, qua cetera cuncta leuantur,
Nec ratio a solito dimouet vlla statu.
Quamuis si qua manent iustorum premia manes,
Et posita est meritis gratia certa suis;
Te quoque credibile est mistum felicibus umbris,
Nec lacrymis nostris iam nec egere prece.
Sed liquidas inter mentes, super aethera vectum,
Perpetua rerum prosperitate frui.
Et vel Iesseis sociantem carmina neruis,
Cantica cœlesti psallere grata Deo.
Aut castas inter diuina Heroidas aula,
Carpere cum sanctis gaudia leta choris.
Quo quaecunque tuos retinent habitacula manes,
Seu quascunque tenes umbra beata plagas;
Sis felix, nostrumque, precor, cape dexter honorem,
Quem tibi supremum mœsta Thalia refert.

* * * * * *

R*Egem dictum fuisse inter sodales & amicos*
Eobanum, Capnione occasionem nominis
huius præbente, & de hac sua denominatione,
carmen ipsum composuisse, supra pag. 36. indi-
cavit Camerarius. Istud ex Poematibus eius,
non adeo obuiis amplius, huc apponemus, de-
promptum ex Sylvarum Libro II. edit. Halensis
Suev. anni 1539. fol. 221. & Francof. anni 1564
pag. 470. seqq.

Non

Non ego crediderim citius prodisse poetam,
 Quem sterilis naptum prædicat Ascræ senem;
 Quam mihi iamdudum Phœbeia fixa ferenti,
 Venit adoptato nomine Regis honor.
 Hoc tamen unde feram, qua manet origine nomen,
 Stultum & ridiculum dicere pene fuit.
 Scripsimus exiguo vulgata poemata versu,
 Scripta notis populo Lipsia clara dedit.
 Legerat hæc gentis Reuchlinus fama Suevæ,
 Et dixit: Regis nomen habere potes.
 Inter enim quoscunque ferunt tua sæcula vates
 Rex es, & est ratio nominis inde tui.
 Nam Graii Regem dicunt Hellenæ poetæ,
 Esse ita te Regem nomine reque doces.
 Et velut exerceas agnatum in carmina regnum,
 Recta stat in versu syllaba quæque tuo.
 Hoc scriptum excipiunt atque amplexantur amici,
 Et Regem clamant omnibus esse locis.
 Ipse ego quandoquidem nec publica scripta negare,
 Nec poteram caris obstruere ora viris;
 Rex inquam, Rex vester ero; quando ista necesse est
 Tradita militiæ nomina ferre meæ.
 Verum alios titulos, nec inepta insignia sumam,
 Moriæ iamdudum cognita tota mihi est.
 Vidimus Utopiæ latissima regna superba,
 Testa lucernarum sunt peragrata mihi.
 Fortunata meo lustrata est insula cursu,
 Dulcia tibi æterno flumine mella fluunt.
 Quæ viret Ambrosiæ succus, quæ rupibus altis
 Nectara ut e cælo præcipitata cadunt.
 Gentis Hyperborææ felicem vidimus oram,
 Quæ neque mors homines nec mala fata premunt.

Qua stant perpetuam facientia stagna iuuentam,
Qua licet in cœlum scandere quando libet.
Hæc per & hæc circum pulcherrima regna, volentem
Moria me fida duxit amica manu.
Quamque peragrarim tot tantaque regna, licebit
Stultitiæ titulos sumere iure mihi.
Musici legitimum sument in carmina regnum,
Qui sint Mœnida Virgiliique super.
Quam mihi sint nulle scribenda in carmina vires
Sentio, & ingenium metior inde meum.
Vos quia me Regem facitis, sinite esse tyrannum :
Stultitiæ haud aliud me diadema mouet.
Sic ego. Paruerant illi tam vera monenti,
Tradentes manibus regia sceptrâ meis.
Ecce ita ergo licet Reuchlinia littera Regem,
Non tamen hoc tantum contulit imperium.
Plurima Capnioni subscribit turba. Quid inde?
Si rem completunt nomina, Cæsar ero.

* * * * *

Idem, cur sibi nomen *Helii* dederit, & reli-
 quis suis nominibus præposuerit, causas ex-
 posuit in carmine, quod supra pag. 15. indica-
 tum hic exhibebimus, depromptum e Libro I.
 Sylvarum p. 373. seq. edit. Francof. fol. 203. edit.
 Haiensis.

AD AMICUM.

Helius vnde metum veniat prænomen in usum,
Indicio quæris certior esse meo.
Accipe, ne quicquam frustra petiisse queraris,
Dispereream possum si qua negare tibi.

Helius

Helius Argiūm; Solest sermone Latino
 Helius est quisquis numina Solis amat.
 Quid mage conueniens vati quam nomina Solis,
 Quem vocat & sentit musca turba patrem?
 Nomine maestas Solis non finit in vno,
 Conueniant uni nomina plura Deo.
 Quippe idem Sol, Mercurius, Mars, Liber, Apollo
 Creditur, & signis pluribus esse liquet.
 Ille regit vates, diuinum inspirat amorem,
 Solis ab influxu spiritus iste venit.
 Et nisi diuini fallunt oracula Platonis,
 Esse nequit vates quem fugit ille Deus.
 Quin etiam si nullus ero & sine numine vates,
 Helius est certe qua ratione vocer.
 Sol mihi nascenti primo praluxit ab ortu,
 Et quæ prima mihi, Phæbi erat illa dies.
 Grata deo Soli lyra tunc fulgebat in astris,
 Natali primum surgere visa meo.
 Iam ter quinque ierant a nato secula Christo,
 Annos decem tamen cum tribus inde decem.
 Non ego falsa loquor, vertentem consule mundum,
 Sacra dies Iani Regibus illa fuit.
 Has tibi de multis placuit conscribere causas,
 Quas veras certe nominis huius habes.
 Quas ipsas aliquo tamen olim carmine dixi,
 Cuius quum nequeas ultima, prima vides.
 Hac siquidem superant, perierunt illa; quod olim
 Sparserat incauta stulta iuuenta manu.

* * * * *

T*heocriti Idyllia*, quorum pag. 47. fit mentio, eleganti Latino carmine exposita prodierunt anno 1531 Basileæ, ex officina Andreae Cratandri, Hieronymo Ebnero Senatori Norimbergensi dicata insigni elegia; quæ in duabus Pœmatum ipsius farraginibus non extat, & incipit:

Hæc tibi Trinacrio ductas e rure capellas

Mittimus, & Latia pascua versa manu &c.

Nec prolixior ista elegia in iisdem comparet, qua Caspari Scheto, erudito mercatori Antverpiano, paraphrasin *Iliados Homericæ* carmine heroico scriptam, Marpurgi d. 15. Mart. anno 1540 nuncupavit, quæ incipit:

In varias quondam partes distractus Homerus,

Et lacer ingrato sparsus in orbe fuit. &c.

Ad quam Schetus respondit diffuso carmine, quod sub finem operis istius, Basileæ apud Io. Oporinum anno 1549 excusi, legitur:

Muse, quæ liquidis transcenditis æra pennis,

O semper faciles in mea vota Deæ. &c.

* * * * *

Epistola ad *Erasinum Roterodamum*, cuius fit mentio pag. 31. quam e diuersorio, postquam Louanium anno 1518. peruenisset, ad ipsum misit Eobanus, extat Lib. III. Sylvarum fol. 233. edit. Hal. pag. 432. seq. ed. Francof.

De

* * * * *

De *Mart. Lutheri* aduentu in urbem Erphordiam, quem pag. 37. narrat Camerarius, quatuor venustissimas elegias scripsit Eobanus, quæ in Poematibus eius leguntur pag. 847. seqq. ed. Francof. fol. 117. seqq. ed. Hal. Quo loco etiam pag. 866. & fol. 126. Inuectiua in *Hieronymum Emserum* Lutheromastiga, vt Eobanus appellat, cuius meminit hoc loco Camerarius, extat.

* * * * *

Psalmodum Dauidicorum paraphrasin elegiacam, a Camerario pag. 55. laudatam, Erphordiae anno 1534 coepit, sed Marpurgi anno 1536 die 14. Decembris anno ætatis 47 finiuit Eobanus, vt ipse indicat in prima huius libri edition, quæ prodiit Marpurgi 1537. pag. vlt.

* * * * *

Ludo latrunculorum delectatum fuisse Eobanum, narrat pag. 56. Camerarius: isque Vidæ descriptionem huius ludi scacchorum miserat ad Eobanum, pro qua ille hoc eidem reddidit carmen:

*Bella per instabilem plus quam socialia campum
 Quadantenus perlegimus.
 Bella quidem belle, quisquis fuit, ista peregit,
 Nec Vida vidit improbe;*

Quam

*Quam deceant faciles etiam sua proelia Musas,
 Diuosque longe principes;
 Arcitenens magno quæcum Ioue tractet Apollo,
 Tuque Argicida Mercuri.
 Iamque nec ingenii, nec in istas temporis artes
 Quondam locati pœnitet.
 Te quoque, cui Phœbus cedat sub talibus armis,
 Non pœnitere suspicor.
 Quas tibi nunc tanto solvam pro munere grates,
 Ioachime mi carissime?
 Sed tamen eximio Bilibaldo plura fatemur
 Debere nos, huiusmodi
 Pro merito; siquidem gratam dedit ille palastram
 Iam non latrocinantium,
 Magnorum superum sed suauiter ista gerentum
 Musis amica proelia.*

* * * * *

Medicinæ encomium, quod Erasmi oratione in versus translata Eobanum conscripisse Camerarius pag. 35. annotat, legitur in Poem. Eobani pag. 811. seqq. ed. Francof. subiectum libello eleganti de bonæ valetudinis conseruanda rationibus, quas venustis versibus descripsit.

* * * * *

Norimbergam, quo anno 1526 accitum Eobanum Camerarius pag. 46. memorat, prolixo carmine descripsit idem, secutus Conradum Celtem; multum lucis splendidissimæ isti

isti vrbi adferens venusto istoc poemate, quod inter reliqua extat pag. 632. edit. Francof. Præstantes etiam in ea viros, *Bilibaldum Pirckheimerum*, *Cassarem Nucelium*, *Hieronymum Ebnerum*, *Albertum Durerum*, *Michaelem Rottingum*, *Sebaldum Heidenum*, *Greg. Haloandrum*, *Hieronymum Baumgartnerum*, & alios carminibus profecutus est, quæ inter reliqua conspiciuntur. De laudibus Norimbergæ legitur etiam eius Idyllium XVI. pag. 86. ed. Francof. fol. 47. ed. Hal.

* * * * * * * *

L*Vdonicum Christianum*, quem Erphordiæ præceptorem fuisse Eobani pag. 14. indicat Camerarius, prima Ecloga seu Idyllio, sub nomine *Melisei*, quum seipsum *Camillum* vocet, colloquentum introducit, suum a patria discessum & aduentum in Academiam Erphordensem describens. Idem Ecloga VIII beatæ Tranquillitatis laudes exposuit ad Contr. Mut. Ruffum, qui studiosæ tranquillitati & quieti se totum dederat, Canonicus Gothanus, & supra fores ædium suarum hunc titulum fixerat: *Beata tranquillitas*; & paullo post in atrio: *Bonis cuncta pateant*. Vide Camer. p. 26.

* * * * *

Ioachimo Camerario quintum Sylvarum librum dedicauit Eobanus anno 1533, cuius in Narratione hac pag. 49. is mentionem facit.

* * * * *

C*hristianorum Fastorum* conscribendorum institutum, quod autore Philippo Melanchthone Eobanum suscepisse Camerarius p. 54. scribit, non persecutus est idem, certe non absoluit. De toto hoc inchoato opere, quod nec Stigelius pertexuit, reliqui sunt pauci hi versus, quos asseruauit in Lib. II. Epist. Hesfi & aliorum Camerarius:

*Sacra, dies, caussas, & signa volubilis anni,
 Quem Christo numerant tempora nostra, canam.
 Tu mihi spirantem patrio de pectore Flatum,
 Hac tibi scripturo mittere, Christe, velis.
 Qui mea si dulci dignetur pectora flamma
 Tangere, iam vero numine plenus ero.
 Ardua iam sacro contingam sidera cantu,
 Iam mea caelesti carmina melle fluent.
 Annue summe tuas conanti dicere laudes,
 O qui quicquid habes, trinus & vnus habes.
 Tota creatorem quem sentit & esse fatetur
 Machina, & immensum totius orbis opus.*

* * * * *

Quum in quadam ad Io. Matthesium scripta carmine epistola, opera sua Eobanus recensuerit, ista autem inter Poemata eius non

extet, a Camerario in Lib. III. Epistolarum eiusdem asservata, eam huc transferendam duximus :

EOBANVS HESSVS
IOHANNI MATTHESIO

Ludi Rectori Vallium
Ioachimicarum.

DOste rudes animos studiis formare, Matthesi,
Addita amicitia pars modo iusta mea.
Quod mea miraris cen dignos scripta libellos,
Quos legat & merito vulgus honore colat.
Candor is est animi simplex tuus, aut ego fallor,
Aut hoc iudicium fallit ineptus amor.
Quos tamen ediderim, vis certior esse libellos:
Accipe de multis nomina pauca breui.
Bucolicis lusit numeris iuuenilior etas,
Quos tamen hac auctos ferior esse dedit.
Hinc facili sanctas Heroidas ore canentem,
Vidit ab Arctoo Parrhasis vrsa polo.
Has quoque sicut erant lacerae nec veste polita,
Indutas cultu iussimus ire nouo.
Quid loquar, ut medicas mea Musa sit ausa per artes
Ire, nec audaces abstinuisse manus?
Scripta quod eximiis epicedia manibus extant,
Pondera mensura iusta libellus habet.
Ut taceam quae Graeca dedi sermone Latino,
Nos Latio Siculum pauius orbe pecus.
Nonnihil immensus nobis quoque debet Homerus,
Debebit totum, si mea fata ferant.
Bis tria nuper erant vulgata volumina, Syluae,
Quas miro assensu Teutonis ora probat.

*Si quis in hos montes miretur quodnihil eorum
 Venerit, hac caussa est & manifesta satis.
 Diuitis hic Pluti, non carmina nostra, leguntur,
 Hic sonat argenti, Musica vena tacet.
 Plurima praterca numero comprehendere non est,
 Quae variis cecinit nostra Thalia modis.
 En tibi, digne cani versum meliore, Matthesi,
 Indice pro longo tam breue carmen habes.
 Viue memor nostri, quotiesque libebit ad Hessum
 Scribere, fac libeat scribere multa. Vale.
 Erphordia, D. IX. Iulii anno Christi MDXXXVI.*


* * * * * *

CArmen prolixius, quo memoriam Eobani
Io. Stigelium, coluisse Camerarius p. 58. in-
 nuere videtur, in voluminibus Poematum
 eius reperitur nullum, prater hoc vnicum
 breue Vol. III. Lib. 3. fol. 100.

*Heliu e viuis Eobanus vt exiit Hesus,
 Pierius siccis aruit amnis aquis.
 Flumina fuderunt oculis manantia Musæ,
 Fleuit & abiecta mæstus Apollo lyra.
 At Deus hunc terris rapuit, cæloque locauit,
 Cantet vt in Christi carmina blanda sinu.
 Donec erunt Musæ, dum voluet sidera cælum,
 Carmine victuro nobilis Hesus erit.*

F I N I S.





VITA GEORGII PRINCIPIS ANHALTINI.

I.



Persis institutum fuisse legimus, vt in conspectum Regis adducti, illum venerari diuino cultu, & in terram procumbere ante ipsum cogerentur: quod in Regiæ nobilitatis excellentia, imaginem Dei gubernantis hunc mundum,

quique esset autor largitorque salutis omnium, expressam esse in terris sentirent, & ideo obseruantix summæ honorem huic deberi. Quod si potentix & sceptri Maiestas referre diuinitatem quandam inter homines existimatur, non profecto iniquiorem concipi opinionem de religione, pietate, virtute, sapientia, doctrina,

A

neque

neque non hanc pulcherrimam effigiem Dei esse, credi debet. Quæ si vera sunt, ut esse liquet, (non enim certe Deus cognosci magis omnipotentiam suam quam bonitatem & sapientiam voluit) multo scilicet erit illustrior species diuinitatis in nobilitatis potentiaque & virtutis ac sapientia coniunctione. Atque eo quidem magis, si intueamur hanc oculis non modo rationis humanæ, sed etiam intelligentia eius, quam patefactio coelestis veritatis in mente accendit. Ut enim opera picturae & statuarum, quam scite & affabre facta sint, artificum contemplatio iudicat, imperiti autem coloribus tantum aut nitore capiuntur: sic pietatis religiosa consideratio operum diuinorum elaborationem plane perspicit, & autorem illorum agnoscit, & consilium atque voluntatem in his perficiendis animaduertens, quum veneratur æterni Dei beneficium numen, tum expressam pulchritudinem in natura eo honore, qui illi debetur, afficit. Non enim certe fortuito existere, neque fatali quadam rerum serie procedere ortus, interitus, euentus, temporum vires verti inclinatione casuum, & hominum præclaram & egregiam progeniem solo, quemadmodum dicitur, exoriri, putat animus veritatis diuinæ cognitione instructus; sed vnum effectorem parentemque & moderatorem atque rectorem Deum esse scit, qui in natura conspicua esse voluerit opera omnipotentia, sapien-

sapientiæ, iustitiæ, benignitatis suæ, ut ipse solus vnus æternus Deus, secundum demonstrationem eam, quæ est prolata λόγῳ αἰδῖω æternæ mentis per agitationem Spiritus sancti, veneratione, precibus, imploratione, gratiarum actione, & laudum celebratione, colatur in hac vita assidue & fideliter, cum spe vitæ in coelis sempiternæ. Atque ista est penus firmissima omnis felicitatis humanæ; non ea, quam veteres quidam suarum cogitationum acumine explorasse se rati, in Fortuna, & huius quasi procuratore Genio, collocarunt.

II. Hæc veluti prænarranda duxi, quum proposuissem quædam de illustrissimo & sanctissimo Principe GEORGIO, Principe Anhaltino, scribere. Quibus pro mea etiam parte illius pietati, virtuti, & sapientiæ, & ingentibus meritis erga patriam, clementiæque, & prolixæ atque munificæ voluntati, memoria animi grati officiose persolueretur. Impar illa quidem excellentiæ ipsius; sed tamen & debita & studiosa. Huius enim speciosissima imago nostra ætate conspecta fuit, omnium eorum, quibus suæ benignitatis munera propitius Deus in genere humano proferri & apparere vult. Istius autem propositi occasio fuit editio quarundam Concionum, quas ille plenissimas sinceræ religionis, & maximæ caritatis erga suos, in conuentibus ecclesiasticis habuisset: quarum lectionem piis studiis multiplices

tiplices fructus allaturam esse confidebamus. Et si autem & aliorum de hoc Principe encomia in medio sunt, & diserta expositione præcipuarum rerum mirifice capiunt legentes; tamen & nostræ narrationi aliquem locum relictum iri sperauimus, vel propter singularem obseruantiaæ meæ affectionem, vel propter abundantem copiam eorum, quæ de hoc Principe cum veritate laudabiliter commemorari possunt. Ordiam autem, ut par est, a maiorum domus Anhaltinæ splendore nominis, & virtutis gloria, & dignitatis excellentia. Et si autem is merito & illustrissimus Princeps & vir amplissimus perhibetur, qui sua ipsius virtute extollitur, & sapientia propria præstat cæteris; tamen omnium consensione, quod naturæ est iudicium, nobilitas generis commendationem singularem habere existimatur. Neque immerito. Diuinum enim esse beneficium confitendum, propagationem de vna origine multorum, directam successionem posteritatis & nominis gloriam custodientem. Itaque Poetæ Græci quorum genus celebrare imprimis voluerunt, eorum ortum tradiderunt esse diuinum. Significantes nimirum, hominibus eximium hoc munus a Deo conferri: ut diuturnitate quadam series procreationis immortalem famam assequi quodammodo sole-re videatur. Quapropter inuidia quoque caret successio opum, & potentia antiquæ, quod quasi

PRINCIPIS ANHALTINI. 5

quasi publicum hoc patrimonium a maioribus relictum minoribus debeatur : qui & indigni laude suorum, degenerando maculam aspergunt familiæ, atque odium incurrunt; & digni, veteres titulos novis ornamentis decorantes, incredibili favore & studio omnium extolluntur, καὶ μᾶλλον ἐρχέσθαι τῆς εὐγενείας τὸν ὄνομα, secundum Euripidem.

III. Est autem perdifficilis explicatio familiarum nostratum, propter nostræ gentis non tam negligentiam, quam simplicitatem: quibus non fuit curæ, ut haberent præcones virtutis & rerum a se gestarum; sed id studuerunt, ne alii magnitudine animi, & iustitia, & fortibus factis priores aut essent aut haberentur. Neque viguit eruditio literarum, & cultura bonarum artium, in natione bellis occupata & studiosa armorum. Non tum caussarum contemplationi vacabat cogitatio, non prudentiæ disertæ oratio copiosa affectabatur; sed agri diligenter colebantur, & res familiaris labore assiduo non tam augebatur cupide, quam retinebatur strenue. Exercitationes autem erant in umbra nullæ, sed omnes manifestæ, venerationum præcipue, & equitationum, & iaculationum, & gestuum repræsentantium congressus dimicationum, & formas tam feriendi hostes, quam ictum hostilem excutiendi. Non enim tantopere probabant læsum ab aliquo adversarium, quam vim externam propulsatam

tam a corpore, & incolumitatem conseruatam esse. Admiscebatur & motuum quædam venustas in lucta, & saltationum agilitas, & decursi spatii certamen. Serio autem in id quisque incumbibat, vt esset secundum Tydeum Euripidis,

ὅτι ἐν λόγοις μὲν λαμπρὸς ἀλλ' ἐν ἀσπίδι
δαιμόνιος σοφιστής, πολλὰ τ' ἐξευρεῖν σοφά,
εὐρῶν ἀκριβῆ μυσικὴν ἐν ἀσπίδι.

Neque tamen defuere nostris hominibus vnamquam ingenia doctrinæ liberalis capacia, sed literarum profecto peritia antiquitas caruit. Declarant hoc ea quæ de nostratibus Poetis tradidere Græci, quibus nomen *Bardis* esset. Quum nunc quoque vulgares isti huius generis circulatores *Gabhardi* vocentur, quod nomen muneris expectationem significat: nam ab iis, quos vel laudarunt vel exhilararunt iucunda recitatione, communiter donari istos adhuc in moribus nostris esse constat. Declarant & carmina veterum, quæ quum a multis memoriter accinerentur, Caroli Magni iussu collecta descriptaque fuisse accepimus. Caroli autem temporibus cœpisse primum nostrorum hominum aliquos conari literis Latinis mandare res aliquas, aut institutionis vtilis, aut narrationum tam recentium quam veterum, populari sermone pronunciatas, multa sunt argumento: & nos vidimus librum Ludouici

Caroli

Caroli F. temporibus exaratum, continentem Euangelicam historiam, quam autor testatus fuit, se Francica lingua voluisse exponere. Vidimus & alia quædam fragmenta chartarum, quibus quid perscriptum fuisset animaduerti non poterat: ea omnia eiusmodi erant, ut aliena scripturæ ratio, & incognitus priscae consuetudinis sermo, nullum continuum sensum a lectore percipi pateretur. Ac nostratis sermonis proprietas Latinarum literarum comprehensioni tam pertinaciter refragata fuit, ut vix annis postea ferme quingentis, sese describi harum figuris ille suerit. Annis enim abhinc ducentis septuaginta duobus, Rudolfo rerum potiente, decretum tandem fuit, ut liceret contractuum & publicarum literarum alia monumenta populari sermone conficere, utque tantum illa valerent ac si Latina oratione aliquis vteretur: atque ex eo tempore deinceps frequentata fuit librorum quoque compositio. Reddit autem rem hac in parte difficiliorem tam deprauatio prisicarum appellationum, quam quorundam, quæ quasi obsoleuerunt obliuione vetustatis obruta, ignoratio. Tum etiam audacia ingens fingendi quiduis, & commenta antiquitatis fide, quæ redargui non posset, affirmandi: qua & multa gesta commemorata quæ gesta sunt nunquam, & nostratia genera in externa infusa, atque ita nostras historias redditas esse

con-

constat mendosiores. Sed quanquam hæc certæ & exquisitæ narrationi officere necesse est plurimum, tamen ad inueniendam quasi sedem veritatis, vbi cognitio non sit instabilis, multum valet diligentia & Industria studii prudentum & doctorum hominum.

IV. Quorum traditas & peruestigatas indicationes nos sequentes, de hac illustrissima progenie, ac cuius quasi fonte deducere reliquæ narrationis cursum placuit, reperimus vel temporibus Caroli Magni, vel paullo post, Hermannum Principem Ascaniæ (quæ est Anhaltina domus) coniugem habuisse Hiltegardim, sororem Bitichindi & Berichingi, filiam Dietrichi. Quod tempus abire aliquantulum oportet vltra annum Christi DCC. Ascaniæ autem nomen ditionis horum Principum & Ballestedii antiquissima est. *Ballestedium* a materia trabum appellatum esse non dubito. *Ascaniæ* autem vocem alii aliunde ducunt. Quam nunc etiam præ se fert oppidum in tractu terrarum, quas incoluerunt Cherusci veteres. Quibus placet Asiaticam olim gentem in hæc loca venisse, ii speciosissima & ciuitatis Ascaniæ, & Ascanii Aeneæ filii, & alterius ætate superioris ductoris Phrygum, nomina Græcis autoribus possunt assumere. Sed nos ingressi in viam narrationis exploratæ, hac ipsa, aliis præteritis, pergamus. Herman-
ni

ni filius fuit Berichingus, nomine, vt videtur, familiari & gentilitio. Nam cognomentum vetus fuit Principum istorum, quacunque sane de causa, Vrforum. Credibile est de studio, vel etiam quopiam euentu, venationis primum alicui illud impositum esse. *Berichingus* autem deminuta Germanica voce a *Bero* (*Bär*) vrsus paruulum significat, & eiusdem originis est *Berengarii* appellatio, siue a Berichingo detorta, seu significans cupiditatem aggrediendi vrsus. Atque hoc nomen in Italiam ab his Principibus allatum, ibique istam familiam quasi consitam esse, historiae series plane demonstrat. Berichingus Hermanni filius ex Chunhilde Rugia suscepit quum alios liberos, tum gubernationis hæredem Berichingum. Hunc vna cum auunculo magno Bittichindo aduersus Carolum bellum gessisse, & tandem certis conditionibus Carolo se subiecisse, & ritu Christiano baptizatum Caroli nomine appellari coeptum esse, perhibetur. Quas actiones incidere oportet in annum Christi DCC LXXX. Hic coniugem habuit Hermodin, vel vt alii Luccardin, Saxonici ducis Luithulfi, vt fertur, filiam: & ipsam ex Bittichindi progenie, sed quo ab illo interuallo atque gradu, incertum est. Quæ peperit filium Hermannum, a quo inexplicata successione per Esichi, Tamichi, Erichi, Adalberti, indistinctæ

fobolis nomina, ad Esichum, fundatorem pi-
& religiosi collegii Ballestediani, familia hæc
perducitur, cuius ætas incidit in annum Chri-
sti MCXXIX. *Esichi & Tamichi*, ab Esa & Tama
deminutæ voces sunt, his temporibus, ni fallor,
ignotæ significationis. *Erichus* autem vel est
& ipse deminutus a verbo Teutonico signifi-
cante Herum, vel est in nomine significatio
honoris & opulentia. Esichi huius filius Otho
fuit, cognomento Diues, pater Alberti Beri, id
est, Vrſi, geniti matre Sophia, filia Magni Ducis
Saxoniae. Albertus affinitatem contraxit cum
Misniae Marchionibus, & toto tempore quo
gubernationi præfuit cum varia fortuna bello-
rum conflictatus, nauauit operam Lotharico
Imperatori in Italia, & domi multiplices im-
pressiones hostium represit, & Septemuir cre-
ando Imperatori factus est, titulo & possessio-
ne Brandenburgensis ditionis. Huius filii fu-
ere Otho & Bernardus. Otho Brandenburgensem
ditionem tenuit, Bernardus cum Saxonica
& ipse Septemuirum Imperatori creando ho-
norem consecutus est. Bernardi ex Cimbrica
coniuge filii fuere Albertus & Henricus. Al-
berto Saxonica dignitas & terra obuenerit, Hen-
ricus gentilem possedit Ascaniae regionem.
A quo multiplici ista domus prole haud longo
tempore aucta, tanquam foecunda arbor, late
protulit quasi ramos illustrissimæ prosapiae,
quæ

quæ post annum circiter trecentesium eos Principes produxit, quorum sapientiam, virtutem, & pietatem, patrum nostrorum & nostra ætas cognouit atque suspexit, & a quibus patria verisimis præclarissimæ laudis titulis illustrata est. E quibus Rudolfus, princeps fortissimus, in exercitu Maximiliani Imp. virtute & consiliis præstans, obiit diem suum Veronæ, neque abfuit suspicio veneno illum sublatum fuisse. Adolfus autem studio religionis & vitæ sanctitate excellens, in gubernatione Ecclesiæ Mersburgensis, omnibus venerabilis & reuerendus maxime consenuit. Coniugia autem huic stirpi inserta fuere quum alia memorabilia, tum sororis summi Principis Ludouici, mariti Elisabethæ sanctæ foeminæ; itemque filiæ Leopoldi ducis Austriaci, etsi Imperatoris Rudolphi filiam alii nominarunt; nec non & filiæ (vt diximus) clarissimi atque cognati generis, Marchionis Misnensis.

V. In hac igitur antiquissima nobilissimæ domus familia natus Princeps Georgius, parentem habuit Ernestum, fratrem Rudolphi, Georgii filium. Adolfo autem pater fuit Adolfus, frater patruelis Georgii, aui huius Georgii, Ernesti filii, de quo narratio ista instituta est. Hunc laudatissima foemina Margarita, filia illustrissimi Ducis Henrici Munsterbergensis, peperit post maiores natu filios duos,

VITA GEORGII

Thomam & Iohannem, & ante minorem Ioachimum. Huius illustrissimæ ~~feminae~~ prudentiæ, & pietatis, & affectionis erga veritatis cœlestis doctrinam, & eximiæ innocentia, recens adhuc memoria est. Sed illustrissimus Princeps Georgius tam parentum voluntate, quam Adolphi Episcopi consilio, vna cum fratre Ioachimo, minore annis duobus, ab ineunte pueritia liberali disciplina institutus fuit, & nondum annos natus duodecim iam orbatum patre, ad pleniorē quasi mercatum doctrinæ missus Lipsiam; præfecto educationi & studiis ipsius optimo viro, & fide præstante, & flagrante desiderio cognitionis eruditæ & bonarum literarum atque artium, Georgio Helto patriæ Vorchemio. Cui & ego puer erudiendus traditus, hoc inter ea, quæ in mea vita feliciter mihi acciderunt, præcipuo loco ponendum duco, contigisse meæ pueritiæ talem magistrum, & alterum plane parentem. Non enim ille, si ipsius filius essem, aut custodire ætatem meam diligentius, aut tradere præcepta honestatis & bonarum artium fidelius potuisset. De quo quicquid grati animi memoria prædicatione nostra celebret, leuius esse atque exilius futurum facile intelligo, quam vt vllam partem meritorum illius æquare possit. De hoc igitur quod ad me attinet sileatur. Erga Principes autem fratres tantus amor, & illos insti-

stituendi ea cura fuit hujus magistri, & in hunc quoque ipsorum caritatis affectio, vt singulari Dei æterni benignitate conciliatos esse dubitandum non sit. Erat natura in Principe Georgio perquam placida & clemens, & quum ad religionis obseruationem custodiamque innocentia ipse sese non haberet seueriorem monitorem, summa tamen comitas & erga omnes humanitas mirabili suauitate mores illius quasi condiebat, vt tam in dictis quam factis omnibus gratia venustatisque commendatio inesset.

VI. Propinquum suum Episcopum amisit natus annos nouendecim, qui curationi illi præfuerat annis duodecim, paterno animo erga suos, Princeps religionis & pietatis studiosissimus, non etiam indoctus, vt captus fuit illorum temporum. Solebat ille omnia Episcopi munera accurate & sedulo exequi. Audiui eum ego adolescens senem admodum concionantem ad populum, quum quidem minus liquido exaudiri verba possent, quamvis de contentione, quanta suscipi maxima poterat, nihil ille remitteret. Hoc Episcopo præsidente in Ecclesia Mersburgensi, disputationes de mercatu veniarum Papalium, qui impudente temeritate exercebatur, prouocarunt aliarum quoque rerum quæstiones. Inter quas & de causis reconciliationis homi-

num cum Deo certiora & disertiora proferri, & errores vel stoliditatis superstitiosæ vel fraudulentæ malitiæ detegi; quum Martini Lutheri Theologi Wittenbergenſis ſalutares admonitiones, & ſtudioſum veritatis, inſolentia atque ferocia aduerſariorum arreptum inclementer exagitaretur, ipſeque non tam irritaretur quam raperetur in certamen & pugnam. Audiui ego Principem Georgium narrantem, quanta cum ſolicitudine animi Episcopuſ A-dolfuſ de illis rebus atque controuerſiis cogitare, quam caute loqui conſueuiſſet. Ac quodam tempore facta mentione doctrinæ, ut quidam dicebant, nouæ, de hominiſ coram Deo iuſtitia, quæ eſſet vnica meriti Jeſu Chriſti, & ſola fide vniciuque applicaretur, & pleriſque (quod hoc Episcopuſ gratum eſſe, ſperarent) Lutheri de ea re doctrinam condemnantibus; narrabat Princeps Georgiuſ, diu aſſediſſe Episcopum nihil loquentem, ut de ſilentio, eſſe cogitationeſ ipſiuſ graueſ, animaduerti poſſet. Tandem vehementiore oratione & ſono vo-ciſ altiore dixiſſe: Quid? voſ ne hanc doctrinam nouam perhibetis? Annon meministi, quid in Pſalmo legamus: *Non iuſtificabitur in conſpectu tuo omniſ vi-uens?* atque impetu animi concitati ter hoc repetiſſe, *omniſ viuens.* Quo reſponſo il-lam inſectationem ſubito conticuiſſe. Finiuit

vitam in terris suam Episcopus Adolfus anno Christi MDXXVI. X. Cal. April. perfunctus laboribus curationis suæ, & feliciter acquiescens in spe clementiæ & misericordiæ diuinæ.

VII Post decessionem Episcopi Adolphi Princeps Georgius, (qui ad Ecclesiasticæ dignitatis eximiam spem educatus, etiam honores iam aliquos consecutus esset) confirmata & aucta prudentia & doctrina, traductus fuit quasi in lucem & conspectum hominum, & ad gubernationis partem in Magdeburgensi principatu a propinquo Archiepiscopo Alberto adhibitus. Quo tempore toto quum essent ante oculos & inter manus, vt dicitur, incrementa opulentiæ, splendoris, amplitudinis, quum occasiones offerrentur voluptatum & vitæ suavis, quum Princeps ætate floreret, corpus haberet integrum viribus, statura elegans, membris firmum, specie formosum, totius habitus pulchritudine conspicuum; animus autem neque inertia torperet, ac potius & sua natura & in illo annorum vigore neutiquam quiesceret, sed ad agendum aliquid incitaretur: tum igitur & cura in ipso virtutis honestatisque, & in omnes partes diligentia atque industriæ aucta fuit, & labores maiores suscepti, & repressa indulgentia, quam blandiens adolescentiæ sensus conciliare hominibus consuevit: tantum abfuit vt voluntas ad pra-

vitatem, & studium ad turpitudinem conuersum, denique vt iucunda & dulcia & quasi ludum concessum iuuentuti ipse secutus sit, memor, non modo quam personam Deus sibi imposuisset, qui tali conditione atque loco nasci se voluisset; sed quid etiam deceret eum, qui ad veram laudem educatus, & ad publicam vtilitatem productus esset, a quo omnes boni & ipsa patria non communia vulgaris gubernationis, sed singularia peculiaris officii merita atque munera expectaret. Itaque in isto fastigio honorum, in libertate vitæ, in copia, & lautitia victus, religiose, caste, gnauiter, sobrie, decurrit spatium ætatis lubricæ & pronæ ad vitia, sic ab omnibus vt laudem pietatis, humanitatis, pudoris, bonarum artium consequeretur. Inprimis erat cupidus & perspicuendæ veritatis & defendendæ. In quo integrum & rectum ingenium magister Heltus sollicito studio & assiduis monitis confirmabat. Non credat aliquis, præsertim in hac tam breui consecuta omnium desidia & languore, quantum vna hi vigilarint, quid operæ impenderint lectioni, quam anxie exquisierint dubia, quam religiose iudicarint de controuersis. Libri, quibus vti fuerunt, testimonium dicunt maximi & infiniti studii ac defatigationis in discendo: quam non modo non tolerare potuissent, sed ne subire quidem omni-

omnino voluissent, nisi & diuina quadam animi incitatione mouerentur, & cognitionis dulcedine inuitarentur, & successu recrearentur. Præsertim quum res plena inuidiæ, neque conatus expertes periculi essent; quod intelligeretur Princeps animum cogitationesque suas intendere explorationi causarum, de quibus discordia in Ecclesiastica doctrina extitisset.

VIII. Accesit postea morbus acerrimus, cuius vis ita labefactauit corpus, vt toto vitæ tempore deinceps valetudo imbecillior afflictiorque fuerit. Inprimis molesta ab hoc & incommoda Principi oculos debilitatio corripuit. Sed inter hæc aduersa tantum ille tamen quotidie, absque vlla intermissione, legit, scripsit, dictauit, commentatus fuit, quantum non alii multi in hac mollitia vitæ & fastidio & inani persuasione scientiæ, qui professi studiorum cultum operas doctrinæ exercent. Quid ego de iis horis memorem, quas destinatas impendebat piis precibus, toto pectore implorans opem æterni Dei, & venerans numen illius, & Filio Dei commendans consilia, actiones, salutem suam, & commendans illi accisas res Ecclesiæ multipliciter laborantis, & gratias agens benignitati ipsius conseruantis hanc in tantis periculis. Quid de interpellationibus dicam? Nam quod omni fastu super-

B 5

biæ

biæ careret, patebat aditus ad eum cuius: quod autem voluntas illius benefica & prolixum studium subleuandi vniuersos, atque etiã prudentia, eruditio literarum, peritia maximarum rerum nota erat, eo fiebat vt ad eum confugeretur vndique, siue alicui defensione, seu consilio, seu quacunque re opus esset. Sed omnia magis conspicua fuerunt postquam hic Princeps propriæ & suæ gubernationis quasi habenas tenere cœpit; quum & illustrissima Mater decessisset, quæ terras reliquit anno Christi MDXXX. & post annos non multos Princeps Iohannes frater affinitatem cum domo Brandenburgensi contraxisset, ducta coniuge vidua Pomeranica. Nam ante omnia amorem & coniunctionem fraternam sic stabiliiuit, vt illa inter tres fratres concordia nihil firmitus neque dulcius fieri potuerit: eratque difficile decernere, vnusquisque alterum magisne & studiosius veneraretur atque obseruaret, an ardentius diligeret & arctiore beneuolentia complecteretur. Tum ad augendam & ornandam ditionem paternam animum conuertit, quam & ædificiis luculentiorum, & ordinatione gubernationis fructuosiorum reddidit, distinctis sedibus quas singuli tenerent tanquam suas, quum possessio communis totius trium remaneret. Hæc iustitia & sapientiã Principis Georgii sic fuere consti-

tuta atque explicata, ut nullius vnquam vlla de re querela aut reprehensio cognita sit.

IX. Quum autem pars esset & membrum collegii Mersburgensis Ecclesiæ, in quo non ætatis sed cooptationis tempore celeriter primas obtinuit, perquam libenter illo loco degere solebat; atque arbitrabatur quum valetudine se ibi meliore uti, tum esse animo alacriore & hilariore. Eam opinionem de consuetudine puerilis educationis manare plerique credebant. Feruebat iara contentio de præcipuis capitibus religionis, quæ præpostero studio & temeraria confidentia quorundam excitata atque aucta, ubi nunc etiam velle insistere, aut quo tandem euasura esse videatur, novit scilicet Deus, hominum quidem certe discernere potest nemo. Nam quum ioculares errores & ludibria quorundam impudentissimorum hominum, quorum audacia, avaritia, rapacitas in Ecclesia delicias faceret, cum detrimento maximo omnium mortalium, notata & reprehensa fuisset, mollissimo ut dicitur brachio, a quibusdam pia & iusta commotione dolentibus, mendaciorum nefario scelere sanctissimæ doctrinæ veritatem infirmari: ita barbaria & improbitas exarsit, & tanta insolentia pro falsitate contra veritatem propugnauit, ut prælia maxima & conflictus acerrimi de principiis extiterint, quorum
nunc

nunc etiam meminisse pudet plerosque, tantum abest ut in defendendo perseverent. Princeps autem Georgius quum ante oculos & in conspectu haberet non modo rituum eversionem, qui usu & notitia corroborati essent, sed cunctæ administrationis Ecclesiasticæ conversionem, patefacta corruptione doctrinæ & vitiis indicatis, neque fugeret eum quid turbarum & miseriæ ex ea re euenturum consecuturumque esset: quia tamen & cogitando, & quærendo ex aliis, & cum bonis doctisque ac piis communicando quæ sibi in mentem venissent, compertum atque exploratum habebat, veritatem doctrinæ cœlestis & præconium Evangelii partim obscuratum superstitione, partim calliditate depravatum sic esse, ut non dissimulari errores ac imposturæ etiam quædam neque tegi posse diutius viderentur; re anxie considerata, & imprimis cum optimo viro & homine fidelissimo Georgio Helto deliberata, omnia negligenda & posthabenda veritatis confessioni & assertioni, & evidentem atque perspicuam interpretationem sacrarum literarum, speciosæ opinionis & ostentationi catholicæ consensionis proponendam esse statuit. Quum quidem intelligeret, depravationis aut lapsuum aduersus sincera & recta neque valere ullam consensionem neque nominari oportere. Statim

tim enim a primo quidem initio a veris falsa dissentiunt & recedunt, sed non statim quantum discrepent manifestum est, id quod, ut in itineribus diuersis, procedendo magis apparet, donec tandem ita procul illa disiungantur, ut ad plane aliena & absurda digressio abducatur.

X. Differuit iis de rebus optimus & religiosissimus Princeps cum magnis etiam viris, quorum aliquos argumentando (quod animo illi essent simplice & probo) eo ~~perduxit~~, ut non tam falsitatis doctrinæ correctionem quam offensionum nomine improbarent. Nam negari non potest, aduersantibus emendationi capitibus & potentibus, in vulgi exultatione & applausu, inque libertatis auda usurpatione, nonnulla facta perpetrataque fuisse, non ab omni crimine & culpa remota. Et norunt prudentes homines, quanto cum periculo constituta moueri soleant, ut prouerbum etiam prohibeat καὶ κανὼν κινῆσαι, τό γ' εὖ κεῖμενον, id est, toleranda peccata aliqua Reipublicæ, neque in hac ruinosa esse conuellenda. Sed quoties mens contemplari & intueri diuinas subiectiones cœpit, vsque adeo non curat rationis propriæ dictata, ut etiam quum stulte atque peruerse sentire de maximis rebus, tum publicam priuatamque rem interdum perperam & male gerere videatur. De quo disputare esset longum, & a nobis fieri plus ver-

verborum in præsentia non est necesse. Georgium quidem certe Principem, ad assentiendum iis, quorum sententiam tanquam abhorrentem ab Ecclesiæ usu condemnari videbat, non fuisse impulsus fructu aut gloria nouitatis, manifestum est. Quid enim illustrissimo loco nato, & ingenii doctrinæque laude summa perfruenti, defuit ad ea consequenda, quæ opum abundantia dignitateque honorum pulcherrima & amplissima habentur, præsertim ingresso iam pridem quasi curriculum splendoris atque potentiæ Ecclesiasticæ? Quin ille potius & famam atque existimationem & rem ac fortunas omnes in discrimen vocari sensit, quum vitæ quoque & salutis pericula constantiæ in asserendis & confitendis iis, quæ vera per se certa fixaque erant animo ipsius, impendere appareret. Sed de his eo breuior esse debet humanæ coniecturæ oratio, quod moderetur & dirigat talia consilia actionesque peculiariter æterni Dei numen; quod quale sit, ingenii nostri acies sua nunquam perspicit, & alio ad hæc contemplanda lumine opus est, quam quod in mente rationeque hominis esse solet aut potest clarissimum atque fulgentissimum. Accensa autem lux est veritatis cœlestis sermone Dei, in tenebris mundi huius, & proposita ad omnium illuminationem in natura nostra, quam Filius Dei indu-

induens corpus humanum sibi adiunxit. Eamque intuentes non aberrant: auersantes autem, aut conuiuentes, in maxima mala & interitum ipsum deferuntur & ruunt. Verum de his & aliorum proprium est disserere, & occasio alterius argumenti debetur enarrationi, non inculcandæ huic scripto. Attexamus igitur supra expositis ea, quæ sunt reliqua.

XI. Quum mortuus fuisset Episcopus Mersburgensis tertius a Principe Adolfo, ita res tulit, vt successione legitima & prius observata suffragatione collegii, Episcopus statim fieri crearique non posset: commissa tamen fuit ordinaria rei Ecclesiasticæ cura & quasi dispensatio Principi Georgio. Quod ille imponi sibi onus vt ægre difficulterque passus est; sic & in suscipiendo pietati morem gesfit, & perferendo præstitit fidem studiumque assiduitatis & laboris immensi. Atque iisdem fere temporibus Georgius Heltus decescit, claudens vitam in terris suam fine optato & felice, inque veneratione Filii Dei & ardentibus precibus reddens animam suam æterno Deo. Huius migrationem, sua quidem ille caussa, grauissime tulit, & eo casu acerbissime est Princeps perculsus, (nam cum ipso præclare actum esse intelligebat & lætabatur) & priuatum se esse tali viro, illo statu rerum suarum, dolen

dolenter sæpe questus, non tam fatum ipsius quam suam orbitatem deplorauit. Omnibus autem pietatis summæ officiis mortuum prosecutus, quum monumento ornari sepulcrum, tum cætera, quæ se velle testatus fuerat, fieri curarique iussit. Instruxerat Heltus bibliothecam copiosam & amplam, inque illam patrimonium facultatesque suas impenderat. Eam cupienti Principi libenter reliquit, petiit tamen vt suis propinquis etiam hoc nomine certa pecunia persolueretur; & vt collocaretur altera quædam pecunia, de qua singulis annis in sua patria adultæ & pudicæ virgini pauperculæ mediocris summa in dotem penderetur. Quum quidem ipse cælebs sine omni non modo crimine, sed suspitione etiam libidinis, consenuisset. Hæc Princeps executus est statim summa fide & liberalitate se digna. Ac paullo post multo vehementius & cupidius præsentiam illius cœpit desiderare, quum post obitum Martini Lutheri (quo auctore & doctore veritatis cœlestis doctrina in Ecclesias & Scholas reuocata, & præconii Evangelici vox, post diuturnum silentium & repressionem, clarius & plenius sonans emissa fuit) ea negotia Rempublicam conturbarunt, quorum quum omnibus bonis recordatio acerbissima & tristissima sit, non est quasi agitata expositione nostra communium calamitatum

tatum mœstitia. Quas quoties reminiscor, & cohorresco tota mente, & deploro fortunam patriæ. Cui quum offerretur omnium rerum expetendarum præclara copia, vt & opibus & viris florere posset, & quum virtutis tum sapientiæ eruditionisque laude atque gloria præstare cæteris nationibus; subito casus quidam hanc iecit in maximum & præsentissimum omnis prosperi euentus certamen atque discrimen, vt deuenerit in eas asperitates atque angustias rerum omnium, vnde quo pacto aut quando emerfura sit, humana ratione & prudentia constitui definiri que non posse videatur. Nam & exitialis tumultus (causis bellorum aliquantis per diuina magis benignitate, quam voluntate hominum retardatis) tum erupit, & perniciofa arma expedita, & distracta studia alienatque animi fuerunt, non modo popularium ac ciuium, sed consanguineorum & naturæ necessitudine deuinctorum. Sed quum pudore tum dolore prohibeor, quominus vrgeam mentionem turpitudinis & detrimentorum gentis nostræ; & patriæ clades atque ignominiam, quoniam auerti non potuerunt, obliuione obrui posse optarim, vt nostra propria ista mala & dedecora sint, neque quicquam de his ad posteritatem deriuetur. Quapropter hætenus attigisse illa incurrentem narrationem nostram fatis sit.

XII. Erat ea tempestate in sanctissima & his regionibus salutari curatione occupatus Princeps Georgius. Quos poterat, iuuabat aut consulendo aut re, ceteros aut consolando erigebat, aut docendo instruebat. Onera autem, quibus iam opprimi cernebat partiam, alleuabat pro viribus. Nam & grassantis quasi pestis impetus si frangi posset & processio impediri, tentabat atque conabatur omnia; & spe opinioneque cum frustrante, ad functionem muneris sui & Ecclesiasticam curam convertebatur, quum ad populum ipse concionando, tum diffluentem cœtum Ecclesiasticum recolligendo, tum etiam (iam omisissis vel abiectis potius solennibus sacrorum ceremoniis) instituendo vbique ritus cum veritatis doctrina & vsu religiosæ antiquitatis consentaneos, qui in hodiernum vsque diem seruantur atque durant. Non autem is erat Princeps Georgius, qui non necessariis mutationibus delectaretur, quiue gauderet nouitate. Ac potius, nota sibi & vsitata libenter & studiose retinenda ducebat, neque quicquam non modo temere mutandum, sed ne omittendum quidem esse censebat, in quo non impietas aliqua hæreret, vel quod non abhorreret a doctrina veritatis cœlestis. Quumque putaretur esse nimis deditus ceremoniis, de iis, quæ oblata essent, quoque tempore accurate quum ad Luth-

the-

therum ipsum, tum alios, referre consueverat, ut omnia semper incepta & facta non modo veris rationibus, sed præcipuorum etiam virorum autoritate, defensa munitaque haberet. Quid autem hoc profuit? Quum reperti sint, qui illum quasi parum fortem & strenuum propugnatorem Evangelicæ doctrinæ accusarent, & quicquid egisset inhumanissima censura carperent, ac pene cruentis notis designarent. Erant in Germania res illa tempestate confusæ & turbulentæ. Nam & Cæsaris potentia formidinem incutiebat omnibus, & multis in locis quædam paullo ante conuulsa instaurabantur, & ad formam priorem ac statum veterem pleraque reducebantur. Inter hæc aliqui omnia quæ gerebantur vituperare, & vehementibus animis refragari quietis consiliis, neque ullam submissionem aut concessionem probare. Id qua affectione ab unoquoque factum sit, neque ego pronunciare volo, neque de sententia & voluntate ullius iudicium facere debeo. Sed res ipsa plane ostendebat, partium in Republica dissensionibus excitari illas quoque magna ex parte alienationes, neque tam quid verum & rectum esset spectari, quam indulgeri inclinationi & favori, quum causam quampiam aut hominem aliquis esset secutus. Itaque non hoc agebatur, ut certo res cognosceretur, neque in-

corruptum ut fieret iudicium de compertis, sed ab iis, quos aduersarios vnaquaque factio se habere credebat, quicquid diceretur aut fieret, id inclementer & sauis insectationibus exagitabatur. Colligebantur autem curiose vndique rumusculi, & indicationes multae leues atque inanes, de quibus vanissima & inconsentanea permulta in vulgus spargebantur; cuius aures semper obtrectationibus & probris patent, quodque iis facile capitur quae suspiciose & maligne declamitantur. In hoc enim & imperitia & contumacia & peruersitas plurima inest, & ut ait Pindarus: *ἵψλὸν ἔχει ἡτὲρ ὁμιλῶ ἀνδρῶν ὁ πλείς*. Ut autem si coloretur speculum, verbi causa, minio aut caeruleo, omnia quae apparent eodem colore conspiciuntur, ita animus oblitus inductionis persuasionis, secundum hanc iudicat atque pronunciat. Tantum autem valet, si quid arripuit studium & propensio, aut reiecit fastidium & maleuolentia, ut non modo tunc consideratio omnis excludatur, sed errori etiam, pertinaciter obtemperetur. Quale est quod de Aristide traditur. Quum enim de hoc suffragia inirentur decem annorum exilii, quae testis perscribi mos erat, venit vnus illiteratus ad Aristidem, & oblata testa petit ut Aristidis nomen inscribat. Interrogat Aristides, numquid mali ab hoc ipsi aut damni datum sit? Immo,

mo, inquit ille, ne noui quidem hominem, sed fama & vociferatione aliorum moueor, & celebritas nominis odiosa est.

XIII. Plausibilis autem erat maxime ad nostratem fere multitudinem infamiae notatio, qua aliqui *Papistici* nominarentur. Atque id obiectum cui foret, eius statim existimatio ita lædebatur, ut de ipso e vulgo vix quisquam deinceps aliter quam de homine deterrimo sentiret. Neque negari potest aut debet, quin istud genus, dominationis & principatus cuiusdam alieni occupatione in Ecclesia insolens & superbum, quum doctrinae coelestis puritatem contaminarit, tum morum sanctitatem & seueritatem disciplinae sustulerit atque violarit, ut illius societas & commercium iis qui in fide Iesu Christi permanere voluerint, magnopere vitandum fugiendumque esse videatur. Sed non est tamen etiam laudanda ferocia & iniquitas eorum, qui hoc conuicio, de quauis similitudinis specie, aliquos, quos oderunt aut a quibus se separauerunt, statim adoriuntur, & hos conantur ad vulgus reddere inuidiosos. Atque mihi hoc loco, quid quidam vir honoratus & doctus dixerit, referre libet. Qui quum aliquando de mutata pictura imaginis Iesu Christi in alteram priscae historiae Abrahami, ut videor meminisse, interrogatus esset, ecquid

placeret consilium? Mihi vero, inquit, valde displicet. Quamobrem autem, inquit alter, displicet? an tu veterum patrum effigies exprimendas non putas? Non hoc, inquit ille, ego dico: sed de Christi priore imagine agnoscere potuisse, quod iste cœtus esset nominis Christiani. Idem in hyeme, quodam querente frigus esse molestum pedibus; Quin tu, inquit, super calceos soleas inducis? quumque ille respondisset: morem eum esse Papisticum; Age igitur, inquit, si, quod mirifice ab istius generis consuetudine abhorreat, sequi cupis, non pedibus sed capite insistere velis. Hæc si venusta esse & vrbana aliquis forte non existimet, certe neque infaceta sunt, & ineptias istas immodicæ vehementiæ hac in parte notando opportune obiurgant. Atque hæc commemoravi, non vt pro optimo & sanctissimo Principe dicerem, qui sine defensione non modo purgatus bonis omnibus, sed eam quoque laudem & admirationem adeptus esset, quam alius in nostra gente nemo: sed ista quasi disputatio hoc vult efficere, vt ieiuni & angusti animi & malevolentia præuitas (quæ interdum admodum est occulta) excutiat, vtque & huius talis Principis, & aliorum quorundam egregiorum virorum, pietatem, sapientiam, virtutem, labores, opera, pro sua quisque parte imitari atque sequi, quam inuidia pre-

premere aut odio insectari malit. Magna autem iam profecto est penuria grauium, constantium & fortium virorum, qui neque temere quicquam commouendum esse statuant, neque se magis diligant & pluris faciant, quam salutem & dignitatem Reipublicæ; quique difficilia & dura, si necesse sit, tolerare ac perferre valeant, & non tam reluctando aduersis tumultuentur, quam patiendo sæpe magna mala auertant, vel certe mitigent. Errant enim magnopere, qui fortitudinem putant esse præposteram, vel etiam præcipitem audaciam & impetum animi concitati; quum hæc ipsa reuera sit timiditas atque formido, quæ impendentes molestias, & ea quæ metuuntur incommoda, effugere aut differre, ruendo & moliendo omnia, conatur atque gestit. Sed redeo ad rem.

XIV. Tempora illa erant difficilia & dura. Deque religionis cultu tractabantur atque promulgabantur ea, quæ Germaniam quasi terræ quodam horribili motu concusserunt. Aliis igitur in locis exultare & gaudere homines, aliis contristari & dolere, aliis trepidare & metuere, aliis fremere & tumultuari. Atque erant sane negotia eiusmodi, vt maiorum dissipationum causas multiplices complecterentur, siue hoc errori & inscitæ aliquorum, seu etiam malitiæ & peruersitati adscribendum esse videatur. His Georgius quoque

Princeps, qui in Ecclesia præcipuo loco curaret, quin implicaretur cauere non potuit. Verum quemadmodum neque conscius aut particeps aut adiutor ille, vllius fraudulentæ, impudentis, mali, perniciosi consilii, neque depravationibus aut corruptelis vnquam assensus fuit: sic in illa difficultate & miseria, quum constantissime atque fortissime tum maxime religiose & circumspecte se gessit. Sciebat se autorem perturbationum illarum non esse, neque culpam sustinere suscitati vnquam belli, aut exorti dissidii, aut natæ offensionis. Quod reliquum erat, suum officium postulare ad Deum & homines animaduvertebat, quasi morbo laborantes res communes non deferere: non quidem iis, a quibus mala immissa essent, inferuentem, sed salutis & incolumitati publicæ consulentem, & in id incumbentem, vt si depellere incommoda & detrimenta non concederetur vniuersa, caput tamen & vita conseruaretur, & interitus atque exitium a corpore Ecclesiæ propulsaretur. Hoc sciebat & æterno Deo gratum acceptumque, & hominibus salutare, & apud bonos & incorruptos iudices sibi laudi futurum esse. Ideo perrexit vnacum aliis doctrina & pietate præstantibus viris in hoc spatio, nihil moratus quid ab inimicis & æmulis impeditenti inferretur proposito & studio optimo atque præclarissimo. Non etiam

etiam fugiebat prudentiam ipsius, opinionum commenta, & vanitatem suspicionum, & fabulas futes, deleri die, & euanescere minimo interdum momento & puncto temporis, vera & recta durare in longitudinem, & indies magis ac magis corroborari. Atque his de rebus neque planius & apertius dicere, neque copiosius & argutius disputare libet. Quod animus mœrore impediatur propter eas plagas, quæ inflictæ sunt rebus communibus, peruicacia & inhumanitate atque præpostero ardore nimiaque vehementia quorundam, sine cœssa sæuitiam adhibentium, & vulnera, quæ illigari potius deberent, infesto vngue reddentium minus sanabilia. Etiam arbitror multos iamdudum audaciæ importunitatisque poenitere; aut si qui nondum intelligunt, quantum illa iactatione & insolentia incommodi damnique publice priuatimque datum sit, cum eorum petulantia atque furore insaniat profecto, qui conflictari amplius velit. Multo enim satius est cedere quam congredi *Bacchæ bacchanti*. vt ait Plautus, cui *si velis aduorsarier,*

Ex insana insaniorem facies, feriet sapius :

Si obsequare, vna resoluas plaga.

Si qui vero iam more impudentes sunt, & scurrilitatis consuetudine bella esse rentur ac falsa, quæ sunt inepta atque deformia, illis sane tanquam Clazomeniis lege Laconica *ἐξέσω ἀγῆ*

tolerabat, & labores fortiter perferebat, & non defatigabatur villo onere officii; ita ambitione penitus caruit, factionum plane hostis, & neque gloriam neque opes vnquam concupiuit. Atque illi, quam veluti spartam, secundum vetus verbum, fuerat sortitus, præsuit. Non, tanquam Apostolicam personam gerens, generalem animaduersionem sibi vendicauit, neque in aliorum quasi prouincias inuasit; quid ipse fecisset, præstandum sibi existimans, non notanda aut insectanda facta aliena. Sanauit, quæ potuit: in quibus medicinam superauit malum, illa tamen neque imperite secundo, neque crudeliter laniando, plus mali intulit quam adiumenti attulit; tantum abest vt vel temeritate atque imprudentia, vel perturbatione & iracundia, noua & recentia vulnera fecerit. Docuit, legit, scripsit, consuluit, monuit, fideliter & vtiliter, quicquid potuit. Non labores fugit, non vitauit tædium, in omnibus iis obeundis, quibus Ecclesiæ & rebus communibus opera nauari posse crederetur. Denique sese exemplum præbuit boni pastoris, omnibus in partibus tam doctrinæ quam disciplinæ: quarum illam purissimam, & sincerissimam, hanc integram, quoad licuit, & incorruptam præstitit.

XVI. Singulari autem attentione & præcipuo studio habuit conuentus eorum, qui in
illa

illa regione præerant Ecclesiis. Quos & convocare statò tempore, & coram præsentibus verba facere solebat, sic illos ut quaque occasione necessariis subiectionibus intrueret, & emendaret comperta vitia, & præciperet quid facere quid omittere deberent. Tum deinde amanter complexus uniuersos, ita acceptos liberaliter & tractatos benigne, ad suum quemque gregem reuerti iubebat. De argumentis autem concionum quum ipse solícite cogitabat, ut idonea & temporibus, rebus, personisque aptissima deligeret, tum de illis absque simulatione referebat ad eos, quos doctos & bonos & communium commodorum amantes esse cognouerát : a quibus non modo æquo, sed grato etiam animo patiebatur admoneri se, & sibi aliquid utiliter & recte monstrari. Perfecere tunc quidam, ut in liberam atque vacuam sedem Mersburgensem, non de collegio lectus, ut ante, Episcopus collocaretur, sed ut postularetur administratio alterius absentis. Quo tempore declaratum fuit religionis in hoc Principe studium, cum prudentia coniunctum. Vel potius apparuit, Deo illum esse carum, regenti voluntatem ipsius & moderanti animum, ne quid vel negligenter vel cupide ageret. Quum enim, Externi potestati suo suffragio Ecclesiæ administrationem committere ut dubitaret, maximis atque grauissimis

ratio-

rationibus moueretur ; veritus fuit ne ipse appetere illum principatum videretur, si eum, qui commendationibus eximiis producebatur, quasi repudiaret. Anxia admodum fuit his de rebus optimi Principis deliberatio , atque animum nunc huc celerem nunc illuc dividebat, in partes rapiens varias perque omnia versans, quemadmodum de re multo leuiore Maro cecinit. Sed antetulit cunctis rationibus & rebus, custodiam veritatis cœlestis & gloriam æterni Dei. Itaque legitima & solenni attestazione distinxit atque definiuit negotium, professus se nemini obstare ad potentiam & principatum gubernationis ciuilis aspiranti; sed cuicunque hic locus ab illis, penes quos istud ius esset, assignaretur, cum se debita reuerentia obseruaturum esse. Ad præsidem vero & moderatorem rei Ecclesiasticæ quod attineret, se, nisi quem Euangelici præconii fautorem, & gnarum doctrinæ veritatis cœlestis, & ita animatum esse sciret atque nosset, vt huius puritatem custodire, neque consensionem sanctæ harum regionum refragari vellet, quo minus permetteret Ecclesiæ suæ præfici Episcopum, prohiberi conscientia officii & fidei, quam Deo & hominibus persolvendam sibi esse meminisset. Inque eo constantissime perseverauit, quemadmodum actiones consecutæ & reliquus cursus vitæ ipsius demonstrat.

XVII. Diligentiam quidem, qua vsus fuit in omnibus perpendendis, considerandis, exquirendis, ne esset vlla in parte assensio temeraria aut præcepta aut deuia, comprobant quum alia, tum perscriptæ conciones, quas de grauibz & præcipuis controuersiis ad populum vernaculo sermone habitas putauit esse edendas. Quæ & leguntur & legentur semper ab iis, quibus cordi est veritatis perspicua explicatio, magis quam litigiosa superuacua contentionis loquacitas, aut etiam inanis strepitus verborum orationis in consentaneæ & turbulentæ, & multa quidem vndique quasi corrogantis, sed ita vt neque rerum causæ, neque suscepti negotii ratio, neque vlla argumentatio diserte exponatur & demonstretur. Tanta autem erat religio in Principe Georgio, vt, quum eum non fugeret, quanta esset humani ingenii ad lapsus & errata procliuitas, non ille satis haberet, si rationem & veritatem quæstionis alicuius sibi esse perspectam arbitraretur; sed quid veteres sensissent tradidissentque perquirere & plane rimari non omittebat. Ac magnopere latabatur, si (vt in plerisque omnibus) animaduerneret, non discrepare illorum doctrinam a sua, quam auderent imperiti & leues quidam nouitatis nomine reprehendere. Idem moleste ferebat, præsidentes in Ecclesia tam negligentes atque socordes fuisse, vt
san-

sanctissimam religionem, tantis præfidiis vndique munitam, non tuerentur atque conseruarent. Execrabatur etiam ambitionem atque cupiditates eorum, a quibus admissa vel etiam accersita superstitionis auxilia essent, ut vulgi animis deuinctis atque captis, liberius & augere opes atque potentiam, & securius voluptatibus vacare, & in luxu bene victitare ipsis concederetur. Atque hic non euerti neque destrui, si qua adhuc starent, neque ruinosa funditus excindi delerique, sed fulciri ac sarciri optabat. Non ille quidem ut falsa approbarentur, aut impietas dissimularetur, sed ut hæc tanquam rupta aut contrita rescinderentur, & quæ possent cohærere ea, ut consuerentur potius, quam diuellendo lacerarentur. Neque assentiebatur ille vehementiæ & immodico ardori quorundam, qui inclementissime insectari aduersarios, & omnia nota atque vsitata in odium ad vulgus rapere solebant. Præsertim quum videret, rebus mutatis interdum, neutiquam tam magno animo fortunæ iniurias perferri, quam ferociter & arroganter sæpe aliqui locuti fuissent. Mouebat & hoc considerationem optimi Principis, quod non ignorabat, confidentiam in rebus secundis plerumque esse alacrem, tanquam equum de pabulo pleniore exultantem. Itaque dicere solebat, sibi interdum venire in mentem,

op-

optandum esse ut metus periculorum semper aliquis immineret, rebus tamen saluis. Id enim utile sibi videri ad curam & studium magis assiduum & attentum, tam in deprecando Deum, quam reprimendo quasi gestientis affectus animi impotentis & elati. Irritationes autem periculorum & violentiæ magnopere fugiendas esse censebat, quum ipse nequaquam formidolosus, ac potius meditando prævidendoque, quæ & possent accidere, & forti viro essent perpetienda, ad omnem vim & impresionem fortunæ paratus instructusque esset. Memorabat iis de rebus tradita historiis veterum, quæ infelicitè in hoc genere interdum fuissent tentata. Atque ego, inquit, si ferocem ac sævum canem alligatum laceßere non desisterem, ille vero iracundiæ impetu concitatus profiliendo vincula abrumperet, & me corriperet atque concerperet, quemnam obsecro nisi meam stultitiam ac proteruitatem, accusare possem? fieretque hoc pacto, ut ad detrimentum & malum, quum ab aliis irrisorium a me pœnitentiæ dolor accederet.

XVIII. Quum vero natura atque ingenium in hoc Principe esset optimum & ad omnem laudem idoneum, studium autem & industria hoc perfecisset, ut honestæ actionis nullius exempla non conspicerentur in ipsius vita; clementia tamen & moderatio & benignitas (di-

(dignissima principe viro & illustrissima virtus) potissimum & clarissime in eo eminere atque elucere visa. Patientia quidem fuit & lenitas atque mansuetudo tanta, vt neque indignantem in aduersis, (quæ est expertus asperissima) neque iracundia incensum, neque propter iniurias frementem, quisquam viderit: quum quidem & generis & dignitatis & fortunæ excellentia, si commoueretur vehementius, reprehensione eum liberare potuisset, & si quando excedere extra modum videretur, in eo iustissimi doloris perturbationem & communem imbecillitatem caussanti, ignouissent facile vniuersi. At hic ne de pertinaciter quidem infensis & maledicis obrectatoribus questus vnquam est inclementer, aut impotenter stomachatus: tantum abest, vt vel verbo ipse in aliquem atroce inuectus fuerit, aut de ore suo emiserit orationem in alterum contumeliosam. Ac potius ea quoque, quæ in suam personam per ignominiam falso dicta dicerentur, quum interpretando mitigare, tum contemnendo obliterare conabatur. Constantissime autem perseuerabât in iis, quæ vera aut recta esse perspexerat neque vlli alteri magis quam suæ conscientia fidebat. Interfuit multis magnis & grauibus, atque necessariis tractationibus, de quibus divulgabantur plane hostiles increpationes,

de negotiis quidem, quæ erant in manibus, plurima temere effutientibus, ignaris tam consiliorum quam actionum omnium. Et si autem grauitè molesteque ferebat clementissimus Princeps, illis fabulis multorum animos fauciari; tamen & diuini nominis atque numinis respectum, & publicam salutem, & exploratam vtilitatem, prætulit famæ existimationique suæ & rebus aliis omnibus. Atque ego vel admodum fallor, vel quamplurimorum vota talem timiditatem & tergiuersationem, qualis ab æmulis optimo & innocentissimo Principi obiecta fuit, exoptant, præ quorundam confidentia & excursionibus. Atque nunc maxime requirunt seueritatem placidi illius, & attentionem indulgentis, & auctoritatem gratiosi, & obsequia veracis, & modestiam constantis, & cautionem fortis & viri & principis. Vsque adco verum est, tum demum intelligere homines sua bona, quum, quæ in manibus habuere, ea amiserint.

XIX. Non tamen eodem modo sentiebat Princeps sapiens & pius, & loquebatur de omnibus. Sed quos crederet in profanitate esse improbos, aut oblitos officii sui & salutis aliorum præcipites ferri, & inconsulto atque amenter ruere, eos refutare verbis solebat grauius & interdum durius. Quos vel implicatos errore teneri, vel inscientes aberrare

a via,

a via, vel falli imprudentes arbitrabatur, eorum misericordia se tangi significabat, & deplorabat infelicitatem, & Deum orabat, ut ad veritatis cognitionem ipsorum intelligentiam voluntatemque conuerteret. Ac quodam tempore quum in sermonem his de rebus incidisset, atque aliquis recitasset de Plutarcho Themistoclis dictum: ut ex ferocissima sobole equestrium pullorum præstantissimi equi evaderent, si curarentur sedulo, sic ingenia elata ad summos laudis gradus ascendere; Quid, inquit Princeps, sapientia humana probet, non quæro, sed hoc mihi persuadet sacrarum literarum doctrina, abiectos a Deo erigi, & cor contritum atque spiritum afflictum non despici, quo ille castissime colitur, & hoc ut sacrificio acceptissimo in primis delectatur: parvos, humiles, fractos, Maiestas, inquit, cœlestis omnipotentis Dei fauore benignitateque & misericordia complectitur. Recitabatur aliquando eruditi superiore ætate hominis gratulatio ad Paulum III. Pontificem Max. qui Deorum immortalium munere ad tantum fastigium euectus esse perhiberetur: ibi Princeps, Deum immortalem, inquit, quam non modo prava & mala, sed stulta quoque & incogitans est impietas? Ista tamen loquerentur ipsi vel garrirent inter se, non etiam diuulgarent & proferrent.

XX. De Iacobo autem Sadoleto quum forte verba in mentione hominum ordinis illius fierent, & recitarentur quædam de scriptis epistolarum & aliis huius; valde sibi dolere ostendebat naturæ minime peruersæ seductionem, siue aliorum sequentis ductum, seu propriæ rationis subiectionem. Atque sperabat, si non fugeret instructionem veritatis, facili momento in viam illum rediturum esse; quod neque approbaret, atque potius magnopere vituperaret impietatem & scelera in re Ecclesiastica hærentia & implicata. Sed quantum est, inquit, mali in omni quæstione, non videre neque causas controuersiarum, neque in quo quasi cardine vertatur res de qua agitur, & argumentis incertarum dubiarumque summationum confirmare ea, de quibus ambigitur? De illa enim licentia statuendi & decernendi, deque non ecclesiastica sed regia potestate principatus, iste profecto deducit cætera. Quum aliquando, quid idem de satisfactione & purgatorio scripisset, referretur; Hiccinne, inquit, sibi persuadere potuit, penetrasse intra sensum arcanum Pauli, quo ille epistolam ad Romanos composuit? Atque solebat tali oratione uti ad ostendendum, quantum valeret opinionis error, & alios ad studium religionis atque veritatis curam cohortandos.

XXI. Ac animaduerto me narrando iam attingere interiorem & quasi priuatam vitæ consuetudinem Georgii Principis. Quæ fuit profecto eiusmodi, vt in ea optimarum disciplinarum & artium cultura admodum esset perspicua, & literarum cognitio veluti purpuræ nitor fulgeret. Prima quidem erat præcationum cura atque opera. Etiam instituto illius ad epulas aliqua pars de sacris Scripturis recitabatur, & ipse inde memoria comprehendere solebat, de quo postea disputaret. Singularem autem Hebraicæ linguæ scientiam sibi parauerat studio suo. Itaque multa tum luculente explicabantur, & erant sermones pleni pietatis & venerationis æterni Dei. Nec non aut tam de Republica, quam priuatis negotiis, prudenter differendo, aut de studiis & literis erudite modo quærendo, modo suam sententiam ostendendo, vtilia & polita colloquia ferebat. In cæteris vrbalitas quædam iocorum admiscebatur, in quibus neque quod dictu turpe esset, neque quod alterius famæ atque nomini maculam inureret, quicquam audiebatur. Ipse neque de iurationes interloquendum vnquam, neque execrationes, vel leuissimas, vsurpabat. Quod ideo narrandum duxi quia iam fere neque vehementer neque asseueranter dici aliquid putatur, nisi auctum religiosa confirmatione, aut increpatione

tione sæua. Si qua sententia præclara & dictum graue commemoraretur, misifce cernebatur ille tunc lætari, præsertim si quid esset eiusmodi, vt argumentationem prudentem, instrueret, aut etiam complecteretur, quæ Græci ἐνθυμήματα & ἐπιχειρήματα nominarunt. Qualis hæc est Gregoriana: *Præstat vinci bonis, quam malis vincere.* Cui auditæ pene applaudere visus est. Itemque huic: *Nemo est curiosus quin sit maleuolus.* Nam colligebat differendo vere & prudenter, quare ita esse oporteret, quemadmodum illo dicto pronunciaretur. Memini aliquando hæc referri coram illo:

*Prima est hæc ultio, quod se
Iudice nemo nocens absoluitur.*

Paullo autem ante quæsitum fuerat de Socratis historici sententia: *Honestæ & bonæ, ubicunque reperiantur, ad veritatem pertinere.* An dubium est, inquit Princeps, de illo sic satis impuro scriptore, tanquam luto, hanc veluti gemmam excipiendam, & quasi in veritatis aurum includendam esse?

XXII. Sed & ipse sententias multas præcipuas & memorabiles de animo sapiente promebat. Quum de periculis horum temporum aliquando querelæ coram eo (ita vt fit) vsurparentur, & fieri indies maiores distracti-
ones

ones perhiberetur: *Non ego, inquit, tam ad-
 versationes metuo, quam inconsentaneam con-
 sensionem.* Solebat & hoc dicere: *valde,
 optandum esse, ut quisque tam diligenter ad se
 respiceret, quam acriter inquireret in alios.*
 Sacram scripturam *fascias* appellabat, in quibus
 aiebat inuolutum esse puerum Iesum, & nisi il-
 lis explicatis non posse hunc conspici. Contu-
 meliosos & sauos in alios, docere aiebat, quid
 conuersis rebus in se esset statuendum. Dice-
 bat: *minis & consumi magnam partem pœnæ,
 & admoneri ut cauerent eos, quibus illæ inten-
 tarentur.* Quum audiret aliquando narrari,
 dæmoniacam quandam interrogatam: quod-
 nam esset peccatum maximum? exclamasse,
superbia; Id quidem de mendace spiritu non
 discemus, inquit; sed verum esse oportet,
 quum Scriptura doceat: *Deum resistere super-
 bis.* Memorabatur quodam tempore, multa
 esse euerfa & abrogata, vsurpata olim perpe-
 ram: *id quidem se probare aiebat, sed optare
 etiam, ut restituerentur & instaurarentur recte,
 olim vsurpata.* Inter colloquia risus inter-
 dum admiscebatur. Atque delectabatur ipse
 fallaciunculis, quibus deceptum si aliquem vi-
 deret, adiuuabat illius dubitationes seuero
 vultu, donec re intellecta communis existeret
 hilaritas.

XXIII. Cibo & potu pro conditionis & loci ratione, & corporis etiam habitu, utebatur eo, qui a mediocritate non recederet, quum apud se nemini quicquam deficeret. Quum autem de morbis valetudo infirmior, & corpus sua natura validum & dignitatis specie pulcrum, redditum esset debilius, atque in ætatis quadam adhuc viriditate quasi adhuc senilius, neque ipse tamen laboribus modum statueret, nonnunquam languoribus conflictabatur. Ac proderat, si mane sudor eliceretur, tum enim grauedinis molestiam, quam sæpe experiebatur, sentiebat alleuari. Crebris inambulationibus utebatur, ad quas assuefactus fuerat a magistro Helto, qui in illo genere esset pene immodicus. In talis vitæ spatio quum inchoasset annum quadragesimum septimum, post grauiiores & periculosas magis tentationes morborum, in lectulum depositus, cunctis rebus ordinatis, & omnibus cogitationibus atque tota mente ad Deum conuersa, in confessione religiosa atque fideli, & imploratione Filii Dei, quem sanctissime coluerat, & cuius nomini seruierat omne studium ipsius, & precibus ardentissimis, vt sancti Spiritus agitatione fides & amor in Deum & spes salutis ac vitæ æternæ luceret continue in animo suo, ita tandem in mentione Jesu Christi placido fine acquieuit, sine vlla vexatione & concussione

cor-

corporis & animi, XVI. Cal. Nouemb. anno Christi MDLIII.

XXIV. Atque sanctissimo & beatissimo illi nunc quidem, vt illustrissimo & reuerendissimo dum vixit, viro ac Principi, nihil accidit acerbitatis, ac potius felicitatem ipse speratam est consecutus. Ita enim euentum mortis eius interpretari nos decet, qua & cœlestem hæreditatem adiit consors Filii Dei, & opportuno tempore decedens, Reipublicæ & patriæ calamitates cernere atque deplorare desiit. Nos autem spoliatos tali viro ac Principe, esse in luctu ac squalore necesse est, requirentes consilium, fidem, sinceritatem, auctoritatemque illius, difficillimo statu, & perturbatis rebus omnibus, & non dubiam ruinam minantibus. Sed nostram fortunam ferre, vt possumus, studeamus. Illum veneremur, & quamuis migrauerit a nobis, & salutaris gubernationis reliquerit functionem, colamus memoria inclyti nominis & recordatione beneficiorum, & ita nostras, quibus angimur atque affligimur, curas ac misérias consolari sedareque conemur. Atque oremus Filium Dei, Dominum nostrum Jesum Christum, vt ipso ducente & sequi possimus vestigia quæ in hac ille vita impressit, & in assertione fideli ac constante veritatis cœlestis & doctrinæ Euangelii decedentes, ad eum feliciter perueniamus, & recipiamur in communitatem

perpetuo colentium atque celebrantium
vnum, verum, æternum, omnipotentem, iu-
stum, clementissimum Deum, Patrem, & Fi-
lium, & Spiritum sanctum, viuentem &
regnantem sæculis infinitis.

A M E N.

*Quia in Narratione hac Georgii Helti facta est men-
tio, quo præceptore usus fuit Georgius Princeps & Joach.
Camerarius; haud abs re fore duximus, hujus & Phil.
Melanchthonis nec non Mart. Lutheri ad illum scri-
ptas Epistolas super ea morte consolatorias
subjicere.*

* * * * *

*Reuerendissimo & illustrissimo Principi
ac Domino,*

DOMINO GEORGIO

*Principi ab Anhalt, Ascanie & Bernburgi Domino, Ec-
clesiastica gubernationis Mersburgi adiutori,
Domino suo clementissimo*

S. D.

IOACHIMVS CAMERARIVS.

IAm cognoueram, vt suspicata fuit Clemen-
tia Tua, mortuum esse virum optimum, &
pietate ac fide præstanti præditum, & veritatis
maximum amatorem, *Georgium Heltuin*: quo

III

nuncio incredibili dolore sensi affici animum meum, quum redditæ mihi fuerunt literæ R.P. Tuæ, vna cum epistolis consolatricibus. Ac nescio quo pacto tristiores euentus celeriter fama dissipat, quasi gaudeat malis alienis. Sed me quum T. R.P. literæ, tum summorum virorum epistolæ, consolatæ illæ quidem fuerunt, omnem moerorem absterfisse dicere non ausim. lubet Achilles, vt opinor, apud Homerum, æquo animo ferre mortem eum, quem interfecturus erat ipse, quod Patroclus ante mortem oppetiisset, vir illo fortior ac melior. Et sapientes quidam, tam ad se quam alios contra mortis formidinem confirmandos, eum versum, quem pronunciat apud Poetam consolator ille, vsurpasse perhibentur,

καὶ γὰρ καὶ Πάτερ κλέος ὅπερ σέο πολλὸν ἀμείνων.

Idque in omnem euentum tristem valere volunt, vt hoc subjiatur, neque primum, neque vnicum, neque indignissimum aliquid accidisse. Sit ita sane, & hac fatali necessitate ac miseria hominum, nos, vt possumus, sustentemus. Ego tamen ferreum eum esse puto, qui non grauitur commouetur morte eorum, quibus vel ipse vel alii non absque magno damno & malo suo carituri esse videantur. Vel si Stoicus aliquis sua causâ dolere alterum non censeat oportere, quid affectioni tamen caritatis & beneuolentiæ amoris faciemus? quæ
non

non potest profecto non quasi contrahi, quum se lacerari sentit auulsione eius, in quo ipsa suauißima deuinctione adhæßisset, vel potius concreta fuisset. Quod eo magis cordi nobis est, quo grauius accusari etiam a S. Paulo sci-
mus vitium *ἀσπείριος*, qui est animus expers humanitatis & huius, de quo loquimur, sensus: quum inter extremorum temporum pestes & hanc nominet. Sed de hoc in præsentia verbosius differendum esse non putauimus. Si quid autem in hoc casu consolari nos par est, subleuari debemus (& nos sensimus) pietate & constantia & fide hominis, quam ille ad vltimum vsque halitum præstitit, & per quam resignauit animam & vitam suam Saluatori Christo. Id quod & T. R. P. significat, & ab aliis nunciatur. Hoc igitur leniat ac reprimat dolorem nostrum. Non solum ideo, quia cum eo, qui felicem illum diem suum obiit, his præsertim temporibus impendentibus, de quibus qui sit omnium prudentum metus manifestum est, præclare actum esse iudicamus; sed quod reliquerit etiam piæ & Christianæ decessionis exemplum Ecclesiæ Christi. Quam & prodest huiusmodi piorum in fide Christi migrationibus, & vestigiorum talium impressione instrui atque edoceri; & hæc bona quasi luculentæ hæreditatis, sanctæ ac beatæ mortis, augment, locupletant, ornant. Me au-
tem

tem & indoluiffe præ cæteris omnibus, excepta tua Reuerendisſima Clementia, huius viri morte, & conſolatione indiguiſſe, non mirabitur, qui illius non modo erga me puerum, ſtudio & fidem, ſed erga adultum etiam officia ſummi amoris cognouerit. Quæ omnia & ipſius de me crebris ac dulciſſimis mentionibus, & meis veriſſimis prædicationibus, T. R. P. intellexit. Philippus Macedonum rex gratias egit diuino numini, quod Alexandrum filium ſuum naſci contigiffet temporibus vitæ Ariſtotelis. Liceat mihi parua noſtratia cum illis ingentibus componere, & ad hoc exemplum agere gratias Deo, qui voluerit in *Georgii Helti*, optimi & ſanctiſſimi & doctiſſimi viri, diſciplinam me tradi, ad quem deductus a matre mea, fœmina nec imprudente & pia, atque commendatus illi vt filius, paterni animi affectionem ita ſum in hoc expertus, vt ſi ex ipſo natus eſſem, neque diligentius me cuſtodire, neque ardentius diligere, neque fidelius inſtituere potuiſſe videatur. Etſi autem ita me geſſi illo pueritiæ tempore, vt non poenituerit eum vnquam vel opinionis de me, vel voluntatis erga me ſuæ; tamen in illa ætate ea officia grati animi, quæ meritis fuerat, perſoluere non potui. Poſtea autem, quum longo ſane interuallo in has regiones rediiſſem, memoriam quidem beneficiorum ipſius retinui
ani-

animo meo, declarare autem neutiquam potui, partim munificentia tua hunc totum occupante, partim fortuna obstante cupiditati meæ. Ita ille suo quidem tempore excessit terris, mihi autem quum immensum desiderium sui reliquerit, tamen hoc cum Tuæ Clementiæ desiderio comparatum paruum videri possit. Sed patiamur quiescere sanctissimi viri manes, qui profecto T. R. P. quum tam caram habuerit animo suo, dolere migratione sua & affligi hoc casu non vult, & me quoque putat luctum moderari debere. Quumque fide & religione plenum cor in vita ipsius multis gravissimis curis sauciatum fuerit, postulat nimirum pietas illius, ut quasi vulnera hæc deplorando refricare desinamus, ita ne ipsius causa, qui beatus sit omnino, nostra autem ut cum ratione & modo moereamus. Hic igitur iam finis sit querelarum & lamentorum nostrorum. Quum autem intellexissem, & gratum hoc futurum R. P. T. & deberi a me superstiti officium istud mortuo, epistolas illas consolatorias una cum Epitaphio, quod R. P. T. Georgio suo curaturam sese poni constituit, exprimendas dedi Typographo nostro. Quod consilium & quem laborem oro ut T. R. P. clementer approbet, & me, quemadmodum certe facit, vel Georgii Helri causa, benignitatis suæ favore constanter complectatur. T. R. P. salutem,
di-

dignitatem, fortunas omnes commendo Christo Jesu σωτήρι. Lipsiæ. XV. Cal. April. anno MDXLV.

E I D E M.

S.D. Etiam ferrum apud Chalybes ait domari βία ἀνάγκης Euripides, neque hanc vllis medicamentis posse reprimi. Et si autem πᾶν μὲν ἀναγκαῖον χρεῖμα ἀνιθεὶν ἔφω, tamen faciendum hoc omnibus, ne nimium doleant, & vt studeant aduersos casus ἐνασπίμως φέρειν. Sed hæc quum & aliis & mihi subieci, Princeps illustrissime, tum illud nihilominus recurrit, ῥᾶον παραινεῖν ἢ παύσασθαι κατῆρεῖν. Quanquam autem me grauitè affligerat nuncium mortis carissimi præceptoris & parentis mei Georgii Helti, tamen literæ Reuerendissimæ Clementiæ Tuæ doloris mei sensum quasi curatione reddiderunt acriorem. Verum cum illo est præclare actum, qui & vitam piam felici fine in Christo clausit, & memoriam nominis sui omnibus bonis reliquit. Ego mihi nunc in his regionibus externus & desertus videor. Et quum meam fortunam, tum vero tuam, illustrissime Princeps, non possum non deplorare. Tuam quidem eo magis, quo altiore & magis præcipiti in loco posita Excellentia Tua minus carere potest quasi fulcimente & sustinente manu fidei ac prudentiæ. Profecto enim ille ὅλωλεν ἐπίσκοπος, vt Andromacha de Hectore

ctore ait, qui nullam partem miseræ & afflictæ Reipublicæ non respicere solebat, comprehensam cura & sollicitudine sua. Quis nunc R.P.T. perturbatam consolabitur? quis hærentem expediet? quis in otio exhilarabit in negotiis subleuabit? cum quo Deum inuocans secretiores iunges preces? denique apud quem tristitia acclata depones? Quid igitur dicam non reperio, sed remitto afflictum animum tuum ad summorum virorum epistolas: nam *Φρενὸς νοσίσσης ἐστὶν ἰατρὸς λόγος*. Me quidem sustineo ut possim. Tuæ autem Reuerendissimæ Clementiæ respondissem statim postquam literas illius acceperam, sed subita fui his diebus ægrotatione ita prostratus, ut mihi esset sæpe ante oculos fatum præceptoris mei. Nam *λεηποθυμία* grauisimæ me in febre presserunt; sed fuit *ἐφήμερος* febris, & me spero morbo esse liberatum. Illustrissime Princeps, ita se res habet in hac vita, ut ait Tragicus,

Συμφορὰ ἐλέγχει ἐλέγχει πένθει θανάτων.

Ferantur igitur potius aduersa, quam exagitantur indignando. Tuæ Reuerendissimæ Clementiæ gratias ago, quum me sibi curæ fore significat, neque dubito, quin aliquid benevolentia tuæ deriuetur in me de communitate præceptoris nostri, quem scio Tuæ Reuerendissimæ Clementiæ fuisse carum *Ἰσον εἴη κεφαλῇ.*

Si

Si quid autem poterit a me proficisci quo inferuiatur Excellentia tua, in eo non patiar vlllo tempore desiderari studium meum. Bene valeat T.R.C. Lipsiæ III. Cal. April. anno MDXLV.

PHILIPPVS MELANCHTHON

E I D E M.

Quum hic nunciata esset mors viri optimi *Georgii Helti*, subita consternatione pene exanimatus sum: ac statim postea comperi, publicum esse luctum omnium honestorum nostri ordinis hominum, quod nemo non dilexerit eum propter eximiam virtutem. Meus vero dolor eo maior est, quod & amicitia inter nos fuit dulcissima, & quum mihi familiarius notus fuerit, magis intelligo, quantum eius interitu iacturam fecerit Respublica. Tuo etiam luctu moueor, qui illum & propter amorem quo eum complexuses, & propter Rempublicam desideras. Quoties iam in deliberationibus rerum magnarum sedens, ac locum, in quo respondere ac conferre sententiam solebat, intuens, eum requires? Et si autem dolorem tuum adeo non reprehendo, vt probem etiam, & insigne specimen esse pietatis ducam: tamen præcepta eadem, quæ in cæteris magnis ærumnis nobis proponimus, hic

E

cogi-

cogitemus. Desiderio nos affici nostrorum vult Deus, vult nos angere & dolere; nec illam toruitatem seu immanitatem potius, quàm nihil mouetur asperis rebus, seu propriis seu amicorum, probat. Ac Filius Dei sæpe expauit ipse, lacrymauit, & acerbissimis doloribus conflictatus est. Sed simul præcipit Deus, ut cogitatione voluntatis suæ & æternorum bonorum, quæ promisit suis, quos ex hac vita euocat, mœstitiam moderemur, & paullatim animos erigamus, ac illis potius hæc bona gratulemur, quam nostra iactura angamur. Non sumus ii, qui homines, ut pecudes, nasci & extinguere tantum, ut ferunt vices materiæ, nec restare nobis aliam ciuitatem meliorem, arbitremur: sed ut in Ecclesia vox Dei nos erudit, scimus iis, qui Euangelium amplexi sunt, æterna præmia proposita esse. Ardebat autem perfectus Georgii amore Filii Dei, Domini nostri Jesu Christi, ita ut cætera in hac vita omnia duceret longe inferiora; & Euangelii propagationem studiose adiuuabat, & ad hoc decus adiungebat omnes alias virtutes, quæ in membris Christi esse debent. Quumque esset in dando consilio non solum prudens & fidelis, sed etiam felix, non dubito ei Deum adfuisse gubernatorem consiliorum & actionum. Nunc igitur euocatus hinc ad consuetudinem coelestium, fruitur dulcissimis colloquiis Dei,
Chri-

Christi, Prophetarum, Apostolorum, immo & matris tuæ, & agit gratias cœlestibus pro omnibus beneficiis, & non modo vitam tuam, sed etiam vniuersæ Ecclesiæ, quæ in hac vita ingentibus periculis exercetur, salutem Deo commendat. Quare gratulemur ipsi hunc portum, in quo lætus acquiescit, & desiderium eius leniamus recordatione virtutum ipsius, præsertim quum breui eum rursus complexuri simus. Quoties de eo cogitabimus, gratias agamus Deo, quod Ecclesiæ tale ornamentum dedit, & ipsum celebremus, quod Dei dona sua diligentia bene collocavit, & morum moderatione ornauit, & virtutes eius imitemur. His fere cogitationibus animum meum a luctu abduco: quas recensui, quod hoc tempore, etiam si te eadem remedia & nosse & colligere scio, tamen hæc quasi commonefactio non inutilis est. Si exempla etiam quærimus, Dauidi ereptus est amicus Ionathas, & multo ereptus est atrocius. Feramus igitur & nos, amicum a nobis aliquanto citius, quam vellemus, abductum esse, præsertim quum placide in complexu amicissimorum hominum iter illud ingressus sit. Et vt David petebat à Deo, dari successorem idoneum Ionathæ in Republica; ita & nos petamus, vt Deus alium in Georgii stationem collocet, cuius & virtus & autoritas Ecclesiæ sit salutaris.

Nam hac cura in hac paucitate bonorum gubernatorum valde nos affici decet. Et Filius Dei sedens ad dextram æterni Patris inter dona, quæ dat hominibus, etiam pollicetur, se daturum bonos pastores & doctores. Hunc oro toto pectore, vt te seruet incolumem, & accendat multorum pectora, vt feliciter seruiant Ecclesiæ. Bene & feliciter vale. Wittenbergæ D. IX. Martii anno MDXLV.

MARTINVS LVTHERVS

E I D E M.

Gratiam & pacem in Christo. Migravit igitur a nobis, clarissime Princeps, *Georgius* noster *Heltus*; migravit magno sui desiderio relicto, & dolore nostro. O Deus meus, in isto tempore, quo nobis esset opus multis sanctis viris, quorum precibus, consiliis & auxiliis consolaremur & foueremur, etiam reliquias istas in nobis tollis? Scimus, placitas tibi, o Deus, fuisse huius Georgii preces & operas, qui Filium tuum Dominum nostrum Jesum Christum ardentissime dilexit, studiosissime coluit, & Ecclesiæ tuæ utilisissimus fuit. Ego ipse certe plurimum in ipsius precibus fidebam, & consolatione suauiter fruebar.

bar. Quanto magis tibi, clarissime Princeps, acerbissimum vulnus inflictum credo illius discessu, cuius tibi fuit consuetudo suavisissima & sincerissima? Cum illo bene actum est, qui collectus ad patres suos, & populum suum, plurimosibi & meliores inuenit, quam hic reliquit. Sed nobiscum durissime agitur, quum in ista Sodoma & Babylone viuimus, vel mortificamur potius, & nobis eripiuntur tales Lotti & Daniele, quorum quo magis opera opus habemus, vergentibus rebus in deterius quotidie, hoc minor eorum copia nobis reliqua est. Sed consilium Dei adorandum est, ut est natura eius, dum aliquid magnum, & quod spem excedit, facturus est, prius omnia annihilat & in desperationem adducit, sicut scriptum est: *Deducit ad inferos & reducit*. Hoc facit ut erudiat nos in fide, spe & caritate erga se ipsum, ut discamus inuisibilia eius præferre apparentibus, & contra spem in spem credentes in ipso hæreamus, qui vocat ea quæ non sunt ut sint. Quæ enim quis videt, quid speret? Deinde, ut & dilectio fiat fortis, ut mors, & æmulatio dura sit, sicut infernus: dum nobis aufert sua dulcissima dona, & ostendit sese prorsus inamabilem Deum, tunc maxime quum de bonis optime & amantissime cogitat & sollicitus est. Sic, sic occiditur vetus homo, & destruitur corpus peccati. Quare, clarissime Princeps, te ipsum

consolare secundum opulentam mensuram cognitionis, qua tibi donatum est nosse Deum Patrem & Filium suum, & in operibus manuum suarum exercitatus es. Nos orabimus, vt Deus totius consolationis te roboret & firmet Spiritu sancto, donec illucescat & veniat hoc opus, quod in istis tentationibus iubet nos expectare. *Non enim ex corde*, ait Ieremias, *humiliat filios hominum.* Et Augustinus in quodam loco : *Non permetteret Deus malum fieri, nisi ex hoc melius aliquid elicere vellet.* Nos adhuc in carne sumus, ignari quid petere aut quomodo petere debeamus, hoc est, quid nobis prosit & optimum sit. Ille autem, qui potens est facere supra quam petimus aut intelligimus, pro nobis sollicitus, plura & ampliora potest quam angustia nostri cordis ausit optare, immo cogitare. Sed ea de re non potest, nisi prius ea tollat quibus nos credimus carere non posse, aut magno malo & periculo carere. Exemplis Scriptura referta est. Adam & Heua spe magna de Cain ebrii fuere, mox utroque filio orbat de tota re desperabant. Sed Deus, qui viuificat mortuos, & ex nihilo facit omnia, mox donat eis semen aliud pro posteritate nunquam defectura. Abraham de Isinaele tibi grandia promittit, Isaac de Esau, Iacob de Ruben; sed spes tantas omnes oportuit occidere, vturgeret noua & æterna spes.

Et

PRINCIPIS ANHALTINI. 63

Et nunc nos in hoc calamitoso sæculo prorsus omnispe destituimur. Sed speramus tamen in Deum viuum spe noua, facturum eum esse finem istorum malorum propediem, nec falleremur. Fidelis & potens est Deus, qui promittit, & facit. Lugeamus igitur nostrum carissimum *Georgium Helt*, quia defecit lux sua, vt *Sirach* loquitur: non sibi, sed nobis. Illi enim lux sua aucta & stabilita est in æternitatem, donec & nobis cum illo eadem lux nostra & hic deficiat, & illic perficiatur, per illum, qui est lux & vita nostra, Amen. In quo Celsitudo Tua quam optime valeat. D. IX. Mart.

MDXLV.

* * * * *

Philippi Melanchthonis Oratio de vīta Principis *Georgii*, recitata a *Georgio Maiore*, quum gradus Doctoris Theologiæ conferretur *Henr. Stenio*, extat Tom. III. Select. Declam. *Phil. Melanchthonis* pag. 183. seqq. edit. Argent. 1567. & Zervestanae 1587. *Jacobi Thomasti* Oratio etiam elegans de *Georgio* Principe *Anhaltino* legitur inter editas eius X. p. 198. seqq.

PHILIPPI MELANCHTHONIS

epitaphium carmen, nomine Fratris IOACHIMI Principis in Anhalt, Comitis Ascaniæ, Domini Seruestæ & Bernburgi scriptum, quod legitur Lib. VI. Epigr. a Jo. Maiore recognitorum, & a Petro Vincentio editorum, Wittenb. 1575. additum sepulcro in templo Dessauienfi.

G E O R G I O

D. G. PRINCIPI IN ANHALT, COMITI ASCANIAE, DOMINO IN ZERBST ET BERNBURG, PRAEPOSITO MAGDEBURGENSI ET MISNENSI, PIETATE, ERUDITIONE ET VIRTUTVM OMNI GENERE ORNATISSIMO, DEQVE ECCLESIIS ET POLITIIS HARVM REGIONVM OPTIME MERITO,

IOACHIMVS PRINCEPS
IN ANHALT

GERMANO FRATRI DVLCISS. CARISSIMOQ. S. LACRIMANS P.

PLACIDE PIEQVE MORTVO

XVI. CAL. NOVEMB. ANNO CHR. M D LIII.

QVVM VIXISSET ANNOS XLVI.

M. II. D. IV. H. XIV.

Prin^cipis *Ascania nati de stirpe GEORGI,*
Quem cernis, tumulus proximus ossa tegit.
Huic fuit ERNESTVS genitor, qui pacis amore
Promeruit patriæ totius esse pater.
Matris erat castæ Monſterbergenſis origo,
Sincera coluit quæ pietate Deum.
Ascania gentis virtus est clara triumphis,
Ordine quos numerant sæcula longa patrum.
Sed fuit huic fontes doctrinæ discere cura,
Quam nobis Gnatus tradidit ipse Dei.
Hoc ad Maiorum decus addidit inclyta facta,
Præbuit & patriæ commoda magna sua.
Eſdras ceu quondam populo ius dixit, & idem
Interpres Solyma legis in vrbe fuit.
Principis hic munus simul & Paſtoris obiuit,
Ipsiꝝ & mentem rexit & ora Deus.
Iustiſicaque fide capiens tua munera, Chriſte,
Solius est cuius parta cruore ſalus;
Vera luce Deum agnouit precibusque vocauit,
Numinibus ſcētis mens inimica fuit.
Nec virtutum umbras habuit, sed pectora rexit
Ipse Dei viuens aſſimilata λόγῳ.
Vrbibus in multis, ſlauus quas alluit Albis,
Et quas cærulei præterit vnda Sala,
Agmina collegit Chriſtum celebrantia, ſpargens
Pura Euangelii ſemina voce ſua.
Fidus & ætati venienti teſtis vt eſſet,
De Chriſto patriæ publica ſcripta dedit.
Hic frater lacrimans IOACHIMVS condidit oſſa,
Viuat conſpectu mens fruiturque Dei.
O Deus; Aſcaniam ſtirpem ſeruesque regasque,
Nulla venit nobis, te niſi dante, ſalus.

Eiusdem Philippi Melanchthonis
epigramma in imaginem GEORGII
Principis in Anhalt, extat Lib. II.

A Scania stirpis virtus est clara triumphis,
Ordine quos numerant secula longa patrum.
Cesar in Adriaco quum gesfit littore bellum,
Et fregit Venetas Maxmilianus opes;
Dux erat Ascania natus de stirpe RVDOLPHVS,
Fixit & in Veneto multa tropaea solo.
Nunc ad Maiorum decora hac laus magna, GEORGI,
Accedit, vere principe digna viro.
Quod sic doctrinam reliquis virtutibus addis,
Ut verum celebres pectore & ore Deum;
Et Christi illustres ingentia muncra scriptis,
Iustificas supplex quae capis ipse fide.
Exemploque Esdra populum dum iure gubernas,
Doctrinae spargis semina pura simul.
Summe Deus, solus qui das felicia regna,
Ascanios fratres, te precor, ipse regas.

IOACHIMI CAMERARII

duo carmina lugubria in Principis GEORGII
obitum.

Græcum.

ΓΕΩΡΓΙΩ ΗΓΕΜΟΝΙ ΑΣΚΑ-
ΝΙΩΝ

ἀξιόμαλ' ἱεράρχη, ἀνδρὶ σεβασμιωτάτῳ
καὶ ὀπιφανεστάτῳ.

Σῆμα ΓΕΩΡΓΙΕ τῶτα πόν, λαμπροκλεές ἦρας,
Εὐγενές δ' ἐχθαίων ἐρνεῖ ἀπ' Ἀσκανίων.

Καὶ

Καὶ γὰρ κῆσ' ἀπὸ καὶ σὺ δέμας ἱέρμῳ καμάησιν
 Ἐισέη γ' ἡλικίης ἀνδρῶν ἔχων νεαρῶς.
 Καὶ μόχθοις μὲν κῆνο καὶ δὲγαλέησιν ἀκαιοῖν
 Ἔχε τέλει, νέστοις φθινόμβρον, θανάτῳ.
 Ἦδ' ἐφίλεχρετος ψυχὴ καὶ νῆς ἱεράρχης
 Αἰθερίας πρὸς εὐνὴν κύριον ἦλθε δόμους.
 Ἐνδ' ἀμπαυμα πόνων εὗρηκε φυγὴν τεμεριμνῶν
 Ἐν δ' ἐτέθη κοίτη σῶμ' ὑπὸ γῆς μαλακῇ.
 Ὅπως οὐλπιγῶ μὲν βιεγέροισιν ἦχον
 Πάντα πέφον νεκύων ἐκκενεωσαμένης.
 Ἦς μὲν ἀφ' ἡγεμόνων θύλλον βλάβημα παλαιῶν
 Πρὸς αὐτοκρατόρων ἀμμιζα Σαξονικῶν.
 Τύποις γὰρ γίνεσθαι ἐμὲ ὑμμετέριοι προσήκει
 Ἦδ' ἀρετῆς λῆξιν πῶς δ' ὁμόφυλον ἔχει.
 Νῦν τ' ἀρχαίρετις ἐπ' ἀνδρῶν καυσαστύκτῳ
 Κύρος ἦν ὡς πρῶτον, εἰ γ' ἐβλήπαθ', ὑμῶν.
 Πρὸς δὲ σὺ θειοσεβῆς θείγκωμ' ἱερῶνυμον δέχῃς
 Χρυσόφρον' τ' ἀρετὴν πιστὸς εἶς καρδίας.
 Δαλεύων ἡδὲ θεῶν αἰδίδι συναγωγῇ
 Ἐκκλητῶν κόσμῳ τῷδ' ἀφ' ἀμαρηνόε.
 Ἦν πρῶτ' οὐ πῶς συνάγῃ, εἰ εὐάγγελον αὐτὸς
 Κήρυγμ' ὡς προσάττειν πάσα πλῆθος.
 Καὶ νῦν τ' ἀντ' αἰνῶς ὑπὸ μισθωτῶν φιλοκερδῶν
 Λαβηθῆναι ἐφόρῳ σῆς ἐκύρησε φρενός.
 Θεολόγοιο φρενός, πάντων διδασκαλίας ἐδωλῶν
 Μουσικάκῃ, σοφίῃς ἐμπλεῶν ἑρμηνείας.
 Καὶ παρὰ τῆς ἐτυχῆς φιλομόχθῳ χρησιμοεργῷ,
 Πλήθους τ' εὐδρασίης σῆς ἀπάλαισε χερσὶς.

Ὀικομένεα δὲ σέθεν δῆμα θεκληθεῖσιν ὁμιλεῖ
 Χριστοβῆς δεινὴ κῆται ἐν ὀρφανίῃ,
 Χήρη πένθει ἅλῃ δ' ἐκκλησίῃ ἐνθάδ' ἀληκτον,
 Ποιμνικῆς τλήμων φροντίδ' ἀμμορίῃ.
 Τὴν αὐτὸς ποιμὴν ὡς χρεῖς φύλαξον ἄριστον,
 Ἄυτὸς ἐπισκοπέων σὴ περιβαίν' ἀγέλη.
 Μηδέτ' ἑα λυμῆσθαι τῇδ' ὄχλον ἐρίδων,
 Μηδ' αὐτὴν σφετέρῃ φθίσθαι ἀτασθαλίῃ.
 Οὐ σὲ χρεῖς κλέει ζῆτεῖτ' ἐδόξα θεοῖο,
 Οὐδ' οἷων ὄφελ' ἐταπάκι πλαζομένων.
 Ζητεῖται βροτῆς κάλλ' ἰσάδανυμον δέχῃς,
 Κεῖθαλέα τε τρέπων τέττιες ἡδυβίων.
 Ἄυτῃ δ' ἀφραγέσσι πολυπλάιν' ἐκτεστάλαιναι
 Πόιμνι αἰηκέστοις φθείρεθ' ἐκῶσι κακοῖς.
 Φθείρεσθαι δ' ἐπιτρέπεται ἐκῶσ' ἀέκοντί γε θυμῷ,
 Ὅν τ' ὧδ' ἰδὲ λυγρῆς φάρμακον ὅτ' ἐνέσθ.
 Οὐ ξυνίησι δὲ πῆμ' ἐλέθροισι, καὶ ἕσπετ' ἄγχοι
 Εἰς μέσον σὺν ἐτύμοις ῥήμασι παρηγομένη.
 Ἄλλων δ' ἀφραδίῃσι νοοῖο κακῶς χερσὶν ἐδν
 Εἰν ἀγέῃ σαρκοῦ μάνειτ' ἐλάττερι.
 Καὶ βιοτῆς ἀνεπωλήκτῳ μαλακῆς διαγωγῇ
 Περσέειτ' ὅπῃ λοιπῶν δρώσιν ὅμοια λεῶ.
 Νῦν ἄρα χρεῖς βοηθείας περφανῆς σέθεν ἔργον
 Λείψαν' ἐπ' σφετέρῃς ὡς περιεῖν ἀγέλης.
 Ὅς δὲ τῆς πτωχῆς καὶ τῆς τήρησεν ἐφετμῶς,
 Λατρυγῶ παύσας σῶμα ἴδιον καμάτῃ.
 Πρὸς σ' ἄνα νῦν ψυχῇ κληθεῖς ἐνπύθεν ἀπῆλθε,
 Τὸν καλὸν ἐν ζωῇ τῇδε δέσμον πλέσας,

Τηρήσας καὶ πίσιν ἀγῶνά τε λαμπρὸν ὑποστάς,
 Νῦν τε δικαιοσύνης σέμμα κομισσάμενός.
 Χαῖρε πατὴρ ἱεράρχα διδάσκαλός ἐμπεδόμυθός.
 Ἦρνήσας δὲ πρὸ πατρὸς γενεῶν εὐγενὲς ἡγεμόνων.
 Καὶ δὴ ἀπ' ἀρχαίων κατάγων γένος ἐδὲλόν ἀνάκτων
 Ἐξοχα δ' ὀρθολόγῳ γνώριμος εὐσεβίῃ.
 Ὡ χαῖρ' αὖτι πατρὶν ὧ τ' ἄρ κήρυξας Ἰησοῦ,
 Ἐν ᾧ θρησκείᾳ καὶ εὐλαβίᾳ χαῖρε μοναῖς.
 Ἐνταυθοῖδ' ἔπερι κραζόντων ψαυδολόγοις
 Χερσὶ πόν μύθοις ῥῆμ' ἐμπλεξάμενοι.
 Οἱ δ' ἔπερι κωκυζόντων φωνῶντες ἄωροι,
 Τολμῶντες βλακικοῖς λεχολογῶν ἔπεσι,
 Νικήσει γὰρ ἀληθείη τέλός ἢ ὑ λαχῶσαι,
 Βλάσφημον δὲ θεὸς καὶ σοὶ ἀναιδὲς ὀλεῖ.

Latinum.

Reuerendissimo & Illustrissimo Principi
 ac Domino

DOMINO GEORGIO

Principi Anhaltino & Ascaniæ Domino,

Antistiti Ecclesiæ Christi fidelissimo,

qui Dessauæ D. S. O. XVI. Cal. Nouembr.

Anno Christi M. D. LIII.

ERipuit nobis Princeps tollente GEORGI,
 Abducens terræ te quoque morte DEUS:

Maiorum Ascania Princeps longo ordine gentis

Ex veteri illustri stirpe create Ducum.

Ex quibus, imperio qui præsist, rite creando

Septem habuere unum secula priora virum.

Nemo

*Nemo tibi similis, nemo pietate secundus,
 Doctrina, ingenio, religione, fide.
 O Princeps, habuit quem desolata patronum
 Christicola fidum turba pusilla gregis.
 Cuius mens, fortuna, animus, ditio, bona, corpus,
 Sunt impensa sacro cuncta ministerio.
 Qui nunc heu patriae decedis tempore quali?
 Quando carere minus quæ tua posset ope?
 Quam tua sustinuit bonitas, sapientia, virtus,
 Et studii immensa sedulitate labor:
 Ne faceret sæpe inclinata Ecclesia lapsus,
 Neu premeret sanctam forte ruina fidem.
 Te venerati dilexere boni, optime Princeps,
 Te simul oderunt & timuere mali.
 His etenim opposuit se constantissima virtus
 Magni animi, & vigilans sollicitudo tui.
 Nec tibi vis nocuit nec fraus, ad utrumque parato,
 Mente opus intrepida siue sagace foret.
 Quo validum pectus? mare si quæ nauigat, omni
 Tempore tranquillas puppis haberet aquas.
 Qui vidit bellis nullum cessantibus hostem
 Miles, hic an dicet forte cor esse sibi?
 Crebra & sunt iniecta tibi, illustrissime Princeps,
 Te pressere grauis pondera dura mali.
 Illinc inimicitiis urgentibus, unde potentum
 Immeritum varia te petiere mine.
 Hinc inuidia te circumstante, maligna
 Rectis infesta consiliis que manus.
 Namque odium ut capiti, sic obtrepatio diras
 Insidias fama struxit iniqua tua.
 Nil refert. Vincit tandem post omnia verum,
 Et redit illustris nube cadente dies.*

PRINCIPIS ANHALTINI.

71

*At nostros eat in tanta caligine, tanquam
 Lucerna, ante, precor, vox tua, Christe, pedes.
 Principis incessus ut rexerat illa Georgii,
 Cœlestis monstrans cognitionis iter.
 O Princeps dilecte Deo, cuius merita extant
 In patriam inque alios maxima ubique, vale.
 Cum damno qui nos quantoque dolore relinquis?
 Dum miseris præsens subtrahis auxilium.
 Sancte vale Princeps. Te nunc Ecclesia luget,
 Et sibi morte gemit vulnera facta tua.
 Felix sorte tua & cunctis defuncte periclis,
 Aeternaque fruens prosperitate, vale.
 Idem cœlesti Princeps in sede locatus,
 Salve anima in Christi sancta recepta sinum.
 Salve iterum ætheria sine fine beatus in aula,
 Non magis humano subditus arbitrio.
 Consors æterna salve vite inclyte Princeps,
 Pars immortalis prima sodalitiū.
 O salve atque vale. Sed tu nos Principe tali
 Orbos, Christe; orbos ne tamen esse sinas.
 Atque aliquo, quem tu scis, præstantissime Pastor,
 Palantes pecudes ipse tuere, modo.*


f.

IOACHIMVS CAMERARIVS.



VA 1

1550936



2

23

148.

D.
54.

